

***Go Tlhatlhoba  
Dikwalo ka  
Malatsi Otlhe***

**2022**



es22-TN  
210813

# ***Go Tlhatlhoba Dikwalo ka Malatsi Otlhe***

## **2022**

**Temana ya Ngwaga**

**“Ba ba senkang Jehofa . . . ga ba kitla  
ba tlhoka sepe se se molemo.”**

**—Pesalema 34:10.**

**Kgatiso eno ga e rekisiwe. Ke karolo ya tiro e e dirwang mo lefatsheng lotlhe ya go ruta batho Baebele mme e tshegediwa ka meneelo e e ntshiwang ka go rata.**

**Fa o batla go ntsha moneelo, tsena mo [donate.jw.org](http://donate.jw.org).**

**Dinopolo tsa Dikwalo tse di mo kgatisong eno, di tswa mo *Baebeleng ya Thanolo ya Lefatshe le Lesha*, kwantle ga fa go supilwe ka tsela nngwe.**

*Go Tlhatlhoba Dikwalo ka Malatsi Otlhe—2022*

*Examining the Scriptures Daily—2022*

**E Gatisitswe ka August 2021**

**Setswana (es22-TN)**

**© 2021**

**WATCH TOWER BIBLE AND TRACT SOCIETY  
OF PENNSYLVANIA**

Bagatisi

PRINTED BY WATCH TOWER BIBLE AND TRACT SOCIETY OF SOUTH AFRICA NPC  
1 Robert Broom Drive East, Rangeview, Krugersdorp, 1739, R.S.A.

Made in the Republic of South Africa

# 2022

## JANUARY

M	L	L	L	L	M	S
					1	2
3	4	5	6	7	8	9
10	11	12	13	14	15	16
17	18	19	20	21	22	23
24	25	26	27	28	29	30
31						

## FEBRUARY

M	L	L	L	L	M	S
	1	2	3	4	5	6
7	8	9	10	11	12	13
14	15	16	17	18	19	20
21	22	23	24	25	26	27
28						

## MARCH

M	L	L	L	L	M	S
	1	2	3	4	5	6
7	8	9	10	11	12	13
14	15	16	17	18	19	20
21	22	23	24	25	26	27
28	29	30	31			

## APRIL

M	L	L	L	L	M	S
				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	

## MAY

M	L	L	L	L	M	S
						1
2	3	4	5	6	7	8
9	10	11	12	13	14	15
16	17	18	19	20	21	22
23	24	25	26	27	28	29
30	31					

## JUNE

M	L	L	L	L	M	S
		1	2	3	4	5
6	7	8	9	10	11	12
13	14	15	16	17	18	19
20	21	22	23	24	25	26
27	28	29	30			

## JULY

M	L	L	L	L	M	S
				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	31

## AUGUST

M	L	L	L	L	M	S
1	2	3	4	5	6	7
8	9	10	11	12	13	14
15	16	17	18	19	20	21
22	23	24	25	26	27	28
29	30	31				

## SEPTEMBER

M	L	L	L	L	M	S
				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	

## OCTOBER

M	L	L	L	L	M	S
				1	2	
3	4	5	6	7	8	9
10	11	12	13	14	15	16
17	18	19	20	21	22	23
24	25	26	27	28	29	30
31						

## NOVEMBER

M	L	L	L	L	M	S
	1	2	3	4	5	6
7	8	9	10	11	12	13
14	15	16	17	18	19	20
21	22	23	24	25	26	27
28	29	30				

## DECEMBER

M	L	L	L	L	M	S
				1	2	3
4	5	6	7	8	9	10
11	12	13	14	15	16	17
18	19	20	21	22	23	24
25	26	27	28	29	30	31

**BOTSHILO LE BODIREDI JWA RONA  
THULAGANYO YA MMALO WA BAEBELE YA 2022**

**January**

- 3 Baatlhodi 15-16
- 10 Baatlhodi 17-19
- 17 Baatlhodi 20-21
- 24 Ruthe 1-2
- 31 Ruthe 3-4

**February**

- 7 1 Samuele 1-2
- 14 1 Samuele 3-5
- 21 1 Samuele 6-8
- 28 1 Samuele 9-11

**March**

- 7 1 Samuele 12-13
- 14 1 Samuele 14-15
- 21 1 Samuele 16-17
- 28 1 Samuele 18-19

**April**

- 4 1 Samuele 20-22
- 11 Beke ya Segopotso
- 18 1 Samuele 23-24
- 25 1 Samuele 25-26

**May**

- 2 1 Samuele 27-29
- 9 1 Samuele 30-31
- 16 2 Samuele 1-3
- 23 2 Samuele 4-6
- 30 2 Samuele 7-8

**June**

- 6 2 Samuele 9-10
- 13 2 Samuele 11-12
- 20 2 Samuele 13-14
- 27 2 Samuele 15-17

## July

- 4 2 Samuele 18-19
- 11 2 Samuele 20-21
- 18 2 Samuele 22
- 25 2 Samuele 23-24

## August

- 1 1 Dikgosi 1-2
- 8 1 Dikgosi 3-4
- 15 1 Dikgosi 5-6
- 22 1 Dikgosi 7
- 29 1 Dikgosi 8

## September

- 5 1 Dikgosi 9-10
- 12 1 Dikgosi 11-12
- 19 1 Dikgosi 13-14
- 26 1 Dikgosi 15-16

## October

- 3 1 Dikgosi 17-18
- 10 1 Dikgosi 19-20
- 17 1 Dikgosi 21-22
- 24 2 Dikgosi 1-2
- 31 2 Dikgosi 3-4

## November

- 7 2 Dikgosi 5-6
- 14 2 Dikgosi 7-8
- 21 2 Dikgosi 9-10
- 28 2 Dikgosi 11-12

## December

- 5 2 Dikgosi 13-15
- 12 2 Dikgosi 16-17
- 19 2 Dikgosi 18-19
- 26 2 Dikgosi 20-21





## Matlhatso, January 1

*O itsile dikwalo tse di boitshupo go tloga fa o ne o le losea, tse di kgonang go go tlhalefisa gore o bolokwe ka go nna le tumelo mo go Keresete Jesu.—2 Tim. 3:15.*

Timotheo o ne a na le tumelo ka gone a dumela gore se a neng a ithutile sone mo dikwalong ke boammaaruri mme seo se ne sa dira gore a batle go nna tsala ya Modimo. Le wena o tshwanetse go tsaya matsapa go ithuta Baebele le go tlhomamisa gore se o se ithutang mo go yone ka Jehofa ke boammaaruri. Gore o kgone go tlhomamisega gore dilo tse o ithutileng tsone ka Jehofa mo Baebeleng di boammaaruri, o tshwanetse go tlhatswega pelo ka dilo tseno tse tharo. Sa ntlha, o tshwanetse go tlhatswega pelo gore Jehofa Modimo ke ene Mmopi wa dilo tsotlhe. (Ekes. 3:14, 15; Baheb. 3:4; Tshen. 4:11) Sa bobedi, o tshwanetse go itse mabaka a go bo o dumela gore Baebele ke buka e Jehofa a e kwaletseng batho. (2 Tim. 3:16, 17) Sa boraro, o tshwanetse go tlhomamisega gore Jehofa o na le setlhopha sa batho ba ba mo direlang ba kaelwa ke Keresete, le gore batho bao ke Basupi ba ga Jehofa. (Isa. 43:10-12; Joh. 14:6; Dit. 15:14) Ga o tlhoke go itse Baebele yotlhe ka tlhogo gore o dire dilo tseno tse tharo. O tshwanetse go dirisa 'maatla a gago a go akanya' gore o tlhomamisege gore se o se dumelang ke boammaaruri.—Bar. 12:1. *w20.07.10 ¶8-9*

## Sontaga, January 2

*Ditsie di ne tsa laelwa gore di se ka tsa ba bolaya, go na le moo, di ba utlwise botlhoko dikgwedi di le tlhano.—Tshen. 9:5.*

Mo boporofeting joo, Johane o bua ka tsie e e nang le difatlhego tsa batho mme "mo ditlhogong tsa yone go ne go na le se se neng se bonala e le dirwalo tse di tshwanang le gouta." (Tshen. 9:7) Tsie eno e tlhokofatsa "batho [baba ba Modimo] ba ba se nang lotshwao

lwa Modimo mo diphatleng tsa bone" dikgwedi di le tlhano. (Tshen. 9:4) Go bonala boporofeti jono bo bua ka tiro e e dirwang ke batlhanka ba ga Jehofa ba ba tloditsweng. Ba rera molaetsa wa Modimo wa katlholo ka bopelokgale mme batho ba lefatshe leno ga ba rate molaetsa wa bone. A ra re tsie e go buiwang ka yone mo go Joele 2:7-9, ga se tsie e go buiwang ka yone mo go Tshenolo? Ee. Ka dinako tse dingwe, Baebele e dirisa setshwantsho se le sengwe go tlhalosa dilo tse di sa tshwaneng gotlhelole. Ka sekai, mo go Tshenolo 5:5, Jesu o bidiwa 'Tau ya lotso lwa Juda,' mme mo go 1 Petere 5:8, Satane o bidiwa "tau e e kurutlang." *w20.04.3 ¶8; 5 ¶10*

## Mantaga, January 3

*Matlho a ga Jehofa a gongwe le gongwe, a lebeletse ba ba bosula le ba ba molemo.—Diane 15:3.*

Lelata la ga Sarai e bong Hagare ga a ka a itshwara sentle fa a sena go nna mosadi wa ga Aborame. Fa Hagare a sena go ima, o ne a simolola go nyatsa Sarai ka gonno o ne a se na bana. Maemo a ne a nna maswe thata janna mo e leng gore Sarai o ne a feleletsa a mo kobile. (Gen. 16:4-6) Re ka nna ra akanya gore Hagare o ne a le lenyatsa e bile Sarai o ne a mo dirile sentle. Mme gone, Jehofa ene o ne a sa akanye jalo. O ne a romela moengele kwa go ene. Moengele yoo o ne a thusa Hagare go baakanya tsela e a neng a akanya ka yone a bo a mmolelela gore Jehofa o tla ntsifatsa losika lwa gagwe. Hagare o ne a lemoga gore Jehofa o a mmona e bile o bona sengwe le sengwe se se mo diragalelang. O ne a itumetse thata janna mo a ne a re Jehofa ke 'Modimo wa pono, . . . ene yo a mmonang.' (Gen. 16:7-13) Jehofa o ne a bona eng mo go Hagare? O ne a itse dilo tsotlhe tse di ileng tsa mo diragalela mo botshelong. Ga se gore Jehofa o ne a dumalana le se Hagare a ileng a se dira, mme gone, o ne a itse gore o ne a ikutlwa jang. Ka jalo, o ile a mo utlwela botlhoko. *w20.04.16 ¶8-9*

## Labobedi, January 4

*Ke weditse lobelo go ya kwa bofelong.—2 Tim. 4:7.*

Moaposetoloi Paulo o ile a re Bakeresete botlhe ba boammaaruri ba mo lobelong. (Baheb. 12:1) Mme rotlhe, re ka tswa re godile kgotsa re le basha, re nonofile kgotsa re le boko, re tshwanetse go itshoka go fitlha kwa bokhutlong gore re kgone go gapa sekgele se Jehofa a re beetseng sone. (Math. 24:13) Paulo o ile a kgona go gakolola Bakeresete gore ba tswelile ba itshokile ka gonne o ile a kgona go “[taboga] lobelo go ya bofelong.” (2 Tim. 4:7, 8) Mme gone, lobelo lo Paulo a neng a bua ka lone ke eng? Ka dinako tse dingwe, Paulo o ne a dira dikai ka metshameko e e neng e tshamekiwa kwa Gerika wa bogologolo go ruta dithuto tsa botlhokwa. (1 Bakor. 9:25-27; 2 Tim. 2:5) Ka makgetlo a le mmalwa, o ile a tshwantsha go nna Mokeresete le go tsena mo lobelong. (1 Bakor. 9:24; Bagal. 2:2; Bafil. 2:16) Motho o tsena mo lobelong lono lwa botshelo fa a ineela mo go Jehofa a bo a kolobediwa. (1 Pet. 3:21) Mme o lo wetsa fa Jehofa a mo naya botshelo jo bo sa khutleng. —Math. 25:31-34, 46; 2 Tim. 4:8. *w20.04* 26 ¶1-3

## Laboraro, January 5

*Aparang diaparo tsa ntwa tse di feletseng tse di tswang kwa Modimong.—Baef. 6:13.*

“Morena o a ikanyega, e bile o tla lo nitamisa a bo a lo boloke mo go yo o boikepo.” (2 Bathes. 3:3) Jehofa o re sireletsa jang? Jehofa o re neile seaparo sa tlhabano se se ka re sireletsang fa Sata-ne a re tlhasela. (Baef. 6:13-17) Seaparo seno se Jehofa a re neileng sone se nonofile! Mme gone, gore seaparo seno se re sireletse, re tshwanetse go nna re dirisa karolo nngwe le nngwe ya sone, e bile re tshwanetse go nna re se apere. Ka sekai, lebante la boammaaruri le

emela boammaaruri jo bo tswang mo Lefokong la Modimong e leng Baebele. Goreng re tshwanetse go gatlha letheka la rona kgotsa go apara lebante leno? Ka gonne Satane ke “ramaaka.” (Joh. 8:44) O feditse dingwaga di le dintsi a bua maaka e bile o tsieditse batho botlhe mo lefatsheng! (Tshen. 12:9) Mme gone, boammaaruri jo bo mo Baebeleng bo re thusa gore a se ka a re tsietsa. Re ka bontsha jang gore re apere lebante leno? Ka go ithuta ka Jehofa, ka go mo obamela “ka moya le ka boammaaruri,” le ka go itshwara ka boikanyegi mo dilong tsotlhe.—Joh. 4:24; Baef. 4:25; Baheb. 13:18. *w21.03* 26-27 ¶3-5

## Labone, January 6

*Gape e tla tsena mo Lefatsheng la Mokgabiso.—Dan. 11:41, nthl.*

Se se neng se dira gore lefatshe la Iseraele le nne botlhokwa thata ke gore e ne e le lone fela lefelo le go neng go obamelwa Jehofa kwa go lone. Go tloga ka Pentekosete ya 33 C.E, ‘lefatshe la Mokgabiso’ e ne e sa tlhole e le lefelo la mmatota. Seno se a utlwala ka gonne batho ba ga Jehofa ba kgona go mo obamela gongwe le gongwe kwa ba leng gone. Mme gompieno ‘lefatshe la Mokgabiso’ ke dilo tse batho ba ga Jehofa ba di dirang e le go mo obamela tse di akaretsang go ya dipokanong le go ya bodireding. Mo metlheng ya bofelo kgosi ya bokone e ile ya tsena makgetho a le mantsi mo “lefatsheng la Mokgabiso.” Ka sekai, fa Jeremane e ne e le kgosi ya bokone e ne ya tsena mo “lefatsheng la Mokgabiso” ka go bogisa le go bolaya batho ba Modimo. Seo se ile sa diragala ka nako ya Ntwa ya Lefatshe ya Bobedi. Morago ga Ntwa ya Lefatshe ya Bobedi fa Soviet Union e ne e le kgosi ya bokone, e ne ya tsena mo “lefatsheng la Mokgabiso” ka go bogisa batho ba Modimo le go dira gore ba tshabe mo ma-gaeng a bone. *w20.05* 13 ¶7-8

## Labotlhano, January 7

*Jehofa o tsalana le ba ba mmoi-fang, e bile o ba itsise kgolagano ya gagwe.—Pes. 25:14.*

Akanya ka banna ba ba ileng ba nna ditsala tsa Modimo pele Jesu a tla go tshela mo lefatsheng. Aborahame o ne a na le tumelo e e nonofileng. Morago ga dingwaga di feta 1 000 fa Aborahame a sena go swa, Jehofa o ne a mmitisa 'tsala ya gagwe.' (Isa. 41:8) Seno se raya gore le fa batho ba sena go swa, Jehofa o sa ntse a ba tsaya e le ditsala tsa gagwe. Mo go Jehofa, Aborahame o sa ntse a tshela. (Luke 20:37, 38) Sekai se sengwe ke sa ga Jobe. Fa baengele ba ne ba phuthegile mmogo kwa legodimong, Jehofa o ile a bua a le motlotlo ka Jobe. Jehofa o ne a mmitisa "monna yo o se nang molato e bile a thokgame, a tshaba Modimo e bile a fapoga bosula." (Jobe 1: 6-8) Mme Jehofa o ne a ikutlwa jang ka monna mongwe yo o bidiwang Daniele, yo o ileng a fetsa dingwaga di le 80 a direla Jehofa le fa a ne a nna le batho ba ba sa mo direleng? Moengele o ile a bolelela Daniele makgetlo a le mararo gore 'o a ratega' mo Modimong. (Dan. 9: 23; 10:11, 19) Re tlhomamisegile gore ele-ruri Jehofa o batla go tsosa ditsala tsa gagwe tse di tlhokafetseng.—Jobe 14:15. w20.05 26-27 ¶3-4

## Matihatso, January 8

*Nthute melao ya gago.  
—Pes. 119:68.*

Motho a ka ithuta melao ya Modimo a bo a e rata. Mme gone a o tla ikobela melao eo ka gonne a rata Jehofa? Se lebele gore Adame le Efa le bone ba ne ba itse melao ya Modimo mme ba ne ba sa mo rate. (Gen. 3:1-6) Ka jalo, ga re a tshwanela go ruta batho melao ya Modimo fela, gape re tshwanetse go ba ruta go mo rata. Melao ya Modimo e a kgaltha ka gonne ka metlha e re solegela molemo. (Pes. 119:97, 111, 112) Mme batho ba re ithutang le bone Baebele ba ka nna ba se ka ba lemoga seo ka go-

nne ba sa tlhaloganye gore Modimo o re neile melao eo ka gonne a re rata. Ka jalo, re ka botsa motho yo re ithutang Baebele le ene gore: "O akanya gore goreng Modimo a letla gore re dire dilo dingwe mme a sa batle gore re dire dilo tse dingwe? Seo se go ruta eng ka Ene?" Fa re thusa batho ba re ithutang le bone go akanya ka Jehofa le go mo rata re tla kgona go ama dipelo tsa bone. Fa re dira jalo, ga ba kitla ba rata fela melao ya ga Jehofa mme le ene ba tla mo rata. Tumelo ya bone e tla nonofa mme ba tla kgona go itshokela diteko tse ba tla kopanang le tsone.—1 Bakor. 3:12-15. w20.06 10 ¶10-11

## Sontaga, January 9

*Nna bonako go utlwa, bonywa go bua.—Jak. 1:19.*

Re tlhoka go nna pelotelele ka gone go tsaya nako gore motho a boele kwa go Jehofa. Bakaulengwe ba le bantsi ba ba neng ba tsidifetse, ba re ba ile ba boa ba direla Jehofa gape fa bago-lwane le bakaulengwe mo phuthegong ba sena go ba etela makgetlo a le mantsi. Kgaisadi mongwe yo o bidiwang Nancy wa kwa Asia o ne a re: "Tsala ya me e ile ya nthusa fela thata. Re ne re ratana fela jaaka bana ba motho. O ne a nkgopotsa dilo dingwe tse di monate tse re neng re di dira mmogo. O ne a nthetsa fa ke ne ke mmolelela gore ke ikutlwa jang, go tswa foo a bo a mpha kgakololo. E ne e le tsala ya nnete." Re ka tshwantsha kutlwelobothoko le molemo o o o tshasang fa o na le ntho. Fa re utlwela ba bangwe botlhoko re ka kgona go ba thusa gore ba ikutlwe botoka. Bangwe ba ba tsidifetseng ba kile ba utlwi-siwa botlhoko ke mongwe mo phuthegong, ka jalo, ba sa ntse ba galefile e bile ba utlwile botlhoko mme ka ntliha ya seo go thata gore ba boele kwa go Jehofa. Ba ka tswa ba akanya gore ga ba a ka ba tshwarwa sentle, ka jalo, ba tlhoka motho yo o ka ba reetsang le yo o ka ba tlhaloganyang. w20.06 26 ¶10-11

## Mantaga, January 10

*Lo fentse Satane.—1 Joh. 2:14.*

Nako le nako fa o sa ineela fa batho ba leka go go gatelela go dira dilo tse di sa siamang, o tla kgona go dira dilo tse di siamang mo nakong e e tlang le fa go ka nna thata go dira jalo. O se ka wa le-bala gore tsela e lefatshe leno le lebang tlhakanelodikobo ka yone, e tswa kwa go Satane. Ka jalo, fa o gana go leba dilo ka tsela e batho ba lefatshe ba di lebang ka yone, o a bo o 'fentya yo o boikepo.' Re a itse gore Jehofa ke ene a nang le tshwanelo ya go re bolelela gore ke eng se se sa siamang. Mme re dira sotlhe se re ka se kgonang gore re se ka ra dira dilo tse di sa siamang. Mme fa re dirile boleo re a rapela re bo re bolelela Jehofa se re se dirileng. (1 Joh 1:9) Mme fa re dirile boleo jo bo masisi, re kopa thuso kwa bagolwaneng. (Jak. 5:14-16) Mme gone, ga re a tshwanela go ikutlwa mola-to ka diphoso tse re kileng ra di dira. Goreng? Ka gone Jehofa o re rekolotse ka setlhabelo sa Morwawe gore a kgone go re itshwarella. Jehofa o a bo a sa ake fa a re o tla re itshwarella fa re ikwatlhaya go tswa pelong. Ka jalo, Jehofa o dirile gore re kgone go mo direla re na le segakolodi se se phepa.—1 Joh. 2:1, 2, 12; 3:19, 20. *w*20.07 22-23 ¶9-10

## Labobedi, January 11

*Mo go wena go na le motswedi wa botshelo.—Pes. 36:9.*

Nako nngwe Jehofa o ne a le nosi. Mme o ne a sa jewa ke bodutu. O ne a sa tlhoke go nna le mongwe gore a itumele. Mme gone, o ne a batla gore ba bangwe le bone ba tshele e bile ba itumele. Lora-to lo ile lwa tlhotlheletsa Jehofa gore a simolole go bopa. (1 Joh. 4:19) Sa ntlha Jehofa o ile a bopa Morwawe e bong Jesu. Morago ga moo, o ile a dira le Morwawe go bopa "dilo tsotlhe tse dingwe" go akaretsa le batho. (Bakol. 1:16) Jesu o ne a itumelela go bereka le Rraagwe.

(Dia. 8:30) Baengele le bone ba ne ba itumetse. E ne e kete ba ntse kwa ditulong tse di kwa pele ba lebeletse Jehofa le Modiri wa gagwe yo o Setswerere e bong Jesu ba bopa legodimo le lefatshe. Baengele ba ne ba dira eng? Ba ne ba "simolola go goa ba baka" fa Jehofa a bopa lefatshe mme ba ne ba tswela ba mmaka fa a ntse a bopa dilo tse dingwe tsotlhe go akaretsa le batho. (Jobe 38:7; Dia. 8:31) Dilo tseno tsotlhe tse Jehofa a di bopileng di bontsha gore o lorato le gore o botlhale.—Pes. 104:24; Bar. 1:20. *w*20.08 14 ¶1-2

## Laboraro, January 12

*Ditšhaba tsotlhe di tla lo tlhoa ka gone lo le balatedi ba me.*  
—*Math. 24:9.*

Jhofa o re bopile re na le keletso ya go rata ba bangwe le go batla go ratiwa. Ka jalo, fa mongwe a re tlhoile, re utlwa botlhoko mme ka dinako dingwe seo se a re tshosa. Mokaulengwe mongwe a re: "Masole a ne a mpetsa, a ntlhapatsa a bo a ntshosetsa ka gore a tiile go ntira sengwe se se botlhoko. Ba ne ba ntira dilo tseno fela ka gone ke le Mosupi wa ga Jehofa. Ke ne ke tshogile e bile ke tlhakilwe ke ditlhong." Re utlwa botlhoko fa batho ba re tlhoile. Mme gone, ga re makale ka gone Jesu o ile a bolelela pele gore batho ba tiile go re tlhoa. Goreng batho ba tlhoile balatedi ba ga Jesu? Ka gone fela jaaka Jesu, ga re "karolo ya lefatshe." (Joh. 15:17-19) Le fa gone re tlotla babusi, ga re ba obamele kgotsa ga re obamele dilo dipe fela tse di amanang le bone. Re obamela Jehofa fela. Re tshegetsatsa bolaodi jwa ga Jehofa, mme gone Satane le batho ba gagwe ba kgalhanong le jone. (Gen. 3:1-5, 15) Re bolelela batho gore Bogosi Jwa Modimo ke jone fela bo tla kgonang go rarabolola mathata a batho, le gore go ise go ye kae, bo tla fedisa batho botlhe ba ba leng kgalhanong le jone. (Dan. 2:44; Tshen. 19:19-21) Molaetsa oo o itumedi-

sa batho ba ba siameng mme batho ba ba sa siamang bone, ba o tilhoile. *w21.03* 20 ¶1-2

## Labone, January 13

*Re a itse gore re ba Modimo.*

—1 Joh. 5:19.

Jehofa o tlotla bokgaisadi botlhe ka go ba naya tiro ya botlhokwa mo phuthegong. Ba tlhoma sekao se sentle ka gonne ba le botlhale, ba na le tumelo, ba dira ka natla, ba le pelokgale, ba rata go aba e bile ba dira ditiro tse dintsi tse di molemo. (Luke 8:2, 3; Dit. 16:14, 15; Bar. 16:3, 6; Bafil. 4:3; Baheb. 11:11, 31, 35) Mo phuthegong ya ga Jehofa, go na le bagodi ba le bantsi. Fa bagodi bano ba ntse ba tsofala, ba nna le mathata a botsogo. Mme gone, bagodi bano ba dira sotlhe se ba ka se kgonang mo bodireding e bile ba kgothatsa ba bangwe le go ba katisa! Maitemogelo a bone a re thusa fela thata. Jehofa o ba tsaya ba le botlhokwa mme le rona re a ba rata. (Dia. 16:31) Akanya ka basha ba re nang le bone mo phuthegong. Ba lebana le dikgwetlho tse dintsi ka gonne ba tshela mo lefatsheng le le laolwang ke Satane e bile ba tshela le batho ba dikakanyo tsa bone le ditiro tsa bone di laolwang ke Satane. Mme re a itumela fa re bona basha bano ba arabela kwa dipokanong, ba ya bodireding e bile re utlwa gore ba emela tumelo ya bone. Lona basha, lo botlhokwa mo phuthegong ya ga Jehofa!—Pes. 8:2. *w20.08* 21-22 ¶9-11

## Labotlhano, January 14

*Ke lo roma jaaka dinku mo gare ga diphiri.—Math. 10:16.*

Re ka nna ra kopana le mathata fa re simolola go rera dikgang tse di molemo e bile batho ba ka nna ba gana go reetsa molaetsa wa rona. Ke eng se se ka go thusang go nna pelokgale? Sa ntlha, o tshwanetse go tlhatswega pelo gore Jesu Keresete ke ene a kaelang tiro eno ya go rera a le kwa legodimong. (Joh.

16:33; Tshen. 14:14-16) Gape o tshwanetse go tlhatswega pelo gore Jehofa o tla go tlhokomela. (Math. 6:32-34) Seno se tla nonotsha tumelo ya gago, e bile o tla nna pelokgale le go feta. O ile wa bontsha gore o na le tumelo, fa o ne o bo-lelela ba losika le ditsala gore o ithuta Baebele le Basupi ba ga Jehofa le gore o ya dipokanong! Ga go pelaelo gore o dirile diphetogo di le dintsi mo botshe-long jwa gago, gore o kgone go tshela ka melao ya ga Jehofa. O ile wa kgona go dira jalo ka gonne o le pelokgale e bile o na le tumelo. Fa o ntse o leka ka natla gore o nne pelokgale le go feta, itse gore “Jehofa Modimo wa gago o na le wena gongwe le gongwe kwa o yang gone.”—Jos. 1:7-9. *w20.09* 5 ¶11-12

## Matlhatso, January 15

*Jehofa o ne a mo neile boikhutso.*

—2 Ditir. 14:6.

Kgosi Asa o ile a bontsha gore o botlhale ka gonne o ne a ikaegile ka Jehofa. O ne a direla Jehofa fa go ne go le monate le fa dilo di ne di sa mo tsamaele sentle. Asa o ne a direla Jehofa ka pelo ya gagwe yotlhe go tloga fela a sa ntse a le moshana. (1 Dikg. 15:14) O ile a bontsha gore o ne a ineetse mo go Jehofa ka pelo yotlhe fa a ne a fedisa kobamelo ya medingwana kwa Juda. Baebele ya re o ne a tlosa “dibeso tsa seeng le mafelo a a kwa godimo a ba a thuba dipilara tse di boitshepo a ba a rema dikota tse di boitshepo.” (2 Ditir. 14:3, 5) Gape o ne a tlosa mmemogolo-gwe e bong Maaka mo maemong a gagwe a segosi. Ka ntlha yang? Ka gonne o ne a dira gore batho ba le bantsi ba obamele medingwana. (1 Dikg. 15:11-13) Asa ga a ka a senya medingwana fela. Gape o ne a thusa batho ba Juda gore ba boe ba obamele Jehofa gape. Jehofa o ne a segofatsa Asa le Bajuda ka go dira gore go nne le kagiso mo lefatsheng la bone. Go ne ga feta dingwaga di le lesome ‘lefatshe le se na matshwenyego.’—2 Ditir. 14:1, 4, 6. *w20.09* 14 ¶2-3

## Sontaga, January 16

*Timotheo, o tlhokomele se o se neilweng.—1 Tim. 6:20.*

Go le gantsi, re naya batho dilo tsa rona tse di tlhwatlhwakgolo gore ba di re tlhokomelele. Ka sekai, re isa madi a rona kwa baneke. Re dira jalo ka gonne re tshepa gore ga a kitla a utswiwa kgotsa a latlhega. Moaposetoloi Paulo o ile a gopotsa Timotheo gore o neilwe sengwe se se tlhwatlhwakgolo. Timotheo o ne a itse boammaaruri ka Modimo le boikaelelo jwa Modimo ka batho. Gape o ne a neilwe tshiamelo ya go “rera lefoko” le go “dira tiro ya moefangele.” (2 Tim. 4:2, 5) Paulo o ile a kgothaletsa Timotheo gore a sireletse se a neng a se neilwe. Le rona re neilwe dilo tse di tlhwatlhwakgolo fela jaaka Timotheo. Jehofa o re neile tshiamelo ya go itse boammaaruri jo bo mo Baebeleng. Boammaaruri joo bo botlhokwa ka gonne bo re ruta gore re tshwanetse go dira eng gore re nne ditsala tsa ga Jehofa, e bile bo re ruta gore ke eng se se ka dirang gore re itumele mo botshelong. Fa re dumela se re se ithutang mo Baebeleng, ga re kitla re tsiediwa ke dithuto tsa maaka, e bile re tla kgona go tshela ka tsela e e itumedisang Modimo.—1 Bakor. 6:9-11. *w20.09 26 ¶1-3*

## Mantaga, January 17

*Molaetsa wa rona o lo thusitse fela thata.—1 Bathes. 1:5.*

Motho yo o ithutang le ene o tshwanetse go bona gore o dumela se o se rutang e bile o a se rata. Seo se ka nna sa dira gore le ene a dumele dilo tse a di ithutang. Gongwe o ka nna wa mmolelela gore wena Baebele e go thusitse jang. Seno se ka mo thusa go lemoga gore le ene Baebele e ka mo thusa. Bolelela motho yo o ithutang le ene ka bakaulengwe le bokgaityadi ba ba ileng ba lebana le mathata a a tshwanang le a gagwe ba bo ba kgona go feta mo go one. Fa o ya

kwa go ene, o ka nna wa tsamaya le mokaulengwe kgotsa kgaityadi yo a ka kgonang go mo thusa ka bothata bongwe jo a nang le jone. Mo thusa go bona gore Baebele e ka fetola botshelo jwa gagwe. Fa e le gore motho yo o ithutang le ene o mo lenyalong, a monna kgotsa mosadi wa gagwe le ene o a ithuta? Fa go sa nna jalo, o ka nna wa mo kopa gore a nne gone fa lo ithuta. Kgothaletsa motho yo o ithutang le ene gore a tlotlele ba lelapa la gagwe le ditsala tsa gagwe dilo tse a di ithutang.—Joh. 1:40-45. *w20.10 16 ¶7-9*

## Labobedi, January 18

*O tshwanetse go a jalela kwa teng mo go bomorwao.—Dute. 6:7.*

Josefa le Marea ba ile ba kgona go thusa Jesu gore e nne motho yo Jehofa a mo ratang ka gonne ba ne ba ikobela molao o Jehofa a neng a o neile batsadi. (Dute. 6:6, 7) Josefa le Marea ba ne ba rata Jehofa fela thata mme selo sa botlhokwa mo go bone e ne e le go thusa bana ba bone gore le bone ba rate Jehofa. Josefa le Marea ba ile ba dira tshwetso ya go obamela Jehofa ka metlha le bana ba bone. Ba ne ba ya kwa sinagong e e neng e le kwa Nasaretha beke le beke e bile ngwaga le ngwaga ba ne ba ya go keteka Tlolaganyo kwa Jerusalem. (Luke 2:41; 4:16) Gongwe fa ba ne ba le mo tseleng ba ya kwa Jerusalem, ba ne ba tilhola ba ruta Jesu le bomonawe ka se se ileng sa diragalela batho ba ga Jehofa mo nakong e e fetileng. Gape ba ka tswa ba ne ba dirisa nako eo go etela mafelo mangwe a go buiwang ka one mo Dikwalong. Gongwe fa bana ba ga Josefa le Marea ba ntse ba oketsega, go ile ga nna thata gore ba tsewelele ba dira dilo tseno. Mme Jehofa o ile a ba segofatsa ka gonne ba ne ba tsaya matsapa. E re ka selo sa botlhokwa thata mo go bone e ne e le go obamela Jehofa, botlhe mo lelapeng ba ne ba tsewelela ba ikanyega mo go Jehofa. *w20.10 28 ¶8-9*

## Laboraro, January 19

*Esera o ne a baakantse pelo ya gagwe gore o tla ithuta Molao wa ga Jehofa . . . le gore o tla ruta melawana . . . [ya] one.—Esera 7:10.*

Fa mongwe a go laleditse gore o tsamaye le ene kwa thutong ya gagwe, go ka nna molemo gore o baakanyetse kgaolo e ba tla e balang. Mmulatsela mongwe yo o kgethegileng e bong Dorin a re: “Ke a itumela fa motho yo ke tsamayang le ene a baakanyeditse. Seno se tla mo thusa gore a ntshe dintlha tsa botlhokwa.” Mme fa moithuti a lemoga gore lo baakanyeditse, seo se tla mo tlhomela sekao se se molemo. Le fa gone o sa kgona go baakanyetsa sentle, gongwe o ka ipha nako ya go lebelela dintlha tsa botlhokwa. Thapelo e botlhokwa thata fa go tshwerwe thuto ya Baebele. Ka jalo, akanya ka se o tllileng go se bua fa motho yo o tshwarang thuto a go kopa gore o rapele. Seo se tla go thusa gore o itse gore o rapelele eng. (Pes. 141:2) Hanae yo o nnang kwa Japan e a re o gopola thapelo ya kgaitisadi yo a neng a tsamaya le motho yo a neng a mo tshwarela thuto. A re: “Ke ne ka lemoga gore kgaitisadi yoo ke tsala e kgolo ya ga Jehofa mme ke ne ke batla go tshwana le ene. Gape ke ne ka lemoga gore o a nthata fa a ne a umaka leina la me mo thapelong.” *w21.03* 9-10 ¶7-8

## Labone, January 20

*Nna pelokgale! . . . O tshwanetse go ya go tlhalosetsa batho le kwa Roma.—Dit. 23:11.*

Jesu o ile a bolelela Paulo gore o tla fitlha kwa Roma. Le fa go ntse jalo, Bajuda bangwe ba kwa Jerusalema ba ile ba loga leano la go tlhasela Paulo le go mmolaya. Fa molaodi wa masole a Roma e bong Kalaudio Lisiase a utlwa ka leano leo, o ile a thusa Paulo. Kalaudio o ile a laela masole gore a sireletse Paulo a bo a mo isa kwa Kaesarea. Fa a fitlha koo, Molaodi Felise o ile a laela gore Paulo ‘a disediwe mo ntlong ya segosi ya mmusi-

mogolo ya ga Herode.’ Ka jalo, Bajuda ba ba neng ba batla go mmolaya ba ne ba ka se kgone go dira jalo. (Dit. 23:12-35) Ka nako eo, Felise o ne a sa tlhole a busa mme go ne go busa Feseto. E re ka Feseto a ne a ne a batla “go amogelwa ke Bajuda,” o ile a botsa Paulo a re: “A o eletsa go tlhatlogela kwa Jerusalema le go athlolelwa gone fa pele ga me ka ga dilo tseno?” Paulo o ne a itse gore fa a ne a ka ya kwa Jerusalema, Bajuda ba ne ba ka nna ba mmolaya. Ka jalo, o ile a re: “Ke ikuela kwa go Kaesara!” Feseto o ile a mo raya a re: “O ikuetse kwa go Kaesara; o tla ya kwa go Kaesara.” Paulo o ne a tllile go ya kwa Roma, kgakala le Bajuda ba ba neng ba batla go mmolaya. —Dit. 25:6-12. *w20.11* 13 ¶4; 14 ¶8-10

## Labotlhano, January 21

*Dipelo tsa rona di ka re bona molato.—1 Joh. 3:20.*

Rotlhe re a tle re ikutlwe molato. Ka sekai, bangwe ba ikutlwa molato ka ntlha ya dilo tse ba ileng ba di dira pele ba ithuta boammaaruri. Ba bangwe ba ikutlwa molato ka ntlha ya dilo tse ba ileng ba di dira ba fa sena go kolobediwa. (Bar. 3:23) Re batla go dira se se siameng. Mme gone, “rotlhe re kgotšwa makgetlo a le mantsi.” (Jak. 3:2; Bar. 7:21-23) Le fa gone go se monate go ikutlwa molato, ka dinako dingwe go ka re thusa. Goreng re re jalo? Ka gonne, go ikutlwa molato go ka dira gore re fetole tsela e re tshelang ka yone go bo go dira gore re ikemisetsa gore ga re kitla re boeletsa phoso e re e dirileng. (Baheb. 12:12, 13) Ka dinako dingwe re ka nna ra ikutlwa molato ka tsela e e feteletseng mme gone, re ka dira jalo le fa Jehofa a setse a re itshwaretse. Go ikutlwa jalo go ka nna kotsi. (Pes. 31:10; 38:3, 4) Go botlhokwa gore re se ka ra nnele go ikutlwa molato ka tsela e e feteletseng. Goreng? Ka gonne Satane a ka itumela tota fa re ka tlogela go direla Jehofa, le fa gone Jehofa a setse a re itshwaretse!—Bapisa 2 Bakorintha 2:5-7, 11. *w20.11* 27 ¶12-13

## Matlhatso, January 22

*Eleruri ke ga lefela go bo ke itshekisitse pelo ya me le go bo ke tlhapiile diatla tsa me gore ke se ka ka nna le molato.—Pes. 73:13.*

Mopesalema wa Molefi o ile a simolola go fufegela batho ba ba dirang dilo tse di bosula, e se ka gonne le ene o ne a batla go di dira mme e le ka gonne a ne a bona e kete batho bao ba tshela monate go mo gaisa. (Pes. 73:2-9, 11-14) Go ne go lebege e kete ba humile, ba tshela monate e bile ga ba na matshwenyego. Molefi o ne a tshwanetse go leba dilo ka tsela e Jehofa a neng a di leba ka yone gore a se ka a kgobega marapo le gore a se ka a fufegela batho ba ba boikepo. Fa a sena go dira jalo o ile a itumela. O ile a re: “Kwantle ga [Jehofa] ga ke na sepe se sengwe se se natefelelang mo lefatsheng.” (Pes. 73:25) Le rona ga re a tshwanela go fufegela batho ba ba bosula ba go lebegang e kete ba tshela monate. Boitumelo jwa bone ke jwa nakwana. (Mor. 8:12, 13) Fa re ba fufegela, re tla feleletsa re kgobegile marapo e bile re sa tlhole re le ditsala tsa ga Jehofa. Ka jalo, fa le wena o ka ikutlwa o fufegela batho ba ba bosula fela jaaka Molefi, dira se a ileng a se dira. Ikobele Jehofa mme o tsalane le batho ba ba dirang thato ya gagwe. Fa o rata Jehofa go feta dilo tse dingwe tsotlhe, o tla itumela. Mme o tla tswelela o le mo tseleng e e isang kwa ‘botshelong jwa mmatota.’—1 Tim. 6:19. *w20.12 19 ¶14-16*

## Sontaga, January 23

*Fa re batla go rapela mme re sa itse gore re rapelele eng, moya . . . o kgona go re rapelela fa re hutsafetse re sa itse mafoko a re ka a buang.—Bar. 8:26.*

Fa o bolelela Jehofa mathata a gago, o se ka wa lebala go mo leboga. Le fa re na le mathata, go botlhokwa gore re akanye ka dilo tse di molemo tse re nang le tsone. Mme o tshwanetse go dira eng fa o sa itse gore o bolelele Jehofa mathata

a gago jang? Gopola gore Jehofa a ka kgona go araba dithapelo tsa gago, le fa selo se le sengwe fela se o kgonang go se bua ka nako eo e le: ‘Ke kopa gore o nthuse.’ (2 Ditir. 18:31) Ikaege ka Jehofa e seng ka botlhale jwa gago. Ka motlha wa ga moprofeti Isaia, Bajuda ba ne ba tshogile gore ba tiile go tlhaselwa ke Baasiria. Ba ne ba sa batle go fennngwa, ka jalo, ba ne ba kopa gore Baagepeto ba ba thuse. (Isa. 30:1, 2) Jehofa o ne a ba bolela gore ba ne ba tiile go ipakela mathata fa ba ka ikanya Baagepeto. (Isa. 30:7, 12, 13) Jehofa o ile a dirisa Isaia go ba bolelela gore ba ka dira eng gore ba bone tshireletsego ya mmatota. Isaia o ile ba raya a re: “Maatla a lona a tla tlišiwa fela ke go nna lo sa tshwe-nyege le go ikanya” Jehofa.—Isa. 30:15b. *w21.01 3-4 ¶8-9*

## Mantaga, January 24

*Ke ne ka utlwa palo ya ba ba neng ba tshwailwe, e le 144 000.  
—Tshen. 7:4.*

Jehofa o tiile go duela batlodiwa ka go bo ba ile ba ikanyega, ka go ba tlhoma gore e nne dikgosi le baperesiti kwa legodimong. (Tshen. 20:6) Jehofa, Jesu le baengele ba tiile go itumela tota fa ba bona Bakeresete ba ba tloditsweng ba ba 144 000 ba newa tuelo ya bone ya kwa legodimong. Fa moaposetoloi Johane a sena go bua ka dikgosi le baperesiti ba ba 144 000, o bona sengwe gape se se kgatlang. O bona “boidiidi jo bogolo” jo bo sa tswang go falola Haramagedona. Ditlhophatse tse pedi di farologane ka pallo ya “boidiidi jo bogolo” ba feta palo ya 144 000 e bile ga re itse gore fa ba feletse ba tla bo ba le bakae. (Tshen. 7:9, 10) Johane o ba bona ba “apere diaparotse di telele tse ditshweu,” seno se bontsha gore ga ba a ka ba itetla go kgotlelwa ke lefatshela ga Satane e bile ba ntse ba ikanyega mo go Jehofa le mo go Jesu. (Jak. 1:27) Mme ba goa ka boitumelo ka gonne ba bolokilwe ka ntlha ya se Jehofa le Jesu ba se dirileng. Gape ba tshwere dikala



tša mokolane go bontsha gore ba amogela Jesu yo o tlhophilweng ke Jehofa go nna Kgosi.—Bapisa Johane 12:12, 13. *w21.01* 15-16 ¶16-7

## Labobedi, January 25

*Boikokobetso jwa gago bo dira gore ke nne mogolo.—2 Sam. 22:36.*

Monna a ka nna tlhogo e e molemo fa a etsa tšela e Jehofa le Jesu ba dirisang taolo ya bone ka yone. Ka sekai, akanya ka nonofo ya boikokobetso. Jehofa o botlhale go gaisa batho botlhe mme gone, o reetsa dikakantsho tša batlhanka ba gagwe. (Gen. 18:23, 24, 32) Jehofa ga a dire diphoso mme gone, ga a lebelela gore le rona re se ka ra dira diphoso. Go na le moo, o thusa batho ba ba nang le bolelo, ba ba mo direlang gore ba kgone go atlega. (Pes. 113:6, 7) Tota e bile, Baebele e tlhalosa Jehofa e le “mothusi.” (Pes. 27:9; Baheb. 13:6) Kgosi Dafide o ile a tlhalosa gore o ne a kgona go dira dilo di le dintsi ka gonne Jehofa a le boikokobetso e bile a mo thusa. Akanya ka se Jesu a ileng a se dira. Le fa e ne e le Morena wa barutwa ba gagwe, o ile a ba tlhapisa dinao. Jesu o ile a re: “Ke lo tlhometse sekao, gore, fela jaaka ke ne ka dira mo go lona, le lona lo tshwanetse lwa dira jalo.” (Joh. 13:12-17) Le fa Jesu a ne a na le taolo, o ne a sa lebelela gore batho ba mo direle. Go na le moo, o ile a direla ba bangwe.—Math. 20:28. *w21.02* 3-4 ¶8-10

## Laboraro, January 26

*Kgalalelo ya makawana ke nonofo ya bone.—Diane 20:29.*

Bakaulengwe ba basha, go na le dilo di le dintsi tse lo ka kgonang go di dira mo phuthegong. Bontsi jwa lona lo na le maatla e bile lo sa ntse lo le matlhaga-tlhaga. Go na le dilo di le dintsi tse lo di dirang go thusa bakaulengwe le bokgaitšadi mo phuthegong ya lona. Gongwe e bile lo ka rata go nna batlhanka ba bodiredi mo nakong e e tlang. Mme gone, lo ka nna lwa ikutlwa e kete ba bangwe ba

akanya gore lo sa ntse lo le bannye kgo-tša ga lo ise lo siamele go newa kabelo eo. Le fa gone lo sa ntse lo le bannye, go na le dilo dingwe tse lo ka di dirang gore ba bangwe mo phuthegong ba lo tlotle e bile ba lo tshepe. Bakaulengwe ba basha, a lo na le bokgoni bongwe jo lo ka bo dirisang go thusa ba bangwe mo phuthegong? Bontsi jwa lona lo na le jone. Ka sekai, bagodi ba itumela tota fa basha ba ba thusa go dirisa didirisiwa tša bone tša thekenoloji gore ba kgone go ithuta ba le nosi le go baakanyetsa dipokano. Lo ka kgona go ba thusa ka gonne lo itse dilo tša thekenoloji. Mo go sengwe le sengwe se lo se dirang, dirang gore Rre wa lona yo o kwa legodimong a nne motlotlo ka lona. *w21.03* 2 ¶1, 3; 7 ¶18

## Labone, January 27

*Mongwe le mongwe o tla rwala morwalo wa gagwe.—Bagal. 6:5.*

Le fa gone mosadi a tlhaloganya Baebele botoka, monna o sa ntse a na le boikarabelo jwa go thusa ba lelapa la gagwe gore ba obamele Jehofa. Ka sekai, o tshwanetse go rulaganya gore go nne le kobamelo ya lelapa. (Baef. 6:4) Mosadi o tshwanetse go ikobela monna wa gagwe. Mme gone, mosadi o na le maikarabelo a gore a nonotshe tumelo ya gagwe mo go Jehofa. Ka jalo, o tshwanetse go ipha nako ya go ithuta le go akanyetsa kwa teng ka se a se badileng. Seo se tla mo thusa gore a tswelele a rata le go tlotla Jehofa le go itumelela go ikobela monna wa gagwe. Basadi ba ba ikobelang banna ba bone ka gonne ba rata Jehofa ba tlile go itumela. Mme basadi ba ba ganang go ikobela thulaganyo ya ga Jehofa ya botlhogo bone, ga ba kitla ba itumela. Gape fa basadi ba ikobela banna ba bone, ba tlhomela basha ba ba iseng ba tsene mo lenyalong sekao se se molemo. E bile ba dira gore go nne le kagiso mo malapeng a bone le mo phuthegong. (Tito 2:3-5) Gompieno, go na le basadi ba le bantsi ba ba obamelang Jehofa.—Pes. 68:11. *w21.02* 13 ¶21-23

## **Labotlhamo, January 28**

*Atamelang Modimo, mme o tla lo atamela.—Jak. 4:8.*

Moaposetoloi Paulo o re tlhometse sekao se se molemo sa go nna pelokgale go nna le boitshoko. Ka dina-ko dingwe o ne a kgobega marapo. Mme gone, o ile a kgona go itshoka ka gonne o ne a ikaegile ka Jehofa gore a mo neye maatla a a neng a a tlhoka. (2 Bakor. 12:8-10; Bafil. 4:13) Le rona re ka kgona go nna le maatla le bopelokgale jo bo tshwanang le jwa ga Paulo, fa re le boikokobetso e bile re lemoga gore re tlhoka thuso ya ga Jehofa. (Jak. 4:10) Re a itse gore fa re kopana le diteko, ga go reye gore Jehofa o a re otlhaya. Jakobe o ile a re: "Fa mongwe a le mo tekong, a a se ka a re: 'Ke lekwa ke Modimo.' Gonne Modimo ga a ka ke a lekwa ka dilo tse di bosula le gone ene ka boene ga a leke ope." (Jak. 1:13) Fa re itse e bile re dumela gore Jehofa ga se ene a re bakelang mathata, botsala jwa rona le ene bo tliile go nonofa. Jehofa ga a fetoge. (Jak. 1:17) O ile a thusa Bakeresete ba bogologolo go lebana le diteko mme le rona o tla re thusa. Mo kope gore a go thuse gore o nne le botlhale, tumelo le bopelokgale. O tla araba dithapelo tsa gago. *w21.02 31 ¶19-21*

## **Matlhatso, January 29**

*Fela jaaka tshipi e lootsa tshipi, motho le ene o lootsa tsala ya gagwe.—Diane 27:17.*

Nna tsala ya motho yo o ithutang le ene. Fa moithuti a ntse a tla dipokanong, mmontshe gore o amega ka ene. (Bafil. 2:4) O ka mmolelela gore o itumeletse go bona gore o dirile diphetogo. O ka mmotsa gore thuto ya gagwe e tsamaya jang, ka ba lelapa la gagwe le ka tiro ya gagwe. Mme gone, o se ka wa mmotsa dipotso tse di ka dirang gore a tlhabiwe ke dithlong. Fa o ntse o tlotla le ene, seno se ka dira gore lo nne ditsala. Fa o nna tsala ya moithuti, seo se ka mo thusa gore a dire diphetogo

a bo a kolobediwe. Fa moithuti a ntse a dira diphetogo, mo thuse gore a iku-tlwe e le karolo ya phuthego. O ka dira seo ka go mo laetsa fa lo dira dilo dingwe. (Baheb. 13:2) Fa moithuti a sena go nna mmoledi, o ka mo kopa gore a tsamaye le wena mo bodireding. Diego wa kwa Brazil a re: "Bakaulengwe ba le bantsi ba ile ba ntaetsa gore ke tsamaye le bone mo bodireding. Seno se ile sa dira gore ke ithute gore ke batho ba ba ntseng jang. Fa ke ntse ke ba tlwaela ke ile ka ithuta dilo di le dintsi mme ke ne ka atamalana le Jehofa le Jesu." *w21.03 12 ¶15-16*

## **Sontaga, January 30**

*Lo se ka lwa busetsa ope bosula ka bosula.—Bar. 12:17.*

Jesu o ile a bolelela balatedi ba gawe gore ba rate baba ba bone. (Math. 5:44, 45) Ga go motlhofo go dira jalo. Mme gone, re ka kgona fa re thusiwa ke moya o o boitshepo. Dingwe tsa dinonofotse moya o o boitshepo o re thusang go nna le tsone ke lorato, bopelotelele, bopelonomi, bonolo le boikgapo. (Bagal. 5:22, 23) Dinonofotse di re thusa gore re kgone go itshoka fa batho ba re tlhoile. Batho ba le bantsi ba ile ba tlogela go re ganetsa ka gonne mongwe, e ka tswa e le monna, mosadi, ngwana kgotsa moagelani, a ile a bontsha dinonofotse. Mme gone jaanong, bangwe ba batho bao, ke Basupi ba ga Jehofa. Ka jalo, fa go le thata gore o rate mongwe yo o go tlhoileng fela ka gonne o direla Jehofa, kopa Jehofa gore a go neye moya wa gawe o o boitshepo. (Luke 11:13) Mme o gopole gore go botlhokwa gore ka metlha o dire dilo ka tsela e Jehofa a e batlang. (Dia. 3:5-7) Go tlhoiwa ke batho go botlhoko, mme gone lorato lo maatla go feta dilo tsotlhe. Lo kgona go dira gore batho ba fetole tsela e ba re tshwarang ka yone. Mme fa re tswela re rata batho ba ba re bogisang, Jehofa o a itumela. Le fa gone batho ba ba re tlhoileng ba sa tlogele go re ganetsa, re ka kgona go itumela. *w21.03 23 ¶13; 24 ¶15, 17*

## Mantaga, January 31

*Setšhaba se se maatla le se se nang palo, se tšile mo lefatsheng la me.—Joele 1:6.*

Joele o ne a bolelela pele ka tlhaselo ya masole. (Joele 2:1, 8, 11) Jehofa o ne a re o tla dirisa “mophato wa [gagwe] o mogolo wa sesole” (masole a Babelona) go otlhaya Baiseraele ba ba neng ba sa mo ikobele. (Joele 2:25) Mophato oo wa masole o bidiwa “motho wa bokone” ka gonne Bababelona ba ne ba tla tlhasela Jerusalema go tswa kwa bokone. (Joele 2:20) Masole a Babelona a tshwantshiwa le lesogodi lwa tsie lo lo rulagantsweng sentle. Joele o ile a bua jaana ka one: “Ba nna ba tsamaya jaaka monna yo o nonofileng mo tseleng ya gagwe. . . . Ba gatlhamela mo teng ga motse. . . . Ba tlhatloga matlo. Ba tsena ka difensetere jaaka legodu.” (Joele 2:8, 9) Akanya fela ka se se neng se direga. Go ne go na le masole a le mantsi tota mo motšeng. Go ne go se na gope kwa motho a ka iphitlhang teng, e bile go se na ope yo o kgonang go tšhaba. Bababelona (kgotsa Bakaladia) ba ile ba tlhasela Jerusalema ka 607 B.C.E. Baebale ya re: “Kgosi ya Bakaladia . . . e ne ya se ka ya tlhomogela pelo lekau le fa e le kgarebane, yo o tsofetseng kgotsa yo o koafaditsweng ke botsofe.”—2 Ditir. 36:17. *w20.04* 5 ¶11-12

## Labobedi, February 1

*Ikobetseng e bile lo tlotle ba bangwe go feta tsela e lo itlotlang ka yone.—Bafil. 2:3.*

Re tshwanetse go leka go itse bakaulengwe le bokgaisadi ba rona botoka. Tlotla le bone kwa dipokanong, bereka le bone mo bodireding, mme fa go kgonega, ba laletse kwa lelaping la gago. Fa o dira jalo, gongwe o tla lemoga gore kgaisadi yo o ntseng o akanya gore ga a rate batho, tota o ditlhong. Kgotsa o tla lemoga gore mokaulengwe yo o nang le madi yo o neng o akanya gore o rata dikhumo, tota o rata go thusa batho. Gape o ka nna wa lemoga gore lelapa le le nngang le tsena thari kwa dipokanong, le itshoketse go bogisiwa. (Jobe 6:29) Gone ga re a tshwane-

la go ‘itsenyatsenya mo mererong ya batho ba bangwe.’ (1 Tim. 5:13) Mme gone, re tshwanetse go itse bakaulengwe le bokgaisadi ba rona le dilo tse di ba diragaletseng mo botsheleng. Fa re dira jalo, re tla kgona go tlhaloganya gore ke eng fa ba itshwara ka tsela e e rileng. Fa e le gore go na le mokaulengwe kgotsa kgaisadi mongwe yo o go serang, ke eng o sa iphe nako ya go mo itse botoka? Go dira jalo gongwe go ka go thusa gore o tlhaloganye gore ke eng fa a itshwara ka tsela e e rileng. Re tlhoka go tsaya matsapa gore re kgone go itse bakaulengwe le bokgaisadi ba rona. Mme fa re dirisa kgakololo e e mo Baebeleng ya gore re rate ba bangwe, re tla bo re etsa Jehofa, yo o ratang “batho ba mefuta yotlhe.”—1 Tim. 2:3, 4; 2 Bakor. 6:11-13. *w20.04* 16-17 ¶10-12

## Laboraro, February 2

*Ga go na ope yo o nang le lorato lo logolo go feta motho yo o ntshang botshelo jwa gagwe mo boemong jwa ditsala tsa gagwe.—Joh. 15:13.*

Mo bosigong jwa pele Jesu a bolawa, o ile a bolelela barutwa ba gagwe gore ba tshwanetse go ratana. Jesu o ne a itse gore fa ba ratana ba ne ba tla kgona go nna seoposengwe, le go itshokela go tlhoiwa ke batho. Akanya ka se se ileng sa diragalela phuthego ya kwa Thesalonika. Fela fa go sena go nna le phuthego kwa Thesalonika, bakaulengwe ba ne ba bogisiwa. Le fa go ntse jalo, ba ile ba tlhoma sekao se se molemo ka gonne ba ne ba tswelela ba itshoka, ba ikanyega e bile ba ratana. (1 Bathes. 1:3, 6, 7) Paulo o ile a ba kgothaletsa gore ba tswelele ba ratana “thata.” (1 Bathes. 4:9, 10) Fa ba ratana, ba ne ba tla kgona go gomotsa ba ba gateletsang mo maikutlong le go tshegetsatsa ba ba bo-koa. (1 Bathes. 5:14) Ba ne ba dira se Paulo a neng a ba laetse gore ba se dire, ka gonne morago ga ngwaga fa a ne a ba kwalela lekwalo la bobedi o ile a ba raya a re: “Lorato lwa mongwe le mongwe wa lona le lwa lona lothele lo oketsega mongwe go yo mongwe.” (2 Bathes. 1:3-5) Ba ile ba kgona go itshokela mathata le go bogisiwa ka gone ba ratana. *w21.03* 22 ¶11

## Labone, February 3

*A re tabogeng lobelo lo re leng mo go lone re itshokile.—Baheb. 12:1.*

Fa re batla go bona botshelo jo bo sa khutleng, re tshwanetse go ikobela melao ya ga Jehofa. (Dit. 20:24; 1 Pet. 2:21) Le fa go ntse jalo, Satane le batho ba lefatshe leno ga ba batle re ikobela Jehofa, go na le moo, ba batla gore re tsewelele re “siana le bone.” (1 Pet. 4:4) Ba a re sotla ka gonne re tshela ka melao ya ga Jehofa. Mo godimo ga moo, ba re tsela e ba tshelang ka yone e monate e bile ba na le kgololesego. Mme seo ke maaka a matala! (2 Pet. 2:19) Go botlhokwa fela thata gore re tsamaye mo tseleng e e siameng. Satane o batla gore re tlogele go tsamaya mo tseleng e e pitlaganeng e e “isang botshe-long.” Go na le moo, o batla gore re tsamaye mo tseleng e e bulegileng e batho ba le bantsi ba lefatshe leno ba tsamayang mo go yone. Batho ba le bantsi ba rata tsela eno e bile go motlhofo go tsamaya mo go yone. Le fa go ntse jalo, e ‘isa tshenyegong.’ (Math. 7:13, 14) Fa re batla gore re tsewelele re le mo tseleng e e siameng e bile re sa itewe tsebe ke sepe, re tshwanetse go tshepa Jehofa e bile re tshwanetse go mo ikobela. *w20.04 26 ¶1; 27 ¶5, 7*

## Labotlhano, February 4

*Ke lo rotloetsa gore lo [rapele] . . . ka go kopa Modimo ka tlhoafalo . . . gore re tle re tsewelele re tshela re ritibetse e bile re le mo kagisong re ikanyega mo Modimong.*

—1 Tim. 2:1, 2.

Mo dingwageng tse di sa tswang go feta Russia le dinaga tse di e tshegetsang di ile tsa tsena mo “lefatshe la Mokgabiso.” (Dan. 11:41) Ba dirile seo jang? Ka 2017 kgosi ya bokone e ile ya thibela tiro ya batho ba ga Jehofa e bo e latlhela bangwe ba bone mo kgolegelong. Gape e ile ya thibela dikgatiso

tse rona le *Thanolo ya Lefatshe le Lesha*. Gape e ile ya tsaya ofisi ya lekala ya Basupi ba ga Jehofa, Diholo Tsa Bogosi le Diholo Tsa Dikopano tse di kwa Russia. Ka jalo, ka 2018 Setlhopho se se Laolang se ile sa re Russia le dinaga tse di e tshegetsang ke kgosi ya bokone. Le fa batho ba Modimo ba bogisiwa ga ba kitla ba lwantsha puso kgotsa go leka go e menola. Go na le moo, batlhanka ba Modimo ba ikobela kgakololo e e mo Babeleng ya gore ba rapelele “botlhe ba ba mo maemong a a kwa godimo,” segolobogolo fa balaodi bao ba batla go dira ditshwetso tse di tla amang kobamelo ya rona. *w20.05 14 ¶9*

## Matlhatso, February 5

*Ikele tlhoko o bo o tlhokomele tselala e o rutang ka yone.—1 Tim. 4:16.*

Batsadi, fa lo batla gore bana ba lona ba tlhatswege pelo gore ba mo boammaaruring, ba thuseng go nna ditsala tsa ga Jehofa le go tlhatswega pelo gore se Baebele e se rutang ke boammaaruri. Gore lo kgone go ruta bana ba lona boammaaruri ka Modimo, lo tshwanetse go ba tlhomela sekao ka go ithuta Baebele ka metlha. Lo tshwanetse go ipha nako ya go tlhatlhanya ka se lo se ithutang. Mme lo tla kgona go thusa bana ba lona go dira se se tshwanang. Rutang bana ba lona go itirela dipatlisiso ba dirisa *Kaedi ya go Dirisa Dipatlisiso*, app ya JW Library le didirisiwa tse dingwe fela jaaka o ne o ka ruta motho yo o ithuta Baebele le ene. Fa lo ba dira jalo, lo tla ba thusa go rata Jehofa le go tshepa gore o dirisa “motlhanka yo o boikanyego le yo o botlhale” go re thusa go tlhaloganya Baebele. (Math. 24:45-47) Ga lo a tshwanela go ba ruta fela dithuto tse di motlhofo tsa Baebele. Ba thuseng go nna le tumelo e e nonofileng ka go ba ruta “dilo tse di boteng tsa Modimo” go ya ka dingwaga tsa bone. —1 Bakor. 2:10. *w20.07 11 ¶10, 12-13*

## Sontaga, February 6

*Jehofa o tlhoile motho yo o tsie-tsang, mme ke tsala e kgolo ya batho ba ba siameng.—Diane 3:32.*

Ke batho ba le kae ba e leng ditsala tsa ga Jehofa gompieno? Ba bantsi tota! Jehofa o kgona go tsalana le bone ka gonne ba dumela mo setlhabelong sa ga Jesu. Ka ntlha ya thekololo, re kgona go nna ditsala tsa ga Jehofa le go inee-la mo go ene re bo re kolobediwa. Fa re dumela mo setlhabelong sa ga Jesu, re inee-la mo go Jehofa re bo re kolobediwa, le rona re tla nna bangwe ba batho le bantsi ba ba atamalaneng thata le Motho yo mogolo go gaisa mo lobo-pong. Re ka bontsha jang gore re tsa-ya botsala jwa rona le Modimo bo le botlhokwa? Fela jaaka Aborahame le Jobe ba ba ileng ba fetsa dingwaga di le dintsi ba ikanyega mo Modimong, le rona re tshwanetse go ikanyega mo go ene go sa kgathalesege gore re na le lobaka lo lo kae re ntse re mo direla. Fela jaaka Daniele, re tshwanetse go tsaya botsala jwa rona le Modimo bo le botlhokwa go gaisa botshelo jwa rona. (Dan. 6:7, 10, 16, 22) Jehofa o tla re thusa gore re kgone go itshokela diteko tse re tla lebanang le tsone mme re tla tswelela re le ditsala tsa gagwe.—Bafil. 4:13. *w20.05 27 ¶5-6*

## Mantaga, February 7

*Dira gore ke boife leina la gago ka pelo yotlhe.—Pes. 86:11.*

Kgosi Dafide o ne a bona mosadi wa monna yo mongwe a tlhapa. O ne a itse gore molao wa ga Jehofa o a re: “O se ka wa eletsa mosadi wa mongwe ka wena.” (Ekes. 20:17) Le fa go ntse jalo, o ne a nna a lebile mosadi yoo. O ne a batla go itumedisa Jehofa mme gape o ne a batla go kgotsafatsa keletso ya gagwe ya go tlhakanela dikobo le Bathesheba. Le fa Dafide a ne a rata Jehofa e bile a mmofa, o ne a ineelela go kgotsafatsa dikeletso tsa gagwe tse di sa siamang. Mme seo se ile sa dira gore a dire le dilo tse

dingwe gape tse di bosula. O ne a gagoga leina la Modimo mo seretseng, gape o ne a utlwise lelapa la gagwe le batho ba bangwe botlhoko. (2 Sam. 11:1-5, 14-17; 12:7-12) Jehofa o ne a otlhaya Dafide mme moragonyana Dafide o ne a boa a atamalana le ene gape. (2 Sam. 12:13; Pes. 51:2-4, 17) Dafide o ne a lemoga gore o bakile mathata a a seng kana ka sepe ka go nna pelopedi. Mafoko a a mo go Pesalema 86:11, gape a ka bewa janna: “Nthuse gore ke se ka ka nna pelopedi.” A Jehofa o ne a thusa Dafide gore a mo direle ka pelo yotlhe? Ee, ka gonne moragonyana Baebele e ile ya re, “pelo ya ga Dafide” e ne e “feletse mo go Jehofa Modimo wa gagwe.”—1 Dikg. 11:4; 15:3. *w20.06 11 ¶12-13*

## Labobedi, February 8

*Ke ne ka nna ka mo goga . . . ka megala ya lorato.—Hos. 11:4.*

Jehofa o tshwantsha tsela e a ratang bathanka ba gagwe ka yone le mogala. Lorato lo Jehofa a ratang bathanka ba gagwe ka lone lo tshwana jang le mogala? Akanya o wetse mo lewatlang, makhubu a le bogale le metsi a le tsididi. O simolola go nwela mme mongwe a bo a go latlhelela sengwe se se go thusang gore o se ka wa nwela. O wela magwafifo mme gore o kgone go tshela, o tlhoka go tswa mo metsing. Ka jalo, o tlhoka gore batho ba ba mo sekepeng ba go latlhelele mogala gore o go thuse gore o tsene mo sekepeng. Fela jaaka temana ya letsatsi ya gompieno e tlhalosa, Jehofa o ile a ‘nna a goga’ Baiseraele ba ba neng ba tlogetse go mo direla. Jehofa o ikutlwa ka tsela e e tshwanang ka batho ba ba tlogetseng go mo direla ba ba nang le mathata le ditlhubaelo tse dintsi. O batla gore ba itse gore o a ba rata le gore o batla go ba thusa gore ba boele kwa go ene. Mme Jehofa a ka go dirisa go ba thusa go lemoga seo. Re tlhoka go nna re bolelela batho ba ba tsidifetseng gore Jehofa o a ba rata le gore le rona re a ba rata. *w20.06 27 ¶12-13*

## Laboraro, February 9

*Go itumela motho yo o tsweleng a itshokela diteko.—Jak. 1:12.*

Fa Setefane a sena go bolawa, Bakeresete ba le bantsi ba ne ba sia kwa Jerusalema, “ba gasamela mo dikgaolong tsothe tsa Judea le Samarea,” mme bangwe ba ne ba tshabela kwa Kuperu le kwa Antioka. (Dit. 7:58–8:1; 11:19) Barutwa ba ile ba lebana le mathata a le mantsi. Mme gone, gongwe le gongwe kwa ba neng ba ya gone ba ne ba rera dikgang tse di molemo. Ka ntlha ya seo, batho ba le bantsi ba kwa mafelong ao ba ne ba nna Bakeresete mme go ne ga nna le diphuthego di le dintsi. (1 Pet. 1:1) Mme go ne go na le mathata a le mantsi a ba neng ba sa ntse ba tla lebana le one. Ka sekai, ka 50 C.E. Mmusimogolo wa Roma e bong Kauludio o ile a laela Bajuda gore ba tswa mo Roma. Ka jalo, Bajuda ba ba neng ba sa tswa go nna Bakeresete ba ne ba tlhoka go tswa mo magaeng a bone ba bo ba fudugela kwa mafelong a mangwe. (Dit. 18:1–3) Ka 61 C.E. moaposetoloi Paulo o ile a tlhalosa gore batho ba ile ba tlhaphatsa Bakeresetemmo go le ene fa pele ga batho, ba ba tsenya mo kgolegelong le go utswa dilo tsa bone. (Baheb. 10:32–34) Fela jaaka batho ba bangwe, Bakeresete bangwe le bone ba ne ba humanegile e bile ba lwalla.—Bar. 15:26; Bafil. 2:25–27. *w21.02* 26–27 ¶12–4

## Labone, February 10

*Diabolo o folegetse kwa go lona, a tletse bogale jo bogolo, ka gonne a itse gore o saletswe ke nako e khutshwane fela.—Tshen. 12:12.*

Fa re nonotsha tumelo ya rona mo go Jehofa, Satane le batho ba gagwe ga ba kitla ba dira gore re palelwe ke go tsamaya mo boammaaruring. (2 Joh. 8, 9) Ga re a tshwanela go makala fa batho ba ba sa rateng Jehofa ba re tlhoile. (1 Joh. 3:13) Re tshwanetse go gopola gore Johane o rile: “Lefatshe lotlhe le namaletse mo maatlang a yo o boikepo.” (1 Joh. 5:19) Satane o galefa le go feta fa bokhutlo jwa lefatshe leno bo ntse bo atamela. Ga a re

tlhasele fela ka tsela e e bofitlha a dirisa boitsholo jo bo sa siamang le maaka a bathanogi. Mme gape o re tlhasele ka tlhamalalo ka go dira gore batho ba re bogise. O a itse gore o saletswe ke nako e khutshwane. Ka jalo, o leka go emisa tiro ya rona ya go rera le go dira gore re se ka ra tlhola re ikaega ka Jehofa. Ka jalo, ga re makale fa re utlwa gore kwa dinageng dingwe tiro ya rona e thibetswe kgotsa puso e letlelela Basupi go dira dilo dingwe tse di rileng fela. Le fa go ntse jalo, bakaulengwe le bogkaiantsadi ba ba nngang kwa mafelong ao ba itshokile. Ba bontsha gore le fa Satane a re bogisa, re sa ntse re ka kgona go ikanyega mo go Jehofa! *w20.07* 24 ¶12–13

## Labotlhano, February 11

*Mpho e Modimo a re nayang yone ke botshelo jo bo sa khutleng a dirisa Keresete Jesu, Morena wa rona.—Bar. 6:23.*

Jehofa o ne a batla gore batho ba tshelele ruri mo polaneteng e ntle e a e bopileng e leng lefatshe. Mme fa Adame le Efa ba sena go leofela Jehofa, ba ne ba sa tlhole ba kgona go tshelela ruri. Kwa bofelong bone le ditlogolwana tsa bone ba ne ba tlile go swa. (Bar. 5:12) Jehofa o ile a dira eng? Ka yone nako eo, o ile a bua gore o tlile go dira eng go golola batho mo boleong. (Gen. 3:15) Jehofa o ne a tlile go ntsha Morwawe e bong Jesu go nna setlhabelo sa thekololo, gore bana ba ga Adame le Efa ba gololwe mo boleong le mo losong. Go tswa foo, a bo a naya batho tshono ya go tlhophaga gore ba mo direle mme ba bone botshelo jo bo sa khutleng. (Joh. 3:16; 1 Bakor. 15:21, 22) Jehofa o tlile go dirisa Morwawe go tsosa baswi mme ga re a lebelela gore a ba tsose botlhe ka nako le nngwe. Goreng re rialo? Ka gonne fa batho botlhe ba ne ba ka tsoisiwa ka nako e le nngwe seo se ne se ka baka tlhakathakano. Jehofa ga se Modimo wa tlhakathakano. O a itse gore dilo di tshwanetse go rulagannngwa sentle, gore batho ba tshele ka gaiso.—1 Bakor. 14:33. *w20.08* 14 ¶3; 15 ¶5

## Matlhatso, February 12

*Ikele tlhoko o bo o tlhokomele tse-la e o rutang ka yone.—1 Tim. 4:16.*

Moithuti o tshwanetse go tshloganya gore lebaka la go bo re ithuta le ene ke gore re batla go mo thusa gore e nne Mosupi wa ga Jehofa. Go na le dilo di le mmalwa tse motho yo o ithutang Baebele a tshwanetseng go di dira gore a kgone go kolobediwa. Sa ntlha, o simolola ka go itse Jehofa, go mo rata le go nna le tumelo mo go Ene. (Joh. 3:16; 17:3) Go tswa foo, o nna tsala ya ga Jehofa a bo a nna le ditsala mo phuthegong. (Baheb. 10:24, 25; Jak. 4:8) O ikwatlhaela dilo tse di sa siamang tse a neng a di dira a bo a tlogela go di dira. (Dit. 3:19) Gape o simolola go bolelela ba bangwe dilo tse a di dumelang. (2 Bakor. 4:13) Go tswa foo, o ineela mo go Jehofa a bo a kolobediwa. (1 Pet. 3:21; 4:2) Fa letsatsi leo le goroga, rotlhe re a itumela. Fa motho yo o ithutang le ene a simolola go dira diphetogo, nna o mo akgola e bile o mo kgothale-tse gore a tshware fela jalo. *w20.10* 17-18 ¶12-13

## Sontaga, February 13

*Fa lonao lo ka re, "E re ka ke se seatla, ga ke karolo ya mmele," seo ga se dire gore lo se ka twa nna karolo ya mmele.*

—1 Bakor. 12:15.

Fa o ipapisa le ba bangwe mo phuthegong, seo se ka dira gore o ikutlwe o se botlhokwa. Bangwe mo phuthegong, ba ka tswa ba na le bokgoni jwa go ruta, ba itse go rulaganya dilo sentle kgotsa ba kgona go gomotsa le go kgothatsa ba bangwe. Gongwe o ka tswa o akanya gore ba na le bokgoni jo bo botoka go go gaisa. Fa e le gore o akanya jalo, seo se bontsha gore o boikokobetso. (Bafil. 2:3) Mme gone, ikele tlhoko. Fa o nna o ipapisa le batho ba ba nang le bokgoni jo bo gaisang jwa gago, o ka nna wa kgobega marapo. O ka nna wa feleletsela o akanya

gore ga o botlhokwa mo phuthegong. Jehofa o ne a naya Bakeresete bangwe ba lekgolo la ntlha la dingwaga moya o o boitshepo mme ba ne ba kgona go dira dilo dingwe, tse Bakeresete bangwe ba neng ba sa kgone go di dira. (1 Bakor. 12:4-11) Jehofa o ne a ba tsaya botlhe ba le botlhokwa. Gompieno ga re a newa bokgoni jo Bakeresete bao ba neng ba na le jone. Mme gone, rotlhe mo phuthegong re na le bokgoni jo bo sa tshwaneng. Le fa go ntse jalo, seo ga se reye gore ga re botlhokwa mo go Jehofa. *w20.08* 23 ¶13-15

## Mantaga, February 14

*Jehofa o ka fa letlhakoreng la me; ga nkitla ke boifa.—Pes. 118:6.*

Fa o batla go nna pelokgale, kopa Jehofa gore a go neye bopelokgale mme o ka tlhomamisega gore Jehofa o tla araba thapelo ya gago. (Dit. 4:29, 31) Ga a kitla a go latlha. O tla nna a go thusa ka metlha. Akanya kafa Jehofa a ileng a go thusa ka gone fa o ne o na le mathata le kafa a go thusitseng ka gone gore o kgone go dira diphetogo mo botshelong. O se ka wa lebala gore Jehofa o ile a thusa batho ba gagwe go kgabaganya Lewatile le Lehibidu, ka jalo, le wena a ka go thusa gore o nne morutwa wa ga Jesu. (Ekes. 14:13) Nna le tumelo mo go Jehofa fela jaaka mopesalema yo o ileng a bua mafoko a a mo temaneng ya letsatsi ya gompieno. Jehofa a ka kgona go thusa le baboledi ba basha go re ba nne pelokgale. Akanya ka se se diragaletseng kgaitisadi mongwe yo o bidiwang Tomoyo. Lekgetlo la ntlha fa a ne a ile tshimong, motho wa ntlha yo a ileng a kopana le ene o ile a mo raya a re: "Ga ke batle go utlwa sepe ka Basupi ba ga Jehofa!" a bo a itaaganya lebatl. Tomoyo o ne a raya kgaitisadi yo a neng a tsamaya le ene a re: "Ga ke a bua le fa e le sepe mme o ne a setse a itse gore ke Mosupi wa ga Jehofa. Ke itumetse tota!" Gone jaanong Tomoyo ke mmulatsela wa ka metlha. *w20.09* 6 ¶13-14

## Labobedi, February 15

*Asa o ne a dira se se molemo  
le se se siameng mo matlhong a  
ga Jehofa, Modimo wa gagwe.  
—2 Ditir. 14:2.*

Asa o ne a bolelela batho ba Juda gore Jehofa ke ene a ba neileng “boikhutso mo tikologeng yotlhe” ya bone. (2 Ditir. 14:6, 7) Mme gone, o ne a sa tseye gore eo e ne e le nako ya gore a tlhabe kgobe ka mmutlwa. Go na le moo, o ne a aga metse, ditora le dikgoro. O ne a raya batho ba Juda a re: “Lefatshe le sa ntse le le mo taolong ya rona.” O ne a raya jang? O ne a raya gore go ne go se na ope yo o ba tshwenyang, ka jalo, ba ne ba ka kgona go aga ba gololesegile. O ile a kgothaletsa batho gore ba le aramele le sa ntse le ba tlhabetse. Gape Asa o ile a dirisa nako eo go nonotsha masole a gagwe. (2 Ditir. 14:8) A seno se raya gore o ne a sa tshepe Jehofa? Le eseng! Go na le moo, o ne a itse gore ke boikarabelo jwa gagwe go thusa batho gore ba ipaakanyetse mathata a ba neng ba ka kopana le one mo nakong e e tlang. Gape o ne a itse gore ga ba kitla ba nna mo kagisong go ya go ile, mme go ne ga nna fela jalo. *w20.09 15 ¶4-5*

## Laboraro, February 16

*Lo se ka lwa ya ka kwa ga dilo tse  
di kwadilweng.—1 Bakor. 4:6.*

Mogolwane a ka nna a akanya gore o na le maikarabelo a go dira melao e e ka sireletsang batho ba Modimo. Mme gone, taolo e mogolwane a nang le yone e farologane thata le e tlhogo ya lelapa a nang le yone. Ka sekai, Jehofa o tlhomile bagolwane gore e nne baatlhodi. O neile bagolwane maikarabelo a go tlosa batho ba ba sa ikwatlhaeleng maleo a bone mo phuthegong. (1 Bakor. 5: 11-13) Le fa go ntse jalo, Jehofa o neile ditlhogo tsa malapa taolo e a sa e nayang bagolwane. Ka sekai, o neile tlho-

go ya lelapa maikarabelo a go baya melao le go netefatsa gore ba lelapa la gagwe ba ikobela melao eo. (Bar. 7:2) Ka sekai, tlhogo ya lelapa o na le tshwanelo ya go bolelela bana ba gagwe gore ba tile nako mang mo gae. Gape o na le tshwanelo ya go otlhaya bana ba gagwe fa ba sa ikobele melao eo. (Baef. 6:1) Gone pele a dira tshwetso, o tshwanetse go bua le mosadi wa gagwe ka gone boobabedi “ke nama e le nngwe.” —Math. 19:6. *w21.02 16-18 ¶10-13*

## Labone, February 17

*[Botlhale] bo tlhwatlhwakgolo go  
feta dikorale; ga go na sepe se o  
se eletsang se se ka bapisiwang  
le jone.—Diane 3:15.*

Boammaaruri jo bo mo Baebeleng bo tlhwatlhwakgolo ka gone Jehofa o bo senolela fela batho ba ba boikokobetso, ba ba nang le “tshakamelo e e siameng” kgotsa ba ba nang le dipelo tse di siameng. (Dit. 13:48) Batho bao ba ba boikokobetso ba a itse gore Jehofa, o dirisa motlhanka yo o boikanyego le yo o botlhale, go re ruta boammaaruri jo bo mo Baebeleng. (Math. 11:25; 24:45) Re ka se kgone go tlhaloganya Baebele fa re sa thusiwe ke ope. Mme ga go na sepe se se tlhwatlhwakgolo jaaka go tlhaloganya boammaaruri jo bo mo Baebeleng. (Dia. 3:13) Gape Jehofa o re neile tshiamelo ya go ruta batho ka ene le se a ikaeletseng go se dira. (Math. 24: 14) Molaetsa o re o rerang o botlhokwa fela thata ka gone o thusa batho gore ba nne karolo ya lelapa la ga Jehofa e bile o ba thusa gore ba nne le tsholofelo ya go tshelela ruri. (1 Tim. 4:16) Le fa re kgona go dira go le gontsi kgotsa go se kae fela mo tirong ya go rera, boammaaruri ke gore re na le seabe mo tirong e e botlhokwa go di gaisa tsotlhe e e dirwang mo lefatsheng. (1 Tim. 2:3, 4) Ele-ruri ke tshiamelo go dira mmogo le Modimo!—1 Bakor. 3:9. *w20.09 26-27 ¶4-5*



## Labotlhamo, February 18

*Re ne ra fitlhela bakaulengwe mme ba ne ba re kopa gore re nne le bone.—Dit. 28:14.*

Fa moaposetoloi Paulo a ne a ya kwa Roma Jehofa o ile a dirisa bakaulengwe le bogkai tsa go mo thusa. Ka sekai, ditsala tse pedi tsa ga Paulo e leng Ari-setareko le Luke ba ile ba tsamaya le ene go ya kwa Roma. Fa ba ne ba tsamaya le Paulo ba ne ba tsenya matshelo a bone mo kotsing mme ba ne ba ikemise-ditse go dira jalo ka gonne ba batla go thusa Paulo. Fa Paulo le batho ba a neng a tsamaya le bone ba ya kwa Itali, ba ne ba ema kwa Sidona mme Juliase o ile a letla Paulo “go ya kwa ditsaleng tsa gagwe le go ipelela tlhokomelo ya bone.” (Dit. 27:1-3) Fa Paulo le ditsala tsa gagwe ba fitlha kwa Puteoli ba ile ba fitlhela bakaulengwe mme bakaulengwe ba ba kopa gore ba nne le bone malatsi a le supa. Fa ba le koo bakaulengwe ba ne ba ba naya dilo tse ba neng ba di tlhoka. Mme Paulo o tshwanetse a bo a ile a dirisa nako eo go ba kgothatsa le go ba bolelela dilo tse di ileng tsa mo diragalela.—Bapisa Ditiro 15:2, 3. *w20.11* 15-16 ¶15-17

## Matlhatso, February 19

*Go ikanyega go thusa motho . . . [go] amogela masego gone jaanong le mo nakong e e tlang.—1 Tim. 4:8.*

Batsadi bontshang bana ba lona gore lo rata Jehofa ka pelo yotlhe. Lo se ka lwa lebala gore selo se se tlhwatlhwakgolo se lo ka se direlang bana ba lona, ke go ba thusa gore ba rate Jehofa. Mme se sengwe sa botlhokwa thata ke gore lo ba rute go bala Baebele ka metlha, go rapela, go ya dipokanong le go ya bodireding. (1 Tim. 6:6) Gone lo tshwanetse go rekela bana ba lona dilo tse ba di tlhokang. (1 Tim. 5:8) Mme gone, lo se ka wa lebala gore dilo tseo ga se tsone tse di tla thusang bana ba

lona go falola fa lefatshe leno la ga Sata-ne le senngwa e bile ga se tsone di tla ba thusang gore ba tsene mo lefatsheng le lesha. Ba tla kgona go tsena mo lefatsheng le lesha fa fela ba atamalane le Jehofa. (Esek. 7:19) Eleruri go ama pelo go bona batsadi ba le bantsi ba thusa bana ba bone gore ba atamalane le Jehofa. Bana ba ba godiseditsweng mo malapeng a a ntseng jalo, go le gantsi ba tswelela ba dira dilo tseno fa ba gola e bile ba itumelela gore batsadi ba bone ba ile ba ba godisa ka tsela eno.—Dia. 10: 22. *w20.10* 28-29 ¶10-11

## Sontaga, February 20

*Dilo tseno ga di kitla di go diragalela.—Math. 16:22.*

Ka dinako dingwe moaposetoloi Petere o ne a bua kgotsa a dira dilo a sa akanye. Kwa bofelong a bo a ikwatlhaela dilo tseo. Ka sekai, fa Jesu a ne a bolelela baaposetoloi ba gagwe gore o tli-le go bogisiwa a bo a bolawa, Petere o ile a mo kgala ka go mmolelela mafoko a a mo temaneng ya gompieno. (Math. 16:21-23) Mme Jesu o ile a mo kgalemela. Fa segopa sa batho se ne se tli-le go tshwara Jesu, Petere o ile a tseega maikutlo a bo a kgaola tsebe ya motlhan-ka wa moperesiti yo mogolo. (Joh. 18: 10, 11) Mme Jesu o ile a mo kgalemela gape. Mo godimo ga moo, Petere o ile a ikgantsha a re le fa baaposetoloi ba bangwe ba ne ba ka tlogela Jesu, ene o ne a se kitla a mo tlogela. (Math. 26:33) E re ka Petere a ne a itshepa thata, o ile a tsena mo mathateng. Mo go jone bosigo joo, o ile a boifa batho a bo a itatola Jesu makgetlo a le mararo. Mme e re ka a ne a kgobegile marapo o ile “a tswela kwa ntle [a bo] a lela mo go botlhoko.” (Math. 26:69-75) Gongwe o ne a ipotsa gore a Jesu o ne a tla mo itshwarela. Petere ga a ka a letla tsela e a neng a kgobegile marapo ka yone e dira gore a tlogele go direla Jehofa. Le fa a sena go itatola Jesu o ile a tswelela a direla Jehofa le baaposetoloi ba bangwe.—Joh. 21:1-3; Dit. 1:15, 16. *w20.12* 20 ¶17-18

## Mantaga, February 21

*Lona banna ba lo nyetseng, tswelang lo akanyetsa basadi ba lona. E re ka basadi ba le bokoa go lo feta e bile ba tshwana le sejana se se seng thata, ba tloleng.*—1 Pet. 3:7.

Tlhogo ya lelapa a ka bontsha gore o boikokobetso ka ditsela tse di farologa-neng. Ka sekai, ga a a tshwanela go lebelela gore mosadi wa gagwe le bana gagwe ba se ka ba dira diphoso. O reetsa le go akanya ka dikakantsho tsa mosadi le bana ba gagwe, le fa gone dikakantsho tseo, di sa dumalane le tsa gagwe. Gape monna yo o boikokobetso, o leka go thusa mosadi wa gagwe ka ditiro tsa mo ntlong, le fa batho ba mo lefelong le ba nnang mo go lone ba akanya gore ditiro tseo ke tsa basadi. Mme gone, go ka nna thata gore monna a dire jalo. Goreng? Kgaitisadi mongwe yo o bidiwang Rachel a re: “Kwa ke goletseng gone, fa monna a ka thusa mosadi go tlhatswa dijana kgotsa go phepafatsa ntlo, baagelani le ba masika ba simolola go mo nyatsa. Ba akanya gore monna yoo ga a kgone go laola mosadi wa gagwe.” Fa e le gore batho ba kwa o nnang gone ba akanya jalo, gopola gore Jesu o ile a tlhapi-sa dinao tsa barutwa ba gagwe, le fa tiro eo e ne e tsewa e le ya makgoba. Monna yo e leng tlhogo e e molemo ya lelapa, ga a leke go dira gore ba bangwe ba akanye gore o na le maatla e bile o botlhokwa. Sa botlhokwa mo go ene ke gore mosadi le bana ba gagwe ba itumele. *w21.02 2 ¶3; 4 ¶11*

## Labobedi, February 22

*Ke tlhatswegile pelo ka selo se se sengwe: Ke lebala dilo tse di kwa morago mme ke gagamalela dilo tse di kwa pele. Ke leka ka natla gore ke fitlhelele se ke se ikaeletseng.*

—Bafil. 3:13, 14.

Bokgoni jwa go gopola dilo ke mpho e e tswang kwa go Jehofa; mme le fa botshelo jwa rona mo nakong e e fetileng bo ne bo le monate, botshelo jo re tli-

leng go nna le jone kwa lefatsheng le lesa bo tile go nna monate le go feta. Batho bangwe ba ka nna ba re utlwi-sa botlhoko mme gone, fa re ba itshwabela re ka kgona go tswelera le direla Jehofa. Go ikutlwa molato ka tsela e e feteletseng go ka dira gore re se ka ra itumelela go direla Jehofa. Ka jalo, fela jaaka Paulo re tshwanetse go dume-la gore Jehofa o re itshwaretse. (1 Tim. 1:12-15) Re na le tsholofelo ya go tshelela ruri. Mme kwa lefatsheng le lesa ga re kitla re tlhola re gopola dilo tse di re utlwisang botlhoko. Baebele e a re: “Dilo tsa pele ga di kitla di gakologelwa.” (Isa. 65:17) Akanya ka seno: Bangwe ba rona re tsofetse e bile re na le dingwaga di le dintsi re direla Jehofa, mme kwa lefatsheng le lesa re tla bo re le basha gape. (Jobe 33:25) Ka jalo, a re lekeng ka natla gore re se ka ra nnela go akanya ka dilo tse di fetileng. Go na le moo, re ba tla go nna re akantse ka lefa-tshe le lesa le go dira sotlhe se re ka se kgonang gore re tshele kwa go lone! *w20.11 24 ¶4; 29 ¶18-19*

## Laboraro, February 23

*Ke ne ka bona boidiidi jo bogolo jwa batho . . . Ba ne ba nna ba goa ka lentswe le le kwa godimo ba re: “Poloko ya rona e tswa kwa Modimong wa rona . . . le kwa go Kwana.”—Tshen. 7:9, 10.*

Go tile go diragala eng mo nakong e e tlang? Ka nako ya pitlagano e kgolo, Jehofa o tla re boloka ka ditsela tse pedi. Sa ntla, o tla sireletsa batho ba gagwe fa a tla bo a tlhotlheletsa dikgosi tsa lefatsheng gore di senye mmusomogolo wa bodumedi jwa maaka e leng, Babelona yo Mogolo. (Tshen. 17:16-18; 18:2, 4) Gape o tla sireletsa batho ba gagwe, fa a tla bo a fedisa karolo e e setseng ya lefatsheng la ga Satane ka ntwa ya Haramagedona. (Tshen. 16:14, 16) Fa re nna re atamalane le Jehofa, ga go na sepe se Satane a ka se dirang se se ka re utlwisang botlhoko go ya go ile. Tota e bile, Satane ke ene yo a tlleng go fedisiwa go

ya go ile. (Bar. 16:20) Ka jalo, dirisa karo-  
lo nngwe le nngwe ya seaparo sa tlhaba-  
no mme o nne o se apere. O se ka wa  
leka go lwa le Satane le batho ba gagwe  
o le nosi. Tshegetsa bakaulengwe le bo-  
kgaitsetsi. Mme o latele kaelo ya ga Je-  
hofa. Fa o dira jalo, o ka tlhomamisega  
gore Jehofa o tla go naya maatla, e bile  
o tla go sireletsa.—Isa. 41:10. *w21.03* 30  
¶16-17

### Labone, February 24

*Fa lo nna lo ritibetse e bile lo ntshe-  
pa, lo tla nna le maatla.—Isa. 30:15.*

Re ka bontsha jang gore re tshepa Je-  
hofa? Ka go dirisa kgakololo e a re nayang  
yone. Go na le dipego di le dintsi mo Bae-  
beleng tse di re bontshang botlhokwa jwa  
go nna re ritibetse le go ikanya Jehofa. Fa  
o ntse o bala dipego tseno, akanya ka se  
se ileng sa thusa batlhanka ba Modimo go  
nna ba ritibetse le fa batho ba ne ba ba ga-  
netsa. Ka sekai, baaposetoloi ga ba a ka  
ba boifa fa kgotlatshekelo ya Bajuda e ne  
e ba laela gore ba tlolege go rera. Go na  
le moo, ba ile ba bua ba le pelokgale ba  
re: “Re tshwanetse go utlwa Modimo e le  
mmusi bogolo go batho.” (Dit. 5:29) Ga ba  
a ka ba tshoga le fa ba sena go itewa. Ka  
ntlha yang? Ka gonne ba ne ba itse gore  
Jehofa o ba eme nōkeng le gore o ne a  
ba amogela. Ka jalo, ba ile ba tswelela ba  
rera dikgang tse di molemo. (Dit. 5:40-42)  
Setefane le ene o ne a ritibetse fa a ne a  
tloga a bolawa. Ka ntlha ya seo, Baebele  
ya re sefatlhego sa gagwe se ne “se tshwa-  
na le sefatlhego sa moengele.” (Dit. 6:12-  
15) Goreng Setefane a ne a ritibetse? Ka  
gonne o ne a tlhomamisegile gore Jehofa  
o a mo amogela. *w21.01* 4 ¶10-11

### Labotlhano, February 25

*Ba tlhatswitse diaparo tsa bone tse  
di telele ba bo ba di sweufatsa mo  
mading a Kwana.—Tshen. 7:14.*

Seno se raya gore ba na le digakolodi  
tse di phepa le gore Jehofa o a ba amog-  
gela. (Isa. 1:18) Ba ineetse mo go Jehofa,  
ba kolobeditse, ba dumela mo setlha-

belong sa ga Jesu e bile ke ditsala tsa ga  
Jehofa. (Joh. 3:36; 1 Pet. 3:21) Ka ntlha  
ya seo, Modimo o a ba amogela. Ka jalo,  
ba kgona go “mo direla tirolo e e boi-  
tshepo motshegare le bosigo” mo lefa-  
tsheng. (Tshen. 7:15) Gone jaanong, ba  
tlhagafetse e bile ba dira ka natla mo ti-  
rong ya go rera ka Bogosi ka gonne tsa-  
ya Bogosi Jwa Modimo bo le botlhokwa  
fela thata. (Math. 6:33; 24:14; 28:19, 20)  
Ba boidiidi jo bogolo, ba tlhomamise-  
gile gore Modimo o tiile go tswelela a ba  
tlhokomela. Ba tlhomamisegile ka seno  
ka gonne Baebele ya re, “Yo o ntseng  
mo setulong sa bogosi o tla tsharolo-  
la mogope wa gagwe [mo] godimo ga  
bone.” Ba tiile go bona tsholofetso e ba  
sa bolong go e letela e diragadiwa. Tsho-  
lofetso eo ke e re eng, “[Modimo] o tla  
phimola dikededi tsothe mo matlhong a  
bone.”—Tshen. 21:3, 4. *w21.01* 16 ¶9-10

### Matlhatso, February 26

*Ke tla tshololela moya wa me mo  
bathong ba mofuta mongwe le mo-  
ngwe, mme bomorwaalona le bomo-  
rwadialona ba tla porofeta.*

—Dit. 2:17.

Re itumelela go direla Jehofa le batho  
ba gagwe, e bile rotlhe re dira ka natla go  
tlotla ba ba nang le taolo mo phuthegong.  
Baebele ya re Jehofa o tsaya banna le ba-  
sadi ba le botlhokwa. Ka sekai, e tlhalosa  
gore ka motlha wa baaposetoloi, Jehofa o  
ile a naya banna le basadi moya wa gagwe  
o o boitshepo gore ba kgone go bua dipuo  
tse di farologaneng. (Dit. 2:1-4, 15-18) Je-  
hofa o tloditse banna le basadi gore ba ye  
go busa le Jesu kwa legodimong. (Bagal.  
3:26-29) Gape o tiile go naya banna le ba-  
sadi botshelo jo bo sa khutleng mo lefa-  
tsheng. (Tshen. 7:9, 10, 13-15) E bile Jeho-  
fa o neile banna le basadi tiro ya go rera  
dikgang tse di molemo. (Math. 28:19, 20)  
Ka sekai, buka ya Ditiro e bua ka kgaitsa-  
di mongwe yo o bidiwang Peresila. Ene le  
monna wa gagwe e bong Akhwila, ba ile  
ba tlhalosetsa monna mongwe yo o neng  
a rutegile e bong Apolose boammaaruri.  
—Dit. 18:24-26. *w21.02* 14 ¶1; 15 ¶4

## Sontaga, February 27

*Ikeleng tlhoko lo bo lo tlhokomele letsomane lotlhe . . . Lo dise phuthego ya Modimo.—Dit. 20:28.*

Bagolwane, lo na le maikarabelo a botlhokwa a go ruta baboleledi gore ba kgone go rera le go ruta sentle mo bodireding. Fa mongwe a tshaba go tshwara thuto o le teng, mmolelele gore o ka tshwara thuto eo. Go na le dilo di le dintsi tse bagolwane ba ka di dirang go kgothatsa baboleledi ba ba tshwarang di-thuto. (1 Bathes. 5:11) Le fa gone jaanong o se na thuto ya Baebele, o ka kgona go thusa mongwe gore a dire diphetogo le gore a kolobediwe. Fa re baakanyeditse sentle re bo re ntsha dintlha tsa botlhokwa re ka thusa motho yo o tshwereng thuto. Mme gone, re tshwanetse go gopola gore ga re a tshwanele go bua thata. Re ka tsalana le batho ba ba ithutang Baebele fa ba tla dipokanong, gape re ka ba tlhomela sekao se se molemo. Bagolwane ba ka kgothatsa batho ba ba ithutang Baebele ka go ipha nako le bone. Gape ba ka thusa baboleledi le go ba akgolela tiro e ba e dirang. Go sa kgathalesenge gore se re se dirileng se sennye kgotsa jang, rotlhe re ka itumelela go thusa ba bangwe go rata Jehofa le go simolola go mo direla. *w21.03 13 ¶18-19*

## Mantaga, February 28

*Jehofa o tsalana le ba ba mmoifang.—Pes. 25:14.*

Dafide o ile a dira dilo dingwe tse di neng di dira gore ba bangwe ba mo tshepe. Fa a ne a sa ntse a le mosha, o ile a dira ka natla gore a kgone go tlhokomele dinku tsa ga rraagwe. Tiro e a neng a e dira, e ne e le kotsi. Nako nngwe Dafide o ile a raya Kgosi Saulo a re: “Motlhanka wa gago o ne a nna modisa wa ga rraagwe mo letsomaneng, mme ga tla tau, le bera, mme nngwe le nngwe ya tsone ya tsaya nku mo letsomaneng. Mme ka tswa ka e latelela ka e itaya ka e latlhela fa fatshe mme ka e namola mo

molomong wa yone.” (1 Sam. 17:34, 35) Dafide o ne a itse gore o tshwanetse go sireletsa dinku. Bakaulengwe ba basha ba ka etsa Dafide ka go dira tiro nngwe le nngwe e ba e neilweng ka matlhaga-tlhaga. Fa Dafide a ne a le mosha, o ne a nna tsala e kgolo ya ga Jehofa. Botsala jwa gagwe le Jehofa bo ne bo le botlhokwa thata mo go ene go gaisa go nna le bopelokgale kgotsa go nna le bokgoni jwa go tshameka seletswa sa mmimo. Jehofa e ne e le Modimo wa ga Dafide gape e le Tsala ya gagwe e kgolo. Bakaulengwe ba basha, selo sa botlhokwa se lo tshwanetseng go se dira ke go nna dit-sala tsa ga Jehofa. *w21.03 3 ¶4-5*

## Labobedi, March 1

*Go itumela lona fa batho ba lo tlhoa.—Luke 6:22.*

Ga se rona re ithlophelang gore batho ba re tlhoe. E bile ga re itumelele go bogisiwa ka ntlha ya se re se dumelang. Jaanong, goreng re ka itumela fa batho ba re tlhoile? Akanya ka mabaka ano a mararo. Sa ntlha, fa re itshoka Jehofa o a itumela. (1 Pet. 4:13, 14) Sa bobedi, tumelo ya rona e a nonofa. (1 Pet. 1:7) Mme sa boraro, Jehofa o tlile go re duelela ka go re naya botshelo jo bo sa khutleng. (Bar. 2:6, 7) Moragonyana fa Jesu a sena go tsofiwa, baaposetoloi ba ne ba itumela fela jaaka Jesu a ne a bole-tse. Fa ba sena go itewa le go bolelelwa gore ba tlogele go rera, ba ne ba itumela. Goreng? Baebele e a re: “Ka gone ba ne ba kailwe ba tshwanela go tlontlollelwa leina la [ga Jesu].” (Dit. 5:40-42) Ba ne ba rata moeteledipele wa bone thata jaana mo ba neng ba sa tshabe le baba ba bone. Ba ile ba bontsha gore ba rata Jesu ka go tswelela ba rera dikgang tse di molemo “ba sa kgaotse.” Bakaulengwe le bokgaityadi ba le bantsi gompiano, ba tswelela ba rera dikgang tse di molemo le fa ba lebane le mathata. Ba a itse gore Jehofa ga a kitla a lebala tiro e ba e dirang le tsela e ba mo ratang ka yone. *w21.03 25 ¶18-19*

## Laboraro, March 2

*O dirile gore ba nne le keletso ya go tshelela ruri.—Mor. 3:11.*

Bakeresete ba ba tloditsweng ga ba tsholwe ba na le tsholofelo ya go tshela kwa legodimong. Modimo ke ene a ba nayang yone. Ba akanya ka tsholofelo eo, ba a e rapelela e bile ba swegaswega pelo gore ba tlile go e amogela leng. Ga ba itse gore mebele ya bone e tla bo e ntse jang fa ba le kwa legodimong. (Bafil. 3:20, 21; 1 Joh. 3:2) Mme gone, ba lebile pele go amogela kabelo ya bone ya kwa legodimong. Ba dinku tse dingwe ba na le tsholofelo ya go tshelela ruri mo lefatsheng. Mme eo ke keletso e batho botlhe ba nang le yone. Ba lebile pele go thusa go dira gore lefatsho e nne para-daise. Mme ba swegaswega pelo go aga matlo a bone, go jala masimo le go godisa bana ba bone ba sa lwale. (Isa. 65:21-23) Gape ba lebile pele go etela mafelo a a farologaneng, go bona dithaba, dikgwa, mawatle le go ithuta ka dilo tso-tlhe tse Jehofa a di bopileng. Mme se se dirang gore ba itumele le go feta, ke go itse gore ba tlile go tsewelela e le ditsala tsa ga Jehofa, le gore botsala joo bo tlile go nonofa le go feta. *w21.01* 18-19 ¶17-18

## Labone, March 3

*O ne a fisa ntlo ya Modimo wa boammaaruri . . . a senya sengwe le sengwe se se tlhwatlhwakgolo.—2 Ditir. 36:19.*

Fa Bababelona ba sena go senya Jerusalema, batho ba ne ba bua jaana ka motse oo: “Ke kgakgabalo e e se nang motho le seruiwa. [O] tsentswe mo seatleng sa Bakaladia.” (Jer. 32:43) Dingwaga di ka nna 200 boporofeti jwa Joele bo sena go kwalwa, Jehofa o ile a dirisa Jeremia go bua sengwe gape ka tlhase-lo eo. Jeremia o ile a tlhalosa gore masole a Babelona a ne a tla batla Baiseraele botlhe ba ba neng ba dira dilo tse di bosula go fitlha ba ba tshwara. O ne a

re: “‘Bonang, ke roma gore go tle ba-tshwara ditlhapi ba bantsi,’ go bua Jehofa, ‘mme ruri ba tla ba tshwara jaaka fa ba tshwara ditlhapi; morago ga moo ke tla roma gore go tle batsomi ba bantsi, ruri ba tla ba tsoma mo thabeng nngwe le nngwe le mo thoteng nngwe le nngwe le mo mapharong a mafika a magolo. . . . Ke tla duela selekanyo se se tletseng sa tlolo ya bone le sa bolelo jwa bone.’” Baiseraele ba ne ba ka se kgone go iphitlha gope, e ka tswa e le mo lewatleng kgotsa kwa sekgweng.—Jer. 16:16, 18. *w20.04* 5 ¶12-13

## Labotlhamo, March 4

*[Lote] a nnela go diega.—Gen. 19:16.*

Nako nngwe Lote o ile a tsaya nako gore a ikobele ditaello tsa ga Jehofa. Re ka nna ra akanya gore Lote o ne a sa batle go ikobela Jehofa. Mme Jehofa ga a ka a mo tlhoboga. Baebele ya re baeng-ele ba ne ba ntshetsa Lote le ba lelapa la gagwe kwa ntle ga motse “ka bopelotlhomogi jwa ga Jehofa.” (Gen. 19:15, 16) Jehofa a ka tswa a ile a utlwela Lote botlhoko ka ntlha ya mabaka a le mmalwa. Gongwe Lote o ne a diega go tsamaya ka gonno o ne a tshaba batho ba motse. Mme ga se gone gotlhe. A ka tswa a ile a utlwalela ka dikgosi tse pedi tse di ileng tsa wela mo khuting e e nang le bitumena kwa mokgatsheng o o neng o le gaufi le motse wa Sodoma. (Gen. 14:8-12) E re ka a ne a na le mosadi le bana, a ka tswa a ne a tshwenyegile ka bone. Mo godimo ga moo, Lote o ne a humile, ka jalo, a ka tswa a ne a na le ntlo e ntle tota. (Gen. 13:5, 6) Le fa lebaka e ka tswa e ne e le lefe, boammaaruri ke gore Lote o ne a tshwanetse go tswa mo motseng ka bonako fela jaaka Jehofa a ne a mo laetse. Mme gone, Jehofa ga a ka a tlhoma mogopolo mo phosong ya ga Lote, go na le moo, o ne a re ke “monna yo o siameng.” —2 Pet. 2:7, 8. *w20.04* 18 ¶13-14

## Matlhatso, March 5

*O na le setlhopha sa gago sa makau se se tshwanang le marothodi a monyo.—Pes. 110:3.*

Mokaulengwe yo mosh, go ka nna thata gore batho ba o goletseng fa pele ga bone ba lemoge gore o setse o godile. Mme gone, Jehofa ene ga a go lebe jalo. O a go itse, e bile o itse gore ke dilo dife tse o kgonang go di dira. (1 Sam. 16:7) Atamalana thata le Jehofa. Dafide o ile a nonotsha botsala jwa gagwe le Jehofa ka go lebelela dilo tse a di bopileng. O ile a akanyetsa kwa teng ka gore dilo tseo di mo ruta eng ka Mmopi wa gagwe. (Pes. 8:3, 4; 139:14; Bar. 1:20) Selo se sengwe se o ka se dirang ke go kopa Jehofa gore a go neye maatla a o a tlhokang. Ka sekai, a batho bangwe ba o tse nang sekole le bone ba a tle ba go sotle ka gonne o le Mosupi wa ga Jehofa? Fa e le gore go ntse jalo, kopa Jehofa gore a go thuse go itshokela bothata joo. Mme gape, dirisa kgakololo e o e fitlhelang mo Baebeleng, mo dikgatisong le mo dibidiong tsa rona. Nako le nako fa o lemoga gore Jehofa o go thusa go rarabolola bothata jo o nang le jone, o tla dumela gore o tla kgona go go thusa fa o le bana le mathata a mangwe. Gape fa ba bangwe ba lemoga gore o ikaega ka Jehofa, ba tla go tshepa. *w21.03 4 ¶7*

## Sontaga, March 6

*Thapelo ya basiami e . . . itumedisa [Jehofa].—Diane 15:8.*

Ditsala di rata go tlotla ka dilo tse ba di akanyang le ka tsela e ba ikutlwang ka yone. Le rona botsala jwa rona le Jehofa bo tshwanetse go nna jalo. Jehofa o dirisa Lefoko la gagwe go re bolelela gore o ikutlwa jang le gore o akanya eng. Re bua le ene fa re rapela, re mmolela gore re ikutlwa jang. E re ka Jehofa e le Tsala ya rona, o reetsa dithapelo tsa rona e bile o a di araba. Ka dina ko tse dingwe, Jehofa o araba dithapelo tsa rona ka bonako. Mme ka dinako tse dingwe, re ka tlhoka go rapela makge-

tlo a le mantsi ka bothata jo re nang le jone. Mme gone, re tlhomamisegile gore Jehofa o tla re araba ka nako e e siameng le ka tsela e e siameng. Gone Jehofa a ka nna a se ka a re araba ka tsela e re lebeletseng gore a re arabe ka yone. Ka sekai, go na le gore Jehofa a fedise mathata a rona, a ka nna a re fa maatla le botlhale jwa gore re kgone go a "itshokela." (1 Bakor. 10:13) Re ka bontsha jang gore re lebogela mpho e Jehofa a re fileng yone ya go rapela? Ka go ikobela kaelo ya ga Jehofa ya gore re 'rapele ka metlha.'—1 Bathes. 5:17. *w20.05 27-28 ¶7-8*

## Mantaga, March 7

*Yo o itshokileng go fitlha kwa bokhutlong o tla bolokwa.*

—*Math. 24:13.*

Fa motho a taboga, o tshwanetse go nna a lebile kwa pele gore a se ka a wa. Fa a ka wa, o a ema a bo a tswelela a taboga. Ga a nnele go akanya ka selo se se mo kgopileng. Go na le moo, o nna a akantse ka go wetsa lobelo le go gapa sekgele. Mo lobelong lwa rona lwa botshelelo, re ka nna ra kgopiwa makgetlo a le mantsi. Re ka nna ra bua kgotsa ra dira dilo tse di sa siamang. Mo godimo ga moo, Bakeresete ba bangwe ba ka nna ba re utlwisa botlhoko. Ga re a tshwanela go gakgamala fa seno se direga. Rotlhe re na le bolelo e bile re tsamaya mo tseleng e e pitlaganeng. Ka jalo, re tla nna re ntse re kgopana. Paulo o ile a re ka dinako dingwe re tla dira gore ba bangwe ba nne "le lebaka la go ngongorega." (Bakol. 3:13) Mme gone, ga re a tshwanela go nna re akantse ka dilo tse di re kgopileng, go na le moo, re tshwanetse go nna re akantse ka go gapa sekgele re bo re tswelela mo lobelong lwa botshelo. Fa re nna re kgopisegile e bile re sa eme gape, ga re kitla re kgona go wetsa lobelo le go gapa sekgele. Mo godimo ga moo, re ka nna ra thibela ba bangwe go wetsa lobelo lwa bone le go gapa sekgele. *w20.04 26 ¶1; 28 ¶8-9*

## Labobedi, March 8

*Bogosi jono . . . bo tla thubaganya  
bo bo bo fedisa magosi ano otlhe.*

—Dan. 2:44.

Boporofeti jwa ga Daniele bo tlhalosa setshwantsho se segolo se mmele wa sone o dirilweng ka dimetale tse di farologaneng. Karolo nngwe le nngwe ya setshwantsho seno e emela puso e e ileng ya busa kwa batho ba le bantsi ba Modimo ba neng ba nna gone. Dipuso tseno ga di a ka tsa busa ka nako e le nngwe. Maoto a setshwantsho seno a dirilwe ka tshipi le letsopa. Maoto ao a emela Mmuso wa Lefatshe Lotlhe wa Maesemane le Maamerika. Boporofeti jono bo bontsha gore o tla bo o sa ntse o busa fa Bogosi Jwa Modimo bo senya dipuso tsotlhe. Moapo-setoloi Johane le ene o ile a bua ka dipuso tse di ileng tsa busa kwa mafelong a go nang le batho ba ga Jehofa kwa go one. Mo boporofeting jwa ga Johane dipuso tseo di emelwa ke sebatana sa ditlhogo di le supa. Tlhogo ya bosupa ya sebatana seo e emela Mmuso wa Lefatshe Lotlhe wa Maesemane le Maamerika. Seno se a utlwala ka gonne sebatana seno ga se na tlhogo e nngwe gape e e tlhogang morago ga ya bosupa. Puso e e emelwang ke tlhogo ya bosupa e tla bo e sa ntse e busa fa Keresete le baengele ba gagwe ba tla go senya sebatana.—Tshen. 13:1, 2; 17:13, 14. w20.05 14 ¶11-12

## Laboraro, March 9

*Modimo ke lorato.—1 Joh. 4:8.*

Mafoko ano a re gopotsa gore lorato lo tswa kwa go Jehofa. Jehofa o a re rata! Tsela e a re ratang ka yone e dira gore re ikutlwe re sireletsegile gape e dira gore re itumele. Bakeresete ga ba itlhophele gore a ba tla rata batho ba bangwe kgotsa ga ba kitla ba ba rata. Go rata batho ba bangwe ke taelo e ba tshwanetseng e e ikobela. (Math. 22:37-40) Fa re itse Jehofa sentle, go nna motlhofo gore re ikobeletaelo ya ntlha. Seno ke ka gonne Jehofa ga a dire diphoso, o amega ka rona e bile o dirisana sentle le rona. Mme gone, go ka

nna thata gore re ikobeletaelo ya bobedi. Ka ntlha yang? Ka gonne batho bangwe ba Baebele e reng ke baagelani ba rona ke bakaulengwe le bokgaitisadi ba ba dirang diphoso. Ka jalo, ba ka nna ba bua kgotsa ba dira dilo dingwe tse di ka re utlwisang bothoko. Jehofa o ne a itse gore go tilile go nna thata gore re ikobeletaelo eno. Ka jalo, o ile a dirisa bakwadi ba Baebele go re ruta gore ke eng fa re tshwanetse go ratana le gore re ka bontsha jang gore re rata ba bangwe. Mongwe wa bakwadi bao ke moapo-setoloi Johane.—1 Joh. 3:11, 12. w21.01 8 ¶1-2

## Labone, March 10

*[Lo] se ka [lwa] tsiediwa ke Satane.  
—2 Bakor. 2:11.*

Go sa kgathalesege gore a re na le nako e telele re direla Jehofa kgotsa ke gone re simololang go mo direla, rotlhe re tshwanetse go ipotsa gore, 'A ke dira sotlhe se nka se kgonang go gana maiteko a ga Satane a go dira gore ke se ka ka direla Jehofa ka pelo yotlhe?' Ka sekai, fa o lebile thelebishene kgotsa o le mo Internet, o bo o bona ditshwantsho tse di ka dirang gore o akanye ka tlhakanelodikobo, o tla dira eng? Gongwe o ka nna wa ipolelela gore ke setshwantsho fela kgotsa ke *movie* fela, ga se gore go tlhaga ditshwantsho tse di tsosang keletso ya tlhakanelodikobo. Boammaaruri ke gore, eno ke tsela e Satane a e dirisang go dira gore o se ka wa direla Jehofa ka pelo yotlhe. Re ka tshwantsha seo le selepe se motho a se dirisang go rema logong lo logolo. Motho yoo fa a simolola go rema, o rema go le gonnnye, mme fa a ntse a rema, logong loo lo kgaogana ka bogare. Re ka tshwantsha setshwantsho se o se boneng fa o lebile *movie* kgotsa mo thelebisheneng le selepe se se bogale. Go leba ditshwantsho tseo tse di lebegang di se kotsi go ka dira gore kwa bofelong motho a lefele Jehofa. Ka jalo, o se ka wa letla dilo dipe tse di sa siamang di go kgaoganya le Jehofa! Dira sotlhe se o ka se kgonang gore o direle Jehofa ka pelo e e feletseng! w20.06 11-12 ¶14-15

## Labotlhano, March 11

*Re tshwanetse go akanyetsa makoa a ba ba sa nonofang.*

—Bar. 15:1.

Re tlhoka go nna re thusa le go kgothatsa batho ba ba tsidifetseng fa re sena go kopana le bone. Fela jaaka mo setshwantshong sa ga Jesu sa morwa yo o latlhegileng, batho ba ba tsidifetseng ba ka tswa ba utlwile botlhoko thata jaana mo go tla ba tsayang lobaka lo loleele gore ba kgone go fola. (Luke 15:17-24) E re ka ba na le lobaka lo loleele ba tsidifetse, ga ba tlhole ba atamalane thata le Jehofa jaaka pele. Re tlhoka go ba thusa go nonotsha tumelo ya bone mo go Jehofa. Mo setshwantshong sa ga Jesu sa nku e e latlhegileng, Jesu o tihalosa kafa modisa a tsayang nku ya gagwe ka gone a bo a e baya mo magetleng a gagwe, a bo a e isa kwa letsomaneng. Modisa o setse a tsere matsapa go batla nku e e latlhegileng mme gone o lemoga gore nku e ka se kgone go itsamaisa go fitlha kwa letsomaneng. Ka jalo o a e tsholetsa a bo a e isa kwa letsomaneng. (Luke 15:4, 5) Re tlhoka go tsaya matsapa go thusa ba ba tsidifetseng gore ba fenyee bothata jo bo dirang gore go nne thata gore ba boele kwa go Jehofa. Jehofa a ka dirisa moya wa gagwe o o boitshepo, Lefoko la gagwe le dikgatiso go re thusa gore re kgone go thusa ba ba tsidifetseng gore e nne ditsala tsa gagwe gape. Ka jalo, fa o kopiwa go ithuta le motho yo o tsidifetseng o se ka wa gana fa e le gore maemo a gago a a go letla. *w20.06 28 ¶14-15*

## Matlhatso, March 12

*Fa lo ratana, batho botlhe ba tla lemoga gore lo barutwa ba me.*

—Joh. 13:35.

Gore re bontshe gore re Bakeresete ba boammaaruri, re tshwanetse go ratana. Mme gape re tlhoka go nna le “kitso ya boammaaruri le temogo e e tletseng.” (Bafil. 1:9) Go seng jalo, re tla heheutlwa “ke phefo nngwe le nngwe ya thuto ya tsietso ya batho,” tota le ya batlhanogi.

(Baef. 4:14) Fa balatedi ba ga Jesu ba le bantsi ba tlogela go mo sala morago, moaposetoloi Petere o ne a bua a tlhatswegile pelo a re Jesu o na le “mafoko a botshelo jo bo sa khutleng.” (Joh. 6:67, 68) Le fa ka nako eo Petere a ne a sa tlhaloganye ka botlalo se Jesu a neng a se bua, o ne a tsewelela a ikanyega ka gonne a tlhaloganyana boammaaruri ka ga Keresete. Le wena o ka nonotsha tumelo ya gago o bo itlhatlwa pelo gore se Baebele e se buang ke boammaaruri. Fa o dira jalo, tumelo ya gago e tla nonofa mme ga e kitla e reketla le fa o lebana le diteko. Gape o tla kgona go thusa ba bangwe gore ba nne le tumelo e e nonofileng.—2 Joh. 1, 2. *w20.07 8 ¶2; 13 ¶18*

## Sontaga, March 13

*Bana ba bannye, ga lo a tshwanela go bua fela lo re lo a ratana, mme lorato lwa lona lo tshwanetse go bonala ka se lo se dirang e bile lo tshwanetse go nna lwa boammaaruri.—1 Joh. 3:18.*

Gore re kgone go thusa bakaulengwe le bogkailsadi gore ba tsewelele ba le mo boammaaruring, re tshwanetse go ba utlwela botlhoko. (1 Joh. 3:10, 11, 16, 17) Re tlhoka go nna re bontshana gore re a ratana fa dilo di tsamaya sentle le fa re lebana le mathata. Ka sekai, a o itse mongwe yo o tlhokafaletseng, yo o tlhokang go gomodiwa kgotsa go thusiwa ka dilo dingwe? Kgotsa a o utlwaletse gore bakaulengwe ba wetswe ke masetlapelo a tlhologo, mme ba tlhoka thuso go baakanya Halo ya bone ya Bogosi kgotsa magae a bone? Re tlhoka go bontsha gore re rata bakaulengwe le bogkailsadi go tswa pelong, e seng fela ka se re se buang, mme gape le ka se re se dirang. Fa re ratana, re a bo re etsa Rraarona e bong Jehofa. (1 Joh. 4:7, 8) Re bontsha gore re a ratana fa re itshwarelana. Ka sekai, motho mongwe a ka nna a re kgopisa, a bo a kopa gore re mo itshwarele. Re bontsha gore re rata motho yoo ka go mo itshwarele le go tlogela go akanya ka se a se dirileng.—Bakol. 3:13. *w20.07 24 ¶14-15*



## Mantaga, March 14

*Modimo o tlile go tsosa batho ba ba siameng le ba ba sa siamang mo basweng.—Dit. 24:15.*

A mongwe le mongwe wa batho ba ba tsositsweng o tla bo a na le motho yo a mo rutang Baebele fela jaaka re dira gompieno? A go tla bo go na le dipokano gore batho ba ba tsositsweng ba ye go rutlwa gore ba kgone go ruta ba bangwe ba ba tlileng go tsosiwa morago ga bone? Ga re itse, re tla bona kwa pele! Mme se re se itseng ke gore morago ga Puso ya ga Keresete ya Dingwaga di le Sekete, “lefa-tshe le tla tlala kitso ya ga Jehofa.” (Isa. 11:9) Re tla bo re tshwere phage ka mangana, mme gone, go tla bo go le monate! Ka nako ya Puso ya ga Keresete ya Dingwaga di le Sekete, batho botlhe ba ga Jehofa ba tla tswelela ba dira diphetogo gore ba mo itumedise. Seo se tla ba thusa gore ba kgone go utlwelela batho ba ba tla tsosiwang botlhoko, le gore ba kgone go ba thusa go fetola tsela e ba akanyang le e ba dirang dilo ka yone gore ba itumedise Jehofa. (1 Pet. 3:8) Ba ba tla bong ba tsositswe ba tla bona gore batho ba Modimo ba boikokobetso le gore ba sa ntse ba dira diphetogo gore ba itumedise Jehofa, mme seo se tla dira gore le bone ba batle go obamela Jehofa.—Bafil. 2:12. *w20.08 16 ¶6-7*

## Labobedi, March 15

*A mongwe le mongwe a tthatlhobe ditiro tsa gagwe, . . . a sa ipapise le motho yo mongwe.—Bagal. 6:4.*

Fa re ka dirisa kgakololo ya ga moapo-setoloi Paulo, re bo re simolola go itshe-katsheka sentle, re tla lemoga gore re na le bokgoni jo ba sa tshwaneng le jwa ba bangwe. Ka sekai, mogolwane mongwe a ka tswa a sa kgone go neela dipuo tse di monate jaaka bagolwane ba bangwe mme gone a atlega mo tirong ya go dira batho barutwa. Gongwe a ka tswa a sa kgone go rulaganya dilo sentle jaaka bagolwane ba bangwe, mme a ka tswa a itsege e le mogolwane yo baboledi ba ikutlwang ba go-

lolesegele go mo atamela fa ba batla dikgakololo tsa Dikwalo. Kgotsa a ka tswa a itsege e le motho yo o ratang go amogela baeng. (Baheb. 13:2, 16) Fa re lemoga gore re na le bokgoni bongwe, re tla itumela e bile re tla batla go thusa mo phuthegong ka dilo dingwe. Mme seo se tla dira gore re se ka ra fufegela ba bangwe. Le fa re na le maikarabelo a a farologaneng mo phuthegong, rotlhe re tlhoka go tokafatsa ti-relo e re e direlang Jehofa le bokgoni jwa rona. *w20.08 24 ¶16-18*

## Laboraro, March 16

*Ke ne ka bona boidiidi jo bogolo jwa batho, jo motho ope a neng a ka se ka a kgona go bo bala.  
—Tshen. 7:9.*

Mokaulengwe J. F. Rutherford o ne a neela puo ya setlhogo se se reng, “Boidiidi jo Bogolo” kwa kopanong e e neng e tshwaretswe kwa United States kwa Washington, D.C. ka 1935. Mo puong ya gagwe o ne a tlhalosa gore ke bomang ba ba welang mo setlhopheng sa ba “boidiidi jo bogolo,” jo go buiwang ka jone mo go Tshenolo 7:9. Pele Baithuti ba Baebele ba utlwa puo eno, ba ne ba akanya gore ba boidiidi jo bogolo ke setlhopho sa batho ba ba tla yang go tshela kwa legodimong mme ba ne ba sa ikanyege thata jaaka Bakeresete ba ba tloditsweng. Mokaulengwe Rutherford o ile a dirisa Baebele go tlhalosa gore ba boidiidi jo bogolo, ga ba a tlhophiwa gore ba ye go tshela kwa legodimong. Mme ba wela mo setlhopheng se Jesu a se bitsang dinku tse dingwe e bile ba tlile go falola “pitlagano e kgolo,” ba bo ba tshelela ruri mo lefatsheng. (Tshen. 7:14) Jesu o ile a re: “Ke na le dinku tse dingwe, tse e seng tsa lesaka leno; tseo le tsone ke tshwanetse go di tlisa, di tla reetsa lentswe la me, mme di tla nna letsomane le le lengwe, modisa a le mongwe.” (Joh. 10:16) Ba dinku tse dingwe ke Basupi ba ga Jehofa ba ba ikanyegang, ba ba nang le tsholofelo ya go tshelela ruri mo lefatsheng la Paradise.—Math. 25:31-33, 46. *w21.01 14 ¶1-2.*

## Labone, March 17

*Batho botlhe ba tla lo tlhoa ka gone lo le balatedi ba me, le fa go ntse jalo, yo o itshokileng go fitlha kwa bokhutlong o tla bolokwa.—Math. 10:22.*

Bakeresete ba tshwanetse go nna le boikgapo gore ba kgone go dira tiro ya go rera. (Math. 28:19, 20) Ga re tsholwe re na le boikgapo. Tota e bile go le gantsi re rata go dira dilo tse di motlhofo. Le fa go ntse jalo, ka dinako tse dingwe dilo tse di botlhokwa tse re tshwane-tseng go di dira, ga go motlhofo gore re di dire. Ka jalo, re tshwanetse go leka ka natla gore re nne boikgapo. Jehofa o dirisa moya o o boitshepo go re thusa gore re kgone go dira dilo tseo. (Bagal. 5:22, 23) Moaposetoloi Paulo o ne a le boikgapo. Mme o ne a tihalosa gore o ne a tshwanetse go “itaya” mmele wa gagwe gore a kgone go dira se se siameng. (1 Bakor. 9:25-27) O ile a kgothaletsa Bakeresete ba bangwe gore ba nne boikgapo le gore ba dire dilo tso-tlhe ka “mokgwa o montle le ka thulaganyo.” (1 Bakor. 14:40) Re tshwanetse go nna boikgapo gore re tswela re direla Jehofa, mme seno se akaretsa go nna gone ka metlha mo tirong ya go rera dikgang tse di molemo.—Dit. 2:46. w20.09 6-7 ¶15-17

## Labotlhano, March 18

*Dikgang tse di molemo di tshwane-tse go rerwa pele mo ditšhabeng tsothle.—Mar. 13:10.*

Mo dinageng di le dintsi, batlhanka ba ga Jehofa ba sa ntse ba na le kgololesego ya go rera. A go ntse jalo le mo nagenng ya lona? Fa go le jalo, ipotse jaana: ‘Ke dirisa jang nako ya me fa re sa ntse re na le kgololesego ya go rera?’ Re tshela mo dinakong tse di kgaatlang ka gone re dira ka natla mo tirong e e seng kana ka sepe ya go rera le go ruta. Go na le dilo di le dintsi tota tse re

ka di dirang mo tirelong ya ga Jehofa. Re tshwanetse go dira eng fa re sa ntse re na le kgololesego ya go rera? (2 Tim. 4:2) Leka go bona gore a wena kgotsa mongwe mo lelapeng la lona a ka kgona go dira diphetogo a bo a oketsa tirelo ya gagwe gongwe ka go nna mmulatse-la. Nnete fela ke gore, eno ga se nako ya gore re ikgobokanyetse dikhumo ka gone ga re kitla re tsena le tsone kwa lefatsheng le lesa. (Dia. 11:4; Math. 6: 31-33; 1 Joh. 2:15-17) Bakaulengwe le bo-kgaitsadi bangwe ba ile ba ithuta puo e nngwe gore ba kgone go thusa batho gore ba ithute ka Jehofa. Phuthego ya Modimo e dirile dikgatiso ka dipuo di feta 1 000 go ba thusa! w20.09 16 ¶9-11

## Matlhatso, March 19

*Tswela o lwa ntwa e e molemo.  
—1 Tim. 1:18.*

Masole a mmatota a a ikanyega. Ba dira ka natla go sireletsa batho ba ba ba ratang le dilo tse di tlhwatlhwakgolo mo go bone. Paulo o ile a kgothaletsa Timotheo gore a ineele mo Modimong, se se rayang gore a ikanyege mo go Ene. (1 Tim. 4:7) Fa re rata Modimo ka pelo yotlhe, re tla kgona go ngangatelela boammaaruri. (1 Tim. 4:8-10; 6:6) Lesole la mmatota le tshwanetse go nna boikgapo gore le kgone go ikatisa ka metlha gore le nne le siametse go ya ntsweng. Timotheo o ile a kgona go lwantshana le dithaelo tsa ga Satane ka gone o ile a dirisa kgakololo ya ga Paulo ya gore a lwantshe dikeletso tse di sa siamang, a leke go nna le botho jo bo siameng le gore a nne a kopanela le Bakeresete ba bangwe. (2 Tim. 2:22) Gore Timotheo a kgone go dira seno, o ne a tshwanetse go nna boikgapo. Le rona re tshwanetse go nna boikgapo gore re kgone go lwantsha dikeletso tse di sa siamang. (Bar. 7:21-25) Gape re tlhoka boikgapo gore re kgone go apola botho jo bogologolo re bo re apara jo bosha. (Baef. 4:22, 24) Mo godimo ga moo, re

tlhoka boikgapo gore re ye dipokanong le fa re ka tswa re lapile.—Baheb. 10:24, 25. *w20.09* 28 ¶9-11

## Sontaga, March 20

*Ke ikemiseditse go ikobela ditaelo tsa gago ka dinako tsotlhe, go fitlha kwa bokhutlong.*

—Pes. 119:112.

Re tlhoka go nna pelotelele fa re thusa motho yo re ithutang le ene gore a tshwanelegele go kolobediwa. Mme gone, re tlhoka go itse gore a mme gone motho yoo o batla go direla Jehofa. Ka sekai, a go na le dilo dingwe tse a di dirang tse di bontshang gore o leka go ikobela ditaelo tsa ga Jesu? Kgotsa a o kगतliwa fela ke go ithuta Baebele? Nna o leka go bona gore a motho yo o ithutang le ene o dira diphetogo. Ka sekai, a o kgona go tlhalosa gore o iku-tlwa jang ka Jehofa? A o a rapela? (Pes. 116:1, 2) A o rata go bala Baebele? (Pes. 119:97) A o ya dipokanong? (Pes. 22:22) A go na le diphetogo tse a di dirileng tse di bontshang gore o dirisa se a se ithutang? A o tlotlela ba lelapa le ditsala tsa gagwe ka se a se ithutang? (Pes. 9:1) Sa botlhokwa le go feta, a o batla go nna Mosupi wa ga Jehofa? (Pes. 40:8) Fa motho yo o ithutang le ene a sa dire diphetogo dipe fela, bua le ene mme o leke go bona gore matsapa di a tsaya kae. Fa o bua le ene, nna bonolo mme gone o sa potapote. *w20.10* 18 ¶14-15

## Mantaga, March 21

*Ene yo o nthomileng o na le nna; ga a ka a ntlogela ke le nosi, ka gone ka metlha ke dira dilo tse di mo itumedisang.—Joh. 8:29.*

Rraagwe Jesu e bong Jehofa ka metlha o dira ditshwetso tse di siameng. Batsadi ba ga Jesu ba mo lefatsheng le bone ba ile ba dira ditshwetso tse di siameng. Mme gone, fa Jesu a setse a godile, o ne a tshwanelwa ke go itire-

la ditshwetso. (Bagal. 6:5) Le ene o ne a kgona go ithlophela gore o batla go dira eng fela jaaka rona. O ne a ka nna a tlhophaga go itirela maratwaepelo go na le go dira se Jehofa a se batlang. Mme gone, ga a ka a dira jalo, go na le moo, o ile a dira se Jehofa a se batlang. Fa Jesu a sena go itse gore Jehofa o batla gore a dire eng, o ile a tlhophaga go mo ikobela. (Joh. 6:38) Jesu o ne a itse gore batho ba le bantsi ba tlele go mo tlhoa, mme seo se ne se mo tshwenya. Le fa go ntse jalo, o ne a tswelela a ikobela Jehofa. Fa a ne a kolobediwa ka 29 C.E., selo sa botlhokwa thata mo go ene e ne e le go dira thato ya ga Jehofa. (Baheb. 10:5-7) Le fa a ne a tloga a swa mo koteng ya tlhokofatso, o ne a tswelela a ikemiseditse go dira thato ya ga Rraagwe.—Joh. 19:30. *w20.10* 29 ¶12; 30 ¶15

## Labobedi, March 22

*Ga nkitla ke go tlogela, e bile ga nkitla ke go latlha.—Baheb. 13:5.*

A go na le bakaulengwe kgotsa bo-kgaitsadi mo phuthegong ya lona ba ba lwalang, ba ba nang le mathata mangwe kgotsa ba ba tlhokafaletsweng ke mongwe mo lelapeng? Fa re lemoga gore mongwe o tlhoka thuso re ka kopa Jehofa gore a re thuse go bua kgotsa go dira sengwe se se ka bontshang motho yoo gore re a mo rata. Se o tla se buang kgotsa se o tla se dirang se ka kgothatsa mokaulengwe yoo kgotsa kgaitsadi yoo fela thata. (1 Pet. 4:10) Re a itse gore re ka nna pelokgale ka gone Jehofa o tla re thusa. O dirisa Jesu le bae-ngele go re thusa. Gape a ka dirisa le ba-laodi go re thusa. Mme re a itse gore Jehofa o dirisa moya o o boitshepo go tlhotlheletsa bakaulengwe le bokgaitsadi gore ba re thuse. Ka jalo, fela jaaka moaposetoloi Paulo, le rona re na le ma-baka a le mantsi a go bo re ka re: “Jehofa ke mothusi wa me; ga ke na ke boi-fa. Motho o ka ntirang?”—Baheb. 13:6. *w20.11* 17 ¶19-20

## Laboraro, March 23

*Fa lo nna lo ritibetse e bile lo ntshepa, lo tla nna le maatla.*

—Isa. 30:15.

Baaposetoloi ba ne ba na le bosupi jwa gore Jehofa o ba eme nōkeng. O ne a ba neile maatla a go dira dikgakgamatso. (Dit. 5:12-16; 6:8) Mme gompiano Jehofa ga a re neye maatla a go dira dikgakgamatso. Le fa go ntse jalo, o dirisa Lefoko la gagwe go re bolelela gore fa re bogisiwa ka ntlha ya go bo re dira dilo tse di siameng, re ka kgona go itumela ka gonne re itse gore re a mo itumelisa le gore moya wa gagwe o o boitshepo o tla re thusa. (1 Pet. 3:14; 4:14) Ka jalo, ga re a tshwanela go tshwenyega ka gore re tla dira eng fa re bogisiwa mo nakong e e tlang. Go na le moo, re tshwanetse go nonotsha tumelo ya rona mo go Jehofa gore o tla re ema nōkeng le go re thusa. Re tshwanetse go tshepa se Jesu a ileng a se bua. O ile a re: “Ke tla lo naya molomo le botlhale, tse baganetsi ba lona botlhe ba le mmogo ba se kitlang ba kgona go emelelana le tsone kgotsa go di ganetsa.” Gape o ile a re solofetsa gore: “Lo tla bona meya ya lona ka go itshoka ga lona.” (Luke 21:12-19) O se ka wa leballa gore Jehofa o gopola le dilo tse dinnye tse di sa reng sepe ka batlhanka ba gagwe ba ba tlhokafetseng, gore a tle a kgone go ba tsosa. *w21.01 4 ¶12*

## Labone, March 24

*Ke na le tsholofelo . . . gore Modimo o tlile go tsosa batho ba ba siameng le ba ba sa siamang mo baswing.—Dit. 24:15.*

Moaposetoloi Paulo ga se ene motho wa ntlha go bua ka tsogo ya baswi. Tlho go ya lotso e bong Jobe le ene o ile a bua ka yone. Jobe o ne a tlhomamisegile gore Modimo o tlile go mo gopola a bo a mo tsosa. (Jobe 14:7-10, 12-15) “Tsogo ya baswi” ke nngwe ya ‘dithuto tsa motheo’ tse Bakeresete botlhe ba di dumelang. (Baheb. 6:1, 2) Mo go Bakorintha

wa ntlha kgaolo 15 Paulo o bua ka tsogo ya baswi. Se a ileng a se kwala se ka tswa se ile sa kgothatsa Bakeresete ba motlha wa gagwe. Le fa o ka tswa o na le dingwaga di le dintsi o dumela gore baswi ba tlile go tsosiwa, lekwalo la Bakorintha wa ntlha kgaolo 15 le tla go kgothatsa le go nonotsha tsholofelo ya gago ya gore ruri baswi ba tlile go tsoga. Tsogo ya ga Jesu Keresete e re tlhomamisetsa gore batho ba re ba ratang ba ba suleng ba tlile go tsoga. Tsogo ya ga Jesu e ne e le nngwe ya “dikgang tse di molemo” tse Paulo a neng a di bolelela Bakeresete ba kwa Korintha. (1 Bakor. 15: 1, 2) Tota e bile, Paulo o ile a re fa Mokeresete a sa dumele mo tsogong ya ga Jesu, tumelo ya gagwe ga e na mosola. —1 Bakor. 15:17. *w20.12 2 ¶2-4*

## Labotlhano, March 25

*Petere o ne a gopola se Jesu a neng a se bua . . . Mme o ne a tswela kwa ntle a bo a lela mo go botlhoko.—Math. 26:75.*

Ke eng se se thusitseng moaposetoloi Petere gore a se ka a tlhola a kgobega marapo? O ile a gopola gore Jesu o kile a mo rapelela gore a se ka a felelwa ke tumelo. Jehofa o ile a araba thapelelo eo. Moragonyana, Jesu o ile a bonala kwa go Petere gongwe e le ka gonne a ne a batla go mo kgothatsa. (Luke 22: 32; 24:33, 34; 1 Bakor. 15:5) Gape Jesu o ile a bonala kwa baaposetoloing ba gagwe morago ga gore ba fetse bosigo jotlhe ba leka go tshwara ditlhapi mme ba sa tshware sepe. Ka nako eo, Jesu o ile a naya Petere tshono ya gore Petere a mmolelele gore o a mo rata. Jesu o ne a setse a itshwaretse Petere mme o ne a mo naya tiro e e oketsegileng. (Joh. 21: 15-17) Tsela e Jesu a neng a dirisana le Petere ka yone e ne e bontsha gore o kutlwelobotlhoko fela jaaka Rraagwe. Ka jalo, fa re dirile diphofo ga re a tshwanela go akanya gore Jehofa ga a kitla a re itshwarela. Gopola gore Satane o batla gore re ikutlwe jalo. Go na le moo, re tshwanetse go nna re gopotse gore Je-

hofa o a re rata, o tlhologanya makoa a rona le gore o batla go re itshwarela. Mme re tshwanetse go mo etsa fa batho ba bangwe ba re utlwise botlhoko.—Pes. 103:13, 14. *w20.12 20-21 ¶17-19*

### **Matlhatso, March 26**

*Ke tla tswelela ke le pelokgale.*  
—Pes. 27:3.

Re ka ithuta mo dikaong tsa batho ba ba ileng ba palelwa ke go nna ba ritibetse le go tshema Jehofa. Fa re bala le go ithuta ka bone, seo se ka re thusa gore re se ka ra dira diphoso tse ba ileng ba di dira. Asa o ne a ikanya Jehofa fa a ne a na le mathata. Mme moragonyana ga a ka a dira jalo. Go na le moo, o ne a leka go itharabololela mathata a gagwe. (2 Ditir. 16:1-3, 12) Kwa tshimologong, go ne go lebega e kete leano la ga Asa la go kopa Basiria gore ba mo thusa go lwa le Iseraele, le ne le tlile go atlega. Mme gone, ga go a ka ga nna le kagiso ka lobaka lo loleele mo Juda. Jehofa o ile a bua le Asa a dirisa moporofeti wa gagwe a re: “Ka gonne o ne wa ikaega ka kgosi ya Siria mme wa se ka wa ikaega ka Jehofa Modimo wa gago, ka lebaka leo mophato wa sesole wa kgosi ya Siria o falotse mo seatleng sa gago.” (2 Ditir. 16:7) Ka metlha fa re le bana le mathata, re tshwanetse go kopa gore Jehofa a re kaele a dirisa Lefoko la gagwe, go na le go leka go itharabololela mathata a rona. Le fa re tlhoka go dira tshwetso ka bonako, re tshwanetse go ikaega ka Jehofa mme o tla re thusa go dira tshwetso e e siameng. *w21.01 6 ¶13-15*

### **Sontaga, March 27**

*Ga ba kitla ba tlhola ba tshwarwa ke tlala.*—Tshen. 7:16.

Gone jaanong, batlhanka bangwe ba ga Jehofa ba bolawa ke tlala ka gonne ba se na madi a go reka dijo tse ba di tlhokang kgotsa ka ntlha ya mathata a a bakiwang ke dintwa. Bangwe ba mo kgolegeleng ka gonne ba direla Jehofa.

Le fa go ntse jalo, ba boidiidi jo bogolo ba itumetse ka gonne ba a itse gore fa ba sena go falola fa lefatshe leno le fedisiwa, ba tlile go nna le dijo tse dintsi e bile Jehofa o tla tswelela a ba kaela. Fa Jehofa a fedisa lefatsheng la ga Satane, o tlile go netefatsa gore ba boidiidi jo bogolo ba sireletsegile kgaatlhanong le bogale jwa gagwe jo bo tshwanang le “mogote . . . o o fisang.” Morago ga pitlagano e kgolo, Jesu o tla kaela ba ba tla bong ba falotse go ya kwa ‘metsing a botshelo’ jo bo sa khutleng. (Tshen. 7:17) Ba boidiidi jo bogolo ba na le tsholofelo e e itumedisang. Mo bathong botlhe ba ba kileng ba tshela, ke bone ba ba nang le tsholofelo ya gore ba ka nna ba se ka ba swa! (Joh. 11:26) Ruri eo ke tsholofelo e e itumedisang. Mme ba leboga Jehofa le Jesu go bo ba ba neile yone. *w21.01 16-17 ¶11-12*

### **Mantaga, March 28**

*Morena o a ikanyega, e bile o tla lo nonotsha a bo a lo sireletsa.*  
—2 Bathes. 3:3.

Mo bosigong jwa bofelo fa Jesu a ne a le mo lefatsheng, o ile a akanya ka mathata a barutwa ba gagwe ba neng ba tlile go le bana le one. E re ka a ne a ba rata, o ne a kopa Rraagwe gore a “ba tlhokomele ka ntlha ya yo o boikepo.” (Joh. 17:14, 15) Jesu o ne a itse gore go ise go ye kae o tlile go boela kwa legodimong, le gore Satane Diabolo o tla tswelela a lwa le batho ba ba batlang go direla Jehofa. Ka jalo, batho ba ga Jehofa ba ne ba tla tlhoka go sirelediwa. Gompie no re tlhoka gore Jehofa a re sireletse go gaisa le e leng pele. Satane o latlhetse mo lefatsheng “a le bogale jo bogolo.” (Tshen. 12:12) O dirile gore batho bangwe ba akanye gore fa ba re bogisa ba direla “Modimo tirelo e e boitshepo.” (Joh. 16:2) Batho bangwe ba ba sa dumeleng mo Modimong ba a re bogisa ka gonne re sa tshwane le batho ba lefatshe leno. Mme gone, ga re tshoge fa batho ba re bogisa. Goreng? Karabo e mo temaneng ya gompieno. *w21.03 26 ¶1, 3*

## Labobedi, March 29

*[Ga go na sepe se se ka kgonang] go dira gore Modimo a se ka tlhola a re rata ka lorato lo a re bontshitseng lone a dirisa Keresete Jesu Morena wa rona.—Bar. 8:39.*

Sengwe le sengwe se Jehofa a se dirang, o se dira ka gonne a rata ba bangwe. O bontsha gore o a re rata ka go re tlamela ka dilo tsothle tse re di tlhokang. E re ka Jehofa a re rata, o ile a re direla thulaganyo ya thekololo. Jesu le ene o ile a re bontsha gore o a re rata ka go re swela. (Joh. 3:16; 15:13) Ga go na sepe se se ka thibelang Jehofa le Jesu go rata ba ba ikanyegang mo go bone. (Joh. 13:1; Bar. 8:35) Ka tsela e e tshwanang, sengwe le sengwe se tlhogo ya lelapa a se dirang, o tshwanetse go se dira ka go bo a rata ba bangwe. Goreng seo se le bothokwa? Moaposetoloi Johane o ile a re: “Yo o sa rateng mokaulengwe wa gagwe, yo a mmonang, [kgotsa ba lelapa la gagwe] ga a ka ke a rata Modimo, yo a iseng a mmonne.” (1 Joh. 4:11, 20) Monna yo o ratang ba lelapa la gagwe le yo o batlang go etsa seka o sa ga Jehofa le Jesu, o tile go thusa ba lelapa la gagwe gore ba nne ditsala tsa ga Jehofa, go dira gore ba ikutlwe ba sireletsegile le go ba tlamela ka dilo tse ba di tlhokang. (1 Tim. 5:8) O tla ruta le go kgalamela bana ba gagwe. O tla tokafatsa tselala e a dirang ditshwetso ka yone gore a itumedise Jehofa le ba lelapa la gagwe. *w21.02 5 ¶12-13*

## Laboraro, March 30

*Latlhela mokgweleo wa gago mo go Jehofa, mme o tla go tshegetsa.—Pes. 55:22.*

Jehofa o a itse gore dilo tse di bosula tse di re diragalelang, di ka dira gore re ikutlwe re se na mosola. Mme o bona dilo tse di molemo tse re di dirang le fa rona re sa kgone go di lemoga. (1 Joh. 3:19, 20) Motho mongwe a ka nna a leka ka natla go tlogela go dira sengwe se se phoso. Le fa go ntse jalo, motho yoo a ka dira phoso eo gape mme seo se bo

se dira gore a kgobegwe marapo. Gone re ikutlwa molato fa re dirile boleo. (2 Bakor. 7:10) Mme gone, ga re a tshwanela go ikutlwa molato thata jaana mo re feleletsang re akanya gore ga re na mosola le gore Jehofa ga a kitla a re itshwanela. Go akanya jalo go ka dira gore re tlogele go direla Jehofa. Go na le gore o nnele go ikutlwa molato, baakanya dilo fa gare ga gago le Jehofa ka go mo kopa gore a go itshwarele. (Isa. 1:18) Fa Jehofa a lemoga gore o ikwatlhela phoso e o e dirileng e bile o dira sotlhe se o ka se kgonang go fetoga, o tla go itshwanela. Gape bua le bagolwane. Ba tla go thusa gore o boe o nne tsala ya ga Jehofa gape.—Jak. 5:14, 15. *w20.12 23 ¶5-6*

## Labone, March 31

*[Tshwara] basadi ba ba godileng jaaka bommaago, makgarebana jaaka bokgaitradio.—1 Tim. 5:2.*

Jesu o ne a tlotla basadi. O ne a sa tshware basadi ka tsela e Bafarasai ba neng ba ba tshwara ka yone. Bafarasai ba ne ba akanya gore banna ba botlhokwa go feta basadi. Ba ne ba sa bue le basadi fa pele ga batho e bile ba sa bue le bone gotlhelele ka Dikwalo. Jesu ene o ne a bua le basadi le banna ka dilo tse di botlhokwa tse di tswang mo Dikwalong. (Luke 10:38, 39, 42) Gape o ne a letla gore basadi ba tsamaye le ene fa a ne a ya go rera kwa mafelong a mangwe. (Luke 8:1-3) Gape Jesu o ile a letla gore basadi e nne bone ba ba bolelelang baaposetoloi gore o tsositswe mo baswing. (Joh. 20:16-18) Moaposetoloi Paulo o ile a bolelela Timotheo gore a tlotle basadi. Paulo o ne a itse gore mmaagwe Timotheo le nkokoagwe, ke bone ba ba ileng ba simolola go mo ruta Dikwalo tse di boitshupo. (2 Tim. 1:5; 3:14, 15) Fa Paulo a ne a kwalela Baroma, o ile a dumedisa bokgaitradio a ba bitsa ka maina. Gape o ne a lemoga gore bokgaitradio ba dira ka natla e bile o ile a ba bolelela gore o lebogela tiro e ba e dirang. —Bar. 16:1-4, 6, 12; Bafil. 4:3. *w21.02 15 ¶5-6*

## Labotlhamo, April 1

*Dilo tsoatlhe tse di neng tsa kwalwa mo Dikwalong bogologolo, di ne tsa kwalelwa go re ruta.—Bar. 15:4.*

A go na le mathata mangwe a o lebaneng le one? Gongwe mongwe mo phuthengong o go kgopisitse. (Jak. 3:2) Kgotsa gongwe batho ba o berekang le bone kgotsa ba o tsenang sekolo le bone ba a go sotla ka gonne o le Mosupi wa ga Jehofa. (1 Pet. 4:3, 4) Kgotsa gongwe ba lelapa la gago ba leka go go thibela go ya dipokanong kgotsa go bua le ba bangwe ka se o se dumelang. (Math. 10:35, 36) Fa go le thata gore o itshokele mathata a o lebaneng le one, o ka nna wa akanya gore go botoka gore o tlogele go direla Jehofa. Mme gone, o ka tlhomamisa-ga gore go sa kgathalesege gore o lebana le ditoko dife, Jehofa o tla go naya botlhale jwa gore o dire ditshwetso tse di siameng le maatla a gore o kgone go itshoka. Jehofa o ile a tlhomamisa gore go kwalwa dipego dingwe tsa batlhanka ba gagwe ba ba ileng ba itshokela mathata mo Baebeleng. Goreng? Gore re kgone go ithuta mo go tsoone. Ke sone se Jehofa a ileng a tlhotlheletsa moapose-toloi Paulo gore a se kwale. Fa re bala ka dipego tsa batlhanka ba Modimo ba ba ileng ba itshokela mathata, seno se ka re kgothatsa le go nonotsha tumelo ya rona. Mme gore dipego tseno di kgone go re solegela molemo, ga re a tshwanela go bala Baebele fela. Re tshwanetse go letla Baebele go fetola tsela e re akanyang ka yone le e re ikutlwang ka yone. *w21.03 14 ¶1-2*

## Matlhatso, April 2

*[Bonang] gore masimo a masweu go ka robiwa.—Joh. 4:35.*

A o leba batho ba o ba rerelang ba tshwana le masimo a a siametseng go ka rojwa? Fa go le jalo, o tla dira dilo tseno tse tharo: Sa ntlha, ga o kitla o goga dinao mo tirong ya go rera. Nako ya thobo e khutshwane, ka jalo, ga re a tshwanela go senya nako. Sa bob-

di, o tla itumelela go dira ka natla mo tirong ya go rera dikgang tse di molemo. Baebele ya re batho ba a “ipela ka nako ya thobo.” (Isa. 9:3) Sa boraro, ga o rerela motho, ga o kitla o tsaya gore motho yoo a ka se fetoge. O tla lemo-ga gore le ene a ka kgona go nna morutwa wa ga Jesu, ka jalo o tla bua le ene ka dilo tse a di kgaatlhegelang. Bangwe ba balatedi ba ga Jesu ba ka tswa ba ne ba akanya gore Basamarea ba ka se fetoge. Mme Jesu ene o ne a sa akanye jalo. O ne a itse gore ba ka kgona go nna barutwa ba gagwe. Le rona ga re a tshwanela go akanya gore batho ba ba mo tshimong ya rona ba ka se fetoge. Moapose-toloi Paulo o re tlhometse sekao se se molemo. O ne a itse gore batho ba a ba rerelang ba dumela eng le gore ba kgaatlhegela eng e bile o ne a lemoga gore le bone ba ka nna barutwa ba ga Jesu. *w20.04 8-9 ¶3-4*

## Sontaga, April 3

*Fa e le gore Jehofa o kgona go bona ba ba mo Lebitteng le ba ba mo lefelong la tshenyego, ruri o kgona go bona se se mo dipelong tsa batho!*  
—Diane 15:11.

Go na le go athola motho go ya ka tsela e a itshwarang ka yone, leka go tlhaloganya gore a ka tswa a ikutlwa jang. Jehofa ke ene fela a re itseng ka botlalo. Ka jalo, mo kope gore a go thusa go leba batho ba bangwe jaaka a ba leba le gore a go thusa gore o ba utlwele botlhoko. Re tshwanetse go bontsha bakaulengwe le bokgaittsadi botlhe kutlwebotlhoko. Fela jaaka Jona, Elija, Hagare le Lote, bakaulengwe le bokgaittsadi ba rona ba lebana le mathata. Ka dinako tse dingwe ke mathata a ba ipaketseng one. Boammaaruri ke gore le rona re a tle re ipakele mathata. Ke gone ka moo Jehofa a reng re utlwelane botlhoko. (1 Pet. 3:8) Ka jalo, re tshwanetse go reetsa bakaulengwe le bokgaittsadi ba rona, re tshwanetse go ithuta mo go bone e bile re tshwanetse go ba utlwele botlhoko. *w20.04 18-19 ¶15-17*

## Mantaga, April 4

*Keresete . . . o ne a boga ka ntlha ya lona, a lo tlhabela sekao gore lo se latele gaufiufi. —1 Pet. 2:21.*

Jesu o re tlhometse sekao se re ka se etsang sa go ikobela Jehofa. Ka jalo, selo sa botlhokwa se re ka se dirang fa re batla go ikobela Jehofa, ke go sala sekao sa ga Jesu morago. (Joh. 8:29) Gore re tswelele re tsamaya mo boammaaruring, re tshwanetse go tlhatswega pelo gore Jehofa ke Modimo wa boammaaruri, le gore sengwe le sengwe se a re bolelelang sone mo Lefokong la gagwe ke boammaaruri. Gape re tshwanetse go tlhatswega pelo gore Jesu ke ene Mesia yo o solofeditsweng. Batho ba le bantsi gompiano ga ba dumele gore Jesu ke Kgosi e e tloditsweng ya Bogosi Jwa Modimo. Johane o ne bolelela pele gore batsietsi ba le bantsi, “ba ne ba tla tsietsa” ba ba sa ikemisetsang go femela boammaaruri ka ga Jehofa le Jesu. (2 Joh. 7-11) Gape o ne a re: “Moaki ke mang fa e se yo o latolang gore Jesu ke Keresete?” (1 Joh. 2:22) Fa re sa batle go tsiediwa, re tshwanetse go ithuta Lefoko la Modimo. Fa re dira jalo, re tla kgona go itse Jehofa le Jesu. (Joh. 17:3) Gape re tla tlhatswega pelo gore re mo boammaaruring. *w20.07 21 ¶4-5*

## Labobedi, April 5

*A re direng tshwetso ya gore re se ka ra baya sengwe se se kgopang fa pele ga mokaulengwe.*

—Bar. 14:13.

Re ka tila go kgopisa bakaulengwe le bogkaiatsadi ba rona ka go ba letla gore ba dire dilo tse ba di batlang, go na le go ba pateletsa gore ba dire se rona re se batlang. (Bar. 14:19-21; 1 Bakor. 8:9, 13) Fa re dira jalo, re tla bo re bontsha gore ga re tshwane le motho yo o tabogang mo lobelong lwa mmatotat ka gonne o batla gore e nne ene a fenyang. Batabogi ba nna ba akantse

fela ka se se ka ba thusang gore ba fene. Ka jalo, ba ka nna ba leka go kgorometsa ba bangwe. Rona ga re gaisane. (Bagal. 5:26; 6:4) Boikaelelo jwa rona ke gore re thuse batho ba le bantsi gore ba bone botshelo jo bo sa khutleng. Ka jalo, re leka ka natla go dirisa kgakololo ya gore re se ka ra ‘kgatlhegela dilo tse di amang rona fela, mme gape re kgatlhegele le dilo tse di amang ba bangwe.’ (Bafil. 2:4) Jehofa o re solofetsa gore fa re ka wetsa lobelo lwa botshelo ka boikanyegi, re tla tshelela ruri, e ka tswa e le kwa legodimong kgotsa mo lefatsheng la paradise. *w20.04 28 ¶10; 29 ¶12*

## Laboraro, April 6

*Bano ke bone ba ba tswang mo pitlaganong e kgolo.—Tshen. 7:14.*

Batho ba le bantsi ba tliile go falola ba bo ba tshela mo lefatsheng le lesa. Batho bao, ba tliile go bona fa loso lo fengwa ka tsela e nngwe, e leng ka nako ya fa batho ba le bantsi ba ba tlhokafetseng ba tla bong ba tsosiwa. Akanya fela gore re tla bo re itumetse jang fa re bona seo se diragala! (Dit. 24:15) Mme botlhe ba ba tla tsweleng ba ikanyega mo go Jehofa, ba tliile go fenyala loso le ba le ruileng mo go Adame. Mme ba tla kgona go tshelela ruri. Bakeresete botlhe ba tshwanetse go anaanela mafoko a a buang ka tsogo ya baswi a moapo-setoloi Paulo a ileng a a kwalela Bakorinth. Se Paulo a ileng a se kwala se tshwanetse sa re kgothaletsa go dira sotlhe se re ka se kgonang go ikobela kgakololo ya gagwe ya gore re dire ka natla “mo tirong ya Morena.” (1 Bakor. 15:58) Fa re dira ka natla mo tirong eo, re tla itumelela botshelo jo bo monate kwa lefatsheng le lesa. Botshelo joo bo tliile go nna monate go feta kafa re ka akanyang ka gone. Seno se tla re bontsha gore tiro e re e direlang Jehofa, ga se ya lefela. *w20.12 13 ¶16-17*



## Labone, April 7

*Masole a tsone a phuthegile mmogo gore a twe le yo o palameng pitse le masole a gagwe.—Tshen. 19:19.*

Go lebeга boporofeti jo bo mo go Esekiele 38:10-23; Daniele 2:43-45; 11:44-12:1; le Tshenolo 16:13-16, 21 bo bua ka ditiragalo tse di tla diragalang ka nako e le nngwe. Fa e le gore go jalo, re akanya gore dilo tse di latelang di tlile go diragala. Fa pitlagano e kgolo e sena go simologa, 'dikgosi tsa lefatshe lotlhe' di tla dira kgoлагano. (Tshen. 16:13, 14) Fa ba kopane jalo Baebele e ba bitsa, "Gogo wa lefatshe la Magogo." (Esek. 38:2) Ba tlile go thasela batho ba Modimo ba bo ba leka go ba fedisa. Moapose toloi Johane o ile a porofeta ka sefako se segolo se se neng se tla tswa kwa legodimo se bo se itaya baba ba Modimo. Sefako seo se ka tswa se tshwantshetsa molaetsa wa katlholo o o tla rerwang ke batlhanka ba ga Jehofa. Gongwe molaetsa oo ke one o tla dirang gore Gogo wa Magogo a tlhasele batho ba Modimo e bile a leke go ba fedisa.—Tshen. 16:21. *w20.05 15 ¶13-14*

## Labotlhamo, April 8

*Fa lona, le fa gone lo le bosula, lo kgona go naya bana ba lona dimpho tse di molemo, ga go pelaelo gore Rraalona yo o kwa legodimong le ene o tla naya ba ba mo kopang moya o o boitshepo fa ba o kopa!—Luke 11:13.*

Moya o o boitshepo wa Modimo ke mpho e nngwe gape e re tshwanetseng go e tsaya e le botlhokwa. Fa re akanya re bo re bona tsela e moya o o boitshepo o re thusang ka yone seo se ka dira gore re o lebogele. Pele Jesu a ya kwa legodimong o ile a raya balatedi ba gagwe a re: "Lo tla amogela maatla fa moya o o boitshepo o goroga mo go lona, mme lo tla nna basupi ba me . . .

go ya karolong e e kwa kgakalakakala ya lefatshe." (Dit. 1:8) E re ka moya o o boitshepo o re thusa go rera dikgang tse di molemo, gompieno go na le Basupi ba ga Jehofa ba feta dimilione di le robedi. Gape re itumelela go nna mo paradaiseng ya semoya ka gonne moya wa Modimo o o boitshepo o re thusa go nna le dinonofo tsa moya, e leng, lora-to, boipelo, kagiso, bopelotelele, bopelonomi, molemo, tumelo, bonolo le boikgapo. Tseno ke dinonofo tse moya o o boitshepo o re thusang go nna le tso-ne. (Bagal. 5:22, 23) Ruri moya o o boitshepo ke mpho e e tlhwalhlwakgolo! *w20.05 28 ¶10; 29 ¶13*

## Matlhatso, April 9

*E re ka loso lo nnile gone ka motho a le mongwe, tsogo ya baswi le yone e tla nna gone ka motho a le mongwe.—1 Bakor. 15:21.*

Go na le mabaka a le mantsi a a dirang gore re dumele gore fa batho ba tsosiwa, re tla kgona go ba itse. Ka sekai, tsela e Jehofa a ile a tsosa batho ka yone mo nakong e e fetileng, e ka re thusa go tlhaloganya seno. Re solofela gore fa Jehofa a tsosa batho, o tla dira gore ba lebege, ba bue le go akanya ka tsela e ba neng ba akanya ka yone pele ba tlhokafala. Gopola gore Jesu o ne a tshwantsha loso le boroko, gape o ne a tshwantsha go tsosiwa mo baswing le go tsosiwa mo borokong. (Math. 9:18, 24; Joh. 11:11-13) Fa motho a tswa mo borokong, o bua le go lebeга ka tsela e re mo itseng ka yone, e bile o sa ntse a gopola dilo tse di diragetseng pele a robala. Akanya ka se se diragaletseng Lasaro. O ne a na le malatsi a le manê a tlhokafetse, ka jalo mmele wa gagwe o ne o simolola go bola. Mme fa a sena go tsosiwa, bokgaitسادie ba ne ba lemoga gore ke ene mme le ene o ne a ba gopola.—Joh. 11:38-44; 12:1, 2. *w20.08 14 ¶3; 16 ¶8*

## Sontaga, April 10

*Poloko ya rona e tswa kwa Modimong wa rona, yo o ntseng mo setulong sa bogosi, le kwa go Kwana.*

—Tshen. 7:10.

Ka tsela nngwe, batlodiwa le ba dinku tse dingwe ba a tshwana. Jehofa o ba rata ka go lekana. Botlhe ba botlhokwa mo go ene. Re itse seno ka gonne o ba rekile botlhe ka madi a Morwawe yo a mo ratang fela thata. Batlodiwa le ba dinku tse dingwe ba farologane fela ka gonne ba na le ditsholofelo tse di sa tshwaneng. Mme gone, botlhe ba tshwanetse go tswela ba ikanyega mo go Jehofa le Jesu. (Pes. 31:23) E bile moya o o boitshepo o kgonna dira ka tsela e e tshwanang mo go rona rotlhe. Jehofa o naya motho moya o o boitshepo ka gonne a o tlhoka, e seng ka gonne a tlo ditse kgotsa a sa tlo diwa. Jehofa o neile batlhanka ba gagwe botlhe tsholofelo e e itumedisang. (Jer. 29:11) Kwa Segopotso sa loso lwa ga Keresete, rotlhe re na le tshono ya go baka Modimo le Keresete. Re ba lebogela dilo tse di molemo tse ba re diretseng tsone ka gonne dilo tse di dira gore re kgone go bona botshelo jo bo sa khutleng. Segopotso ke pokano ya botlhokwa e Bakeresete ba e tshwarang ngwaga le ngwaga. *w21.01 18 ¶16; 19 ¶19*

## Mantaga, April 11

*Nnang lo dire seno.—1 Bakor. 11:25.*

Batho ba le bantsi ba ba nnang teng kwa Segopotso ba na le tsholofelo ya go tshela mo lefatsheng. Jaanong, goreng ba nna gone kwa Segopotso? Fa batho ba ya lenyalong, ba a bo ba batla go ema batho ba ba nyalanang nökeng le go ba bontsha gore ba a ba rata. Ka tsela e e tshwanang, ba dinku tse dingwe ba ya Segopotso ka gonne ba batla go bontsha gore ba rata Jesu le Bakeresete ba ba tlo ditsweng le gore ba ba ema nökeng. Gape ba nna gone kwa Segopo-

tsong ka gonne ba batla go bontsha gore ba lebogela setlhabelo sa ga Jesu. Ka ntlha ya setlhabelo seo, ba na le tsholofelo ya go tshela ruri mo lefatsheng. Lebaka lengwe la botlhokwa la go bo ba dinku tse dingwe ba nna gone kwa Segopotso ke ka gonne ba batla go ikobela taelo ya ga Jesu. Fa Jesu a ne a simolola Sejo sa Morena sa Maitseboa o ile a raya baaposetoloi ba gagwe a re: “Nnang lo dire seno e le go nkgopola.” (1 Bakor. 11:23-26) Ka jalo, fa fela batlodiwa ba sa ntse ba tshela mo lefatsheng, ba dinku tse dingwe ba tla tswela ba nna gone kwa Segopotso. *w21.01 17-18 ¶13-14*

**Mmalo wa Baebele wa Segopotso:**  
(Ditiragalo tsa motshegare: Nisane 9)  
Johane 12:12-19; Mareko 11:1-11

## Labobedi, April 12

*Eno ke tsela e Modimo a neng a re bontsha lorato ka yone: O ne a romela Morwawe yo o tshotsweng a le esi mo lefatsheng gore re bone botshelo ka ene.—1 Joh. 4:9.*

Ga re a tshwana le go bolelela ba bangwe fela gore re a ba rata, re tshwanetse go ba bontsha seo ka go ba direla dilo tse di molemo. (Bapisa Jakobe 2:17, 26.) Ka sekai, Jehofa o a re rata. (1 Joh. 4:19) Mme o re bolelela gore o a re rata a dirisa Baebele. (Pes. 25:10; Bar. 8:38, 39) Jehofa ga a re bolelele fela gore o a re rata mme o re bontsha seo ka dilo tse a di dirang. Jehofa o ile a letla gore Morwawe a boge a bo a re swele. (Joh. 3:16) Ka jalo, ga re belaele gore Jehofa o a re rata. Re bontsha gore re rata Jehofa le Jesu ka go ba ikobela. (Joh. 14:15; 1 Joh. 5:3) Jesu o ile a re laela gore re ratane. (Joh. 13:34, 35) Re tshwanetse go bolelela le go bontsha bakaulengwe le bo-kgaitsadi gore re a ba rata.—1 Joh. 3:18. *w21.01 9 ¶6; 10 ¶8*

**Mmalo wa Baebele wa Segopotso:**  
(Ditiragalo tsa motshegare: Nisane 10)  
Johane 12:20-50

## Laboraro, April 13

*Ke lo bitsa ditsala.—Joh. 15:15.*

Batlodiwa ba na le tsholofelo ya go nna le Keresete go ya go ile kwa legodimong ba busa le ene mo Bogosing Jwa Modimo. Ba tla kgona go mmona, go bua le ene le go fetsa nako le ene. (Joh. 14:2, 3) Ba ba nang le tsholofelo ya go tshela mo lefatsheng le bone Jesu o tla ba bontsha gore o a ba rata. Le fa gone ba tla bo ba sa bone Jesu, ba tla mo rata le go feta ka ntlha ya dilo tse ene le Rraagwe ba tla ba direlang tsone. (Isa. 9:6, 7) Fa re le ditsala tsa ga Jesu, re tla amogela masego a le mantshi. Ka sekai, o tla re rata e bile o tla re tshegetsa. Gape re nna le tsholofelo ya go tshelela ruri. Mme sa botlhokwa le go feta, go nna ditsala tsa ga Jesu go tla dira gore re atamalane le Jehofa. Eleruri ke tshiamelo go nna tsala ya ga Jesu. *w20.04 25 ¶15-16*

**Mmalo wa Baebele wa Segopotso:**  
(Ditiragalo tsa motshegare: Nisane 11)  
Luke 21:1-36

### Labone, April 14

*Batho botlhe ba tla tsosiwa  
ka ntlha ya ga Keresete.*

*—1 Bakor. 15:22.*

Moaposetoloi Paulo o ile a kwalela Bakeresete ba ba tloeditsweng ba kwa Korintha ba ba neng ba na le tsholofelo ya go tsoediwa go ya go tshela kwa legodimong. Bakeresete bao ba ne ba 'itshepisiswe ba le seoposengwe le Keresete Jesu, ba bo ba bile diwa go nna baitshepi.' Gape Paulo o ile a bua ka ba "ba neng ba robala mo losong ba le seoposengwe le Keresete." (1 Bakor. 1:2; 15:18; 2 Bakor. 5:17) Gape mo lekwalong le lengwe, Paulo o ile a re ba ba 'tshwaraganeng le Jesu mo losong lo lo tshwanang le lwa gagwe' ba "tla

tshwaragana le ene mo tsogong e e tshwanang le ya gagwe." (Bar. 6:3-5) Jesu o ile a tsosiwa e le sebo-piwa sa semoya a bo a ya go tshela kwa legodimong. Ka jalo, seo ke sone se se tlieng go diragalela botlhe ba ba leng "seoposengwe le Keresete" e leng Bakeresete botlhe ba ba tloeditsweng. Paulo o ile a re Keresete o ile a tsosiwa e le "mabutswepele a ba ba robetseng mo losong." (1 Bakor. 15:20) Jesu e ne e le motho wa ntlha go tsosiwa e le sebo-piwa sa semoya a bo a newa botshelo jo bo sa khutleng. *w20.12 5-6 ¶15-16*

**Mmalo wa Baebele wa Segopotso:**  
(Ditiragalo tsa motshegare: Nisane 12)  
Mathaio 26:1-5, 14-16; Luke 22:1-6

**LETSATSI LA SEGOPOTSO**  
Fa Letsatsi le Sena go Phirima  
Labotlhano, April 15

*Re tla nna re na le Morena.*

*—1 Bathes. 4:17.*

Gone jaanong fa Bakeresete ba ba tloeditsweng ba tlhokafala, ba tsosiwa ka yone nako eo go ya go tshela kwa legodimong. Seno se dumalana sentle le mafoko a moaposetoloi Paulo a ileng a a kwala mo go 1 Bakorintha 15:51 le 52. Fa batlodiwa ba sena go tsosiwa, ba tla bo ba itumetse. Baebele e re bolelela gore ba ba tla fetolwang "ka ponyo ya leitlho" ba tla dira eng kwa legodimong. Jesu o ba raya a re: "Yo o fenyang a ba a boloka ditiro tsa me go fitlha kwa bokhutlong ke tla mo naya taolo godimo ga ditšhaba, mme o tla disa batho ka thobane ya tshipi mo ba tla thubegang dikarolwana jaaka dijana tsa letso-pa, fela jaaka ke amogetse mo go Rre." —Tshen. 2:26, 27. *w20.12 12 ¶14-15*

**Mmalo wa Baebele wa Segopotso:**  
(Ditiragalo tsa motshegare: Nisane 13)  
Mathaio 26:17-19; Mareko 14:12-16;  
Luke 22:7-13  
(Ditiragalo tsa fa letsatsi le sena  
go phirima: Nisane 14)  
Johane 13:1-5; 14:1-3

## Matlhatso, April 16

*Keresete o tsositswe mo baswing.*  
—1 Bakor. 15:20.

Fa moaposetoloi Paulo a ne a re Jesu ke “mabutswapele,” o ne a raya gore go ne go tla nna le ba bangwe morago gagwe, ba ba neng ba tllile go tsosiwa gore ba ye go tshela kwa legodimong. Baaposetoloi le batlodiwa ba bangwe ba ba leng “seoposengwe le Keresete” le bone ba ne ba tla ya go tshela kwa legodimong. (1 Bakor. 15:18) Ka nako ya fa Paulo a ne a kwalela Bakeresete ba ba tloditsweng lekwaleno, batlodiwa ba ne ba ise ba tsosewiwe go ya go tshela kwa legodimong. Paulo o ile a tilhalosa gore seo se ne se tla diragala mo nakong e e tlang. O ile a re: “Mongwe le mongwe a le mo maemong a gagwe: Keresete mabutswapele, morago ga moo ba e leng ba ga Keresete mo nakong ya go nna gone ga gagwe.” (1 Bakor. 15:23; 1 Bathes. 4:15, 16) Gompieno, re tshela mo motlheng o Paulo a ileng a bolelelapele ka one. Motlha oo o bidiwa “go nna gone” ga ga Keresete. Baaposetoloi le Bakeresete ba ba tloditsweng ba ba tlhokafetseng, ba ne ba tshwanetse go leta go fitlha ka nako ya go nna gone ga ga Keresete, gore ba amogele tuelo ya bone ya go tshela kwa legodimong le gore ba ‘tshwaragane le Jesu mo tsogong e e tshwanang le ya gagwe.’ —Bar. 6:5. *w20.12* 5 ¶12; 6 ¶16-17

**Mmalo wa Baebele wa Segopotso:**  
(Ditiragalo tsa motshegare: Nisane 14)  
Johane 19:1-42

## Sontaga, April 17

*Mmele o jalwa e le o o bolang,  
o tsosiwa e le o o sa boleng.*  
—1 Bakor. 15:42.

Moaposetoloi Paulo o ne a bua ka motho yo o tla tsosiwang a na le mmele wa go tshela kwa legodimong e leng mmele “wa semoya.” (1 Bakor. 15:43, 44) Fa Jesu a ne a le mo lefatsheng o ne a na le mmele wa senama kgotsa mmele o o tshwanang le wa batho. Mme fa a sena go tsosiwa, o ne a nna “moya o o nayang botshelo” a bo a boela kwa lego-

dimong. Ka tsela e e tshwanang, Bakeresete ba ba tloditsweng ba tla tsosiwa ka mmele wa semoya gore ba kgone go tshela kwa legodimong. Paulo o ile a re: “Fela jaaka re apere setshwano sa yo o dirilweng ka lorole, re tla apara le setshwano sa wa selegodimo.” (1 Bakor. 15: 45-49) Ela tlhoko gore Jesu ga a ka a tsosiwa a na le mmele wa batho kgotsa wa senama. Paulo o ile a re: “Nama le madi ga di ka ke tsa rua bogosi jwa Modimo” kwa legodimong. (1 Bakor. 15:50) Batlodiwa ga ba kitla ba tsosewiwa go ya go tshela kwa legodimong ba na le mebele ya senama. *w20.12* 10-11 ¶10-12

**Mmalo wa Baebele wa Segopotso:**  
(Ditiragalo tsa motshegare: Nisane 15)  
Mathaio 27:62-66  
(Ditiragalo tsa fa letsatsi le sena go phirima: Nisane 16)  
Johane 20:1

## Mantaga, April 18

*Loso, maatla a gago a kae? Loso,  
bothhole jwa gago bo kae?*  
—1 Bakor. 15:55.

Modimo o ile a tlhotlheletsa barutwa bangwe ba ga Jesu gore ba kwale ka tso go ya kwa legodimong. Moaposetoloi Johane o ile a re: “Jaanong re bana ba Modimo, mme go fitlha jaanong ga go ise go dirwe gore go bonatshege se re tla nnang sone. Re a itse gore motlhang a bonadiwang re tla tshwana le ene.” (1 Joh. 3:2) Ka jalo, Bakeresete ba ba tloditsweng ga ba itse gore fa ba sena go tsosiwa, botshelo bo tla bo ntse jang kwa legodimong. Mme gone, ba tllile go bona Jehofa ka tsela ya mmatota fa ba amogela tuelo ya bone. Baebele e re naya lemmonyana ka kgang eno. Batlodiwa ba tla bo ba na le Keresete fa a tla bo a ‘fedisa dipuso tso-tlhe le bolaodi jotlhe le maatla.’ Seno se akareletsa le “mmaba wa bofelo” e leng loso. Go tswa foo, Jesu le ba ba tla bong ba busa le ene ba tla busetsa bogosi kwa go Jehofa. (1 Bakor. 15:24-28) Eo e tla bo e le nako e e itumedisang! *w20.12* 8 ¶2

**Mmalo wa Baebele wa Segopotso:**  
(Ditiragalo tsa motshegare: Nisane 16)  
Johane 20:2-18

## Labobedi, April 19

*Ke na le tsholofelo . . . gore Modimo o tlike go tsoa batho ba ba siameng le ba ba sa siamang mo baswing. —Dit. 24:15.*

Bakeresete botlhe ba ba ikanyegang ba ba se nang tsholofelo ya go tshela kwa legodimo le Keresete le bone ba na le tsholofelo ya go tsoisiwa. Baebele e a re moaposetoloi Paulo le ba bangwe ba ba nang le tsholofelo ya go tshela kwa legodimong, ba tla tsoisiwa mo 'tsogong ya pele ya baswi.' (Bafil. 3:11) Seno se bontsha gore go tlike go nna le tsoego e nngwe gape morago ga eo. Seo se dumalana le se Jobe a ileng a re se tla mo diragalela. (Jobe 14:15) "Ba e leng ba ga Kerese- te mo nakong ya go nna gone ga gagwe" ba tla bo ba na le ene kwa legodimong fa a tla bo a fedisa dipuso tsothe tsa batho. Tota le loso e leng "mmaba wa bofe- lo" lo tla nyelediwa. Ba ba tsoseditsweng go ya go tshela kwa legodimo ga ba kitla ba tlhola ba swa. (1 Bakor. 15:23-26) Ba ba nang le tsholofelo ya go tshela mo lefatsheng ba ka solofela gore se Paulo a ileng a se bua mo temaneng ya letsatsi ya gompieno se tla diragala. Re a itse gore ga go na motho ope yo o sa siamang yo o ka tsenang kwa legodimong, ka jalo, mafoko ano a kaya gore go tlike go nna le tso- go mo lefatsheng. w20.12 6-7 ¶18-19

## Laboraro, April 20

*[Keresete] o [ne] a nthata a bo a nkentshetsa setlhabelo ka botshelo jwa gagwe. —Bagal. 2:20.*

Re ka nna ra ipotsa gore, 'Nka itse jang gore Jehofa ga a ntlhoboga?' Fa o botsa potso eno go bontsha gore o dumela gore Jehofa a ka go itshwarela. Makasine mongwe wa *Tora ya Tebelo* o ile wa re: "Re ka nna ra iphitlhela re boaboetsa phoso e le nngwe gantsintsi. Gongwe lebaka ke gore ga re ise re tlogele mekgwa mengwe e Jehofa a sa e amogeleng. . . . O se ka wa akanya gore o motho yo o bosula thata jaana mo e leng gore Jehofa ga a kitla a go itshwarela. Satane o batla gore o akanye

jalo. Fa o dirile phoso o bo o galefa kgo- tsa o bo o utlwa botlhoko, seo ga se reye gore o motho yo o bosula. Mme se bontsha gore Jehofa a ka go itshwarela. Nna boikokobetso mme o kope gore Jehofa a go itshwarela, a go thuse gore o nne le se- gakolodi se se phepa le gore a go thuse gore o se ka wa boeletsa phoso eo gape." Pele moaposetoloi Paulo e nna Mokerese- te o ile a dira dilo di le dintsi tse di bosu- la. Paulo ga a ka a lebala dilo tse a ileng a di dira. (1 Tim. 1:12-15) Mme o ne a dume- la gore setlhabelo sa ga Jesu ke mpho e e tswang kwa go Jehofa. Ka jalo, Paulo ga a ka a letla dilo tse a kileng a di dira di mo kgoba marapo, go na le moo, o ne a tlhoma mogopolo mo go direleng Jehofa. w20.11 27 ¶14; 29 ¶17

## Labone, April 21

*Fa mongwe wa lona a tlhoka bo- tlhale, a a nne a bo kope mo Mo- dimong, mme o tla bo newa, ka go- nne Modimo o bo naya botlhe ba ba bo kopang mme o dira jalo ka bopelotshweu e bile a sa ba kgobe.*

—Jak. 1:5.

Go na le dilo tse dintsi tse di sa sia- mang tse Satane a di dirisang go re raela. Fa seo se direga, re dira eng? Go motlho- fo go dira diipato. Gongwe o ka tswa o akanya gore: 'Ga nkitla ke kgaolelwa go dira selo seno, ka jalo go raya gore ga se kotsi go le kalo.' Go akanya jalo ga go a siama. Go tla bo go le botlhale gore re ipo- tse dipotso tse di latelang: 'A Satane o di- risa teko eno go dira gore ke se ka ka dire- la Jehofa ka pelo yotlhe? Fa ke ineela ke bo ke kgotsofatsa dikeletso tsa me, a ke tla itumedisa Jehofa? A tshwetso e ke tla e tsayang e tla nonotsha botsala jwa me le Jehofa kgotsa e tla bo senya?' Tlhatlha- nya ka dipotso tseno. Rapela Jehofa, o mo kope gore a go thuse go araba dipotso tseno. Go dira jalo go tla go thusa. Mme o tla kgona go emelana le diteko fela jaaka Jesu a ile a kgona go raya Satane a re: "Tsamaya, Satane!" (Math. 4:10) Ga re a tshwanela go nna pelopedi. w20.06 12-13 ¶16-17

## Labotlhano, April 22

*Ke rotloetsa mongwe le mongwe wa lona gore a se ka a akanya gore o botlhokwa thata. Le fa go ntse jalo, a mongwe le mongwe a akanye sentle mme a itebe ka tsela e e tshwanetseng.—Bar. 12:3.*

Re ikobela Jehofa ka gonne re a itse gore ka metlha o itse se re se tlhokang. (Baef. 4:22-24) Fa re le boikokobetso re tla itse gore se Jehofa a se batlang se botlhokwa go gaisa se rona re se batlang le gore batho ba bangwe ba botlhokwa go re gaisa. Mme seo se tla dira gore re nne ditsala tsa ga Jehofa le tsa bakaulengwe le bokgaisadi ba rona. (Bafil. 2:3) Fa re se kelotlhoko, batho ba lefatshe la ga Satane ba ka re tshwaetsa ka mekgwa ya bone ya go ikakanyetsa ba le nosi le go ikgomomosa. Go lebeba Bakeresete ba lekgolo la ntsha la dingwaga ba ne ba tshwaeditswe ke mekgwa eo, ka gonne moaposetoloi Paulo o ile a ba raya a re: “Ke bolelela mongwe le mongwe mo go lona gore a se ka a ikgopola thata go feta kafa go tlhokegang go ikgopola ka gone; mme a akanye gore a nne le mogopolo o o itekanetseng sentle.” Paulo o ne a dumalana le ntsha ya gore rotlhe re tlhoka go itlotla. Mme fa re le boikokobetso, ga re kitla re ikgomomosa kgotsa re itsaya re le botlhokwa thata. *w20.07 2* ¶1-2

## Matlhatso, April 23

*Lefatshe le ne le se na matshwenyego e bile go se na batho bape ba ba tlhabanang le ene.—2 Ditir. 14:6.*

Ka nako ya ga Kgosi Asa, Bajuda ga ba a ka ba tswelela ba le mo kagisong go ya go ile. Masole a feta milione a Ethiopia a ile a ba tlhasela. Molaodi wa masole ao e bong Sera o ne a tlhatswegile pelo gore ba tlile go nyeletsa Bajuda. Mme Asa ene, o ne a ikantse Jehofa. O ne a rapela a re: “Re thuse, tlhe Jehofa Modimo wa rona, gonne re ikaegile ka wena, mme re tsogologetse boidiidi jono ka leina la gago.” (2 Ditir. 14:11) Le fa gone masole a

Ethiopia a ne a le mantsi thata go feta masole a Juda, Asa o ne a itse gore Jehofa o na le maatla go ba feta, e bile o ne a itse gore Jehofa o tla ba thusa. Jehofa ga a ka a swabisa Asa. Masole a Juda a ne a fena masole a Ethiopia. (2 Ditir. 14: 8-13) Ga re itse gore re tla diragalelwa ke eng mo nakong e e tlang, mme gone, re a itse gore ga re kitla re nna le kgolesego go ya go ile. Tota e bile, Jesu o ne a bolelela pele gore mo malatsing a bofelo, barutwa ba gagwe ba tla ‘tlhoiwa ke ditšhaba tsoatlhe.’—Math. 24:9. *w20.09 17-18* ¶14-16

## Sontaga, April 24

*Ke itumedisiwa . . . ke go tlhapadiwa.—2 Bakor. 12:10.*

Ga go na ope yo o ratang go tlhapadiwa. Mme fa batho ba ba sa re rateng ba re tlhapatsa, re bo re tshwenyega thata ka se ba se buang, re ka kgobega marapo. (Dia. 24:10) Jaanong re tshwanetse go dira eng fa batho ba re tlhapatsa? Le rona re ka etsa moaposetoloi Paulo ka go “itumedisiwa . . . ke ditlhapatso.” Goreng? Fa batho ba re tlhapatsa e bile ba re bogisa, seo se bontsha gore re barutwa ba ga Jesu. (1 Pet. 4:14) Jesu o rile balatedi ba gagwe ba tlile go bogisiwa. (Joh. 15:18-20) Seo ke se se neng sa diragalela Bakeresete ba lekgolo la ntsha la dingwaga. Ka nako eo, batho ba ba neng ba dumela dingwao tsa Segerika, ba ne ba akanya gore Bakeresete ga ba a rutega e bile ke batho ba maemo a a kwa tlase. Bajuda le bone ba ne ba re Bakeresete ga ba a ‘rutega e bile ke batho fela,’ jaaka Petere le Johane. (Dit. 4:13) Batho ba le bantsi ba ne ba akanya gore Bakeresete ba bokoa e bile ga ba ka ke ba iphemela. Bakeresete ba ne ba sa tsenele dipolotiki, ka jalo, ba ne ba ka se kgone go tlhotlheletsa puso go dira dilo dingwe. Gape ba ne ba sa tsenele sesole, ka jalo ba ne ba ka se ka kgone go itwela e bile batho ba ne ba sa ba rate e bile ba sa ba tlotle. A Bakeresete bao ba ile ba letla se baganetsi ba bone ba neng ba se bua ka bone se dira gore ba tlogele go direla Jehofa? Nnyaa. *w20.07 14-15* ¶3-4

## Mantaga, April 25

*A re tsweleng re ratana, ka gonne lorato lo tswa kwa Modimong, mme mongwe le mongwe yo o ratang ba bangwe ke ngwana wa Modimo e bile o itse Modimo.—1 Joh. 4:7.*

Moaposetoloi Johane o ne a rata Bake-resetemmogo le ene e bile o ne a batla gore ba nne le tumelo e e nonofileng. Re kgona go bona seo mo makwalong a mararo a a ba kwaletseng one. Go a itumedisa go itse gore banna le basadi ba ba tilileng go busa le Jesu kwa legodimong ba lorato e bile ba amega ka batho fela jaaka Johane! (1 Joh. 2:27) E kete re ka dirisa kgakolo e re e neilweng. A re ikemisetseng go tswela re tsamaya mo boammaaruring, ka go ikobela Jehofa mo go sotlhe se re se dirang. Ithute Lefoko la Modimo o bo o le ikanye. Nonotsha tumelo ya gago mo go Jesu. Gana dithuto tsa batho le dithuto tsa batlhanogi. O se ka wa itira e kete o direla Jehofa mme o dira dilo tse di sa siamang e bile o gane go reetsa batho ba ba go gatelelang gore o dire dilo tse di sa siamang. Ikobele melao ya ga Jehofa ya boitsholo. Gape thusa bakaulengwe gore ba tswela ba tsamaya mo boammaaruring ka go ba itshwarela fa ba go utlwisitse botlhoko le go ba thusa ka dilo tse ba di tlhokang. Fa re dira jalo, re tla tswela re tsamaya mo boammaaruring le fa re ka lebana le diteko. *w20.07 24-25 ¶15-17*

## Labobedi, April 26

*Modimo o rulagantse karolo nngwe le nngwe ya mmele jaaka a batla.—1 Bakor. 12:18.*

Jehofa o letlile gore go nne le batho ba ba farologaneng ba ba mo direlang mo phutheng ya gagwe. Le fa re na le maitshwano kgotsa re dira dilo tse di farologaneng mo phutheng, rotlhe re botlhokwa mo go Jehofa e bile re a tlhokana. Moaposetoloi Paulo o re bontsha gore yo mongwe mo phutheng ga a ka ke a raya yo mongwe a re “Ga ke go tlhoke.” (1 Bakor. 12:21) Fa re batla gore go nne go na le kagiso mo phutheng re tshwanetse go tlotlana le go dirisana mmogo. (Baef. 4:

16) Fa re dirisana ka kutlwano mo phutheng, batho botlhe ba tla ikutlwa ba ratiwa e bile phutho e tla nonofa. Jehofa o tlhoma bagolwane botlhe mo phutheng a dirisa moya wa gagwe o o boitshupo. Mme mongwe le mongwe wa bone o na le mpho e a e abetsweng. (1 Bakor. 12:17) Ba bangwe ga se kgale e le bagolwane, ka jalo ga ba na maitemogelo a a tshwanang le a bagolwane ba bangwe. Ba bangwe ga ba kgone go dira dilo dingwe ka gonne ba godile kgotsa ba lwalwa. Le fa go ntse jalo, mogolwane yo mongwe ga a ka ke a raya yo mongwe a re, “Ga ke go tlhoke.” Mogolwane mongwe le mongwe o tshwanetse go ikobela kgakololo ya ga Paulo e e mo go Baroma 12:10. *w20.08 26 ¶1-2; 27 ¶4*

## Laboraro, April 27

*Seemo sa lefatshe leno se a fetoga.—1 Bakor. 7:31.*

Jehofa o dirisa phutho ya gagwe go re kaela fa re ntse re tsamaya mo tseleng e e isang botshelong. Fa phutho ya Modimo e fetola tsela nngwe e re tlhaloganyang dilo dingwe mo Baebeleng ka yone, kgotsa e re naya kgakololo ya kafa re tshwanetseng go itshwara ka gone re amogela kgakololo e, re bo re e dirisa. Mme gone, re dira eng fa phutho ya Modimo e fetola tsela e re tlwaetseng go dira dilo ka yone, jaaka fa go rekisiwa Holo ya Bogosi e re kopanelang mo go yone? Fa re nna re gopitse gore tiro e re e dirang ke ya ga Jehofa le gore ke ene a kaelang phutho ya gagwe, re tla nna re itumetse. (Bakol. 3:23, 24) Kgosi Dafide o re tlhometse sekao se se molemo fa a ne a ntsha moneelo wa go aga tempele. O ne a re: “Nna ke mang le batho ba me ke bomang, gore re bo re na le maatla a go ntsha moneelo e e ntseng jaana ka go rata? Gonne sengwe le sengwe se tswa kwa go wena, mme re go neile se se tswang mo seatleng sa gago.” (1 Ditir. 29:14) Fa re ntsha moneelo, re a bo re naya Jehofa se a re neileng sone. Mme gone, Jehofa o a itumela fa re dirisa nako, maatla le madi a rona go dira tiro ya gagwe.—2 Bakor. 9:7. *w20.11 22-23 ¶14-16*

## Labone, April 28

*Yo o lebang maru ga a kitla a roba.—Mor. 11:4.*

Jehofa ga a tseye gore re atlegile fa fela re kgonne go thusa batho ba le bantsi gore e nne Basupi ba gagwe. (Luke 8:11-15) Go na le moo, selo sa bothokwa mo go ene ke gore re tswelele re itshokile mo tirong ya go rera dikgang tse di molemo. Ka ntlha yang? Ka gone fa re dira jalo, re a bo re dira se ene le Morwawe ba batlang gore re se dire. (Mar. 13:10; Dit. 5:28, 29) Re na le lebaka le le utlwalang la go dira ka natla mo tirong ya go rera dikgang tse di molemo. Nako e ile! Ka jalo, ga re a tshwanela go goga dinao mo tirong eno e e ka bolokang matshelo a batho. O se ka wa senya nako o re o emetse gore dilo di go tsamaele sentle mo botshelong gore o nne le seabe mo tirong eno ya bothokwa. Dira sotlhe se o ka se kgonang gone jaanong gore o rate tiro ya go rera, o itse go e dira sentle, o nne pelokgale e bile o nne boikgapo. Tsaya karolo mo tirong eno ya go rera dikgang tse di molemo e e dirwang ke batho ba ga Jehofa mo lefatsheng lotlhe. Seno se tla dira gore o itumele. (Neh. 8:10; Luke 5:10) Dira sotlhe se o ka se kgonang mo tirong eno go fitlha Jehofa a re go lekane. *w20.09 7 ¶18-20*

## Labotlhano, April 29

*O tlhokomele se o se neilweng.  
—1 Tim. 6:20.*

Ga re a tshwanela go itetla gore re itewe tsebe ke dikhumo tsa lefatshe leno. “Maatla a a tsietsang a dikhumo” a ka dira gore re se ka ra tlhola re rata Jehofa le Lefoko la gagwe, e bile a ka dira gore re goge dinao mo tirong ya go rera. (Math. 13:22) Fa re batla go sireletsa dilo tse Jehofa a re neileng tsona, re tshwanetse go tsiboga ka bonako fa re bona kotsi. Re tshwanetse go itse gore re tla dira eng fa go ka tlhaga dilo

tse di jaaka boitsholo jo bo sa siamang, dintwa le tshedimotsetso ya batlhanogi fa re lebeletse thelebishene kgotsa re le mo Internet. Fa re dira jalo, re tla kgonna go itshireletsa e bile re tla tswela re le ditsala tsa ga Jehofa. (Pes. 101:3; 1 Tim. 4:12) Re tshwanetse go sireletsa dilo tse di tlhwalhwakgolo tse Jehofa a re neileng tsona e leng, boammaaruri jo bo mo Baebeleng le tshiamelo ya go ruta batho ka Jehofa. Fa re dira jalo, re tla nna le segakolodi se se siameng, re tla itumelela botshelo e bile re tla thusa batho gore ba itse Jehofa. *w20.09 30 ¶16-19*

## Matlhatso, April 30

*Lo tla bona Motlhatlheledi wa lona yo Mogolo ka matlho a lona.*

*—Isa. 30:20.*

A o kolobeditse? Fa e le gore o kolobeditse, o ile wa bontsha batho gore o na le tumelo mo go Jehofa le gore o batla go mo direla mo phuthegong ya gagwe. Tsela e Jehofa a kaelang phuthego ya gagwe ka yone, e re thusa gore re itse gore ke Motho yo o ntseng jang, o ikaeletse go dira eng e bile e re thusa go itse melao ya gagwe. Akanya ka dinonono tse tharo tsa ga Jehofa tse re kgonang go di bona mo phuthegong ya gagwe. Sa ntlha, “Modimo ga a na tlhaolele.” (Dit. 10:34) E re ka Jehofa a re rata, o ile a ntsha Morwawe gore a re swele rotlhe. (1 Tim. 2:6; Joh. 3:16) Jehofa o dirisa batho ba gagwe go rerela batho botlhe dikgang tse di molemo. Ka go dira jalo, o thusa botlhe ba ba dumelang mo setlhabelong sa ga Jesu gore ba bolokwe. Sa bobedi, Jehofa o rata thulaganyo le kagiso. (1 Bakor. 14:33, 40) Ke gone ka moo batho ba ba mo direlang ba rulaganeng sentle e bile ba dirisanang ka kagiso. Sa boraro, Jehofa ke “Motlhatlheledi yo Mogolo.” (Isa. 30:21) Ke ka moo phuthego ya gagwe e tsayang matsapa go ruta batho botlhe Baebele. *w20.10 20 ¶1-3*



## Sontaga, May 1

*O ne a tswelela a ba ikobela.*

—*Luke 2:51.*

Jesu o ne a ikobela batsadi ba gagwe go tloga fela a sa le monnye. O ne a sa tseye gore o itse dilo di le dintsi go ba feta. Jesu e ne e le ene leitibolo mo lelapeng. Seo se raya gore go ne go na le dilo dingwe tse a neng a tshwanetse go di dira. O tshwanetse a bo a ile a dira sotlhe se a neng a ka se kgona go ithuta tiro ya go betla gore a kgone go thusa Josefa go tlamela lelapa. Batsadi ba ga Jesu ba ka tswa ba ile ba mmolelela gore go tlile jang gore a tsholwe le gore batho ba Modimo a neng a ba romile ba ile ba reng ka ene. (Luke 2:8-19, 25-38) Mme gone, Jesu le ene o ile a tsa-ya matsapa go ithuta Dikwalo. Re itse jang gore Jesu o ne a ithuta Lefoko la Modimo ka metlha? Baebele ya re fa e sa ntse e le mosimanyana, barutisi ba kwa Jerusalem a “ba ne ba gaggamadiwa ke tlhaloganyo ya gagwe le dikarabo tsa gagwe.” (Luke 2:46, 47) Fa a na le dingwaga di le 12, o ne a setse a tlhomamsegile gore Jehofa ke Rraagwe.—Luke 2: 42, 43, 49. *w20.10* 29-30 ¶13-14

## Mantaga, May 2

*Keresete o tsositswe mo baswing.*

—*1 Bakor. 15:12.*

Tsogo ya ga Jesu ke lone lebaka la go bo re dumela gore baswi ba tlile go tsoiwa. Fa Paulo a ne a kwalela Bakorintha ka kgang ya go tsoiwa ga baswi, o ile a simolola pele ka go bua dintlha tseno tse tharo: (1) “Keresete o ne a swela maleo a rona.” (2) “O ne a fitlha.” (3) “O tsositswe ka letsatsi la boraro go ya ka Dikwalo.” (1 Bakor. 15: 3, 4) Dilo tseno tse tharo di kaya eng mo go rona? Moporofeti Isaia o ile a bolelela pele gore Mesia o ne a tla “kgaolwa mo lefatsheng la ba ba tshelang” le gore o tla fitlhelwa mo lefelong la baikepi.

Mme gone, go na le sengwe gape se se neng se tla direga. Isaia o ile a re Mesia o ne a tla tshola “boleo jwa batho ba le bantsi.” Jesu o ile a dira seno ka go ntsha botshelo jwa gagwe e le thekololo. (Isa. 53:8, 9, 12; Math. 20:28; Bar. 5:8) Ka jalo, loso lwa ga Jesu, go fitlhiwa ga gagwe le tsogo ya gagwe, di re tlhommisetsa gore re tlile go gololwa mo bo-leong le mo losong le gore re tlile go kopana le batho ba re ba ratang ba ba tlhokafetseng. *w20.12* 2-3 ¶4-6; 5 ¶11

## Labobedi, May 3

*Mo bathong botlhe, ke nna ke nang le lebaka la go ikanya dilo tse batho ba di ikanyang. Fa e le gore go na le mongwe yo o nang le lebaka la go ikanya dilo tseo, nna ke na le mabaka a a fetang a gagwe.*

—*Bafil. 3:4.*

Moaposetoloi Paulo o ne a rera mo di-sinagogeng tsa Bajuda. Ka sekai, kwa sinagogeng ya kwa Thesalonika, o ne a fetsa ‘bosabata ba le bararo a bontsha [Bajuda] mabaka go tswa mo Dikwalong.’ (Dit. 17:1, 2) Paulo a ka tswa a ne a ikutlwa a phuthologile fa a le kwa sinagogeng ka gonne le ene e ne e le Mojuda. (Dit. 26:4, 5) O ne a itse dilo tse Bajuda ba di dumelang ka jalo go ne go le motlhofo gore a ba rerele. (Bafil. 3:5) Fa Paulo a sena go lelekwa kwa Thesalonika le kwa Berea, o ne a ya kwa Athena. Fa a le kwa motseng oo, o ne a “simolola go bontshana mabaka le Bajuda mo sinagogeng le batho ba bangwe ba ba neng ba obamela Modimo.” (Dit. 17: 17) Mme fa a ne a rera kwa marekisetso, o ile a kopana le batho ba e seng Bajuda. Bangwe ba bone e ne e le batho ba ba ratang dithuto tsa filosofi le Badi-tshaba bangwe ba ba neng ba re molae-tsa wa ga Paulo ke “thuto e ntsha.” Ba ne ba mo raya ba re o bua dilo tse di sa tlwaelegang.—Dit. 17:18-20. *w20.04* 9 ¶5-6

## Laboraro, May 4

*Fa ke batla go dira se se siameng,  
se se bosula se gone mo go nna.*

—Bar. 7:21.

Fa o dira diphoso, o se ka wa akanya gore ga o na mosola mo go Jehofa. E re ka re dira diphoso, rotlhe re tlhoka gore Jehofa a re utlwele botlhoko. Mme o dira jalo a dirisa setlhabelo sa ga Jesu. (Baef. 1:7; 1 Joh. 4:10) Bakaulengwe le bogkai-tsadi ba tla re kgothatsa. Ba ka re reetsa fa re batla go bua. (Dia. 12:25; 1 Bathes. 5:14) Kgaityadi mongwe wa kwa Nigeria yo o bidiwang Joy a re: “Fa e ka bo e se ka bakaulengwe le bogkai-tsadi, ga ke itse gore nka bo ke le wa ga mang. Tsela e ba neng ba nkgothatsa ka yone e ne e mponntsha gore Jehofa o araba dithapelo tsa me. Se ba ileng ba se dira se ile sa nthusa go bona gore ke eng se nka se dirang go kgothatsa ba ba kgobegileng marapo.” Mme gone, re tshwanetse go gopola gore bakaulengwe le bogkai-tsadi ba ka nna ba se ka ba le-moga gore re tlhoka go kgothadiwa. Ka jalo, fa re kgobegile marapo, re ka bua le mokaulengwe kgotsa kgaityadi yo o nang le maitemogelo. *w20.12* 23-24 ¶7-8

## Labone, May 5

*Ke lo bitsa ditsala.*—Joh. 15:15.

Gantsi fa o batla go nna tsala ya mongwe, o tshwanetse go fetsa nako le ene. Fa lo ntse lo tlotla ka dikgang tsa botshelo, lo nna ditsala. Mme gone, ga go motlhofo gore re nne ditsala tsa ga Jesu. Selo sa ntlha se se dirang gore go nne thata go nna ditsala tsa ga Jesu ke gore ga re ise re kopane le ene. Bakeresete ba le bantsi mo lekgolong la ntlha la dingwaga le bone ba ne ba ise ba kopane le Jesu. Le fa go ntse jalo, Petere o ne a re: “Le fa lo ise lo ke lo mmone, lo a

mo rata. Le fa lo sa mo leba [kgo-tsa lo sa mmone] gone jaanong, le fa go ntse jalo lo dumela mo go ene.” (1 Pet. 1:8) Seno se bontsha gore re ka kgona go nna ditsala tsa ga Jesu le fa re ise re kopane le ene. Sa bobedi, ga re kgone go bua le Jesu. Fa re rapela, re bua le Jehofa. Gone ke boammaaruri gore re rapela mo leineng la ga Jesu, mme gone, ga re bue le ene. Tota e bile, Jesu ga a batle re mo rapela. Ka ntlha yang? Ka gone thapelo ke karolo ya kobamelo mme re tshwanetse go obamela Jehofa fela. (Math. 4:10) Le fa go ntse jalo, re ka kgona go bontsha gore re rata Jesu. *w20.04* 20 ¶1-3

## Labotlhano, May 6

*[Modimo] o tla lo nonotsha, o tla lo thusa.*—1 Pet. 5:10.

Batabogi ba kwa Gerika ba ne ba tshwanelwa ke go itshokela dilo tse di jaaka ditlhabi le letsapa. Ba ne ba ikaegile ka maatla a bone le thapiso e ba neng ba e neilwe. Re tshwana le bone ka gone le rona re a thapisiwa gore re ka tswelela jang re itshokile mo lobelong lwa botshelo. Mme go farologana le bone, rona re ikaegile ka maatla a a tswang kwa go Jehofa. Fa re ikaega ka Jehofa, o re solofetsa gore o tla re thapisa e bile o tla re nonotsha. Moaposetoloi Paulo o ile a lebana le mathata a le mantsi. O ne a bogisiwa e bile a tlhapadiwa. Mo godimo ga moo, ka dinako tse dingwe o ne a ikutlwa a le bokoa ka gone o ne a na le “mutlwa mo nameng.” (2 Bakor. 12:7) Mme gone, ga a ka a letla gore dilo tseo di mo kgaoganyane le Jehofa, go na le moo, o ne a di dirisa e le tshono ya go bontsha gore o tshepa Jehofa. (2 Bakor. 12:9, 10) Ka ntlha ya seo, Jehofa o ile a mo thusa go itshokela mathata otlhe a a ileng a lebana le one. *w20.04* 29 ¶13-14

## Matlhatso, May 7

*Ga go na motho ope yo o ka tlang mo go nna fa Rara . . . a sa mo goge.—Joh. 6:44.*

Re na le mpho ya 'go dira mmo-go' le Jehofa, Jesu le baengele. (2 Bakor. 6:1) Re dira le bone mo tirong ya go dira barutwa. Paulo o ne a re ene le batho ba bangwe ba ba dirang tiro eno ke "badirimmogo le Modimo." (1 Bakor. 3:9) Fa re ya bodireding re a bo re dira mmogo le Jesu. Gopola gore fa Jesu a se na go raya barutwa ba gagwe a re ba dire "batho ba ditshaba tsotlhe barutwa," o ne a ba raya a re: "Ke na le lona." (Math. 28:19, 20) Baengele bone ba re thusa jang? Baengele ba a re kaela fa re ntse re rera "dikgang tse di molemo tsa bosakhutleng . . . mo go ba ba nnang mo lefatsheng." (Tshen. 14:6) Re ka kgona go fitlhelela eng fa Jehofa, Jesu le baengele ba re thusa? Fa re ntse re jala peo ya Bogosi, e nngwe e wela mo mmung o o molemo e bo e gola. (Math. 13:18, 23) Ke mang yo o godisang peo eo go fitlha e ungwa? Jesu o tlhalosa seo mo temaneng ya letsatsi ya gompieno. *w20.05 30 ¶14-15*

## Sontaga, May 8

*Tlogelang go etsa tsela e batho ba lefatshe leno ba dirang dilo ka yone.—Bar. 12:2.*

Malapa a le mantshi gompieno a kgaogangwa ke tlhalo. Ka dinako dingwe, tota le malapa a a nnang mmogo ga a atamalana. Ka sekai, rre mongwe yo e leng mogakolodi wa malapa a re: "Batsadi le bana ba nna fela ba le mo dikhomputareng, ba tobetsa difouno kgotsa ba tshameka di-video game. Mme seo se dira gore ba se ka ba nna le nako ya go tlotla. Le fa gone ba nna mo ntlong e le nngwe, ga ba itsane sentle." Ga re batle go nna le mokgwa o batho

ba lefatshe leno ba nang le one wa go sa rate ba bangwe. Go na le moo, re tshwanetse go tswelela re rata ba malapa a rona le bakaulengwe le bokgaitjadi. (Bar. 12:10) Lorato lwa bopelonomi ke eng? Ke tsela e mongwe le mongwe mo lelapeng a ikutlwang ka yone ka yo mongwe fa lelapa leo le ratana kgotsa le atamalane thata. Eo ke tsela e re tshwaneng go rata bakaulengwe le bokgaitjadi ka yone. Fa re rata ba bangwe ka pelo yotlhe, seo se ba thusa gore ba direle Jehofa ba itumetse.—Mika 2:12. *w21.01 20 ¶1-2*

## Mantaga, May 9

*Dira gore ke boife leina la gago ka pelo yotlhe.—Pes. 86:11.*

Ga go kitla go nna motlhofo gore setlhopha se batshameki ba sone ba sa utlwaneng se kgone go fenyatsameko. Ka tsela e e tshwaneng, le wena fa o batla go direla Jehofa ka pelo yotlhe, o tshwanetse go dira gore maikutlo, dikakanyo le dikeletso tsa gago di dumalane le thato ya Gagwe. Gopola gore Satane a ka rata go go bona o sa direle Jehofa ka pelo yotlhe. O batla go bona pelo ya gago e lwantshana le maikutlo, o etsaetsega, o sa itse gore o dire eng. Mme gone, gore o kgone go direla Jehofa, ga o a tshwanela go nna pelopedi. (Math. 22:36-38) O se ka wa letla Satane a go kgaoganya le Jehofa! Fela jaaka Dafide, rapela Jehofa o re: "Kitlanya pelo ya me gore e boife leina la gago." Leka go tshela go dumalana le thapelo eno. Ikemisetse go dira ditshwetso tse di tla itumedisang Jehofa le tse di tla tlotlomatsang leina la gagwe. (Dia. 27:11) Fa re dira jalo, rotlhe re tla kgona go bua mafoko ano a a ileng a buiwa ke moporofeti Mika: "Re tla tsamaya mo leineng la ga Jehofa Modimo wa rona ka bosakhutleng, le ka bo-saengkae."—Mika 4:5. *w20.06 13 ¶17-18*

## Labobedi, May 10

*E tla tswa e shakgetse thata gore e ye go nyeletsa le go senya ba le bantsi.—Dan. 11:44.*

Fa kgosi ya bokone le dipuso tse dingwe di tlhasela batho ba Modimo, seo se tla dira gore Modimo Mothatayotlhe a galefe mme Haramagedona e tla simologa. (Tshen. 16:14, 16) Jehofa o tlile go senya kgosi ya bokone le ditšhaba tse dingwe tse e leng karolo ya Gogo wa Mago go mme di tla bo di se na “mothusi.” (Dan. 11:45) Temana e e latelang ya Daniele e tlhalosa gore kgosi ya bokone le dipuso tse di e tshegetsang di tlile go sennwa jang le gore rona re tlile go bolokwa jang. (Dan. 12:1) Temana eno e kaya eng? Mikaele ke leina le lengwe la ga Jesu Keresete. O sa ntse a eme batho ba Modimo no-keng fa e sa le ka 1914. Go ise go ye kae, “o tla ema” kgotsa o tla tsaya kgato go fedisa baba botlhe ba gagwe ka ntwaga ya Haramagedona. Ntwaga eo ya makgaolakang, Daniele o e bitsa “nako ya matshwenyego” e e iseng e ko e nne gone e bile e se kitla e tsamaya e nna gone gape.—Tshen. 6:2; 7:14. *w20.05* 15-16 ¶15-17

## Laboraro, May 11

*Josefa o ne a isiwa kwa Egepeto.—Gen. 39:1.*

Ka nako ya fa Josefa e le lekgoba le fa a le kwa kgolegelong, o ne a sa gololesega e bile go ne go se na sepe se a neng a ka se dira go fetola seemo se a neng a le mo go sone. Ke eng se se mo thusitseng go itshoka? Go na le gore a nnele go akanya ka dilo tse a neng a sa tlhole a kgona go di dira, o ile a tlhoma mogopolo mo dilong tse a neng a kgona go di dira, a bo a dira dilo tse a neng a laetswe gore a di dire. Josefa o ne a batla go itumedisa Jehofa. Ka ntlha ya seo, Jehofa o ile a segofatsa sengwe le sengwe se a neng a se dira. (Gen. 39:21-23) Se se diragaletseng Josefa se re gopotsa gore re tshela mo lefatsheng le le bosula le gore batho ga ba kitla ba re tshwara sentle. Tota le bakaulengwe le bokgaitisadi ba ka nna ba se ka

ba re tshwara sentle kgotsa ba re utlwa botlhoko. Mme fa re tsaya Jehofa e le Lefika kgotsa Botshabelo jwa rona ga re kitla re kgobega marapo kgotsa go tlologa go mo direla. (Pes. 62:6, 7; 1 Pet. 5:10) Gopola gore Josefa o ne a na le dingwaga di ka nna 17 fa a ne a lora ditoro tse di tswang kwa go Jehofa. Seno se re bontsha gore Jehofa o tshepa batlhanka botlhe ba gagwe le fa ba ka tswa ba le basha. Gompieno go na le basha ba le bantsi ba ba tshwanang le Josefa. Le bone ba na le tumelo mo go Jehofa fela jaaka Josefa. Bangwe ba bone ba ile ba tsennwa mo kgolegelong ka gonne ba sa batle go tlola melao ya ga Jehofa.—Pes. 110:3. *w20.12* 16 ¶3; 17 ¶5, 7

## Labone, May 12

*Ba bitsa baaposetoloi, ba ba kgwathisa, ba bo ba ba laela gore ba tlogele go bua ka leina la ga Jesu.—Dit. 5:40.*

Moaposetoloi Petere le moaposetoloi Johane ba ne ba itumela fa ba bogisiwa ka gonne ba sala Jesu Keresete morago e bile ba bolelela batho ba bangwe ka ene. (Dit. 4:18-21; 5:27-29, 41, 42) Bakeresete bao ba ne ba sa tlhabetse ditlhong ke go sala Jesu morago. Le fa batho ba ba neng ba nna mo matseng wa bone ba ne ba sa ba tlhole, Bakeresete ba ne ba dira sotlhe se ba ka se kgonang go ba thusa. Ka sekai, dibuka tsa Baebele tse Bakeresete bao ba ileng ba di kwala, di sa ntse di thusa le batho ba le bantsi le gompieno. Gape Bogosi jo ba neng ba rera ka jone, bo setse bo busa kwa legodimong e bile mo nakong e e sa fediseng pelo, bo tlile go busa le mo lefatsheng. (Math. 24:14) Mme gone, puso ya bogologolo ya Roma e e neng e bogisa Bakeresete, ga e tlhole e le teng. Le fa go ntse jalo, Bakeresete ba lekgolo la ntlha la dingwaga bone, ke dikgosi gone jaanong kwa legodimong. Batho ba ba neng ba ba bogisa ba sule, fa e le gore ba tla tsosiwa, ba tla busiwa ke Bogosi jo Bakeresete ba ba neng ba ba bogisa ba neng ba rera ka jone.—Tshen. 5:10. *w20.07* 15 ¶4

## Labotlhamo, May 13

*[Aborahame] o ne a letetse motse o o nang le metheo ya mmatota, o Modimo a o tlhamileng a bo a o aga.—Baheb. 11:10.*

Aborahame o ne a dumela ditsholofetso tsa Modimo thata mo e neng e kete o bona Yo o Tloditsweng kgotsa Mesia yo o neng a tlile go nna Kgosi ya Bogosi Jwa Modimo. Leno ke lone lebaka la go bo Jesu a ile a raya Bajuda a re: “Aborahame rraalona o ne a itumelela thata tebelelo ya go bona letsatsi la me, mme o ne a le bona a bo a itumela.” (Joh. 8:56) Aborahame o ne a itse gore ditlogolwana tsa gagwe, di ne di tlile go nna karolo ya Bogosi jo Jehofa a neng a tlile go bo tlhoma e bile o ne a ikemiseditse go leta gore Jehofa a diragatse tsholofetso eo. Aborahame o ne a bontsha jang gore o letetse “motse” kgotsa Bogosi jo modiri wa jone e leng Modimo? Sa ntlha, o ne a nna moagi wa moeng kwa mafelong otlhe a a neng a ya kwa go one. O ne a nna mokgarakgatshegi e bile ga a ka a tshegetsatsa magosi a batho. Mo godimo ga moo, ga a ka a leka go itirela bogosi. Go na le moo, o ne a ikobela Jehofa, a bo a mo leta gore a diragatse ditsholofetso tsa gagwe. Dilo tseno tse Aborahame a neng a di dira, di ne di bontsha gore o na le tumelo e e nonofileng mo go Jehofa. *w20.08 3 ¶4-5*

## Matlhatso, May 14

*Yo o suleng o itshwaretse boleo jwa gagwe.—Bar. 6:7.*

Jehofa o tshepisa gore ga go na ope yo o tla reng: “Ke a bobola.” (Isa. 33:24) Ka jalo, ba ba tla tsoiswang, ba tla tsoiswa ka mebele e mesha, ba sa lwale. Mme gone, ga ba kitla ba itekanela ka gangwe fela. Go seng jalo, ba malapa le ditsala tsa bone, ba ne ba se kitla ba ba itse. Go lebeba batho botlhe ba tla itekanela kgato ka kgato, ka nako ya Puso ya ga Keresete ya Dingwaga di le Sekete. Mo-

rago ga dingwaga di le sekete, Jesu o tla busetsa Bogosi kwa go Rraagwe. Jesu o tla bo a diragaditse dilo tsoatlhe tse Jehofa a batlang gore di dirwe, go akaretsa le go tsoa baswi. (1 Bakor. 15:24-28; Tshen. 20:1-3) Akanya fela gore o tla bo o itumetse jang fa o kopana le batho ba o ba ratang ba ba tlhokafetseng. A seo se tla dira gore o itumele? A o tla bo o itumetse thata jaana mo o tla batlang go opelela Jehofa? Se re se itseng ke gore re tla rata Jehofa le Morwawe le go feta ka gonne ba dirile gore tso go e nne gone. *w20.08 16-17 ¶9-10*

## Sontaga, May 15

*Modimo o neile mongwe le mongwe mpho ya gagwe, ke gone ka moo go nang le ba ba nyalang le ba ba sa nyaleng.—1 Bakor. 7:7.*

Moaposetoloi Paulo o ile a kgothaletsa Bakeresete gore ba akanyetse go direla Jehofa ba sa nyala. (1 Bakor. 7:8-9) Paulo o ne a sa akanye gore batho ba ba sa nyalang ga ba botlhokwa fa ba bapisiwa le batho ba ba nyetseng. Tota e bile o ne a tlhophisa Timotheo, mokaulengwe yo o neng a sa nyala gore a dire tiro ya botlhokwa mo phuthengong ya ga Jehofa. (Bafil. 2:19-22) Ka jalo, go tla bo go sa siama go akanya gore mokaulengwe mongwe ga a tshwanele go dira tiro nngwe fela ka gone a sa nyala kgotsa ka gonne a nyetse. (1 Bakor. 7:32-35, 38) Jesu le Paulo ga ba ise ba ko ba re Bakeresete ba tshwanetse go nyala kgotsa gore ga ba a tshwanela go nyala. Ka jalo, re ka reng ka go nyala kgotsa ka go sa nyale? Makasine wa *Tora ya Tebelo* wa October 1, 2012 o ne wa tlhalosa gore: “Boammaaruri ke gore, go tsena mo lenyalong le go sa tsene mo go lone, ka bobedi go ka tsewa e le dimpho tse di tswang kwa Modimong. . . . Mme Jehofa ga a lebe go sa nyale e le selo se se tlhabisang dithlong kgotsa se se hutsafatsang.” Ka jalo, re tshwanetse go tlo-tla bakaulengwe ba ba sa nyalang le bo-kgaitisadi ba ba sa nyalwang. *w20.08 28 ¶8-9*

## Mantaga, May 16

*Ga go na ope yo o itseng letsatsi  
leo kgotsa ura eo, . . . go itse  
Rara fela.—Math. 24:36.*

Mo dinageng dingwe, batho ba rata go reetsa dikgang tse di molemo le go ithuta Baebele. Mme mo dinageng tse dingwe, batho ga ba batle go utlwa sepe ka Modimo kgotsa ka Baebele. Batho ba kwa o nnang gone bone ba ntse jang? Le fa batho ba ka tswa ba reetsa molaetsa wa rona kgotsa ba sa o reetse, Jehofa o batla gore re tswewe le re rera go fitlha a re go lekane. Jehofa o setse a tlhomile nako e tiro ya go rera e tliileng go fela ka yone mme go tswa foo, “bokhutlo bo tla tla.” (Math. 24:14) Jesu o ne a bolelela barutwa ba gagwe gore go ne go tla diragala eng mo metlheng ya bofelo le gore batho ba ne ba tla nna jang. O ne a itse gore dilo tseno di ne di ka dira gore ba iteege tsebe mo tirong ya go rera. Ka jalo, o ne a ba bolelela gore ba ‘nne ba disitse.’ (Math. 24:42) Mo motlheng wa ga Noa, go ne go na le dilo di le dintsi tse di neng di dira gore batho ba se ka ba reetsa molaetsa wa gagwe. Le rona dilo tse di ntseng jalo di ka re itaya tsebe. (Math. 24:37-39; 2 Pet. 2:5) Ka jalo, re tshwanetse go nna re tlhomile mogopolo mo tirong e Jehofa a re neileng yone. *w20.09* 8 ¶1-2, 4

## Labobedi, May 17

*Botlhe ba ba eletsang go obamela  
Modimo e le balatedi ba ga Kerese-  
te Jesu le bone ba tla bogisiwa.  
—2 Tim. 3:12.*

Baebele ya re Satane o tletse “bogale jo bogolo,” mme go ise go ye kae, rotlhe re tliile go utlwa manokonoko a bogale jwa gagwe. (Tshen. 12:12) Rotlhe tumelo ya rona e tliile go lekwa ka gonne go ise go ye kae, lefatshe lotlhe le tliile go leba-na le “pitlagano e kgolo e e jaaka e e iseng e ko e nne fa e sale ka tshimologo ya lefatshe go fitlha jaanong.” (Math. 24:

21) Ka nako eo, ba malapa ba ka nna ba re tilhanogela e bile tiro ya rona e ka nna ya thibelwa. (Math. 10:35, 36) A fela jaa-ka Kgosi Asa re tla tshepa gore Jehofa o tla re thusa e bile o tla re sireletsa mo nakong eo e e thata? (2 Ditir. 14:11) Jehofa o re baakanyetsa nako eo e e thata ka go re thusa gone jaanong gore re nne le tumelo e e nonofileng. O dirisa “motlhanka yo o boikanyego le yo o botlhale” go re ‘naya dijo ka nako e e tshwane-tseng’ gore re tswewe le re na le tumelo e e nonofileng. (Math. 24:45) Mme gone, mongwe le mongwe wa rona o tshwane-tse go tsaya matsapa gore a nonotshe tumelo ya gagwe.—Bah. 10:38, 39. *w20.09* 18 ¶16-18

## Laboraro, May 18

*Pelo ya kgosi e tshwana le mela-  
tswana ya metsi mo seatleng sa  
ga Jehofa. O e kaela gongwe le  
gongwe kwa a ratang teng.  
—Diane 21:1.*

Jehofa a ka nna a dirisa moya wa gagwe o o boitshepo, go dira gore balaodi ba dire se a se batlang. Batho ba kgona go epa mosele gore metsi a kgone go ya kwa ba batlang gone. Jehofa le ene a ka dirisa moya wa gagwe o o boitshepo gore balaodi ba diragatse boikaelelo jwa gagwe. Fa Jehofa a dira jalo, batho ba ba nang le taolo ba ka dira ditshwetso tse di solegelang batlhanka ba Modimo molemo. (Bapisa Esera 7:21, 25, 26.) Ke eng se re ka se dirang? Fa “dikgosi le botlhe ba ba mo maamong a a kwa godimo” ba tlhoka go dira ditshwetso tse di amang bodiredi jwa rona le kobamelo ya rona, re ka rapela Jehofa gore a dirise moya wa gagwe o o boitshepo go ba kaela. (1 Tim. 2:1, 2; Neh. 1:11) Fela jaaka Bakeresete ba lekgolo la ntlha, le rona re ka rapelela gore Jehofa a thuse bakaulengwe le bogkaiatsadi ba ba kwa kgolegolong.—Dit. 12:5; Baheb. 13:3. *w20.11* 15 ¶13-14

## Labone, May 19

*Yang kwa bathong ba ditšhaba  
tsoitlhe mme lo ba dire barutwa,  
lo ba kolobetse.—Math. 28:19.*

Fa o ithuta Baebele le motho, a bo a kolobediwa o itumela fela thata! (1 Bathes. 2:19, 20) Fa motho yo o ithutang Baebele le ene a kolobediwa, seno se bontsha gore wena le botlhe mo phuthegong ya lona, lo dirile ka natla go mo thusa. E re ka lo ile lwa dira ka natla jalo, re ka re motho yoo, ke 'lekwalo le le lo buelelang' lotlhe mo phuthegong. (2 Bakor. 3:1-3) Mo dingwageng di le nné tse di fetileng, Basupi ba ga Jehofa ba ntse ba bega dithuto tsa Baebele di ka nna 10 000 000 kgwedi le kgwedi. Mo go tsone dingwaga tseo tse nné, go ntse go kolobediwa batho ba ka nna 280 000 ngwaga le ngwaga. Re ka thusa jang batho ba le bantsi ba re ithutang le bone gore ba kolobediwe? Jehofa o sa ntse a neile batho tshono ya gore ba tle mo phuthegong ya gagwe, ke gone ka moo re tshwanetseng go dira ka natla go ba thusa gore ba dire diphetogo ba bo ba kolobediwe. Nako e ile!—1 Bakor. 7:29a; 1 Pet. 4:7. *w20.10 6 ¶1-2*

## Labotlhano, May 20

*Modimo ga a itumelele batho ba ba mabela, mme o naya ba ba ikokobeditse bopelonomi jo bogolo.  
—Jak. 4:6.*

Kgosi Saulo ga a ka a ikobela Jehofa. Mme fa moporofeti Samuele a ne a mmolelela ka phoso e a e dirileng, Saulo ga a ka a batla go amogela gore o phoso. Go na le moo, o ile a re se a se dirileng ga se maswe go le kalo e bile o ile a re batho ke bone ba ba ileng ba mo tlhohlheletsa gore a dire jalo. (1 Sam. 15:13-24) Mme e ne e se lekgetlo la ntlha Saulo a dira phoso e e tshwanang le eno. (1 Sam. 13:10-14) Ka maswabi, Saulo o ile a itetla go nna boikgogomoso. Ga a ka a fetola tsela e a neng a akanya ka

yone, ka jalo, Jehofa ga a ka a tlhola a mo amogela. Ga re batle go tshwana le Saulo. Ka jalo, re tshwanetse go ipotsa gore: 'Fa ke bala kgakololo e e tswang mo Lefokong la Modimo a ke itirela diipato tsa gore ke se ka ka dirisa kgakololo eo? A ke akanya gore se ke se dirang ga se phoso go le kalo? A ke pega ba bangwe molato ka dilo tse ke di dirang?' Fa e le gore re arabile nngwe ya dipotso tseno ka ee, re tshwanetse go fetola tsele e re akanyang ka yone le e re dirang dilo ka yone. Fa re sa dire jalo, re tlele go nna boikgogomoso mme Jehofa ga a kitla a re amogela. *w20.11 20 ¶4-5*

## Matlhatso, May 21

*O gakologelwe Mmopi wa gago yo Mogolo mo malatsing a bosha jwa gago, pele ga malatsi a matshwenyego a tla le dingwaga di goroga tsa fa o tla bo o re: "Ga ke di itumelele."—Mor. 12:1.*

Basha, ithlopheleng gore lo batla go direla mang. Lo tshwanetse go tsa-ya matsapa gore lo ithute gore Jehofa ke mang, boikaelelo jwa gagwe ke eng le gore lo ka dira jang thato ya gagwe. (Bar. 12:2) Go dira jalo go tla lo thusa gore lo kgone go dira tshwetso ya botlhokwa thata mo botshelong e leng go direla Jehofa. (Josh. 24:15) Fa o bala Baebele ka metlha, o tla rata Jehofa le go feta e bile tumelo ya gago e tla nono- fa. Itlhophele go dira thato ya ga Jehofa. Batho ba lefatshe leno la ga Satane ba re o tla itumela fa o dirisa talente e o nang le yone gore o atlege mo botshelong. Mme gone, boammaaruri ke gore batho ba ba lelekisanang le dikhumo ba 'itlhabakaka ka ditlhabi tse dintsi.' (1 Tim. 6:9, 10) Mme fa o ka tlhophaga go reetsa Jehofa le go dira thato ya gagwe, o tla "dira ka botlhale" e bile o tla itumelela botshelo.—Josh. 1:8. *w20.10 30-31 ¶17-18*

## Sontaga, May 22

*Ke tshwanetse go rera dikgang tse di molemo tsa Bogosi Jwa Modimo . . . , ka gone ke rometswe go dira jalo.—Luke 4:43.*

Mo lekgolong la ntlha la dingwaga, Jesu o ne a rera molaetsa o o neng o thusa batho gore ba nne le tsholofelo. O ne a laela barutwa ba gagwe gore ba tswelele ba rera “go ya karolong e e kwa kgakalagakala ya lefatshe.” (Dit. 1:8) Ba ne ba ka se kgone go dira tiro eo ka maatla a bone fela. Ba ne ba tlhoka “mothusi” e leng moya o o boitshepo o Jesu a neng a ba solofeditse gore o tla ba naya one. (Joh. 14:26; Seka. 4:6) Balatedi ba ga Jesu ba ile ba amogela moya o o boitshepo ka Pentekosete ya 33 C.E. Moya oo o ile wa ba thusa go rera, mme mo nakong e e khutshwane fela, batho ba le bantsi ba ile ba amogela molaetsa wa bone. (Dit. 2:41; 4:4) Fa ba ne ba bogisiwa, ga ba a ka ba boifa ba bo ba tlogela go rera, go na le moo, ba ile ba kopa Jehofa gore a ba thuse. Ba ne ba rapela ba re: “O dire gore batlhanka ba gago ba nne ba bue lefoko la gago ka bopelokgale jotlhe.” Jehofa o ile a ba naya moya o o boitshepo mme ba ne ba tswelela “ba bua lefoko la Modimo ka bopelokgale.” —Dit. 4:18-20, 29, 31. *w20.10 21 ¶4-5*

## Mantaga, May 23

*Go ya ka Dikwalo, Keresete o ne a swela maleo a rona; . . . mme a tsosiwa.—1 Bakor. 15:3, 4.*

Goreng re ka dumela gore Jehofa o ile a tsosa Jesu? Go na le batho ba le bantsi ba ba ileng ba bona Jesu fa a sena go tsosiwa mme ba ile ba bolelela ba bangwe ka kgang eno. (1 Bakor. 15:5-7) Motho wa ntlha yo moaposetoloi Paulo a buang ka ene a re o ile a bona Jesu fa a sena go tsosiwa ke Petere (Kefase). Barutwa ba ga Jesu le bone ba ile ba re Petere o ile a bona Jesu fa a sena go tsosiwa. (Luke 24:33, 34) Gape Paulo o ile a re baaposetoloi ba ba “lesome le bobedi” ba ile ba bona Jesu fa a sena go tsosiwa.

Go tswa foo, Keresete o ile a “bonala mo bakaulengweng ba ba fetang makgolo a matlhano,” ba gongwe ba neng ba le kwa moletlong o o neng o tshwaretswe kwa Galalea o go buiwang ka one go Mathaio 28:16-20. Gape Jesu o ile a “bonala kwa go Jakobe,” yo o ka tswang e ne e le monnawe. Mme Jakobe o ne a sa dumele mo go ene pele ga moo. (Joh. 7:5) Fa a sena go bona gore Jesu o ne a tsositswe, o ile a simolola go dumela mo go ene. Se se kgatlang ke gore, ka 55 C.E. fa Paulo a ne a kwala lekwalo leno, batho ba ba ileng ba bona Jesu fa a sena go tsosiwa ba ne ba sa ntse ba tshela. Ka jalo, fa motho a ne a belaela gore Jesu o ile a tsosiwa, o ne a ka nna a botsa batho bao. *w20.12 3 ¶5, 7-8*

## Labobedi, May 24

*Jehofa ga a kitla a mo latlha fa a le mo bolaong a lwala.—Pes. 41:3.*

Go ka nna thata gore re lebe dilo sentle fa re lwala kgotsa re tshwerwe ke bolwetse jo bo sa foleng. Jehofa ga a kitla a re fodisa ka kgakgamatso mme gone, o tla re naya maatla a re a tlhokang gore re kgone go itshoka. (Pes. 94:19) A ka nna a dirisa bakaulengwe le bogaittsadi gore ba re thuse ka dilo dingwe mo lelapeng. Gape a ka dira gore bakaulengwe le bogaittsadi ba rapele le rona. Kgotsa a ka nna a dira gore re gopole dilo dingwe tse di tswang mo Lefokong la gagwe, tse di jaaka tsholofelo e re nang le yone ya go tshela kwa lefatsheng le lesa re se na bolelele e bile re sa lwale. (Bar. 15:4) Re ka nna ba kgobiwa marapo ke gore ga re kgone go rera ka tsela e re neng re batla ka yone. Kgaittsadi mongwe yo o bidiwang Laurel o ne a fetsa dingwaga di le 37 a tsentswe mo motshineng o o neng o mo thusa go hema. Gape o ne a na le kankere, a dirilwe dikaro di le dintsi e bile a na le bothata jwa letlalo. Mme ga a ka a tlogela go rera. O ile a rerela baoki le batho ba ba neng ba tla go mo tlhokomela kwa ntlong ya gagwe mme o ile a thusa batho ba ka nna 17 gore ba ithute ka Jehofa. *w20.12 24 ¶9; 25 ¶12*



## Laboraro, May 25

*Jehofa o ka fa letlhakoreng la me; ga nkitla ke boifa. Motho a ka ntira eng?—Pes. 118:6.*

Moaposetoloi Paulo o ne a tlhoka thuso. Ka 56 C.E., segopa sa batho se ile sa gogela Paulo kwa ntle ga tempele ya Jerusalema se leka go mmolaya. Mo letsatsing le le latelang, fa a ne a tlisiwa fa pele ga Sanehederine, batho bao ba ne ba mo gobaditse thata. (Dit. 21:30-32; 22:30; 23:6-10) Ka nako eo, Paulo a ka tswa a ne a ipotsa gore o tla itshokela dipogiso tseo go fitlha leng. Jesu o ile a thusa Paulo jang? Mo bosigong jwa pele Paulo a tshwarwa, Jesu o ile a ema fa go ene a bo a mo raya a re: “Nna le bopelokgale jo bogolo! Gonne fela jaaka o ntse o neela bosupi ka botlalo ka dilo tse di leng kaga me mo Jerusalema, jalo o tshwanetse go naya bosupi le kwa Roma.” (Dit. 23:11) Mafoko ao a ile a kgothatsa Paulo fela thata! Jesu o ile a akgola Paulo ka gonne a ile a rera kwa Jerusalema. Mme o ile a mo solofetsa gore o tla fitlha kwa Roma, a bo a rerela batho ba koo. Ga go pelaelo gore se Jesu a ileng a se bolelela Paulo, se ile sa dira gore a ikutlwe a sireletsegile jaaka ngwana mo matsogong a ga rraagwe. *w20.11 12 ¶1, 3; 13 ¶4*

## Labone, May 26

*Tsholofelo eno ke . . . e e re thusang go nna re nonofile re sa belaele sepe.—Baheb. 6:19.*

Tsholofelo ya rona e tshwana le “tshetledi ya moya.” E re thusa gore re itshoke le fa re kopana le maemo a a thata kgotsa a a dirang gore re tlhobaele. Akanya ka botshelo jo Jehofa a re solofeditseng jone. Ka nako eo, o tla bo o tshela go se na sepe se o tshwenyegang ka sone. (Isa. 65:17) Ipone o tshela kwa lefatsheng le lesa le le nang le kagiso, le kwa go lone go se kitlang go direga dilo tse di bosula e bile matshwenyego a gago e le dilo tsa maloba. (Mika 4:4) Gape o ka notsha tumelo ya gago ka go bolelela ba bangwe ka tsholofetso ya go tshela kwa

lefatsheng le lesa. Dira ka natla mo tirong ya go rera le ya go dira batho baru-twa. Fa o dira jalo o tla nna o ‘tlhomamsegile ka tsholofelo e o nang le yone go fitlha . . . kwa bokhutlong.’ (Baheb. 6:11) E re ka re le gauri le bokhutlo jwa tsamaiso eno ya dilo, re tile go nna le mathata a le mantsi a a ka dirang gore re tlhobaele. Fa re lebana le mathata, re tla kgona go nna re ritibetse fa re ikanya Jehofa, e seng maatla a rona. A re bontsheng gore re tshepa mafoko a ga Jehofa a a reng: “Maatla a lona a tla tlisiwa fela ke go nna lo sa tshwenyega le go ikanya.”—Isa. 30:15. *w21.01 7 ¶17-18*

## Labotlhano, May 27

*Jehofa o pelotlhomogi thata.  
—Jak. 5:11.*

Ela tlhoko gore Jakobe 5:11 e bua ka bopelonomi jwa Modimo le nonofo e nngwe gape e e dirang gore re batle go atamalana le ene, e leng, kutlwelobotlhoko. (Ekes. 34:6) Tsela nngwe e Jehofa a re bontshang ka yone gore o re utlwela botlhoko, ke ka go re itshwarela fa re dirile diphoso. (Pes. 51:1) Fa Baebele e bua ka kutlwelobotlhoko, ga e bue fela ka go itshwarela motho fa a dirile phoso. Gape e kaya tsela e motho a ikutlwang ka yone fa a bona motho yo mongwe a tshwenyegile, mme seo se bo se mo tlhotltheletsa gore a mo thuse. Jehofa a re tsela e a ikutlwang ka yone ka rona fa re tlhoka thuso, e gaisa le tsela e mmê a ikutlwang ka yone ka ngwana wa gagwe fa a tlhoka thuso. (Isa. 49:15) E re ka Jehofa a re utlwela botlhoko, fa re tshwenyegile o batla go re thusa. (Pes. 37:39; 1 Bakor. 10:13) Re ka bontsha gore re utlwela bakaulengwe ba rona botlhoko ka go ba itshwarela fa ba re kgopisitse le go sa nnele go akanya ka se ba re dirileng sone. (Baef. 4:32) Tsela nngwe ya botlhokwa e re ka ba bontshang gore re ba utlwela botlhoko, ke ka go ba thusa fa ba na le mathata. Fa re dira jalo, re a bo re etsa Jehofa Modimo yo o lorato le yo o kutlwelobotlhoko.—Baef. 5:1. *w21.01 21 ¶5*

## Matlhatso, May 28

*Keresete . . . o ne . . . a lo tlhoma sekao gore lo se latele gaufiufi.—1 Pet. 2:21.*

Tlhogo ya lelapa o tshwanetse go nna tekatekano. Ga a a tshwanela go fetsa nako e ntsi kwa tirong, mo a feleletsang a palelwa ke go thusa ba lelapa la gagwe gore ba atamalane le Jehofa le go ba bontsha gore o a ba rata. O tshwanetse go ba ruta. Jehofa o a re ruta e bile o a re otlhaya ka gonne a batla go re thusa. (Baheb. 12:7-9) Jesu le ene, o ruta batho ba a ba etelelang pele ka tsela e e lorato. (Joh. 15:14, 15) O ba kgalemela a tiisitse fa go tlhokega e bile a le bonolo. (Math. 20:24-28) O tlhologanya gore re na le boleo, le gore ka dinako dingwe re dira diphoso. (Math. 26:41) Monna yo o late-lang sekao sa ga Jehofa le Jesu o nna a gopola gore mosadi le bana ba gagwe ba dira diphoso. Ga a ba 'galefele mo go botlhoko.' (Bakol. 3:19) Go na le moo, o leka go dirisa molaomotho o o mo go Bagalatia 6:1, a bo a leka go ba thusa a le "bonolo", a gopola gore le ene o dira diphoso. Fela jaaka Jesu, o lemoga gore fa a batla go ruta ba lelapa la gagwe, o tshwanetse go ba tlhomela sekao. *w21.02 6-7 ¶16-18*

## Sontaga, May 29

*A sengwe le sengwe se se hemang se bake Jah.—Pes. 150:6.*

Jehofa o rekolotse batho botlhe mo phuthengong le batho ba bangwe botlhe ba ba dumelang mo go Jesu a dirisa thekololo. (Mar. 10:45; Dit. 20:28; 1 Bakor. 15:21, 22) Ka jalo, go a utlwala go bo Jehofa a tlhomile Jesu go nna tlhogo ya phuthego, ka gonne Jesu o ile a ntsha botshelo jwa gagwe e le thekololo. Ke lone lebaka la go bo Jesu a na le taolo ya go baya melao ya gore motho mongwe le mongwe, malapa le batho botlhe mo phuthengong, ba tshwanetse go dira eng

e bile o na le tshwanelo ya go tlhomamisa gore batho botlhe ba ikobela melao eo. (Bagal. 6:2) Mme gone, Jesu ga a tlhome melao fela. O a re tlhokomela e bile o a re rata. (Baef. 5:29) Bokgaitsa-di ba bontsha gore ba ikobela Keresete ka go ikobela ditaelo tse banna ba a ba tlhomileng ba di ntshang. Bakaulengwe ba bontsha gore ba tlhologanya thulaganyo ya botlhogo ka go tlotla bokgaitsa-di. Fa batho botlhe mo phuthengong, ba tlhologanya gore Jehofa o neile bangwe taolo e bile ba tlotla thulaganyo eo, go tla nna le kagiso mo phuthengong. Mme sa botlhokwa le go feta, seo se tla galaletsa Rraarona e bong Jehofa. *w21.02 18-19 ¶14-17*

## Mantaga, May 30

*Dafide o ne a botsa Jehofa.  
—1 Sam. 30:8.*

Fa Dafide a ne a iphitlhetse Saulo kwa nageng ya Bafilisitia, ene le banna ba a neng a na le bone, ba ne ba tlogela ba malapa a bone ba bo ba ya ntweng. Fa ba ntse ba le koo, batho bangwe ba ile ba utswa dilo tsa bone, ba bo ba isa ba malapa a bone botshwarwa. Dafide ga a ka a akanya gore e re ka a itse go lwa, a ka kgona go tla ka leano le a ka le dirisang go falotsa batho bao. Go na le moo, o ile a kopa Jehofa gore a mo thusa. O ile a botsa Jehofa a re: "A ke lelekise setlhopha seno sa dirukutlhi?" Jehofa o ile a raya Dafide a re a ye go lwa le dirukhutlhi tseo mme o tla fenywa. (1 Sam. 30:7-10) Ke eng se o ka ithutang sone mo tiragalong eno? Kopa kgakololo mo go ba bangwe pele o dira tshwetso. Mosh, bua le batsadi ba gago. Gape o ka kopa thuso kwa bago-lwaneng ba ba nang le maitemogelo. Jehofa o tshepa banna bano mme le wena o ka kgona go ba tshepa. O ba tsaya e le "dimpho" tse a di neileng phuthego. (Baef. 4:8) Fa o ka etsa sekao sa bone o bo o reetsa dikgakololo tse ba go na-

yang tstone, o tla kgona go dira ditshwetso tse di siameng. *w21.03* 4-5 ¶10-11

### **Labobedi, May 31**

*[Ga go na sepe se se ka kgonang] go dira gore Modimo a se ka a tlhola a re rata.—Bar. 8:38, 39.*

Jesu o ile a re fa re bala mme gone re sa dirise se re ithutang sone, re tshwana le motho yo o agang ntlo ya gagwe mo motlhabeng. Motho yoo o dira ka natla mme gone, o itshenyetsa nako. Goreng re rialo? Ka gonne fa setsuatsue le morwalela di tla, di tlile go diga ntlo ya gagwe. (Math. 7:24-27) Ka tsela e e tshwanang, fa le rona re sa dirise se re se balang re a bo re itshenyetsa nako fela. Fa re lebana le diteko kgotsa re bogisiwa ga re kitla re kgona go itshoka. Mme gone, fa re dirisa se re se ithutang, re kgona go dira ditshwetso tse siameng, re a itumela mme gape tumelo ya rona e a nonofa. (Isa. 48:17, 18) Gore re tsewelele re ikanyega mo go Jehofa fa re lebana le mathata, re tshwanetse go nna re rapela le go bala Lefoko la gagwe ka metlha. Gape re tshwanetse go gopola gore selo sa botlhokwa se re ka se dirang, ke go dira gore Jehofa a galalediwe. Re ka tlhomamisega gore Jehofa ga a kitla a re latlha le gore ga go na sepe se se ka dirang gore a tlogele go re rata. —Baheb. 13:5, 6. *w21.03* 15 ¶6; 18 ¶20

### **Laboraro, June 1**

*Re ne re ikemiseditse go lo bolelela dikgang tse di molemo tsa Modimo, tota le go ntsha botshelo jwa rona gore re lo thuse.—1 Bathes. 2:8.*

Re tshwanetse go rata batho ba re ithutang Baebele le bone. Ga re a tshwanela go lebala gore kamoso batho bao, e tla bo e le bakaulengwe le bokgaisadi ba rona. Ga go motlhofo gore ba tlogele ditsala tsa bone le gore ba dire diphe-

go. Go botlhokwa gore fa re ithuta Baebele le motho, re mo itsise bakaulengwe le bokgaisadi mo phuthengong. Ba tla mo thusa gore a atamalane le Jehofa. Gape bakaulengwe le bokgaisadi ba tla mo thusa fa a lebane le mathata. Re batla gore batho ba re ithutang le bone ba iku-tlwe e le karolo ya lelapa la ga Jehofa e bile re batla gore ba rate bakaulengwe le bokgaisadi. Seno se tla dira gore go nne motlhofo gore ba tlogele ditsala tsa bone tse di sa direleng Jehofa. (Dia. 13:20) Fa ditsala tsa bone di ba tlhanogela, ba tla bo ba setse ba na le ditsala mo phuthengong.—Mar. 10:29, 30; 1 Pet. 4:4. *w20.10* 17 ¶10-11

### **Labone, June 2**

*Ke neilwe taolo yotlhe kwa legodimong le mo lefatsheng.—Math. 28:18.*

Re tshwanetse go nna ditsala tsa ga Jesu fa e le gore re batla go atamalana le Jehofa. Ka ntlha yang? Sa ntlha, Jesu o ne a raya barutwa ba gagwe a re: “Rara ka boene o a lo rata, ka gonne lo nthatile.” (Joh. 16:27) Gape o ne a re: “Ga go na ope yo o tlang kwa go Rara fa e se ka nna.” (Joh. 14:6) Go leka go atamalana le Jehofa re se ditsala tsa ga Jesu go tshwana le go leka go tse-na mo ntlong mme o sa dirise kgoro. Jesu o ile a dirisa papiso e e tshwanang fa a ne a re ke ene “kgoro ya dinku.” (Joh. 10:7) Sa bobedi, Jesu o ne a na le botho jo bo tshwanang le jwa ga Rraagwe. O ne a raya barutwa ba gagwe a re: “Yo o mponeng o bone le Rara.” (Joh. 14:9) Ka jalo, fa re batla go itse Jehofa, re tshwanetse go ithuta ka Jesu. Fa re ntse re ithuta ka ene, re tla mo rata le go feta. Mme fa re rata Jesu, re tla rata le Jehofa. *w20.04* 21-22 ¶5-6

## Labotlhano, June 3

*Ke itumedisiwa ke go nna bokoa, . . . gonne fa ke le bokoa, ke gone ke leng maatla.—2 Bakor. 12:10.*

A o a lwala kgotsa o golafetse? A ga o bone sentle kgotsa o na le bothata jwa mangole? Fa e le gore go ntse jalo, a o sa ntse o ka kgona go direla Jehofa le batho ba basha le ba ba itekanetseng sentle mo mmeleng? Ee o ka kgona! Bakeresete ba le bantsi ba ba tsofetseng le ba ba lwalang ba sa ntse ba le mo lobelong lwa botshelo. Ba ka se kgone go dira seno ka maatla a bone fela. Ka jalo, ba ikaega ka maatla a a tswang kwa go Jehofa. Fa ba sa kgone go ya dipokanong, ba direlwa thulaganyo ya gore ba reetse dipokano ka founu kgotsa ba lebelele tse di rekotilweng. Ba nna le seabe mo tirong ya go dira barutwa ka gonne ba rerela dingaka, baoki le ba masika. Fa o sa kgone go direla Jehofa jaaka o batla, o se ka wa kgobega marapo e bile o se ka wa akanya gore o ka se kgone go itshoka go fitlha kwa bokhutlong. Jehofa o a go rata ka gonne o na le tumelo mo go ene e bile ga a kitla a le-bala dilo tse o mo diretseng tsone mo dingwageng tse di fetileng. O tlhoka thuso ya gagwe mme ga a kitla a go latlha. (Pes. 9:10) Go na le moo, o tla atamala-na thata le wena. *w20.04 29 ¶16-17*

## Matlhatso, June 4

*Ke dira dilo tsotlhe ka ntsha ya dikgang tse di molemo, gore ke di bo-lelele ba bangwe.—1 Bakor. 9:23.*

O ka tlotla ka eng le motho yo o tse-nang kereke? Tlotla le ene ka dilo tse lo dumalanang ka tsone. A ka tswa a obamela Modimo a le esi fela, a ka tswa a dumela gore Jesu ke ene Mmolo-ki wa batho kgotsa a ka tswa a dumela gore re tshela mo metlheng ya bofelo e e tletseng ka mathata. Dirisa dilo tseo go tlotla le ene ka tsela e e tla dirang gore a kगतlhegele molaetsa wa Baebel-e. Nna o gopotse gore batho ba ka tswa

ba sa dumele sengwe le sengwe se se rutiwang kwa dikerekeng tsa bone. Ka jalo, le fa motho a ka go bolelela gore o tsena kereke efe, mmotse dipotso, o leke go bona gore ene o dumela eng. Mokaulengwe mongwe yo e leng moro-ngwa a re batho bangwe ba ba reng ba dumela thuto ya Tharonngwe, tota ga se gore ba dumela gore Rara, Morwa le moya o o boitshepo, ke Modimo a le mongwe. A re: “Go itse gore motho a ka tswa a sa dumele dilo tsotlhe tse di ruti-wang kwa kerekeng ya bone, go nthusa gore ke tlotle le ene ka dilo tse a di du-melang.” Ka jalo, leka go itse se tota ba-tho ba se dumelang. Fa o dira jalo, o tla nna “dilo tsotlhe mo bathong ba mefuta yotlhe” fela jaaka Paulo.—1 Bakor. 9:19-22. *w20.04 10 ¶9-10*

## Sontaga, June 5

*Mo nakong eo batho ba gaeno ba tla falola, mongwe le mongwe yo o fitlhelwang a kwadilwe mo bukeng.—Dan. 12:1.*

Daniele le Johane ba ile ba tlhalosa gore batho ba ba ikobelang Jehofa le Jesu ba tile go falola pitlagano e kgolo, ka jalo, ga re tlhoke go boifa. Daniele o ile a tlhalosa gore batho ba maina a bone a ‘kwadilweng mo bukeng’ ya botshelo ke bone ba tla falolang. Ke eng se re tshwanetseng go se dira gore maina a rona a kwadiwe mo bukeng ya botshelo? Re tshwanetse go bontsha gore re na le tumelo mo go Jesu Keresete, Kwana ya Modimo. (Joh. 1:29) Re tshwanetse go bontsha gore re ineetse mo go Jehofa ka go kolobediwa. (1 Pet. 3:21) Gape re tshwanetse go ema Bogosi Jwa Modimo nokeng ka go thusa ba bangwe go itse Jehofa. Gone jaanong ke nako ya gore re ikanye Jehofa le gore re tshepe phuthego ya gagwe. Gape ke nako ya gore re eme Bogosi Jwa Modimo nokeng. Fa re dira jalo, Jehofa o tla re boloka fa a senya kgosi ya bokone le kgosi ya borwa. *w20.05 16 ¶18-19*

## Mantaga, June 6

*Jehofa, leina la gago le nnetse ruri.*

—Pes. 135:13.

Adame le Efa ba ne ba itse gore leina la Modimo ke Jehofa, e bile ba ne ba itse dilo di le dintsi ka ene. Ba ne ba itse gore Jehofa ke Mmopi, ke ene a ba neileng bo-tshelo le legae le lentle le ba neng ba nna mo go lone, le gore o ba kopantse gore e nne monna le mosadi. (Gen. 1:26-28; 2:18) Mme gone, a ba ne ba tla tswelela ba akanya ka dilo tse dintle tse Jehofa a ba diretseng tsone? A ba ne ba tla bontsha gore ba rata Jehofa le gore ba lebogela se a ba diretseng sone? Karabo e ne ya bonala sentle fa mmaba wa Modimo a ne a ba leka. Satane o ne a botsa Efa jaana a dirisa noga: "A tota go ntse jalo gore Modimo o rile lo se ka lwa ja mo setlhareng sengwe le sengwe sa tshingwana?" (Gen. 2:16, 17; 3:1) Fa Satane a ne a botsa Efa potso eno, o ne a e tswakantse le maaka a batla gore Efa a simolole go belaela Modimo. Modimo o ne a ba reile a re ba ka ja mo setlhareng sengwe le sengwe jaaka ba batla, ntle le mo setlhareng se le sengwe fela. (Gen. 2:9) Satane o ne a dira gore go nne e kete Modimo ga a pelotshweu. Mme seo se ka tswa se ile sa dira gore Efa a ipotse gore: 'A go na le sengwe se Modimo a nti-mang sone?' w20.06 3-4 ¶8-9

## Labobedi, June 7

*Tswelatang lo itshokelana e bile lo itshwarelana ka pelo yotlhe.*

—Bakol. 3:13.

Batlhanka bangwe ba ga Jehofa ba ile ba utlwiwa bothoko ke se mokaulengwe kgotsa kgaitisadi a ileng a se dira. Moapo-setoloi Paulo o ile a tlhalosa gore ka dina-ko tse dingwe re ka nna le "lebaka la go ngongorega" ka mokaulengwe kgotsa kgaitisadi wa rona. Gongwe ga re a ka ra tshwarwa sentle mo nakong e e fetileng, mme seo se ka dira gore re galefe. Fa re sa ikele tlhoko re ka nna ra tshwara sekgopi. Fa motho a galefile a ka simolola go katogela kgakala le batho ba ga Jehofa. Akanya ka se se diragaletseng mokaulengwe Pablo yo o nngang kwa South America. Mongwe o ile

a re Pablo o dirile sengwe se se siamang le fa a ne a sa se dira. Bagolwane ba ile ba dumela seo mme Pablo o ile a latlhegelwa ke ditshiamelo dingwe mo phuthegong. Pablo o ile a dira eng? A re: "Ke ne ka galefa mme fa nako e ntse e ya, ke ne ka katogela kgakala le phuthego." Fa motho a kile a dira boleo jo bo masisi, segakolodi sa gagwe se ka mo tshwenya mme a ka nna a akanya gore Modimo ga a kitla a tlhola a mo rata. Le fa a ile a ikwatlhaya a bo a itshwarelwa, a ka nna a ikutlwa a sa tshwanele go nna motlhanka wa ga Jehofa. O ikutlwa jang ka bakaulengwe le bokgaitisadi ba ba lebanang le maemo a re tlotlileng ka one? w20.06 19 ¶6-7

## Laboraro, June 8

*Yo o bothhale o bona kotsi a bo a iphitlha.—Diane 22:3.*

Re tshwanetse go lemoga dilo tse di ka re tsenyang mo mathateng re bo re di thibogela. (Bah. 5:14) Ka sekai, re tshwanetse go nna kelotlhoko fa re tlhopha dilo tse re itlosang bodutu ka tsone. Difilimi le mananeo a thelebishene a le mantsi a tletse ka boitsholo jo bo sa siamang. Re a itse gore Jehofa o tlhoile boitsholo jo bo sa siamang e bile batho ba ba bo dirang ba ikutlwisa bothoko e bile ba utlwisa ba bangwe bothoko. Ga re a tshwanela go itlosa bodutu ka dilo tse di ntseng jalo ka gone di ka dira gore re se ka ra tlhola re rata Jehofa. (Baef. 5:5, 6) Re tshwanetse go nna kelotlhoko gore re se ka ra tsiediswa ke tshedimosetso ya maaka e e anamisiwang ke batlhanogi, ba ka nna ba bua dilo tse di ka dirang gore re se ka ra tlhola re tshepa bakaulengwe ba rona le phuthego ya Modimo. (1 Tim. 4:1, 7; 2 Tim. 2:16) Dilo tse di ntseng jalo di ka koafatsa tumelo ya rona. Ka jalo, ga re a tshwanela go dumela dilo tse batlhanogi ba di buang. Ka ntlha yang? Ka gone batlhanogi "ke batho ba ba senyegileng mo mogopolong" le ba ba latlhileng boammaaruri. Sa bone fela ke gore ba batla go tsosa "dipotso le dikganetsano." (1 Tim. 6:4, 5) Ba batla gore re dumele maaka le gore re se ka ra tlhola re tshepa bakaulengwe ba rona. w20.09 29 ¶13, 15

## Labone, June 9

*[Nna o] dire se se tswelang motho yo mongwe mosola, e seng se se tswelang [wena] mosola.*

—1 Bakor. 10:24.

Banyalani ba tshwanetse go ratana le go tlotlana. (Baef. 5:33) Baebele e re kgothaletsa go rata go abela ba bangwe. (Dit. 20:35) Banyalani ba tshwanetse go nna le nonofo efe gore ba kgone go ratana le go tlotlana? Ba tshwanetse go nna le boikokobetso. Go nna le boikokobetso go thusitse banyalani ba le bantsi ba Bakeresete gore ba nne ba itumetse mo manyalong a bone. Ka sekai monna mongwe yo o bidiwang Steven a re: “Banyalani ba tshwanetse go dirisana mmogo segolo jang fa ba na le mathata. Go na le gore o akanye ka gore ‘ke eng se se ntshiametseng gongwe o ka nna wa akanya ka gore ke eng se se re siametseng.’” Mosadi wa gagwe e bong Stephanie le ene o ikutlwa jalo. A re: “Ga go na motho yo o batlang go tshela le motho yo o ratang manganga. Fa re na le kgotlhang, re leka go bona gore ke eng se se e bakileng. Go tswa foo, re a rapela, re dira dipatlisiso re bo re tlotla ka gore re ka dirang go rarabolola bothata joo. Re tila go lwantshana mme re leka go rarabolola bothata.” Banyalani ba tla itumela fa ba sa ikakanyetse ba le bosii mme ba leka go akanyetsana. w20.07 3-4 ¶5-6

## Labotlhamo, June 10

*Ke ne ke gatetse pele thata mo dithutong tsa Bajuda go gaisa balekane ba me ba le bantsi ba lotso lwa me.—Bagal. 1:14.*

Ga re a tshwanela go ikaega ka maatla le bokgoni jwa rona fa re direla Jehofa. Moaposetoloi Paulo o ne a rutegile, o ne a rutilwe ke moeteledipele wa Mojuda yo o neng a tlotliwa ke batho e bong Gamaliele. (Dit. 5:34; 22:3) O ne a itsiwe ke Bajuda ba le bantsi e bile ba mo tlotla. (Dit. 26:4) Mme Paulo ga a ka a ikanya bokgoni le

maatla a gagwe. O ne a tlogela dilo tsothe tse di neng di dira gore batho ba ba sa tlotleng Jehofa ba mo tlotle kgotsa ba mo tseele kwa godimo. (Bafil. 3:8) Fa Paulo e nna Mokeresete, o ne a lebana le dikgwethlo tse dintsi. O ne a tlhoiwa ke batho ba setshaba sa kwa ga bone. (Dit. 23:12-14) Ba ne ba mo itaya, ba mo tsenya mo kgolegolong le fa e ne e le Moroma. (Dit. 16:19-24, 37) Gape Paulo o ne a lemoga gore o na le makoa le gore ga se ka dinako tsothe a kgonang go dira se se siameng. (Bar. 7:21-25) Paulo ga a ka a kgoibiwa marapo ke mathata a a neng a kopana le one le dilo tse batho ba bangwe ba neng ba di bua, go na le moo o ne a re o “itumedisiwa ke makoa.” Goreng a ne a itumedisiwa ke makoa? Ka gone fa a ne a le bokoa, ke gone a neng a kgona go lemoga sentle fa Jehofa a mo thusa.—2 Bakor. 4:7; 12:10. w20.07 16 ¶7-8

## Matlhatso, June 11

*Yo o dumelang mo go nna, . . . o tla dira ditiro tse dikgolo go feta tseno.—Joh. 14:12.*

Go botlhokwa gore re nne re tlhomile mogopolo mo tirong ya go rera. Jesu o ile a bolelela pele gore balatedi ba gagwe ba ne ba tla tswelela ba rera fa a sena go swa le gore ba ne ba tla rera lobaka lo loleele. Fa Jesu a sena go tsosiwa, o ne a dira kgakgamatso ka go thusa balatedi bangwe ba gagwe gore ba tshware ditlhapi di le dintsi. Go tswa foo, o ne a ba tlhalosetsa gore tiro ya go rera le go dira barutwa e botlhokwa go gaisa tiro epe fela. (Joh. 21:15-17) Pele Jesu a ya legodimong, o ne a bolelela barutwa ba gagwe gore tiro eno ya go rera e ne e tla dirwa mo lefatsheng lotlhe. (Dit. 1:6-8) Dingwaga di se kae moragonyana, Jesu o ne a bontsha moaposetoloi Johane se se neng se tla direga mo “letsatsing la Morena.” Mo ponatshegelong eo, Johane o ile a bona moengale “a tshotse dikgang tse di molemo tsa bosakhutleng” gore a di bolelele mo “setshabeng sengwe le sengwe le lotso le teme le batho.” (Tshen. 1:10; 14:6) Jehofa o batla gore re rere di-

kgang tse di molemo mo lefatsheng lo-  
tlhe go fitlha a re go lekane. *w20.09 9 ¶5*

### **Sontaga, June 12**

*E re ka Aborahame a ne a na le  
tumelo, fa a ne a lekwa, go ne ga  
nna jaaka e kete o ne a setse a  
ntshitse Isake setlhabelo.*

—*Baheb. 11:17.*

Lelapa la ga Aborahame le ile la nna le mathata. Mosadi wa gagwe e bong Sara o ne a sa kgone go tshola bana. Ba ne ba fetsa dingwaga di le dintsi seo se ba utlwisa botlhoko. Sara o ne a naya Aborahame lelata la gagwe e bong Hagare gore a ba tsholele ngwana. Mme fa Hagare a sena go ima Ishemaele o ne a simolola go nyatsa Sara. Maemo ao a ile a nna maswe thata jaana mo Sara a ileng a koba Hagare. (Gen. 16:1-6) Kwa bofelong Sara o ne a ima mme a tshola ngwana mme Aborahame o ne a mmitse Isake. Aborahame o ne a rata Ishemaele le Isake fela thata. Mme e re ka Ishemaele a ne a bogisa Isake, Jehofa o ne a laela Aborahame gore a mo tsamaisa le Hagare. (Gen. 21:9-14) Morago ga dingwaga di le dintsi, Jehofa o ne a laela Aborahame gore a mo ntshetse setlhabelo ka Isake. (Gen. 22:1, 2; Baheb. 11:17-19) Fa Jehofa a ne a laela Aborahame gore a tsamaisa Ishemaele le gore a ntshe setlhabelo ka Isake, Aborahame o ne a tshwanetse go tshema gore Jehofa o ne a tla dira se a neng a se solofeditse ka bana bao ba gagwe. *w20.08 4 ¶9-10*

### **Mantaga, June 13**

*[Aparang] botho jo boshwa jo Modimo  
a bo dirileng go ya ka thato ya  
gagwe; mme botho jono, ruri bo  
siame e bile bo a ikanyega.*

—*Baef. 4:24.*

Akanya fela gore batho ba ba tla tso-  
siwang ba tla bo ba itumetse jang fa  
ba apola botho jwa bogologolo mme ba  
tshela ka melao ya Modimo. Batho bo-  
tlhe ba ba tla dirang diphetogo, ke bone  
ba ba tla tsheleng ruri kwa Paradai-

seng. Mme Jehofa ga a kitla a letlele-  
la batho ba ba sa batleng go fetoga, go  
tshela kwa Paradaiseng le gore ba senye  
kagiso e e tla bong e le gone. (Isa. 65:  
20; Joh. 5:28, 29) Fa Bogosi Jwa Modi-  
mo bo busa, re tla bona boammaaruri  
jwa mafoko ano a a mo go Diane 10:22:  
“Tshegofatso ya ga Jehofa—ke yone e e  
humisang, mme ga a e oketse ka botlho-  
ko.” Jehofa o tla dirisa moya wa gagwe o  
o boitshepo, go thusa batho ba gagwe  
gore ba nne le botho jo bo tshwanang  
le jwa ga Keresete le gore ba itekanele.  
(Joh. 13:15-17; Baef. 4:23) Letsatsi le  
letsatsi mebele ya bone e tla nna e toka-  
fala go fitlha ba itekanela. Ruri botshe-  
lo bo tlile go nna monate!—Jobe 33:25.  
*w20.08 17 ¶11-12*

### **Labobedi, June 14**

*Ikemisetseng [gore] . . . lo se ka  
lwa itshunya nko mo dikgannyeng  
tsa batho ba bangwe.*

—*1 Bathes. 4:11.*

Re tshwanetse go gopola gore Bakere-  
sete bangwe ba dirile tshwetso ya go sa  
nyale. Ba bangwe ba batla go nyala mme  
ga ba ise ba bone motho yo o siameng.  
Mme ba bangwe ba ka tswa ba tlhokafa-  
letswe ke monna kgotsa ke mosadi. Ma-  
baka a bone a farologane, mme gone, a  
seo se raya gore ba ba mo phuthegong  
ba tshwanetse go ba batlela molekane  
kgotsa go ba botsa gore ke eng fa ba sa  
nyala? Fa ba sa go kopa gore o ba thuse,  
ba ka ikutlwa jang fa o ba batlela mole-  
kane? (1 Tim. 5:13) Bakaulengwe le bo-  
kgaitsadi ba ba seng mo lenyalong ba tla  
itumela fa re ba rata ka ntlha ya botho  
jwa bone jo bontle, go na le gore re ba  
utlwele botlhoko ka gonne ba sa nyala.  
Re tshwanetse go ba akgolela gore ba  
ikanyega mo go Jehofa go na le go ba  
utlwela botlhoko. Seo ga se kitla se dira  
gore bakaulengwe le bogkaitsadi bano  
ba ikutlwe e kete re ba raya re re: “Ga  
ke go tlhoke.” (1 Bakor. 12:21) Mme ba  
tla lemoga gore re a ba tlotla le gore re  
itumelela go bo ba le mo phuthegong.  
*w20.08 29 ¶10, 14*

## Laboraro, June 15

*[Keresete] o ne a bonwa ke baru-twa ba ba fetang 500 ka nako e le nngwe.—1 Bakor. 15:6.*

Moragonyana, Jesu o ile a bonala kwa go moaposetoloi Paulo. (1 Bakor. 15:8) Fa Paulo (Saulo) a ne a le mo tseleng a ya kwa Damaseko o ile a utlwa lentswe la ga Jesu a bo a mmona mo ponatshegelong a le kwa legodimong. (Dit. 9:3-5) Se se ileng sa diragalela Paulo e ne e le bosupi jwa gore tota Jesu o ne a tsositswe. (Dit. 26:12-15) Batho ba le bantsi ba ne ba ka kgatlhegela se Paulo a neng a se bua ka gonne o ne a bogisa Bakeresete pele Jesu a bonala kwa go ene. Fa Paulo a sena go thatswega pelo gore Jesu o tsositswe, o ile a leka ka natla go thusa ba bangwe go dumela boammaaruri joo. Fa a ntse a rera gore Jesu o ile a swa a bo a tsosiwa o ne a itshokela dipogiso. O ne a itewa, a tsenngwa mo kgolegelong le go thubegelwa ke sekepe. (1 Bakor. 15:9-11; 2 Bakor. 11:23-27) Tota Paulo o ne a dumela gore Jesu o ile a tsosiwa mo a neng a ikemiseditse go swela se a neng a se dumela. Se se diragaletseng Bakeresete ba mo nakong e e fetileng, se re tlhomamisetsa gore Jesu o ile a tsosiwa le gore mo nakong e e tlang baswi ba tlile go tsosiwa. *w20.12 3 ¶8-10*

## Labone, June 16

*Fa lo [batla Jehofa], o tla dira gore lo mmone.—2 Ditir. 15:2.*

Re ka ipotsa dipotso tseno: 'A ke ya dipokanong ka metlha?' Go ya dipokanong go re thusa gore re tswelele re di-rela Jehofa, e bile fa re le kwa dipokanong, bakaulengwe le bokgaisadi ba a re kgothatsa. (Math. 11:28) Gape re tshwanetse go ipotsa go re: 'A ke bala Baebele letsatsi le letsatsi?' Fa e le gore o na le lelapa, a lo tshwara kobame-lo ya lelapa beke le beke? Fa e le gore o nna o le nosi, a o beela nako ya go ithuta kwa thoko beke le beke jaaka o ne o ka dira fa o ne o na le lelapa? A o

dira ka natla mo tirong ya go rera ka Bogosi? Ke eng fa re tshwanetse go ipotsa dipotso tseno? Baebele ya re Jehofa o tlhatlhoba dilo tse re di akanyang le tse di mo dipeleng tsa rona, mme le rona re tshwanetse go dira jalo. (1 Ditir. 28:9) Fa re itlhatlhoba re bo re bona gore re tlhoka go fetola mekgele e re ipeetseng yone kgotsa re tlhoka go fetola tsela e re akanyang le e re ikutlwang ka yone, re tshwanetse go kopa Jehofa gore a re thuse. A re tseyeng matsapa go ipaakanyetsa dinako tsa mathata tse di larileng kwa pele. *w20.09 19 ¶19-20*

## Labotlhamo, June 17

*Ope wa lona yo o ka se kang a tlogela dilo tsa gagwe tsothe ga a ka ke a nna morutwa wa me.*

—*Luke 14:33.*

Jesu o ile a dirisa sekai sengwe go tlhalosa gore motho o tshwanetse go dira eng fa a batla go nna morutwa wa gagwe. O ile a dira sekai ka motho yo o batlang go aga tora le ka kgosi e e batlang go ya ntweng. Jesu o ile a re fa motho a batla go aga, o tshwanetse go 'nna fa fatshe pele a bo a bala ditshenyegelo' go bona gore a o tla kgona go fetsa go aga. Gape o ne a re kgosi e tshwanetse go "nna fa fatshe pele e bo e batla kgakololo" go bona gore a masole a yone a tla kgona go fenywa kwa ntweng. (Luke 14:27-32) Ka tsela e e tshwanang, Jesu o ne a itse gore fa motho a batla go nna morutwa wa gagwe, o tshwanetse go nna fa fatshe pele a akanyetse dilo tse a tla tlhokang go di dira. Ka jalo, fa re ithuta Baebele le motho, re tshwanetse go mo kgothaletsa gore re ithute beke le beke. Re tshwanetse go baakanyetsa nako le nako pele ga re ya go ithuta le ene. Fa re ntse re baakanyetsa, re tshwanetse go akanya ka motho yo re ithutang le ene mme re leke go bona gore re tlile go mo tlhalosetsa jang se re se ithutang ka tsela e e motlhofo gore a kgone go se tlhaloganya le go se dirisa.—Neh. 8:8; Dia. 15:28a. *w20.10 7 ¶5; 8 ¶7*



## Matlhatso, June 18

*Jalo yang kwa bathong . . . mme lo ba dire barutwa . . . , lo ba rute gore ba ikobele dilo tsothle tse ke di lo laetseng.—Math. 28:19, 20.*

Jesu o rile re rute batho dilo tse a di laetseng. Mme gone, ga re a tshwanela go lebala ntlha eno ya bothlokwa. Jesu ga a ka a re fela re rute batho dilo tse a di laetseng, mme gone, o ile a re re rute batho “go boloka dilo tsothle tse a di laetseng.” Re tshwanetse go ikobela taelo eno ya ga Jesu ka go ruta batho ba re ithutang Baebele le bone se ba tshwanetseng go se dira le gore ba tshwanetse go se dira jang. (Dit. 8:31) Go “boloka” taelo go kaya go e ikobela. Fa re ithuta le motho Baebele, re mo ruta se Modimo a batlang gore re se dire. Mme gape, re tshwanetse go ruta batho ba re ithutang le bone gore ba dirise se ba se ithutang. (Joh. 14:15; 1 Joh. 2:3) Gape re tshwanetse go ba tlhomela sekao. Re tshwanetse go ba bontsha gore ba ka dirisa jang se ba se ithutang fa ba le kwa tirong, kwa sekolong kgotsa fa ba itlosa bodutu. Fa re na le bone, re tshwanetse go kopa Jehofa gore a ba kaele ka moya wa gagwe o o boitshepo.—Joh. 16:13. *w20.11 2-3 ¶3-5*

## Sontaga, June 19

*“Dilo tseno di tla direga ka moya wa me, e seng ka mophato wa masole kgotsa ka maatla a batho,” go bua Jehofa wa masomosomo.—Seka. 4:6.*

Barutwa ba ga Jesu ba ile ba lebana le dikgwetlho. Ka sekai, go ne go na le dikhopi di le mmalwa fela tsa Dikwalo. Gape ba ne ba se na dikgatiso tse di ba thusang go tlhaloganya Lefoko la Modimo jaaka rona gompiono. Mo godimo ga moo, ba ne ba tshwanetse go re-rela batho ba ba buang dipuo tse di farologaneng. Le fa gone ba ne ba lebane le dikgwetlho tseo, ba ile ba dira

sengwe se go neng go lebega se ka se kgonege. Mo dingwageng di ka nna 30 fela, ba ile ba kgona go rera dikgang tse di molemo “mo popong yotlhe e e kafa tlase ga legodimo.” (Bakol. 1:6, 23) Mo motlheng wa rona, Jehofa o kaela batho ba gagwe e bile o ba thusa go dira thato ya gagwe. O ba kaela a dirisa Baebele e e tlhotlheleditsweng ka moya wa gagwe. Baebele e re thusa go itse gore Jesu o ne a rerela batho jang le gore o ile a naya barutwa ba gagwe taelo ya gore ba tswelele ba dira tiro ya go rera. (Math. 28:19, 20) Jehofa ga a na tlhaolele, o ile a bolelela pele gore dikgang tse di molemo di tla rerwa “mo setshabeng sengwe le sengwe le lotso le teme le batho.” (Tshen. 14:6, 7) O batla gore batho botlhe ba utlwe dikgang tse di molemo tsa Bogosi. *w20.10 21 ¶6-8*

## Mantaga, June 20

*O golola batho ba ba boikokobetso, le fa go ntse jalo, o tlhoile ba ba mabela.—2 Sam. 22:28.*

Kgosi Dafide o ne a rata “molao wa ga Jehofa.” (Pes. 1:1-3) Dafide o ne a itse gore Jehofa o rata batho ba ba boikokobetso mme o tlhoile batho ba ba boikogomoso. Ka jalo, o ile a letla Lefoko la Modimo le mo thusa go fetola tsela e a akanyang ka yone. O ile a re: “Ke tla baka Jehofa, yo o nneileng kgakololo. Ruri, diphilo tsa me di ntshiamisitse mo masigong.” (Pes. 16:7) Fa re le boikokobetso re tla letla Baebele e fetola tsela e e sa siamang e re akanyang ka yone pele re dira diphoso. Lefoko la Modimo le tla nna jaaka lentswe le le re rayang le re: “Tsela ke e. Tsamayang ka yone.” Le tla re tlhagisa fa re simolola go dira sengwe se se phoso. (Isa. 30:21) Go bothlokwa gore re reetse Jehofa. (Isa. 48:17) Fa re dira jalo, ga go na go tlhokega gore motho yo mongwe a tle go re gakolola, re bo re tsenwa ke matlho. E bile re tla atamalana le Jehofa Modimo ka gonne o a re kgathalela.—Baheb. 12:7. *w20.11 20 ¶6-7*

## Labobedi, June 21

*E rile ba utlwa a bua ka tsogo ya baswi, bangwe ba ne ba simolola go sotla.—Dit. 17:32.*

Go ka tswa go ne go na le batho bangwe ba kwa Korintha ba ba neng ba sa dumele mo tsogong. (1 Bakor. 15:12) Gape bangwe ba ka tswa ba ne ba akanya gore kgang ya go tsošwa ga baswi, e ne e le go ijesa dijo tsa ditoro fela. Gongwe ba ne ba akanya gore fa go twe motho o sule seo se raya gore ke moleofi mme fa go twe motho o tsositswe go raya gore ke Mokeresete e bile o itshwaretsewe maleo. Le fa batho bano ba ka tswa ba ne ba na le mabaka afe a go sa dumele mo tsogong ya baswi, tumelo ya bone e ne e le ya lefela. Fa e le gore Modimo ga a tsoša Jesu, seo se raya gore thekololo ga ya duelelwa le gore batho botlhe ba ne ba sa itshwarelwa maleo a bone. Ka jalo, botlhe ba ba neng ba sa dumele mo tsogong ya baswi, ba ne ba se na tsholofelo ya tsogo. (1 Bakor. 15:13-19; Baheb. 9:12, 14) Moaposetoloi Paulo o ne a itse gore “Keresete o [ne a] tsositswe mo baswing.” Tsogo ya ga Jesu e gaisa tsogo epe fela e e kileng ya nna teng. Ka ntlha yang? Ka gonne batho botlhe ba ba ileng ba tsošwa pele ga Jesu a tsošwa, ba ile ba swa gape. Paulo o ile a re Jesu ke “mabutswapele a ba ba robetseng mo losong.” Jesu e ne e le motho wa ntlha go tsošwa e le sebopiwa sa semoya gape e ne e le ene wa ntlha go tsošediwa go ya go tshela kwa legodimong.—1 Bakor. 15:20; Dit. 26:23; 1 Pet. 3:18, 22. *w20.12* 5 ¶11-12

## Laboraro, June 22

*Ba ne ba bolelela bakaulengwe tshwetso e baaposetoloi le bagolwane kwa Jerusalema ba neng ba e dirile, gore ba e diragatse.—Dit. 16:4.*

Mo lekgolong la ntlha la dingwaga, sethlopha se se laolang sa kwa Jerusalema se ne se dira mmogo go thlomamisa gore go na le kagiso mo phuthegong le gore dilo di dirwa ka thulaganyo. (Dit. 2:42) Ka sekai, mo e ka nnang ka 49 C.E., Bakeresete ba le bantsi ba ne ba ngangisana ka gore a batho ba ba direlang Jehofa ba

tshwanetse go rupisiwa kgotsa jang. Ka jalo, sethlopha se se laolang se ile sa sekaseka kgang eo se thusiwa ke moya o o boitshepo. Fa kgang ya go rupa e ne e sa rarabologe, tiro ya go rera e ne e tla kgoeletsega. Le fa gone baaposetoloi le banna ba bagolwane e ne le Bajuda, fa ba dira tshwetso, ba ne ba sa tlhotlhelediwe ke dingwao tsa Bajuda kgotsa batho ba ba neng ba di rata. Go na le moo, ba ile ba batla kaelo mo Lefokong la Modimo e bile ba ile ba kopa Jehofa gore a ba neye moya o o boitshepo gore ba kgone go dira tshwetso e e siameng. (Dit. 15:1, 2, 5-20, 28) Go ne ga felela jang? Jehofa o ne a segofatsa tshwetso ya bone. Go ne ga tswelela go na le kagiso le kutlwano mo phuthegong e bile tiro ya go rera e ne ya gatela pele. (Dit. 15:30, 31; 16:5) Mo motlheng wa rona, phuthego ya ga Jehofa e re thusa go tswelela re dira dilo ka thulaganyo e bile re dirisana ka kagiso. *w20.10* 22-23 ¶11-12

## Labone, June 23

*Morwaake e bong Solomone, [ke ene] yo Modimo a mo tihophileng. —1 Ditir. 29:1.*

Re ka nna ra se ka ra nwa kabelo e re neng re e batla ka gonne re tsofetse, re lwala kgotsa ka ntlha ya mabaka mangwe a a rileng. Fa seo se direga, re ka ithuta sengwe mo go Kgosi Dafide. Dafide o ne a batla go agela Jehofa tempele mme gone, Jehofa o ile a tlhopho motho yo mongwe gore a e age. Le fa go ntse jalo, Dafide o ile a thusa mo porojekeng eo ka go ntsha gauta le selefera. Ruri Dafide o re tlhometse sekao se se molemo! (2 Sam. 7:12, 13; 1 Ditir. 29:3-5) Mokaulengwe mongwe wa kwa France yo o bidiwang Hugues o ne a simolola go lwala mme ka ntlha ya seo, o ne a sa tlhole a kgona go direla e le mogolwane e bile a sa kgone go itirela sepe mo lapeng. A re: “Kwa tshimologong ke ne ke ikutlwa ke se na mosola e bile ke kgobegile marapo. Mme fa nako e ntse e ya, ke ne ka lemoga gore ke tshwanetse go tlogela go ikutlwa bothoko ka dilo tse ke sa kgoneng go di dira. Mme fa ke sena go dira jalo, ke ne ka itumela ka gonne ke ne ka simolola go thoma mogopolo mo dilong tse

ke kgonang go di direla Jehofa. Gidione le banna ba le 300 ga ba a ka ba ineela le fa ba ne ba lapile. Ka jalo, le nna ke ikemiseditse gore ke tla tswelela ke itshokile!"  
—Baatlh. 8:4. *w20.12 25 ¶14-15*

## Labotlhano, June 24

### *A re tsweleng re ratana.*

—1 Joh. 4:7.

Mo bukeng ya Baebele e moaposetoloi Johane ileng a e kwala ka botshelo jwa ga Jesu, o bua ka lorato makgetlo a le mantsi go feta Mathaio, Mareko le Luke. Mo dibukeng tsa Baebele tse a ileng a di kwala re ithuta gore sengwe le sengwe se re se dirang re tshwanetse go se dira re tlhohlhelediwa ke lorato. (1 Joh. 4:10, 11) Mme gone, go ile ga tsaya lobaka lo lolele pele Johane a ithuta gore o tshwanetse go rata ba bangwe. Fa Johane a ne a le mosha, ga se ka metlha a neng a bontsha ba bangwe gore o a ba rata. Nako nngwe Jesu o ne a feta kwa Samarea le barutwa ba gagwe ba ya kwa Jerusalema. Batho ba kwa motseng wa Samarea ba ne ba gana go ba amogela. Johane o ile a botsa Jesu gore a a kope gore molelo o tswe kwa legodimong mme o senye batho botlhe ba motse oo! (Luke 9:52-56) Mo lekgetlong le lengwe gape, Johane ga a ka a bontsha gore o rata baaposetoloi ba bangwe. Go bonala ene le Jakobe ba ile ba kopa mmaabone gore a kope Jesu gore a ba neye maemo a a kwa godimo mo Bogosing. Fa baaposetoloi ba bangwe ba utlwa ka se Jakobe le Johane ba se dirileng, ba ile ba galefa. (Math. 20:20, 21, 24) Le fa gone Johane a ne a dira diphoso, Jesu o ne a mo rata.  
—Joh. 21:7. *w21.01 8-9 ¶3-4*

## Matlhatso, June 25

### *Keresete o ne a se ka a dira se se mo itumedisang.—Bar. 15:3.*

Jehofa o dira ditshwetso tse di solegelang ba bangwe molemo. Ka sekai, o bopile dilo tsothe ka gonne a batla gore re itumele. Ga go na ope yo o patleditseng Jehofa gore a romele Morwawe gore a tle go re swela. O ile a dira jalo ka gonne a batla go re thusa. Jesu le ene o ile a dira

ditshwetso tse di neng di solegela ba bangwe molemo. Ka sekai, fa a ne a lapile, go na le gore a ikhutse, o ile a tlhopho go ruta boidiidi jwa batho. (Mar. 6:31-34) Monna yo e leng tlhogo ya lelapa o a itse gore selo sa botlhokwa se a tshwanetseng go se dira, mme go se motlhofo go se dira, ke go direla ba lelapa la gagwe ditshwetso tse di siameng. Mme o tsaya maikarabelo ao a le botlhokwa fela thata. Ga a phamoge fela fa a dira ditshwetso mme o di dira a na le mabaka a a utlwalang. Gape o letla Jehofa go mo ruta gore a ka dira jang ditshwetso tse di molemo. (Dia. 2:6, 7) Fa a dira jalo, o tla kgona go dira ditshwetso a sa ikakanyetse a le nosi. (Bafil. 2:4) Fa monna yo o nyetseng a latela sekao sa ga Jehofa le Jesu, o tla kgona go nna tlhogo ya lelapa e e molemo. *w21.02 7 ¶19-21*

## Sontaga, June 26

### *Asa o ne a dira se se molemo le se se siameng mo matlhong a ga Jehofa, Modimo wa gagwe.*

—2 Ditir. 14:2.

Fa Kgosi Asa a ne a sa ntse a le mosha, o ne a le boikokobetso e bile a le pelokgale. Ka sekai, fa rraagwe Asa e bong Abija a sena go tlhokafala, Asa o ne a nna kgosi mme o ile a tlosa medingwana yotlhe mo Juda. Gape o ile a raya 'Bajuda a re ba batle Jehofa Modimo wa borraabone-mogologolwane le go dira molao le taelo.' (2 Ditir. 14:1-7) Fa Sera wa Moethiopia a ne a batla go tlhasela Juda ka masole a le 1 000 000, Asa o ile a kopa thuso kwa go Jehofa. O ile a re: "Ao tlhe Jehofa, malebana le go thusa, ga go re sepe mo go wena gore a e ka ne go na le ba le bantsi kgotsa ba ba se nang maatla. Re thusa, tlhe Jehofa Modimo wa rona, gonne re ikaegile ka wena." Mafoko ano a ga Asa a bontsha gore o ne a tshepa gore Jehofa o tla kgona go ba thusa. Asa o ile a ikanya Jehofa mme 'Jehofa o ile a fenyaa Baethiopia.' (2 Ditir. 14:8-12) Go tshwanetse ga bo go ne go tshosa tota fa masole a le 1 000 000, a ne a tla go lwa le Asa. Mme Asa o ne a ba fenyaa ka gonne a ikanya Jehofa.  
*w21.03 5 ¶12-13*

## Mantaga, June 27

*Ratanang thata jaaka bana ba motho ba ratana.—Bar. 12:10.*

Baebele e re bolelela ka ditsala tse di neng di atamalane thata e bile di ratana. Akanya ka Jonathane le Dafide. Baebele e a re: "Moya wa ga Jonathane wa bogagana le moya wa ga Dafide, mme Jonathane a simolola go mo rata jaaka moya wa gagwe ka esi." (1 Sam. 18:1) Jehofa o ne a tlhophile Dafide go nna kgosi morago ga ga Saulo. Saulo o ile a fufegela Dafide, a bo a leka go mmolaya. Mme morwa wa ga Saulo e bong Jonathane ene, ga a ka a ema rraagwe nökeng fa a ne a batla go bolaya Dafide. Jonathane le Dafide ba ile ba ikana gore ba tla tswela e bile ba tla emana nökeng. (1 Sam. 20:42) Go a gakgamatsa go bo Jonathane le Dafide e ne e le ditsala ka gonne go na le dilo di le dintsi tse di neng di ka ba kgoreletsa go nna ditsala. Ka sekai, Jonathane o ne a feta Dafide ka dingwaga di ka nna 30. Jonathane a ka bo a ile a akanya gore ga a kitla a kgona go nna tsala ya motho yo monnye thata mo go ene e bile a se na maitemogelo. Mme gone, ga a ka a akanya jalo e bile o ne a tlotla Dafide fela thata. *w21.01 21-22 ¶6-7*

## Labobedi, June 28

*Bakaulengwe ba me, itumeleng thata fa lo tlelwa ke diteko tse di farologaneng.—Jak. 1:2.*

Jesu o ile a bolelela balatedi ba gagwe gore ba ka nna le boitumelo jwa mmatota. Gape o ile a ba bolelela gore ba tlele go lebana le diteko ka gonne ba mo direla. (Math. 10:22, 23; Luke 6:20-23) Re itumelela go nna barutwa ba ga Jesu. Mme gone, re ikutlwa jang fa ba masika ba batla gore re tlogele go direla Jehofa, puso e re bogisa kgotsa batho ba re berekang le bone le ba re tsenang sekolo le bone ba re raela go dira sengwe se se sa siamang? Re ka nna ra tshwenyega fa re akanya ka dilo tseno. Batho ba le bantsi ba akanya gore

ga go kgonege gore motho a itumele fa a bogisiwa. Mme gone, Baebele ya re re tshwanetse go itumela le fa re bogisiwa. Ka sekai, Jakobe o ile a re ga re a tshwanela go kgobega marapo fa re lebana le mathata, go na le moo, re tshwanetse go itumela. (Jak. 1:2, 12) Jesu le ene o ile a re re tshwanetse go itumela le fa re bogisiwa. (Math. 5:11) Jehofa o ile a kaela Jakobe ka moya wa gagwe o o boitshepo gore a neye Bakeresete bao kgokololo e e neng e tla ba thusa gore ba tswela ba itumetse le fa ba lebana le diteko. *w21.02 26 ¶1-2; 27 ¶5*

## Laboraro, June 29

*O se ka wa reetsa dipuo tse di tlotlotlang Modimo.—1 Tim. 6:20.*

Ka nako ya ga Timotheo, Bakeresete bangwe ba ne ba sa tseye tshiamelo ya go dira le Modimo e le botlhokwa. Bangwe ba bone e ne e le Demase, Fegilo, Heremogenese, Himenaes, Aleksandere le Fileto. (1 Tim. 1:19, 20; 2 Tim. 1:15; 2:16-18; 4:10) Go bonala batho bano botlhe ba simolotse ba rata Jehofa, mme fa nako e ntse e ya, ga ba a ka ba tlhola ba tsaya dilo tse Jehofa a neng a ba neile tsone di le botlhokwa. Satane o leka go dira gore re latlhe dilo tse di tlhathlwakgolo tse Jehofa a re neileng tsone. O dira seo jang? O dirisa metswedi ya tshedimosetso go dira gore re simolole go akanya dilo tse di sa siamang le go di dira. Mme re ka feleletsa re sa rate Jehofa e bile re sa ikobele melao ya gagwe. Gape Satane o leka go re tshosetsa. A ka nna a dira gore re simolole go tshwenyega thata ka se batho ba se buang ka rona, kgotsa a ka dira gore batho ba simolole go re bogisa, e le fela gore re tlogele go rera. Gape o leka go re raela gore re reetse maaka a a buiwang ke batlhanogi gore re tlogele boammaaruri. Fa re se kelotlhoko, re ka nna ra simolola go katoga boammaaruri ka bonya ka bonya.—1 Tim. 6:21. *w20.09 27 ¶6-8*

## Labone, June 30

*Jehofa o tla nkuhlwa fa ke mo kopa gore a nkuhlwele bothhoko; Jehofa o tla reetsa thapelo ya me.—Pes. 6:9.*

A tsala ya gago kgotsa mongwe wa losika o kile a go utlwiswa bothhoko? Fa e le gore go ntse jalo, o ka thusiwa ke go bala ka se Kgosi Dafide a ileng a se dira fa morwawe e bong Abesalome a ne a mo utlwiswa bothhoko. (2 Sam. 15:5-14, 31; 18:6-14) Bolelela Jehofa gore o ikutlwa jang ka se se go diragaletseng, o akantse ka pego eno. (Pes. 6:6-8) Jaanong leka go bona ka leitlho la mogopolo gore Dafide o ne a ikutlwa jang. O ne a rata Abesalome e bile a tshepa Ahitofele. Mme gone, bone batho bao, ba ile ba mo tlhanogela. Ba ne ba mo utlwiswa bothhoko fela thata ba bo ba leka go mmolaya. Dafide a ka bo a ile a akanya gore ditsala tse dingwe tsa gagwe le tsone di mo tlhanogetse, mme a bo a tlogela go ba tshepa. A ka bo a ile a tshaba a le nosi a sa akanye ka ditsala tsa gagwe. Kgotsa gongwe a ka bo a ile a kgobega marapo. Go na le moo, o ile a kopa Jehofa gore a mo thuse. Gape o ile a kopa ditsala tsa gagwe gore di mo thuse. Mme o ile a dira se a neng a tlhoka go se dira ka bonako. O ile a tswelela a ikanya Jehofa le go tshepa ditsala tsa gagwe. *w21.03 15 ¶7-8; 17 ¶10-11*

## Labotlhano, July 1

*Ke neilwe taolo yotlhe kwa legodimong le mo lefatsheng.  
—Math. 28:18.*

Re tshwanetse go nna ditsala tsa ga Jesu fa re batla gore Jehofa a arabe dithapelo tsa rona. Seno ga se reye fela go bua re re “mo leineng la ga Jesu” fa re rapela. Gape re tshwanetse go itse gore Jehofa o dirisa jang Jesu go araba dithapelo tsa rona. Jesu o ne a raya baapostoloi ba gagwe a re: “Le fa e le eng se lo se kopang ka leina la me, ke tla se dira.” (Joh. 14:13) Le fa gone

Jehofa e le ene a reetsang dithapelo tsa rona e bile e le ene a di arabang, o neile Jesu taolo ya go diragatsa ditshwetso tsa Gagwe. Ka jalo, pele Jehofa a re itshwarela, o leba pele gore a re dirisa kgakololo ya ga Jesu. Ka sekai, Jesu o ne a re: “Fa lo itshwarela batho ditlolo tsa bone, Rraalona wa selegodimo le ene o tla lo itshwarela; mme fa lo sa itshwarele batho ditlolo tsa bone, le Rraalona ga a na go itshwarela ditlolo tsa lona.” (Math. 6:14, 15) Ka jalo, go bothokwa gore re tshware ba bangwe ka tsela e Jehofa le Jesu ba re tshwarang ka yone. *w20.04 22 ¶6*

## Matlhatso, July 2

*Re lo bolelela dikgang tse di molemole, gore lo tlogele go obamela dilo tse di se nang mosola mme lo obamele Modimo.—Dit. 14:15.*

Paulo o ne a kgona go lemoga gore batho ba rata eng a bo a tlotla le bone ka dilo tseo. Ka sekai, batho ba a neng a bua le bone kwa Lisetera ba ne ba itse go le gonnye kgotsa ba sa itse sepe ka Dikwalo. Ka jalo, o ile a bua le bone ka dilo tse ba di itseng. O ne a bua le bone ka temo le ka dilo tse di re thusang go itumelela botshelo. O ile a dirisa mafoko le dikai tse batho ba neng ba di thaloganya. Leka go lemoga gore batho ba mo tshimong ya lona ba rata eng mme o nne o fetofetola motlotlo go ya ka se ba se ratang. Fa o etetse motho, ke eng se se ka go thusang go bona gore o rata eng? Nna kelothhoko. Gongwe motho yo o mo etetseng o bereka mo tshingwaneng, o bala buka, o baakanya koloi kgotsa o dira sengwe fela. O ka nna wa simolola go tlotla le ene ka se a se dirang. (Joh. 4:7) Tota le se a se apereng se ka go thusa go bona gore ke wa naga efe, o bereka kae kgotsa o rata sethlopha sefe sa metshameko. *w20.04 11 ¶11-12*

### Sontaga, July 3

*Latlhelang ditlhubaelo tsothle tsa lona mo [Modimong], ka gonne o a lo kgathalela. —1 Pet. 5:7.*

Bakaulengwe le bokgaisadi bangwe ba na le bothata jwa go tlhobaela thata, ka jalo, ga ba kgone go phuthologaga fa ba na le batho ba bangwe. Le fa gone ba ikutlwa ba sa phuthologa mo gare ga batho ba bantsi, ba tswelela ba ya dipokanong e bile ba ya dikopanong tse dinnye le tse dikgolo. Ga go motlhofo gore ba bue le batho ba ba sa ba itseng, mme gone, ba tswelela ba ya bo-direding. Fa e le gore o lebane le mae-mo a a ntseng jalo, itse gore ga o nosi. Batlhanka ba ga Jehofa ba le bantsi le bone ba lebane le bothata jono. Tlhomamisega gore Jehofa o itumelela dilo tso-tlhe tse o mo direlang tsone. E re ka o sa ineele, seno se bontsha gore Jehofa o a go segofatsa e bile o go naya maatlā. (Bafil. 4:6, 7) Fa e le gore o direla Jehofa le fa gone o lwala kgotsa o na le bothata jwa go tshwenyega mo maikutlong, itse gore Jehofa o go rata fela thata. Le fa bantsi jwa rona re lwala, re tswelela re ithshokile mo lobelong lwa botshelo. (2 Bakor. 4:16) Jehofa o tla re thusa go wetsa lobelo lono! *w20.04 31 ¶20-21*

### Mantaga, July 4

*Gonne le fa re sa kgone go bona Modimo, re ka kgona go mo itse fa re ithuta ka dilo tse a di bopileng. —Bar. 1:20.*

Fa re leba tsela e Jehofa a bopileng lefatshe ka yone, le dilo tse di mo go lone, re kgona go bona gore Modimo o botlhale. (Baheb. 3:4) Jehofa o bopile dipolanete di le dintsi, mme lefatshe ke lone fela le batho ba kgonang go tshela mo go lone. Re ka tshwantsha lefatshe la rona le sekepe se se tletseng batho. Mme go na le pharologano magareng ga rona le sekepe seo. Ka sekai, fa go ne go ka nna le batho ba ba nnang mo seke-

peng, mme batho bao ba tshwanelwa ke go itirela okesejene, dijo le metsi, e bile go se na gope kwa ba ka latlhelang le-swe la bone gone fa e se fela mo sekepeng, batho bao ba ne ba ka tshela lobaka lo lokae? Ba ne ba ka swa ka bonako tota. Mme go farologana le sekepe seno, lefatshe lone le kgona go direla batho ba ba nnang mo go lone okesejene, dijo le metsi e bile dilo tseno ga di ke di tlhalela. Le fa batho ba le leswafatsa le nna le ntse le le lentle e bile le re tlhogisetsa dijo. Le dira seo jang? Jehofa o dirile gore dilo tse di mo lefatsheng fa di sena go dirisiwa di boe di kgone go dirisiwa gape. *w20.05 20 ¶3-4*

### Labobedi, July 5

*Ruri ga lo kitla lo swa. —Gen. 3:4.*

Satane o ne a gogagoga leina la Modimo mo seretseng ka go raya Efa a re Jehofa ke moaki. Seo se ile sa dira gore Satane a bidiwe Diabolo kana ramaaka. Efa o ne a tsieditswe, ka jalo o ne a dumela Satane. (1 Tim. 2:14) O ile a ikanya Satane, e seng Jehofa. Mme seo sa dira gore a dire phoso e tona. O ile a tlola molao wa ga Jehofa mme a ja mo setlhareng se Jehofa a neng a ba laetse gore ba se ka ba se ja. Moragonyana, o ne a naya Adame leungo gore le ene a le je. (Gen. 3:6) O akanya gore Efa a ka bo a arabile Satane jang? Akanya fa a ka bo a mo reile a re: "Ga ke go itse, ke itse Rre, Jehofa, ke a mo rata e bile ke a mo tshapa. Sengwe le sengwe se nna le Adame re nang le sone, re se neilwe ke ene. Goreng o bua dilo tse di ntseng jaana ka ene? Tsamaya!" Akanya fela gore Jehofa a ka bo a ile a ikutlwa jang fa a utlwa mafoko ano a a itumedisang! (Dia. 27:11) Mme gone, Adame le Efa ba ile ba paelwa ke go rata Jehofa le go ikanyega mo go ene. Seo se ile sa dira gore ba paelwe ke go emela leina la gagwe fa le ne le gogagogiwa mo seretseng. *w20.06 4 ¶10-11*

## Laboraro, July 6

*Basadi ba ba bolelang dikgang tse di molemo . . . ke lesomo le legolo.*  
—Pes. 68:11.

Bokgaisadi ba tlhoka go akgolwa ka ntlha ya tiro e ba e dirang mo phuthegong ya ga Jehofa. Bangwe ba thusa mo tirong ya go aga le go tlhokomela dikago, ba thusa mo tshimong ya dipuo tse dingwe e bile ba bangwe ba direla kwa Bethele. Ba thusa mo tirong ya namolo, mo tirong ya thanolo gape bangwe ba bone ke babulatsela kgotsa barongwa. Gape basadi ba ba nyetsweng ba thusa banna ba bone gore ba kgone go dira dikabelo tsa bone mo phuthegong. Baebele ya re bakaulengwe bano ke “dimpho” mme ba thusa batho ba le bantsi mo phuthegong. Mme gone, go ne go ka se nne motlhofo gore ba dire tiro eno fa basadi ba bone ba ne ba sa ba eme nōkeng. (Baef. 4:8) Bagolwane ba ba botlhale ba a itse gore bokgaisadi ke “lesomo le legolo” e bile ba a itse gore ke ditswerere mo tirong ya go rera. Gape bagolwane ba a itse gore bokgaisadi ba ba godileng ba kgona go thusa ba basha fa ba na le mathata. (Tito 2:3-5) Ruri re tshwanetse go bontsha bokgaisadi gore re a ba rata e bile re lebogela tiro e ba e dirang. *w20.09 23-24 ¶13-14*

## Labone, July 7

*Rre yo o kwa legodimong ga a batle gore mongwe wa ba bannye bano a nyelele.*—Math. 18:14.

Jehofa ga a lebale batho ba ba kileng ba mo direla le fa gone jaanong ba tsidifetse, e bile ga a lebale dilo tse ba kileng ba mo direla tsone. (Baheb. 6:10) Moporofeti Isaia o ile a kwala ka setshwantsho se se bontshang kafa Jehofa a ratang batlhanka ba gagwe ka gone. Isaia o ne a re: “O tla disa motlhape wa gagwe jaaka modisa. O tla phutha dikwanyana mmogo ka lebogo la gagwe; mme o tla di tshola mo sehubeng sa gagwe.”

(Isa. 40:11) Modisa yo Mogolo e bong Jehofa o ikutlwa jang fa mongwe wa batlhanka ba gagwe a tlogela go mo direla? Jesu o ile a tlhalosa tsela e Jehofa a ikutlwang ka yone fa a ne a botsa barutwa ba gagwe a re: “Lo akanyang? Fa motho mongwe a ka nna le dinku di le legolo mme e le nngwe ya tsone e timele, a ga a na go tlogela tse di masome a robongwe le borobongwe mo dithabeng a ba a bolola a ya go batla e e timetseng? Mme fa go diragala gore a e bone, eleruri ke a lo bolelela, o ipelela yone thata go na le tse di masome a robongwe le borobongwe tse di sa timelang.”—Math. 18:12, 13. *w20.06 19-20 ¶8-9*

## Labotlhano, July 8

*Fa monna a kgaratlhela go nna molebedi, o eletsa go dira tiro e e molemo.*—1 Tim. 3:1.

Go direla Jehofa ke tshiamelo e kgolo. (Pes. 27:4; 84:10) Fa mokaulengwe a batla go nna le ditshiamelo tse di oke-tsegileng mo phuthegong, seo se molemo. Mme gone, fa a newa maikarabelo ao, ga a a tshwanela go akanya gore o bothlokwa go gaisa ba bangwe. (Luke 17:7-10) O tshwanetse go direla ba bangwe a le boikokobetso. (2 Bakor. 12:15) Go na le batho bangwe mo Baebe-leng ba ba neng ba tsaya gore ba botlhokwa go feta ba bangwe. Dioterefese o ne a se boikokobetso, o ne a rata go nna le “maemo a ntlha” mo phuthegong. (3 Joh. 9) Kgosi Usia o ne a leka go dira tiro e Jehofa a neng a sa mo laela go e dira. (2 Ditir. 26:16-21) Abesalome o ne a batla go nna kgosi. Ka jalo, o ne a itira e kete o rata batho, gore ba tseye le-tlhakore la gagwe. (2 Sam. 15:2-6) Dikai tseno, di re bontsha gore Jehofa ga a rate batho ba ba ratang go ikgalale-tsa. (Dia. 25:27) Batho ba ba ikgogomolang le ba ba ratang go galalediwa ke batho, ba felelets a ba wetse mo mathateng.—Dia. 16:18. *w20.07 4 ¶7-8*

## Matlhatso, July 9

*Mongwe le mongwe o tla rwala morwalo wa gagwe.—Bagal. 6:5.*

Malapa mangwe a fudugetse kwa dinageng tse dingwe ka gonne go na le mathata kwa dinageng tsa bone, kgotsa ka gonne ba ya go batla tiro. Ka ntlha ya seo, bana ba bone ba ka nna ba tlhoka go ithuta puo e e buiwang kwa seko-long se ba se tsenang. Batsadi le bone ba ka nna ba tlhoka go ithuta puo e e buiwang mo nageng eo gore ba kgone go bona tiro. Mo maemong ao, ba tshwanetse go kopanela mo phuthegong e go buiwang puo efe? A ba tshwanetse go kopanela kwa phuthegong e go buiwang puo ya bone? Kgotsa a ba tshwanetse go kopanela kwa phuthegong e e dirisang puo e e buiwang mo nageng eo? Tlhogo ya lelapa ke ene a tshwanetseng go dira tshwetso ya gore lelapa la gagwe le tla kopanela kwa phuthegong efe. O tshwanetse go akanyetsa gore lelapa la gagwe le tlhoka eng. Re tlhoka go tlotla tshwetso e a e direlang lelapa la gagwe. Gape re tshwanetse go amogela lelapa leo le go ba bontsha gore re a ba rata. —Bar. 15:7. *w20.08 30 ¶17-18*

## Sontaga, July 10

*Modimo o ne a tlhophla dilo tse batho ba di tsayang di le bokoa. —1 Bakor. 1:27.*

Fa re na le botsogo jo bo siameng, re rutegile, re tswa mo lotsong le le rileng kgotsa re na le madi a mantsi, ga re a tshwanela go akanya gore dilo tseo ke tsone di ka dirang gore Jehofa a re dirise. Tota e bile ga se batlhanka ba Modimo “ba bantsi ba ba botlhale ka tsela ya senama, ba bantsi ba ba nang le maatla, ba bantsi ba ba tshotsweng ke batlotle-gi.” (1 Bakor. 1:26) Jaanong le fa o sena dilo tse re buileng ka tsone kwa tshimologong, Jehofa o sa ntse a ka go dirisa. Ka jalo, leba maemo a gago ka tsela e e siameng. O ka dira seo jang? Gopola

gore fa o se na dilo tse di dirang gore batho ba lefatshe leno ba go tseye o le botlhokwa, o tla lemoga ka bonako fa Jehofa a go naya maatla. Ka sekai, fa e le gore o tshosiwa ke batho ba ba n nang ba bua dilo tse di sa siamang ka bodumedi jwa gago, rapela Jehofa, mo kope gore a go neye maatla a go emela se o se dumelang. (Baef. 6:19, 20) Fa e le gore o a lwala kgotsa o golafetse, kopa Jehofa gore a go thuse go dira sotlhe se o ka se kgonang fa o mo direla. Ka metlha fa o lemoga gore Jehofa o a go thusa, tumelo ya gago e tla nonofa e bile o tla iku-tlwa o na le maatla. *w20.07 16 ¶9*

## Mantaga, July 11

*[Batla] Bogosi . . . pele. —Math. 6:33.*

Gore Bogosi Jwa Modimo bo tle pele mo matshelelong a rona, re tlhoka go ithontsha dilo dingwe gore re kgone go itumedisana Modimo fela jaaka Aborahame a ile a dira. (Mar. 10:28-30; Baheb. 11:8-10) O se ka wa lebelela gore ga o kitla o nna le mathata. Le fa re ka direla Jehofa botshelo jwa rona johlhe, re sa ntse re tilele go lebana le mathata. (Jak. 1:2; 1 Pet. 5:9) Gompieno go na le dilo di le dintsi tse di ka re thusang gore re nne re akantse ka ditsholofetso tsa Modimo. Dilo tse di diragalang mo lefatsheng, di re bontsha gore re mo bokhutlong jwa metlha ya bofelo. Gape sengwe se se tla dirang gore re itumele fa Bogosi Jwa Modimo bo busa, ke go bona batho ba re ba ratang ba tsosiwa mo baswing. Ka nako eo Jehofa o tla segofatsa Aborahame le lelapa la gagwe ka go ba tsoa gore ba tle go tshela mo lefatsheng ka gonne Aborahame o ne a na le tumelo e bile a le pelotelele. A o tla bo o le gone? O ka kgona go nna gone, fa o ka etsa seka o sa ga Aborahame. Ikentshe setlhabelo fela jaaka Aborahame, ka gonne o batla go direla Jehofa, nna le tumelo le fa o lebana le mathata e bile o ithute go letela Jehofa.—Mika 7:7. *w20.08 5-6 ¶13-14; 7 ¶17*



## Labobedi, July 12

*Nna o ikanyega go fitlha o swa, mme ke tla go naya serwalo sa botshelo.—Tshen. 2:10.*

Re a itse gore fa baba ba rona ba ka re bolaya, Jehofa o tla re tsosa. Re tlhatswegile pelo gore ga go na se ba ka se dirang, se se ka dirang gore re tlogele go direla Jehofa. (Bar. 8:35-39) Jehofa o bontshitse gore o botlhale ka go re solofetsa gore fa re swa o tla re tsosa! Tsholofetso eno e dira gore re se ka ra tshoga fa batho ba re tshosetsa ka gore ba tlile go re bolaya, gape e re thusa gore re nne pelokgale le go tswelera re ikanyega mo go Jehofa. Fa batho ba ba sa rateng Jehofa ba go tshosetsa ka gore ba tlile go go bolaya, a o tla tshepa gore Jehofa o tla go tsosa? O ka itse jang gore o tlile go kgona go tshepa Jehofa? Ipotse gore, 'A ditshwetso tse ke di dirang letsatsi le letsatsi di bontsha gore ke tshepa Jehofa?' (Luke 16: 10) Gape ipotse gore, 'A tsela e ke dirisang nako le madi a me ka yone e bontsha gore ke tshepa gore Jehofa o tla ntlamela fa ke baya Bogosi kwa pele?' (Math. 6:31-33) Fa e le gore o araba dipotso tseno ka ee, go bontsha gore o ipaakanyeditse diteko tse o tla lebanang le tsone.—Dia. 3:5, 6. *w20.08* 17-18 ¶15-16

## Laboraro, July 13

*Dira bojotle gore o amogelwe ke Modimo, o le modiri yo o se nang sepe se se ka mo tlhabisang ditlhong, mme o rute o bo o tlhalose lefoko la boammaaruri sentle.—2 Tim. 2:15.*

Re tshwanetse go itse go dirisa Lefoko la Modimo sentle. Fa re le kwa dipokanong, re rutiwa gore re ka dirisa jang Lefoko la Modimo. Mme gone, fa re batla go thusa batho gore ba dumele gore Baebele e ka ba thusa, re tshwanetse go e ithuta ka metlha. Re tshwanetse go dirisa Baebele go nonotsha tumelo ya

rona. Gore re kgone go dira jalo, ga re a tshwanela go e bala fela re feta, go na le moo, re tshwanetse go akanya ka se re se balang le go dira dipatlisiso mo dikgatisong. (1 Tim. 4:13-15) Fa re dira jalo, re tla kgona go dirisa Lefoko la Modimo sentle fa re ruta ba bangwe. Seno se raya gore ga re kitla re ba balela dite mana fela, go na le moo, re tla ba thusa go di thaloganya le go bona gore ba ka dirisa jang se ba se ithutang. Fa re ipha nako ya go ithuta Baebele ka metlha, re tla kgona go e ruta ba bangwe.—2 Tim. 3:16, 17. *w20.09* 28 ¶12

## Labone, July 14

*Akanyang ka kelotlhoko ka [Jesu] . . . , gore lo se ka lwa lapa lo bo lo kgobega marapo.—Baheb. 12:3.*

Sengwe se se tla re thusang gore re nne re tlhomile mogopolo mo tirong ya go rera ke go nna re akantse ka dilo tso tle tse Jehofa a di dirang go re thusa mo tirong eno. Ka sekai, re na le dikgatiso di le dintsi tse di printilweng, tse di mo Internet, tse di rekitilweng, di bidio le JW Broadcasting. Mo godimo moo, go na le tshedimosetso ka dipuo di feta 1 000 mo *website* ya rona. (Math. 24: 45-47) Selo se sengwe se se tla re thusang go tlhoma mogopolo mo tirong ya go rera ke go etsa Jesu. O ne a sa letle sepe se mo itaya tsebe mo tirong ya go rera. (Joh. 18:37) Fa Satane a ne a mo raya a re o tla mo naya “magosi otlhe a lefatshe le kgalalelo ya one,” ga a ka a raelesega. E bile ga a ka a dumela fa batho ba ne ba batla go mo dira kgosi. (Math. 4:8, 9; Joh. 6:15) O ne a sa eletse go huma e bile o ne a sa boife batho ba ba neng ba mmogisa. (Luke 9:58; Joh. 8: 59) Fa re nna re akantse ka se moapose toloi Paulo a ileng a se bua mo temaneng ya letsatsi ya gompiano, le rona re tla nna re tlhomile mogopolo mo tirong ya go rera le fa re kopana le mathata. *w20.09* 9-10 ¶6-7

## Labotlhano, July 15

*Etsang sekao sa me, fela jaaka le nna ke etsa sekao sa ga Keresete.*

—1 Bakor. 11:1.

Re itumelela gore re na le bokgaisadi ba le bantsi ba ba dirang ka natla mo phuthegong. Kwa dipokanong, ba a arabela, ba neela dipontsho e bile ba dira ka natla mo tirong ya go rera. Ba bangwe ba thusa go tlhokomela Holo ya Bogosi e bile ba bontsha gore ba rata Bakeresetemmogo le bone. Mme gone, ba lebana le dikgwetlho di le dintsi. Bangwe ba tlhokometse batsadi ba bone ba ba godileng. Ba bangwe ga ba tshwarwe sentle ke ba malapa a bone fela ka gone e le Basupi. Ba bangwe bone, ba dira ka natla ka gone ba godisa bana ba le bosii. Goreng re tshwanetse go ema bokgaisadi nokeng? Ka gone batho ba lefatshe leno ga ba tlotle basadi. Gape Baebele e re kgothaletsa gore re ba eme nokeng. Ka sekai, moaposetoloi Paulo o ile a bolelela phuthego ya kwa Roma gore ba amogele Febe le gore ba mo thusa ka dilo tse a di tlhokang. (Bar. 16:1, 2) Fa Paulo e ne e le Mofarasai, o ne a dumela gore basadi ke batho ba maemo a a kwa tlase e bile o ne a sa ba tlotle. Mme fa a sena go nna Mokeresete o ne a simolola go tshwara basadi sentle e bile o ne a ba tlotla fela jaaka Jesu. *w20.09 20 ¶1-2*

## Matlhatso, July 16

*Lo . . . dire barutwa, . . . lo ba rute gore ba ikobele dilo tsoatlhe tse ke di lo laetseng.*

—Math. 28:19, 20.

Re ka thusa batho ba re ithutang le bone gore ba rate tiro ya go rera dikgang tse di molemo ka go ba botsa dipotso tseno: “O thusitswe jang ke go dirisa se o se ithutileng mo Baebeleng? A o akanya gore batho ba bangwe le bone ba tlhoka go utlwa molaetsa ono? Ke

eng se o ka se dirang go ba thusa?” (Dia. 3:27; Math. 9:37, 38) Gopola gore Jesu o re laetse gore re rute batho go “bolo-ka dilo tsoatlhe tse a di laetseng.” Seno se akaretsa gore re ba rute go rata Modimo le go rata batho. (Math. 22:37-39) Tota e bile, lebaka la go bo re rerela batho, ke ka gore re a ba rata. Gone fa moithuti wa Baebele a akanya ka gore o tlhoka go rerela batho, a ka nna a simolola go boifa. Mme re ka bolelela batho ba re ithutang le bone gore Jehofa o tli- le go ba thusa mme fa nako e ntse e ya, ga ba kitla ba tlhola ba boifa go rerela batho.—Pes. 18:1-3; Dia. 29:25. *w20.11 3 ¶6-8*

## Sontaga, July 17

*Re ne ra tswelela re lo rapelela.*

—Bakol. 1:9.

Fa o baakanyetsa thuto, bua le Jehofa mme o mo kope gore a thusa motho yo o ithutang le ene. Gape mo kope gore a go thusa go dirisa Baebele ka tsela e e tla amang motho yoo pelo. Nna o gopotse gore boikaelelo jwa gago ke go mo thusa gore a dire diphetogo a bo a kolobediwa. Moithuti le ene o tshwanetse go buisana le Jehofa. Jang? Ka go mo reetsa le go bua le ene. O reetsa Modimo fa a bala Baebele letsatsi le letsatsi. (Josh. 1:8; Pes. 1:1-3) A ka bua le Jehofa ka go mo rapela letsatsi le letsatsi. Pele ga lo simolola go ithuta, rapela, mme o dire jalo le fa lo fetsa go ithuta. Fa o rapela, bua le Jehofa go tswa pelong ka motho yo o ithutang le ene. Fa a ntse a go reeditse o rapela, le ene o tla ithuta go rapela go tswa pelong. Gape o tla lemoga gore o tshwanetse go rapela Jehofa Modimo a dirisa leina la ga Jesu Keresete. (Math. 6:9; Joh. 15:16) Go bala Baebele letsatsi le letsatsi (go reetsa Jehofa) le go rapela (go bua le Jehofa) go tla mo thusa gore a atamalane le ene. —Jak. 4:8. *w20.10 8 ¶8; 9 ¶10-11*

## Mantaga, July 18

*Leka[ng] go nna seoposengwe lo thusiwa ke moya o o boitshepo.*

—Baef. 4:3.

Gompiano phuthego ya ga Jehofa e dira ka natla gore go tsewelele go na le kagiso mo phuthegong e bile dilo di dirwa ka thulaganyo fela jaaka mo lekgolong la ntlha la dingwaga. (Dit. 16:4, 5) Ka sekai, fa o ya kwa dipokanong tsa mafelobeke kwa phuthegong e nngwe, e ka tswa e le mo nageng ya lona kgotsa kwa nageng e nngwe, o a itse gore Thuto ya *Tora ya Tebelo* e tlile go tshwarwa jang e bile o a itse gore go tla bo go ithutiwa se tlhogo sefe. Ka jalo, ga o kitla o ikutlwa e kete o latlhegile. Moya o o boitshepo ke one o o dirang gore seno se kgonege. (Sefa. 3:9) Wena o ka dira eng? Ipotse go re: 'A ke dira gore go nne le kagiso le kutlwano mo phuthegong? A ke ikobela ba ba etelelang pele? A bakaulengwe le bokgaisadi ba ka ntshepa, segolobogolo fa e le gore ke na le maikarabelo mo phuthegong? A ke tshwara nako? A ke rata go thusa ba bangwe?' (Jak. 3:17) Fa o lemoga gore go na le dilo dingwe tse o tshwanetseng go di tokafatsa, kopa Jehofa gore a go fe moya wa gagwe o o boitshepo. Fa o letla moya o o boitshepo gore o go thusa go tokafatsa botho jwa gago le tsela e o itshwarang ka yone, bakaulengwe le bokgaisadi ba tla go rata e bile ba tla lebogela se o se dirang mo phuthegong. *w20.10 23 ¶12-13*

## Labobedi, July 19

*Dirang se lefoko la Modimo le se buang mme lo se ka lwa le utlwa fela.*—Jak. 1:22.

Re ka tshwantsha Lefoko la Modimo le seipone. (Jak. 1:23-25) Bontsi jwa rona re iteba mo seiponeng letsatsi le letsatsi pele re tswa mo gae. Seno se re thusa go bona gore a go na le sengwe se re tlhokang go se baakanya pele re kopana le batho ba bangwe. Ka tsela e e tshwanang, fa re bala Baebele letsatsi le letsatsi, re tla bona gore re ka fetola

jang tsela e re akanyang ka yone le e re itshwarang ka yone. Batho ba le bantsi ba rata go bala temana ya letsatsi mo mosong. Ba letla se ba se balang se fetola tsela e ba akanyang ka yone. Mme fa letsatsi le ntse le ya, ba batla ditse tse di farologaneng tsa go dirisa kgakololo e e tswang mo Lefokong la Modimo. Gape re tshwanetse go bala le go thathlanya ka Lefoko la Modimo letsatsi le letsatsi. Re ka nna ra akanya gore ga go tlhokege go bala Baebele letsatsi le letsatsi. Mme go dira jalo go ka re thusa gore re tsewelele re le mo tseleng e e pitlaganeng e e isang botshelong jo bo sa khutleng. Re ka tshwantsha Lefoko la Modimo le motšhine wa X-ray, o o re thusang go bona mmele wa rona ka fa gare. Gore re kgone go amogela kgakololo e e tswang mo Baebeleng kgotsa mo batlhankeng ba Modimo, re tshwanetse go nna boikokobetso. *w20.11 18 ¶3; 20 ¶8*

## Laboraro, July 20

*Diphuthego di ne tsa tsewelela di notshiwa mo tumelong e bile palo ya bakaulengwe e ne ya oketsega letsatsi le letsatsi.*—Dit. 16:5.

Le fa gone Bakeresete ba lekgolo la ntlha ba ne ba bogisiwa, ka dinako tse dingwe, dilo di ne di ba tsamaela sentle. Ba ne ba dirisa nako eo jang? Ba ne ba dira ka natla mo tirong ya go rera dikgang tse di molemo e bile ba ne ba tlhomile mogopolo mo tirong eo. Ka ntlha ya seo, ba ne ba nna ba oketsega. Seno se ne se bontsha gore Jehofa o segofatsa tiro ya bone ya go rera. (Dit. 9:26-31) Bakeresete bao ba ne ba dirisa tshono nngwe le nngwe go rerela batho dikgang tse di molemo. Ka sekai, fa Paulo a ne a lemoga gore batho ba le bantsi kwa Efeso ba kgatlhegela dikgang tse di molemo, o ne a sala kwa motseng oo gore a kgone go ba rerela. (1 Bakor. 16:8, 9) Baaposetoloi ba ile ba ntsha ga tshwene mo tirong ya go rera "dikgang tse di molemo tsa lefoko la ga Jehofa." (Dit. 15:30-35) Go ne ga felela jang? Temana ya letsatsi ya gompiano e thalosa seo. *w20.09 16 ¶16-8*

## Labone, July 21

*Loso lo nnile gone ka motho a le mongwe.—1 Bakor. 15:21.*

Fa Adame a sena go leofa, seo se ile sa dira gore ene le ditlogolwana tsa gagwe ba simolole go swa. Le gompieno, re sa ntse re utlwa manokonoko a dipphoso tsa gagwe. Mme e re ka Modimo a ile a tsosa Morwawe, re na le tsholofelo e e itumedisang! Baebele ya re: “Tsogo ya baswi le yone e ka motho,” e bong Jesu. Moaposetoloi Paulo o ile a tlhalosa gore: “Fela jaaka mo go Adame botlhe ba swa, jalo le mo go Keresete botlhe ba tla tshediwa.” (1 Bakor. 15:22) Paulo o ne a kaya eng fa a ne a re “mo go Adame botlhe ba [a] swa”? Paulo o ne a bua ka batho botlhe ba ba ruileng boleo jwa ga Adame mme ka ntlha ya boleo joo ba ne ba tlile go swa. (Bar. 5:12) Adame ga se mongwe wa batho ba ba tlieng go tsosiwa. Ga a solegelwe molemo ke setlhabelo sa ga Jesu ka gonne o ne a itekanetse a bo a tlhopha go sa ikobele Modimo. Se se diragaletseng Adame se tla diragalela batho ba “Morwa motho” a tla ba atholang e le “dipodi” se se rayang gore ba tliile go ‘kgaolwa ka bosakhutleng.’—Math. 25:31-33, 46; Baheb. 5:9. *w20.12 5 ¶13-14*

## Labotlhano, July 22

*Jehofa . . . o ela tlhoko ba ba ikokobeditse.—Pes. 138:6.*

Fa re sa newe kabelo nngwe e re neng re ka rata go e newa, re tshwanetse go akanya ka sekao se baengele ba ba ikanyegang ba re tlhometseng sone. Ka sekai, Jehofa o ne a botsa baengele gore ke leano lefe le ba akanyang gore le ka dirisiwa go tsietsa Kgosi e e bosula e bong Ahabe. Baengele ba bangwe ba ile ba ntsha dikakantsho tsa bone. Mme gone, Jehofa o ile a tlhopha moengele e le mongwe gore a ye go tsietsa Ahabe a bo a mmolela gore leano la gagwe le ne le tliile go atlega. (1 Dikg. 22:19-22) A baengele ba bangwe ba ile ba kgobega marapo, ba bo ba akanya gore

ba sentse nako ya bone ka go ntsha dikakantsho? Nnyaa, ga ba a ka ba dira jalo. Baengele ba boikokobetso e bile ba batla gore Jehofa e nne ene fela a newang kgalalelo. (Baatlh. 13:16-18; Tshen. 19:10) Gopola gore tshiamelo e e di gaisang tsothle e re nang le yone, ke go nna Basupi ba ga Jehofa le go rera ka Bogosi Jwa Modimo. Dikabelo ga se tsone tse di dirang gore Jehofa a re rate. Fa re le boikokobetso Jehofa o tla re rata le bakaulengwe le bone ba tla re rata. Ka jalo, kopa Jehofa gore a go thuse gore o tswelele o le boikokobetso. Leka go akanya ka batlhanka ba Modimo ba go buiwang ka bone mo Baebeleng ba ba neng ba le boikokobetso. Ithaopele go thusa bakaulengwe le bokgaisadi.—1 Pet. 5:5. *w20.12 26 ¶16-17*

## Matlhatso, July 23

*Rwalang tlhoro ya phemelo ya poloko, lo bo lo tsaya tshaka ya moya, e leng lefoko la Modimo.  
—Baef. 6:17.*

Tlhoro ya phemelo ya poloko ke tsholofelo e Jehofa a re nayang yone. Tsholofelo eo ke ya gore Jehofa o tliile go segoftsa batho botlhe ba ba dirang thato ya gagwe le gore le fa re ka swa, o tliile go re tsosa. (1 Bathes. 5:8; 1 Tim. 4:10; Tito 1:1, 2) Tsholofelo e re nang le yone e sireletsa tsela e re akanyang ka yone. E re thusa gore re nne re tlhomile mogopolo mo dilong tse Jehofa a re solofetsang tsone, le gore re se ka ra fekeediwa ke mathata a rona. Re ka bontsha gore re rwele tlhoro eo ka go ikutlwa ka tsela e Jehofa a ikutlwang ka yone ka dilo dingwe. Ka sekai, ga re beye tsholofelo ya rona mo dikhumong tse di sa tlhomamang, go na le moo, re solofela mo go Jehofa. (Pes. 26:2; 104:34; 1 Tim. 6:17) Tshaka ya moya ke Lefoko la Modimo e leng Baebele. Tshaka eo e na le maatla a go senola maaka le go golola batho mo dithutong tsa maaka le mo dilong tse di ka ba utlwisang botlhoko. (2 Bakor. 10:4, 5; 2 Tim. 3:16, 17; Baheb. 4:12) Phuthego ya Modimo e re

ruta go dirisa tšhaka eno mme gape re ka kgona go itse go e dirisa fa re ithuta re le nosi.—2 Tim. 2:15. *w21.03* 27 ¶4; 29 ¶10-11

### Sontaga, July 24

*[Ke ne ke le] kwa setlhaketlhakeng se se bidiwang Patamose ka gonne ke ne ke bua ka Modimo e bile ke naya bosupi ka Jesu.—Tshen. 1:9.*

Le fa moaposetoloi Johane a ne a tse-ntswe mo kgolegelong ka gonne a ne a rera ka Jesu, o ile a bontsha gore o rata ba bangwe. Ka sekai, o ile a kwala buka ya Tshenolo a bo a e romela kwa diphuthegong gore ba tle ba itse dilo 'tse di tlogang di direga.' (Tshen. 1:1) Mme fa a sena go gololwa kwa kgolegelong, o ile a kwala pego ya botshelo jwa ga Jesu le bodiredi jwa gagwe. Gape o ile a kwala makwalo a mararo gore a kgothatse ba-kaulengwe le bokgaisadi. O ka etsa se-kaeo sa ga Johane ka go bontsha gore o rata batho ka se o tlhophang go se dira ka botshelo jwa gago. Satane le batho ba lefatshe la gagwe ba batla gore o ikanyetse o le nosi, o itirele madi a manntsi e bile o itsege. Go na le moo, Bake-RESET ba dirisa nako ya bone go rera dikgang tse di molemo le go thusa batho gore ba atamalane le Jehofa. *w21.01* 10 ¶9-10

### Mantaga, July 25

*Jonathane o ne a simolola go mo rata jaaka a ithata.—1 Sam. 18:1.*

Jonathane a ka bo a ile a fufegela Dafide. E re ka e ne e le morwa Kgosi Saulo, a ka bo a ile a gatelela gore ke ene a tshwanetseng go nna kgosi morago ga rraagwe. (1 Sam. 20:31) Mme Jonathane o ne a le boikokobetso e bile a ikanyega mo go Jehofa. Ka jalo, o ile a tshegetsa tshwetso e Jehofa a neng a e dirile ya gore Dafide e nne kgosi morago ga ga Saulo. Gape o ile a ikanyega mo go Dafide le fa seo se ne se galefisa Saulo. (1 Sam. 20:32-34) Jonathane o ne a rata Dafide, ka jalo, ga a ka a mo fufegela. O

ne a le pelokgale mme o ile a lwa dintwa di le dintsi e bile o ne a itse go dirisa bora le motswi. Batho ba ne ba re ene le rraagwe ba "bofego go feta bontsu" le gore ba "thata go feta ditau." (2 Sam. 1: 22, 23) Ka jalo, Jonathane a ka bo a ile a ikgantsha ka dilo tse a ileng a kgona go di dira. Mme gone, ga a ka a leka go ipapisa le Dafide kgotsa go mo fufegela. Go na le moo, o ne a rata Dafide ka gonne Dafide a le pelokgale e bile a ikanya Jehofa. Ka sekai, fa Dafide a sena go bolaya Goliathe, Jonathane o ne a simolola go mo rata le go feta. *w21.01* 21 ¶6; 22 ¶8-9

### Labobedi, July 26

*Mosadi ene tlhogo ya gagwe ke monna.—1 Bakor. 11:3.*

Jesu Keresete ke tlhogo ya Bakeresete botlhe mme ene ga a dire diphoso. Mme gone, fa mosadi wa Mokeresete a sena go nyalwa, o ikobela taolo ya monna wa gagwe. Mme go farologana le Jesu, monna wa gagwe ene o dira diphoso. Ka jalo, ka dinako tse dingwe go ka nna thata gore mosadi a ikobele taolo ya monna wa gagwe. Ka jalo, pele kgaisadi a nyalwa o tshwanetse go ipotsa gore, 'A mokaulengwe yono o tlile go nna tlhogo e e molemo ya lelapa? A o tsaya go direla Jehofa go le botlhokwa thata? Fa e le gore ga a dire jalo, ke eng se se dirang gore ke akanye gore o tlile go dira gore re tsewelele re direla Jehofa fa re sena go nyalana?' Kgaisadi le ene o tshwanetse go ipotsa gore, 'Ke botho bofe jo bo molemo jo ke nang le jone, jo bo tla thusang lenyalo la rona gore le kgone go atlega? A ke pelotelele e bile ke rata go abela ba bangwe? A botsala jwa me le Jehofa bo nonofile?' (Mor. 4:9, 12) Fa kgaisadi a dira ditshwetso tse di siameng pele a nyalwa, seo se ka dira gore lenyalo la gagwe le atlege le gore ene le monna wa gagwe ba itumele. Bokgaisadi ba le bantsi ba tlhoma sekaeo se se molemo ka gonne ba ikobela banna ba bone. Re a ba akgola! *w21.02* 8 ¶1-2

## Laboraro, July 27

*Tla kwano mo Makedonia mme o re thuse.—Dit. 16:9.*

Bosheng jaana baboledi ba le bantsi ba ithuta dipuo tse dingwe gore ba kgone go dira mo oketsegileng mo tirong ya go rera le go direla kwa diphuthengong tse go buiwang puo e nngwe le kwa go nang le tlhokego ya baboledi gone. Ke tshwetso e ba e dirileng gore ba kgone go direla Jehofa mo go oketsegileng. Le fa go ba tsaya nako go ithuta puo e nngwe, ba thusa diphuthego ka ditsela tse di farologaneng. Ba na le dinonofo tse dintle tse di nonotshang bakaulengwe le bokgaitisadi mo phuthengong. Re rata bakaulengwe le bokgaitisadi bano ka gonne ba rata go ikentsha setlhabelo! Bagolwane ga ba a tshwanele go swetsa ka gore mokaulengwe mongwe ga a tshwanele go nna mogolwane kgotsa motlhanka wa bodiredi, fela ka gonne a ise a itse go bua puo e e dirisiwang mo phuthengong eo sentle. Bago-lwane ba tla sekaseka gore a mokaulengwe o tshwanelega go nna mogolwane kgotsa motlhanka wa bodiredi go ya ka se Baebele e se buang, e seng ka gonne a kgona go bua puo e e dirisiwang mo phuthengong eo sentle.—1 Tim. 3:1-10, 12, 13; Tito 1:5-9. *w20.08 30 ¶15-16*

## Labone, July 28

*Bakaulengwe ba me, itumeleng thata fa lo tlelwa ke diteko tse di farologaneng.—Jak. 1:2.*

Batho ba le bantsi ba akanya gore motho a ka itumela fela fa a sa lwale, a na le madi a le mantsi e bile lelapa la gagwe le itumetse. Mme gone, boitumelo jo Jakob e ileng a kwala ka jone, ke boitumelo jo motho a bo newang ke moya o o boitshepo. Ka jalo, motho yoo o kgona go tswelela a itumetse go sa kgathalasege gore go diragala eng mo botshelong jwa gagwe. (Bagal. 5:22) Mokeresete

a ka nna le boitumelo jwa mmatota fa a itse gore o itumedisa Jehofa le gore o latela sekao sa ga Jesu. (Luke 6: 22, 23; Bakol. 1:10, 11) Boitumelo jwa rona bo ka tshwantshannngwa le kga-bo ya molelo e e mo leboneng la parafene. Galase e e ka fa ntle e sireletsa kgabo eo gore e se ka ya tima, le fa lebone leo le ka bewa mo phefong kgotsa fa pula e nang gone. Le rona re ka tswelela re itumetse go sa kga-thalasege gore re diragalelwa ke eng. Ga re kitla re felelwa ke boitumelo ka gonne re lwala kgotsa re sena madi. Gape re tla tswelela re itumetse fa batho ba bangwe ba re sotla kgotsa fa ba malapa a rona le batho ba bangwe ba re ganetsa. Nako le nako fa batho ba re utlwiswa botlhoko, boitumelo jwa rona bo tla tswelela bo gola. Fa re le-bana le diteko, seo se bontsha gore re barutwa ba ga Jesu. (Math. 10:22; 24:9; Joh. 15:20) Ke lone lebaka la go bo Jakobe a ile a kwala mafoko a a mo temaneng ya letsatsi ya gompie-no. *w21.02 28 ¶16*

## Labotlhano, July 29

*Lefoko le le molemo le dira gore [pelo e] itumele.—Diane 12:25.*

Fa o kopana le ditemana tsa Baebele tse di bontshang botlhokwa jwa go nna o ritibetse le go tshepa Jehofa, leka go di tshwara ka tlhogo. Gongwe o ka thusiwa ke go di balela kwa godimo kgotsa wa di kwala o bo o di bala nako le nako. Jehofa o ile a bolelela Joshua gore a nne a balele buka ya Molao kwa tlase gore a tle a kgone go dira ditshwetso tse di siameng. Se a neng a se bala se ne se tla mo thusa gore a se ka a boifa mme a nne pelokgale gore a kgone go etelela batho ba Modimo pele. (Josh. 1:8, 9) Ditemana di le dintsi tsa Baebele di ka go thusa gore o nne o ritibetse fa o lebana le maemo a gantsi a ka dirang gore o tlhobaele kgotsa o tshoge. (Pes. 27:1-3; Dia. 3:25, 26) Fa re le kwa dipokanong re solegelwa molemo ke dipuo tse di nee-

Iwang, dikarabo tsa bakaulengwe le bo-kgaitsadi le go tlotla le bone ka dilo tse di kgothatsang. (Baheb. 10:24, 25) Gape re ka thusiwa ke go bolelela ditsala tsa rona gore ke eng se se re tshwenyang. *w21.01 6 ¶15-16*

### **Matlhatso, July 30**

*Nna sekao mo go ba ba ikanyegang. —1 Tim. 4:12.*

Fa o ne o kolobediwa, o ne o bontsha gore o na le tumelo mo go Jehofa le gore o a mo tshepa. Mme Jehofa o ile a go amogela mo lelapeng la gagwe. Se gone jaanong o tlhokang go se dira, ke go tswelela o ikaega ka Ene. Go ka nna motlhofo gore o ikaege ka Jehofa fa o tlhoka go dira ditshwetso tsa botlhokwa. Mme gone, a o tla dira jalo le fa o tlhoka go dira ditshwetso tse di sa reng sepe? Go botlhokwa gore o ikaege ka Jehofa fa o tlhoka go dira ditshwetso tse di jaaka gore ke boitlosobodutu bofe jo o tla bo tlhophang, o tla amogela tiro ya mofuta ofe le gore o tla ipeela mekgele efe mo botshelong. O se ka wa ikanya botlhale jwa gago. Go na le moo, batla melaometheo e e tla go thusang go dira ditshwetso tse di siameng o bo o e dirise. (Dia. 3:5, 6) Fa o dira jalo, o tla itumedisa Jehofa mme o tla dira gore ba bangwe mo phuthengong ba go tlotle. Fela jaaka mongwe le mongwe, le wena o tlile go dira diphoso. Mme gone, seo ga se a tshwanela go go kgoreletsa go dira sotlhe se o ka se kgonang mo tirelong ya ga Jehofa. *w21.03 6 ¶14-15*

### **Sontaga, July 31**

*Ke ne ka gololwa mo molomong wa tau. —2 Tim. 4:17.*

A ba lelapa la gago ba kgatlhanong le wena ka gonne o direla Jehofa? Kgotsa a o nna kwa nageng e Basupi ba ga Jehofa ba sa letlelelwang go dira dilo dingwe kgotsa kwa nageng e tiro ya rona e thibetsweng gotlhelele. Fa e le gore go

ntse jalo, o ka kgothadiwa ke go bala 2 Timotheo 1:12-16 le 4:6-11, 17-22. Moa-posetoloi Paulo o ile a kwala ditemana tseno fa a ne a le kwa kgolegelong. Pele o bala ditemana tseno, bolelela Jehofa ka bothata jwa gago le gore o ikutlwa jang. Bolelela Jehofa sengwe le sengwe. Go tswa foo, fa o sena go bala ka se se diragaletseng Paulo, mo kope gore a go thuse go bona melaometheo e e ka go thusang go itse gore o dire eng. Pele-nyana, Jehofa o ne a bolelela Paulo gore o tlile go bogisiwa ka gonne e le Mokeresete. (Dit. 21:11-13) Jehofa o ile a thusa Paulo jang? O ile a araba dithapelo tsa gagwe, mme fa nako e ntse e ya, o ile a mo naya maatla. Paulo o ile a bolelelwa gore o tlile go duelwa ka gonne a ile a dira ka natla. Gape Jehofa o ile a dirisa ditsala tsa ga Paulo go mo thusa ka dilo tse a neng a di tlhoka. *w21.03 17-18 ¶14-15, 19*

### **Mantaga, August 1**

*Ga lo ka ke lwa dira sepe gotlhelele kwantle ga me. —Joh. 15:5.*

Ditsala tsa ga Jesu ke tsone fela tse di tla solegelwang molemo ke setlhabelo sa gagwe. Jesu o ne a re o tla “neela moya wa gagwe mo boemong jwa ditsala tsa gagwe.” (Joh. 15:13) Batlhanka ba ga Jehofa ba ba ileng ba tshelela pele Jesu a tla mo lefatsheng ba tla tshwanelwa ke go ithuta ka ene le go mo rata. Batho ba ba jaaka Aborahame, Sara, Moshe le Rahabe ba tlile go tsosiswa mme le bone ba tla tshwanelwa ke go nna ditsala tsa ga Jesu gore ba bone botshelo jo bo sa khutleng. (Joh. 17:3; Dit. 24:15; Baheb. 11:8-12, 24-26, 31) Re na le tshiamelo ya go dira le Jesu mo tirong ya go rera dikgang tse di molemo tsa Bogosi. Fa Jesu a ne a le mo lefatsheng, o ne a ruta batho ka Bogosi Jwa Modimo. Mme fa e sa le a boela kwa legodimong, o ntse a tswetse ka go kaela tiro eno ya go rera le go ruta e re e dirang. O

itumela fela thata fa a bona o tsaya matsapa go ruta batho ka ene le ka Rraagwe. Tota e bile, re ka kgona go dira tiro eno fa fela re thusiwa ke Jehofa le Jesu. —Joh. 15:4. *w20.04* 22 ¶7-8

## Labobedi, August 2

*Dikgosi tseno tse pedi . . . di tla nna mo tafoleng e le nngwe di bolelelana maaka.—Dan. 11:27.*

Kwa tshimologong, “kgosi ya bokone” e go buiwang ka yone e ne e le kgosi ya mafelo a a neng a le kwa bokone jwa Iseraele mme “kgosi ya borwa” e ne e le kgosi ya mafelo a kwa borwa jwa Iseraele. (Dan. 10:14) Setšhaba sa Iseraele e ne e le batho ba Modimo go fitlha ka Pentekosete ya 33 C.E. Fa e sa le go tloga ka nako eo, Jehofa o ile a tlhalosa gore balatedi ba ga Jesu ke bone batho ba gagwe. Ka jalo, dikarolo di le dintsi tsa poporofeti jo bo mo go Daniele kgaolo 11 di bua ka balatedi ba ga Jesu, e seng setšhaba sa Iseraele. (Dit. 2:1-4; Bar. 9:6-8; Bagal. 6:15, 16) Mo godimo ga moo, kgosi ya bokone le kgosi ya borwa di ne di ntse di tla di fetoga. Le fa go ntse jalo, go na le dilo dingwe tse di neng di sa fetoge ka dikgosi tseno. Sa ntlha, dikgosi tseno di ne di busa lefatshe le batho ba ga Jehofa ba le bantsi ba n nang kwa go lone kgotsa di ne di bogisa batho ba ga Jehofa. Sa bobedi, tsela e di neng di tshwara batho ba ga Jehofa ka yone e bontsha gore di tlhoile Jehofa. Sa boraro, dikgosi tseno di a gaisana ka gonne di batla go nna le tao. *w20.05* 3 ¶3-4

## Laboraro, August 3

*Ke Tla Nna se ke Tlhophang go Nna Sone.—Ekes. 3:14.*

Jehofa o dira gore dilo di diragale ka go nna sengwe le sengwe fela se a tlhokang go nna sone gore a kgone go diragatsa boikaelelo jwa gagwe. Ka dinako dingwe, Jehofa o dira gore batlhanka ba gagwe ba nne sengwe le sengwe fela

se se tlhokegang gore boikaelelo jwa gagwe bo kgone go diragadiwa. (Isa. 64:8) Ga go na sepe se se ka thibelang Jehofa go diragatsa boikaelelo jwa gagwe. (Isa. 46:10, 11) Selo se se ka dirang gore re tlotle Jehofa thata, ke go tlhatlhanya ka dilo tse a di dirileng le tse a re thusitseng gore re kgone go di dira. Ka sekai, fa re akanya ka dilo tse Jehofa a di bopileng, re tla kgona go mmaka. (Pes. 8: 3, 4) Fa re akanya ka dilo tse Jehofa a re thusitseng go di dira gore re kgone go dira thato ya gagwe re tla mo tlotla thata. Ruri leina la Modimo le tshwanelwa ke go bakwa! Le tlhalosa botho jwa ga Rraarona, se a se dirileng le se a ikaeletseng go se dira.—Pes. 89:7, 8. *w20.06* 9-10 ¶6-7

## Labone, August 4

*Modimo . . . o naya batho botlhe botshelo le mohemo.*

—Dit. 17:24, 25.

Okesejene ke moya o batho le diphologolo ba o hemang gore ba kgone go tshela. Mo ngwageng o le mongwe fela ba hema okesejene e ntsi thata, ba bo ba ntsha moya o o bidiwang khabonetaeokosaete. Batho le diphologolo ga ba ke ba fetsa okesejene, e bile lefaufau ga le ke le tlala ka khabonetaeokosaete. Go tla jang? Jehofa o dirile ditlhare tse dikgolo le tse dinnye tse di hemang khabonetaeokosaete di bo di ntsha okesejene. E re ka modikologo ono wa okesejene o re thusa gore re nne re na le moya o re o hemang. Seno se re bontsha gore mafoko a temana ya letsatsi ya gompiano a boammaaruri. Ke eng se re ka se dirang go bontsha gore re lebogela polanete ya rona le dilo tse di mo go yone? (Pes. 115:16) Re ka tlhatlhanya ka dilo tse Jehofa a di bopileng. Seo se tla dira gore re lebogela Jehofa ka ntlha ya dilo tse dintle tse a re diretseng tsone. Sengwe gape se re ka se dirang go bontsha gore re lebogela lefatshe la rona ke go phepafatsa mo re n nang teng. *w20.05* 22 ¶5, 7



## Labotlhano, August 5

*Ruri ke tla dira gore batho ba bone gore leina la me le legolo le boitshepo, le fa gone lo dirile gore batho ba ditšhaba tse dingwe ba se ka ba le tlotla.—Esek. 36:23.*

Jehofa o ile a emelana le ditatofa-tso tsa ga Satane ka botlhale, a le peletelele e bile a le tshiamiso. O ile a re bontsha ka ditsela tse di farologaneng gore o maatla. Mo godimo ga moo, Jehofa o dira dilo tsothle ka lorato. (1 Joh. 4:8) O itshepisa leina la gagwe ka metlha. Satane o sa ntse a gogagoga leina la Modimo mo seretseng le gompieno. O dira gore batho ba le bantsi ba se ka ba dumela gore Modimo o maatla, o siame, o botlhale le gore o lorato. Ka sekai, o leka go dira gore batho ba dumele gore Modimo ga se Mmopi wa dilo tsothle. Fa batho ba dumela gore Modimo o teng, o dira gore ba akanye gore go thata go tshela ka melao ya Gagwe. Gape o ruta batho gore Modimo o bosula le gore o fisa batho mo diheleng. Mme fa ba dumela maaka ao a ga Satane, go ka nna motlhofo gore ba ganeng go direla Jehofa. Fa Satane a ise a fedisiwe, o tla batla gore le wena o dire se se tshwanang. A Satane o tla atlega? *w20.06 5 ¶13-15*

## Matlhatso, August 6

*Ga go na pharologano fa gare ga Mogerika kgotsa Mojuda, go rupa kgotsa go sa rupa, motswakwa, Mosehia, motlhanka kgotsa motho yo o gololesegileng; mme Keresete ke dilo tsothle e bile o mo go botlhe.—Bakol. 3:11.*

Mo diphuthegong di le dintsi go na le bakaulengwe le bokgaisadi ba ba leakang go ithuta puo e nngwe. Go ka nna thata gore ba tlhalose maikutlo a bone ka tsela e e utlwalang. Mme ga re a tshwanela go tlhoma mogopolo mo goreng ba bua jang. Go na le moo, re tshwanetse go nna re akantse ka gore bakaulengwe le bokgaisadi bano, ba rata Jehofa e bile ba batla go mo direla.

Seno se ka re thusa gore re ba rate le gore re ba tlotle. Re tla bona gore ba bothokwa le fa ba sa itse go bua puo ya rona sentle. (1 Bakor. 12:21) Re leboga Jehofa ka gonne mongwe le mongwe wa rona o na le tiro ya botlhokwa e a e dirang mo phuthegong ya gagwe. Jehofa o a re rata mme le bakaulengwe le bone ba a re rata le fa re ka tswa re le borre kgotsa bomme, re nyetse kgotsa re sa nyala, re le basha kgotsa re go dile kgotsa re sa ntse re ithuta go bua puo e nngwe. (Bar. 12:4, 5; Bakol. 3:10) A ka metlha re batleng ditsela tsa go bontsha gore re anaanela tshiamelo ya go nna mo phuthegong ya ga Jehofa le go bontsha gore re tlotla botlhe ba ba leng mo phuthegong. *w20.08 31 ¶20-22*

## Sontaga, August 7

*Banna bangwe ba ne ba tsamaya le ene mme ba nna badumedi.—Dit. 17:34.*

Paulo ga a ka a tlhoboga batho ba kwa Athena le fa gone ba ne ba obamela medimo ya maaka, ba dira boitsholo jo bo maswe jwa tlhanelodikobo e bile ba dumela dithuto tsa maaka. Mo godimo ga moo, o ne a tswelela a ba rerela le fa gone ba ne ba sa mo tshware sentle. Pele Paulo e nna Mokeresete, le ene e ne e le "motlhapatshi le mmogisi le motho yo o se nang maitseo." (1 Tim. 1:13) Fela jaaka Jesu a ne a dumela gore Paulo a ka fetoga, Paulo le ene o ne a dumela gore batho ba kwa Athena ba ka fetoga, mme ga ba a ka ba mo swabisa. (Dit. 9:13-15) Mo lekgolong la ntlha la dingwaga, batho ba merafe e e farologaneng ba ne ba nna barutwa ba ga Jesu. Fa Paulo a ne a kwalela Bakeresete ba kwa Korintha, o ile a tlhalosa gore bangwe ba bone e kile ya bo e le dikebekwa kgotsa ba dira dilo tse di tsitsibanyang mmele. Mme gape o ne a re: "Bangwe ba lona ba ne ba ntse jalo. Mme lo tlhapisitswe lwa nna phepa." (1 Bakor. 6:9-11) A wena o ka bo o ile wa dumela gore batho bao ba ka kgona go fetoga ba bo ba nna barutwa ba ga Jesu? *w20.04 12 ¶15-16*

## Mantaga, August 8

*Go lekane! . . . Tsaya botshelo  
jwa me.—1 Dikg. 19:4.*

Bagolwane ga ba a tshwanela go itlha-ganelela go atlhola batho ba ba simo-lolang go nna le dipelaelo ka go dire-la Jehofa. Go na le gore ba ba kgale, ba tshwanetse go leka go tlhaloganyana gore goreng ba bua jalo kgotsa ba dira dilo ka tsela e ba di dirang ka yone. Go tswa foo, ba bo ba ba kgothatsa ba diri-sa Baebele. Moporofeti Elija o ne a tsha-ba ka gonne Kgosigadi Jesebele o ne a batla go mmolaya. (1 Dikg. 19:1-3) O ne a tsaya gore tiro ya gagwe ga e na moso-la mme o ne a batla go swa. (1 Dikg. 19:10) Go na le gore Jehofa a kgale Elija, o ne a mmolelela gore ga a nosi e bile o tli-le go mo thusa le gore o ne a tla tsewe-la e le moporofeti wa gagwe. Jehofa o ne a reetsa fa Elija a mmulela mafatlha, go tswa foo, a bo a mo naya dikabelo tse dingwe. (1 Dikg. 19:11-16, 18) Re ithuta eng? Rotlhe go akaretsa le bagolwane, re tshwanetse go dirisana le batlhanka ba ga Jehofa ka lorato. Le fa motho a ka bolelela bagolwane gore o galefile, kgo-tsa o akanya gore Jehofa ga a kitla a mo itshwarela, bagolwane ba tshwane-tse go mo reetsa fa a ba bolelela gore o ikutiwa jang. Mme go tswa foo, ba tla leka go mo tlhatswa pelo gore Jehofa o a mo rata. *w20.06 22 ¶13-14*

## Labobedi, August 9

*Tsala ya boammaaruri e lorato ka  
dinako tsotlhe.—Diane 17:17.*

Jehofa o batla gore re itumelele go fetsa nako le ba lelapa le ditsala. (Pes. 133:1) Jesu o ne a na le ditsala tse di siameng. (Joh. 15:15) Baebele e tlhalosa melemo ya go nna le ditsala tse di siameng. (Dia. 18:24) Gape ya re ga re a tshwanela go itlhaola. (Dia. 18:1) Batho ba le bantsi ba akanya gore Internet e ba thusa go nna le ditsala tse dintsi le

gore ba se ka ba jewa ke bodutu. Mme gone, re tlhoka go nna kelotlhoko fa re tlotla le batho ka Internet. Dipatlisiso di a re batho ba ba fetsang nako e ntsi ba lebile ditshwantsho le dikakgelo tse batho ba di tsenyang mo Internet, ba ka feleletsa ba ikutiwa ba jewa ke bodutu e bile ba gateletswe mo maikutlong. Goreng? Lebaka lengwe e ka tswa e le gore fa batho ba tsenya ditshwantsho tsa bone mo Internet, ba tsenya fela tse di bontshang dinako tse di monate tse ba nnileng le tsone le ditsala tsa bone le mafelo a a kgathang a ba kileng ba ya kwa go one. Motho yo o lebang ditshwa-ntsho tseno, a ka akanya gore botshe-long jwa gagwe bo a bora e bile bo a la-pisa. *w20.07 5-6 ¶12-13*

## Laboraro, August 10

*Baaposetoloi le bagolwane ba ne  
ba kopana mmogo gore ba seka-  
seke kgang eno.—Dit. 15:6.*

Makasine wa *Tora ya Tebelo* ya Octo-ber 1, 1988 o ile wa re: “Bagolwane ba tla lemoga gore Keresete, ka thuso ya moya o o boitshepo, o ka kaela mogopolo wa mogolwane ope fela mo setlhopheng sa bagolwane go ntsha molaomtheo wa [Baebele] oo ba o tlhokang go dirisana le seemo sepe fela kana go dira tshwetso epe fela ya botlhokwa. (Dit. 15:7-15) Moya o o boitshepo o thusa bagolwane botlhe e seng a le mongwe.” Fa bagolwane ba kopane mmogo, mogolwane yo o tlotlang ba bangwe ga a nnele go bua a le nosi gape ga a batle gore go reediwe ene fela. O a reetsa fa ba bangwe ba bua. Gape o bua a ikokobeditse. Sa botlhokwa le go feta, o batla kgakololo mo Baebeleng, e bile o latela kgakololo ya “motlhanka yo o boikanyego le yo o botlhale.” (Math. 24:45-47) Fa bagolwane ba bontshana gore ba a ratana le gore ba a tlotlana fa ba bua ka dilo dingwe, moya o o boitshepo o tla ba thusa go dira ditshwetso.—Jak. 3:17, 18. *w20.08 27 ¶5-6*

## Labone, August 11

*Nnang lo feny e bosula ka molemo.  
—Bar. 12:21.*

Batho ba ba neng ba bogisa Paulo ba ne ba le maatla go mo feta. Nako le nako ba ne ba mo itaya, ba bo ba mo latlhela mo kgologelong. Gape Paulo o ne a sotlwa ke batho ba e ka bong e ne e le ditsala tsa gagwe. Bakeresete bangwe ba ne ba mo tshwayatshwaya diphoso. (2 Bakor. 12:11; Bafil. 3:18) Mme Paulo o ile a kgona go fenya diteko tseo tsoitlhe. O ile a kgona jang? O ne a tswelala a rera le fa a ne a ganediwa. O ne a tswelala a dirisana le bakaulengwe le bokgaitsa-di ka boikanyegi, le fa ka dinako tse dingwe ba ne ba a tle ba mo swabise. Mme sa botlhokwa le go feta, o ne a ikanyega mo go Jehofa botshelo jotlhe jwa gagwe. (2 Tim. 4:8) O ile a kgona go fenya mathata ano otlhe ka gonno o ne a ikae-ga ka Jehofa e seng ka maatla a gagwe. A batho ba a tle ba go reye dipuo kgotsa ba go bogise ka gonno o le Mosupi? Boikaelelo jwa rona ke go thusa batho go ithuta ka Jehofa. Gape re dirisa Baebelle go araba dipotso tsa bone, re a ba tlo-tla e bile re dirisana le bone ka bonolo re bo re ba direla le dilo tse di molemo le fa ba re tilhoile.—Math. 5:44; 1 Pet. 3:15-17. *w20.07 17-18 ¶14-15*

## Labotlhano, August 12

*Boikokobetso jwa gago bo dira  
gore ke nne mogolo.  
—2 Sam. 22:36.*

A re ka re Jehofa o boikokobetso? Ee. Dafide o ile a bua seo mo mafokong a temana ya gompieno. (Pes. 18:35) Fa Dafide a ne a bua mafoko ano, a ka tswa a ne a akantse ka nako ya fa Samuele a ne a tllile kwa gaabo a tllile go tlotsa motho yo o neng a tla nna kgosi e e latelang ya Iseraele. Kwa gaabo Dafide go ne go na le bana ba basimane ba le robedi, mme e ne e le ene wa bofelo, le fa go ntse jalo

ke ene yo Jehofa a neng a mo tlotsa go nna kgosi e e neng e tla tilhatlhama Saulo. (1 Sam. 16:1, 10-13) Dafide o tshwanetse a bo a ne a dumalana le mafoko a a buang ka Jehofa a a reng: “O a ikokobetsa gore a lebe legodimo le lefatshe, o tsholetsa motho wa maemo a a kwa tla-se go tswa mo loroleng; O godisa mo-humanegi . . . gore a mo nnise le batlotlegi.” (Pes. 113:6-8) Tsela e Jehofa a dirisanang ka yone le batho ba ba nang le bolelo, e bontsha gore o boikokobetsa. Jehofa ga a itumelele fela gore re mo obamele mme o re tsaya re le ditsala tsa gagwe. (Pes 25:14) O ntshitse sethabelo ka Morwawe gore re kgone go nna ditsala tsa gagwe le gore a kgone go re itshwarela fa re mo leofela. Ruri Jehofa o kutlwebotlhoko! *w20.08 8 ¶1-3*

## Matlhatso, August 13

*[Jehofa] ga a eletse gore motho ope a sennngwe mme o eletsa gore botlhe ba ikwatlhaye.—2 Pet. 3:9.*

Jehofa o setse a ebele letsatsi le ura e a tla senyang lefatshe leno ka yone. (Math. 24:36) Ga a kitla a fela pelo a bo a le senya pele ga nako e a e tlhomileng. O batla go tsosa baswi mme gone o pelotelele. (Jobe 14:14, 15) O letetse nako e e siameng gore a ba tsose. (Joh. 5:28) Re na le mabaka a a utlwalang a go lebo-ga Jehofa go bo a le pelotelele. E re ka Jehofa a le pelotelele seno se re thusitse, e bile se thusitse le batho ba bangwe gore ba nne le nako e e lekaneng ya ‘go ikwatlhaya.’ Jehofa o batla gore batho ba le bantsi ba nne le tshono ya go tshelala ruri. Ka jalo re tshwanetse go bontsha gore re lebogela go bo a le pelotelele. Re ka dira seo jang? Ka go batla ba ba nang le “tshokamelole e e siameng ya go bona botshelo jo bo sa khutleng,” re bo re ba thusa go rata Jehofa le go mo direla. (Dit. 13:48) Mme le bone ba tla solegelwa molemo ke go bo Jehofa a le pelotelele. *w20.08 18 ¶17*

## Sontaga, August 14

*Nkitsise ditsela tsa gago, tlhe Jehofa; nthute ditselana tsa gago.—Pes. 25:4.*

Fa re ithuta le motho, re batla gore a ithute ka Jehofa. Mme gone, dilo tse a di ithutang di tshwanetse go mo ama pelo gore a kgone go di dirisa. Jesu o ne a ruta batho dilo di le dintsi mme ba ne ba rata go mo reetsa. Mme gone, batho e ne e nna balatedi ba gagwe ka gone se a neng a se ruta se ne se ba ama pelo. (Luke 24:15, 27, 32) Motho yo o ithutang Baebele le ene o tshwanetse go itse gore Jehofa ke Motho wa mmatota le gore Jehofa a ka kgona go nna Rraagwe, Modimo wa gagwe le Tsala ya gagwe. (Pes. 25:5) Fa lo ithuta, mo thuse gore a itse botho jwa ga Jehofa. (Ekes. 34:5, 6; 1 Pet. 5:6, 7) Dira jalo nako le nako fa lo ithuta. Mo thuse go lemoga gore Jehofa o lorato, o pelonomi e bile o kutlwelobotlhoko. Jesu o ne a re taelo ya ntlha ke gore “o rate Jehofa Modimo wa gago ka pelo yotlhe.” (Math. 22:37, 38) Thusa motho yo o ithutang le ene gore a rate Jehofa ka pelo yotlhe. *w20.10* 10 ¶12

## Mantaga, August 15

*Jesu o ne a rata Maratha le monawe le Lasaro.—Joh. 11:5.*

Jesu o ne a tlotla basadi botlhe. (Joh. 4:27) Mme segolobogolo o ne a tlotla basadi ba ba dirang thato ya ga Rraagwe. O ne a re basadi bao ke bokgaisadie e bile o ne a ba tsaya e le karolo ya lelapa la gagwe. (Math. 12:50) Mme gape o ne a ba tsaya e le ditsala tsa gagwe. Akanya ka botsala jo Jesu a neng a na le jone le Marea le Maratha, ba go lebegang ba ne ba sa nyalwa. (Luke 10:38-42) Jesu o ne a dira gore ba ikutlwe ba gololesegile fa ba na le ene. Ka sekai, nako nngwe fa Jesu a ne a ba etetse, Marea o ile a nna fa dinaong tsa ga Jesu. Maratha o ne

a kgopisitswe ke gore Marea o ne a sa mo thuse, ka jalo, o ne a ikutlwa a gololesegile go bolelela Jesu gore a mo kga-lemele. Mme Jesu o ile a dirisa tshono eo go ba ruta sengwe sa botlhokwa. O ne a bontsha gore o rata basadi bano le kgaityadihone e bong Lasaro, ka go nna a ba etela. (Joh. 12:1-3) Ka jalo, fa Lasaro a ne a lwala, Marea le Maratha ba ne ba itse gore Jesu o ne a tla ba thusa.—Joh. 11:3. *w20.09* 20 ¶3; 21 ¶6

## Labobedi, August 16

*Ba ne ba akanya gore Bogosi Jwa Modimo bo ne bo tla tla ka ponyo ya leitlho.—Luke 19:11.*

Barutwa ba ga Jesu ba ne ba solofetse gore Bogosi bo ne bo tla tla ka “ponyo ya leitlho” gore bo ba golole mo pusong ya Baroma e e neng e ba gatelela. Re eletsa gore Bogosi Jwa Modimo bo feditse dilo tse di bosula tse di diregang le gore bo tlise lefatshe le leshe, le mo go lone go tla bong go tshela batho ba ba siameng fela. (2 Pet. 3:13) Mme gone, re tshwanetse go nna pelotelele, re lete gore Jehofa a dire seo ka nako e a e tlhomileng. Jehofa o ne a naya Noa nako e e lekaneng gore a age araka le gore a tlhagise batho. (2 Pet. 2:5; 1 Pet. 3:20) Jehofa o ne a le pelotelele fa Aborahame a ne a mmotsa dipotso tse di ganang go fela ka tshwetso ya gagwe ya go fedisa metse ya Sodoma le Gomora. (Gen. 18:20-33) Gape go ne ga feta dingwagangwaga a le pelotelele le setshaba se se tlhogoethata sa Iseraele. (Neh. 9:30, 31) Mo godimo ga moo re kgona go bona gore Jehofa o pelotelele ka gone o neile batho nako e telele ya gore ba ikwatlhaye. (2 Pet. 3:9; Joh. 6:44; 1 Tim. 2:3, 4) E re ka Jehofa a le pelotelele, seno se re thusa gore le rona re tswelele re le pelotelele fa re ntse re rerela batho dikgang tse di molemo. *w20.09* 10 ¶8-9

## Laboraro, August 17

*Modimo o tlile go tsosa batho . . .  
mo baswing.—Dit. 24:15.*

Jehofa o tlile go dira gore batho ba ba suleng ba tsoge ba gopola dilo tse ba neng ba di dira pele ba tlhokafala e bile ba na le botho jo ba neng ba na le jone. Seno se raya gore Jehofa o a go rata, o lemoga dilo tse o di akanyang e bile ga a kitla a le-bala tsela e o ikutlwang ka yone, se o se buang le se o se dirang. Ka jalo, fa Jehofa a tsosa batho ba ba suleng, go tla nna molthofo gore a dire gore ba nne le megopolo, mekgwa, le botho jo ba neng ba na le jone. Kgosi Dafide o ne a itse gore Jehofa o itse mongwe le mongwe wa rona sentle. (Pes. 139:1-4) E re ka jaanong o tthaloganya gore Jehofa o go itse sentle, seo se dira gore o ikutlwe jang? Fa re akanya ka tsela e Jehofa a re itseng ka yone, ga re a tshwanela go tshwenyega. Goreng? Ka gonne Jehofa o a re kgathalela. O tsaya mongwe le mongwe wa rona a le bothokwa. O itse dilo tse di dirang gore re nne se re leng sone. Ga go reye gore fa Jehofa a re leba, o a bo a batla go bona diposo, tota o a bo a batla go re thusa. Seno se a gomotsa ka gonne se dira gore re se ka ra ikutlwa e kete re nosi.—2 Ditir. 16:9. *w20.08 17 ¶13-14*

## Labone, August 18

*Ke tla go naya temogo ke bo ke go ruta tsela e o tshwanetseng go tsamaya mo go yone.—Pes. 32:8.*

Jehofa o rata go ruta batho ba gagwe. O batla gore re mo itse, re mo rate le gore re tsehelele ruri. Dilo tseno tsotlhe di ne di ka se kgonege fa a ka bo a sa re rute. (Joh. 17:3) Jehofa o ne a dirisa phuthego ya lekgolo la ntlha la dingwaga go ruta batho ba gagwe. (Bakol. 1:9, 10) Ba ne ba thusiwa ke moya o o boitshepo o Jesu a ileng a solofetsa balatedi ba gagwe gore o tla ba naya one. (Joh. 14:16) Moya o o boitshepo o ile wa thusa balatedi ba ga Jesu gore ba tlhaloganye

Lefoko la Modimo le gore ba gopole dilo tsotlhe tse Jesu a ileng a di bua le tse a ileng a di dira jaaka go ne ga tlhalosiwa moragonyana mo Diefangeleng. Kitso eo e ile ya nonotsha tumelo ya bone e bile e ile ya ba thusa gore ba rate Jehofa le Morwawe. Gape e ile ya ba thusa gore ba ratane. Jehofa o ile a bolelela pele gore “go ela kwa bofelong jwa metlha,” batho ba ditšhaba tsotlhe ba ne ba tla tla mo thabeng ya gagwe. Seno se raya gore ba ne ba tla tla mo phuthogong ya gagwe gore ba ithute melao ya gagwe. (Isa. 2:2, 3) Boporofeti joo bo a diragadiwa gompieno. *w20.10 24 ¶14-15*

## Labotlhamo, August 19

*Motho yo o nang le tlhaloganyo  
o amogela kaelo e e botswerere.  
—Diane 1:5.*

Ke eng se se ka dirang gore motho a gane go reetsa fa a gakololwa? Ke boikgogomoso! Batho ba ba boikgogomoso ba rata “gore ditsebe tsa bone di tsikitiwi.” Ba “faposa ditsebe tsa bone mo boammaaruring.” (2 Tim. 4:3, 4) Ba akanya gore bone ga ba tlhoke go gakololwa ka gonne ba bothale e bile ba bothokwa go gaisa ba bangwe. Mme gone, moaposetoloi Paulo o ile a re: “Fa mongwe a akanya gore o sengwe fa a se sepe, o tsietsa mogopolo wa gagwe.” (Bagal. 6:3) Mme Kgosi Solomone ene o ile a re: “Ngwana yo o tlhokang mme a le bothale o botoka go na le kgosi e e tsofetseng mme e le sematla, e e iseng e itse mo go lekaneng gore e ka tlhola e tlhagisiwa.” (Mor. 4:13) Akanya ka se Petere a ileng a se dira fa Paulo a mo kgalemela fa pele ga batho. (Bagal. 2:11-14) Petere a ka bo a ile a galefisiwa ke se Paulo a ileng a se bua le gore o ile a se bua fa pele ga batho. Mme Petere ga a ka a dira jalo. Go na le gore a tseye kgang eno ka pelo, o ile a amogela kgakololo. Mme moragonyana o ile a re Paulo ke “mokaulengwe yo o rategang.” —2 Pet. 3:15. *w20.11 21 ¶9, 11-12*

## Matlhatso, August 20

*[Dirang] barutwa . . . , lo ba rute.*  
—Math. 28:19, 20.

Ke eng se se ka thusang moithuti go gatele pele? Ke go ya dipokanong ka metha. Se a se ithutang kwa dipokanong se tla mo thusa gore a nne le kitso e e oketsegileng, se tla nonotsha tumelo ya gagwe le go dira gore a rate Jehofa le go feta. (Dit. 15:30-32) Gape mmoledi a ka tlhalosetsa moithuti gore selo se se mo thusitseng go ikobela melao ya ga Jehofa ke fa a ntse a ithuta ka ene a bo a simolola go mo rata le go feta. (2 Bakor. 7:1; Bafil. 4:13) Fa motho yo o ithutang Baebele a simolola go itse bakaulengwe le bokgaisadi ba ba farologaneng, o ithuta mo go bone gore ke eng se a tshwanetseng go se dira gore a kgone go ikobela taelo ya ga Jesu ya gore a rate Modimo le batho. (Joh. 13:35; 1 Tim. 4:12) Moithuti wa Baebele a ka ithuta mo bakaulengwe le bokgaisadi ba ba ileng ba lebana le dikgwetlho tse di tshwanang le tse a lebanang le tso. Dilo tseo di ka mo thusa go lemoga gore a ka kgona go dira diphetogo tse di tlhokegang gore e nne morutwa wa ga Jesu. (Dute. 30:11) Mongwe le mongwe mo phuthegong a ka thusa moithuti wa Baebele gore a gatele pele.—Math. 5:16. *w20.11 5 ¶10-12*

## Sontaga, August 21

*Ke lole le dibatana tsa naga  
kwa Efeso.—1 Bakor. 15:32.*

Gongwe Paulo a ka tswa a ne a bua ka go lwa ka tsela ya mmatota le dipologolo kwa setediamong sa kwa Efeso. (2 Bakor. 1:8; 4:10; 11:23) Kgotsa gongwe o ne a bua ka Bajuda kgotsa batho ba ba neng ba le kgatlhanong le ene, ba ba neng ba tshwana le “dibatana tsa naga.” (Dit. 19:26-34; 1 Bakor. 16:9) Paulo o ile a lebana le ditoko di le dintsi, mme gone o ne a na le tumelo ya gore o tllile go nna le bokamoso jo bo itumedisang. (1 Bakor. 15:30, 31; 2 Bakor. 4:16-18) Re tshela mo nakong ya mathata. Bakaulengwe le bokgaisadi

bangwe ba ile ba amiwa ke bokebekwa. Bangwe ba nna kwa mafelong a go tletseng dintwa mme ba ikutlwa ba sa sireletsega. Batlhanka bangwe ba ga Jehofa ba nna kwa mafelong a tiro ya rona ya go rera e thibetsweng kwa go one. Mme ba tswelela ba direla Jehofa le fa seo se ka dira gore ba tsennngwe mo kgolegelong kgotsa ba bolawe. Le fa bakaulengwe le bokgaisadi bano ba kopana le mathata, ba tswelela ba obamela Jehofa, mme ba re tlhomela sekao se se molemo. Ga ba boife ka gone ba a itse gore le fa ba ka swa, Jehofa o tllile go ba tsosa le go ba naya botshelo jo bo itumedisang mo nakong e e tlang. *w20.12 9 ¶3-4*

## Mantaga, August 22

*Re dira mmogo le Modimo. Lona lo tshimo ya Modimo e e lengwang,  
kago ya Modimo.—1 Bakor. 3:9.*

A ka dinako dingwe o a tle o kgobwe marapo ke gore batho ba tshimo ya lona ga ba batle go reetsa dikgang tse di molemo? Kgotsa gore ga se gantsi lo fitlhela batho mo magaeng a bone? Ke eng se se ka re thusang gore re tswelere re itumetse le fa re lebana le maemo ano? O tshwanetse go leba bodiredi ka tsela e e siameng. Go leba bodiredi ka tsela e e siameng go kaya eng? Gopola gore lebaka la go bo re rera ke ka go bo re batla go itsise batho leina la Modimo le ka Bogosi jwa gagwe. Jesu o ile a tlhalosa gore ke batho ba le mmalwa fela ba ba tllileng go nna baledi ba gagwe. (Math. 7:13, 14) Fa re le mo bodireding, re na le tshiamelo ya go dira mmogo le Jehofa, Jesu le baengele. (Math. 28:19, 20; Tshen. 14:6, 7) Jehofa o batla go thusa batho ba ba batlang go mo direla. (Joh. 6:44) Ka jalo, fa motho a sa batle go reetsa molaetsa wa rona fa re mo etetse, gongwe a ka o reetsa mo nakong e e tlang. Kgaisadi mongwe yo o bidiwang Deborah a re: “Satane o dirisa go kgobega marapo e le sebetse kgatlhanong le rona.” Mme Jehofa Modimo o maatlga go feta Satane le dibetsa tsa gagwe. *w20.12 26 ¶18-19; 27 ¶21*

## Labobedi, August 23

*A re tsweleleng re ratana, ka gone  
lorato lo tswa kwa Modimong.*  
—1 Joh. 4:7.

Bakeresete ba le bantsi ba tshwane-tse go bereka ka gone ba tlhoka go tlamela ba malapa a bone. Le fa go ntse jalo, ba dira sotlhe se ba ka se kgonang go tshegetsatsa dithulaganyo tse di dirwang mo phuthegong ya Modimo. Ka sekai, bangwe ba kgona go thusa fa go na le masetlapelo, go thusa mo tirong ya dikago mme batho botlhe ba na le tshono ya go ntsha moneelo go thusa mo tirong ya lefatshe lotlhe. Ba dira seno ka gone ba rata Modimo le batho. Re bontsha gore re rata bakaulengwe le bokgaisatsadi ka go ya dipokanong beke le beke le go tsaya karolo mo go tsone. Re nna gone kwa dipokanong tseno le fa re lapile. Re a araba le fa gone re tshoga. Mme fa re le kwa dipokanong re kgothatsa ba bangwe le fa re na le mathata. (Baheb. 10:24, 25) Ruri re lebogela maiteko a bakaulengwe le bokgaisatsadi ba a dirang go tshegetsatsa tiro ya Modimo! w21.01 10 ¶11

## Laboraro, August 24

*A re se ka ra ikgogomosa.*  
—Bagal. 5:26.

Batho ba ba boikgogomoso ba batla gore ka metlha e nne bone fela ba ba akgolwang. Ga ba batle go akgola ba bangwe. Ba rata go gaisana le ba bangwe le go ipapisa le bone. Go na le gore ba ba rute go dira dilo dingwe, ba batla go itirela sengwe le sengwe ka gone ba akanya gore batho ba bangwe ga ba ka ke ba kgona go dira dilo tsele sentle. Gantsi motho yo o boikgogomoso o itsaya a le botlhokwa go gaisa ba bangwe e bile o a fufega fa ba dira dilo botoka go mo gaisa. Fa re lemoga gore re na le bothata jono, re tshwanetse go kopa Jehofa gore a re thuse gore re se ka ra itsege re le batho ba ba boikgogomoso. (Bar. 12:2)

Re leboga go bo Jehofa a re tlhometse sekao se se molemo! (Pes. 18:35) Re lemoga gore o boikokobetso fa a dirisana le batho ba gagwe e bile re batla go mo etsa. Gape re batla go etsa batho ba go buiwang ka bone mo Baebeleng, ba ba ileng ba direla Jehofa ba le boikokobetso. A ka metlha re lekeneng go tlotlomatsa Jehofa.—Tshen. 4:11. w20.08 13 ¶19-20

## Labone, August 25

*Ba ba nyalang kgotsa ba ba nyalwang ba tla nna le mathata  
a mantsi.*—1 Bakor. 7:28.

Lenyalo ke mpho e e molemo e e tswang kwa go Jehofa. Mme gone, batho ba ba nyalanang ba dira diphoso. (1 Joh. 1:8) Ke lone lebaka la go bo Baebele e tlhagisa banyalani gore ba tlile go lebana le mathata mme e tlhalosa mathata ao e le "pitlagano mo nameng." Jehofa o lebeletse gore banna ba ba nyetseng ba akanyetse ba malapa a bone, ba ba tlhokomele ka dilo tse ba di tlhokang le go ba thusa gore ba obamele Jehofa. (1 Tim. 5:8) Le fa go ntse jalo, bokgaisatsadi ba ba nyetsweng ba tshwanetse go ipha nako ya go bala Lefoko la Modimo letsatsi le letsatsi, go akanya ka se ba se badileng le go rapela Jehofa. Go ka nna thata gore basadi ba ba nyetsweng ba dire dilo tseno ka gone ba na le ditiro di le dintsi. Mme gone, ba tshwanetse go ipha nako ya go dira jalo. Ka ntilha ya eng? Ka gone Jehofa o lebeletse gore mongwe le mongwe wa rona a nne tsala ya gagwe le gore a tswelele a nonotsha botsala joo. (Dit. 17:27) Mosadi a ka nna a tlhoka go dira ka ntila gore a ikobele monna wa gagwe ka gone monna wa gagwe le ene o dira diphoso. Mme gone, fa a tlhaloganya le go dumalana le mabaka a a mo Baebeleng a go bo a tshwanetse go tlotla le go ikobela monna wa gagwe, o tla kgona go diragatsa maikarabelo ao a Jehofa a mo neileng one. w21.02 9 ¶3, 6-7

## Labotlhamo, August 26

*Fa tumelo ya lona e lekwa . . . ,  
e tla lo thusa gore lo kgone go  
itshoka.*—Jak. 1:3.

Diteko di ka tshwantshannngwa le molelo o o dirisiwang fa go dirwa tshaka ya tshipi. Fa tshaka eo e sena go gotediwa e bo e tsidifadiwa, e a nonofa kgotsa e nna thata. Le rona tumelo ya rona e a nonofa fa re itshokela diteko. Ke lone lebaka la go bo Jakobe a ile a re: “Letlang boitshoko bo feleetse tiro ya jone, gore lo felele lo bo lo itekanele sentle ka di-tsela tsotlhe.” (Jak. 1:4) Fa re lemoga gore diteko di nonotsha tumelo ya rona, re tla kgona go di itshokela re itumetse. Gape Jakobe o ile a tlhalosa dilo dingwe tse di ka dirang gore re se ka ra tlhola re itumela. Sengwe sa dilo tseo, ke fa re sa itse gore re dire eng. Fa re na le mathata re tshwanetse go kopa Jehofa gore a re thuse go dira di tshwetso tse di tla mo itumedisang, tse di tla solegelang bakaulengwe le bokgaisadi molemo le tse di tla re thusang gore re tswellele re ikanyega mo go Jehofa. (Jer. 10:23) Re tlhoka botlhale jo bo tswang kwa go Jehofa gore re itse gore re tshwanetse go dira eng le go bua eng fa batho ba re ganetsa. Fa re sa itse gore re dire eng, re ka kgobega marapo mme kwa bofelong re bo re sa tlhole re itumela. *w21.02 28* ¶7-9

## Matlhatso, August 27

*Ratanang ka pelo yotlhe.  
—1 Pet. 1:22.*

Jehofa o re tlhomela sekao se se molemo sa go rata ba bangwe. Jehofa o re rata thata mme fa re ikanyega mo go ene, o tla tswellela re rata. (Bar. 8:38, 39) Baebele e a re re ratane ka lorato lo logolo, seno se kaya gore re tshwanetse go tsaya matsapa go bontsha ba bangwe gore re a ba rata. Mme ka dinako dingwe, go ka nna thata go bontsha bakaulengwe le bokgai-

tsadi gore re a ba rata. Fa ba bangwe ba re kgopisa, re tlhoka go tswellela re “itshokelana ka lorato, [re] leka ka natla ka tlhoafalo go boloka bongwefela jwa moya mo sebofong se se kopanyang sa kagiso.” (Baef. 4:1-3) Ga re kitla re tlhoma mogopolo mo diphosong tsa bakaulengwe le bokgaisadi ba rona, mme re tla leka ka natla go ba leba jaaka Jehofa a ba leba. (1 Sam. 16:7; Pes. 130:3) Ka dinako dingwe go ka nna thata go rata bakaulengwe le bokgaisadi segolobogolo fa re itse diphoso tsa bone. Seno se ile sa diragalela Bakeresete bangwe ba bogologolo. Bangwe ba bone ke Yudia le Sentike. Moaposetoloi Paulo o ile a ba kopa gore “ba nne [le] mogopolo o o tshwanang mo Moreneng.”—Bafil. 4: 2, 3. *w21.01 22-23* ¶10-11

## Sontaga, August 28

*Makawana, ke a lo kwalela ka gone  
lo nonofile mme lo dumela mo  
lefokong la Modimo e bile lo fentse  
Satane.*—1 Joh. 2:14.

Bakaulengwe le bokgaisadi ba ba tseng ba godile ba a lo rata lona bakaulengwe ba basha ka gone lo direla Jehofa le bone! (Sefa. 3:9) Ba rata tsela e lo leng matlhagatlhaga ka yone fa lo dira tiro e lo e neilweng. Ba lo rata fela thata! Bakaulengwe ba basha, lo se ka lwa lebala gore Jehofa o a lo rata e bile o a lo tshepa. O ile a bolelela pele gore mo metlheng ya bofelo bakaulengwe ba le bantsi ba basha ba tla ithaopa ka go rata. (Pes. 110:1-3) O a itse gore o a mo rata le gore o batla go mo direla kafa o ka kgonang ka gone. Nna pelotelele le ba bangwe mme le wena o se ka wa iphelela pelo. Fa o dirile diphoso, amogela thapiso le kgakololo e o e newang mme o tseye seo e le thuso e e tswang kwa go Jehofa. (Baheb. 12:6) Dira ka natla mo dikabelong tsotlhe tse o di newang. Mo godimo ga moo, dira gore Jehofa a nne motlotlo ka wena mo dilong tsotlhe tse o di dirang.—Dia. 27: 11. *w21.03 7* ¶17-18



## Mantaga, August 29

*Fa o kgobega marapo ka dinako tsa mathata, o tla felelwa ke maatla.—Diane 24:10, ntlh.*

Go na le dilo di le dintsi tse di ka dirang gore re kgobega marapo. Dingwe tsa dilo tseo ke diphoso tsa rona, mako a rona le bolwetse. Mme selo sengwe se se ka dirang gore re kgobega marapo ke fa re sa newe kabelo nngwe e re neng re lebeletse gore re tla e newa kgotsa re rera mo lefelong le batho ba lone ba sa rateng go reetsa molaetsa wa rona. Fa re dirile diphoso kgotsa re boeletsa phoso nngwe e re e dirileng, re ka ikutlwa molato gape re ka simolola go inyatsa. Ka ntlha ya seo, re ka simolola go akanya gore Jehofa ga a kitla a re letla go tshela kwa lefatsheng le lesa. Go akanya jalo go ka nna kotsi. Baebale ya re batho botlhe, kwantle ga Jesu, "ba leofile." (Bar. 3:23) Mme gone, Jehofa ga a tlhome mogopolo mo diphosong tsa rona e bile ga a lebelela gore re se ka ra dira diphoso. Go na le moo, ke Rre wa rona e bile o a re rata. O pelotelele le rona. O a itse gore ga go motlhofo gore re dire dilo tse di siameng le gore fa re dirile diphoso re ikutlwa molato. Ka jalo, o batla go re thusa.—Bar. 7:18, 19, w20.12 22 ¶1-3

## Labobedi, August 30

*Kwa bokhutlong bakaulengwe, tswelelang lo itumetse, lo dira diphetogo tse di tlhokegang.  
—2 Bakor. 13:11.*

Rotlhe re mo loetong. Re batla go fitlha kwa lefatsheng le lesa. Letsatsi le letsatsi re leka go tsamaya mo tseleng e e re isang kwa botshelong jo bo sa khutleng. Mme fela jaaka Jesu a tihalositse, tsela eo e pitlagane e bile ga go motlhofo go tsamaya mo go yone. (Math. 7:13, 14) E re ka re na le bolelo, go ka nna motlhofo gore re tlogele go tsamaya

mo tseleng eo. (Bagal. 6:1) Fa e le gore re batla go tswelela re le mo tseleng e e isang botshelong jo bo sa khutleng, re tshwanetse go ikemisetsa go fetola tsela e re akanyang ka yone, dilo tse re di ratang le tsela e re itshwarang ka yone. Moaposetoloi Paulo o re kgothaletsa gore re fetole tsela e re dirang dilo ka yone kgotsa re "lolamisiwe." Ga go motlhofo go tlhatlhoaba tsela e re ikutlwang ka yone le e re akanyang ka yone. Goreng? Ka gonne dipelo tsa rona di boferefere e bile go ka nna thata go itse gore di ka re tlhotlhelletsa go dira eng. (Jer. 17:9) Go ka nna motlhofo gore re itsietse ka "tsela e e phoso ya go akanya." (Jak. 1:22) Ka jalo, re tshwanetse go dirisa Lefoko la Modimo go itlhatlhoaba. Ka gonne le kgona go re bontsha se tota re leng sone e bile le kgona go lemoga "dikakanyo le maikaelelo a pelo." —Baheb. 4:12, 13. w20.11 18 ¶1-3

## Laboraro, August 31

*Nnang ba ntlha go tlotla ba bangwe.—Bar. 12:10.*

Fa re le boikokobetso, re tla kgona go itumela. Goreng re rialo? Fa re itse gore go na le dilo dingwe tse re sa kgoneng go di dira, re tla kgona go leboga fa ba bangwe ba re thusa. Ka sekai, akanya ka nako ya fa Jesu a ne a fodisa baleperero ba le lesome. Go ne ga boa moleperero a le mongwe fela a tla go leboga Jesu. O ne a itse gore o ne a se kitla a fola fa Jesu a sa mo thusa. Ka jalo, o ne a le-bogela thuso eo, a bo a galaletsa Modimo. (Luke 17:11-19) Go motlhofo gore batho ba ba boikokobetso ba nne le ditlala. Goreng? Ba a itse gore go na le dilo dingwe tse ba bangwe ba kgonang go di dira, tse bone ba sa kgoneng go di dira, ka jalo ba a ba tshepa. Batho ba ba boikokobetso ba itumela fa ba bangwe ba atlega mo dikabelong tse ba di neilweng, ba a ba akgola e bile ba a ba tlotla. w20.08 12 ¶17-18

## Labone, September 1

*Morago ga moo, ke tla tshololela moya wa me mo bathong ba mofuta mongwe le mongwe.*

—*Joele 2:28.*

Fa Petere a ne a nopola mafoko a ga Joele, o ile a dirisa mafoko a a farologa-neng go se kae. (Dit. 2:16, 17) Ga a ka a dirisa mafoko a a reng “morago ga moo.” Go na le moo, o ne a re: “Mme mo mtlheng ya bofelo” moya wa Modimo o ne o tla tshololelwa “mo nameng ya mofuta mongwe le mongwe.” Fa a ne a bua ka mtlha ya bofelo, o ne a bua ka malatsi a bofelo pele Jerusalema e senngwa. Seno se bontsha gore go ne ga feta nako e telele pele boporofeti jwa ga Joele bo diragadiwa. Fa Modimo a sena go tshololela Bakeresete ba lekgolo la ntlha la dingwaga moya o o boitshepo, ba ile ba simolola go dira tiro ya go rera e morago ga nako e neng e tla dirwa mo lefatsheng lotlhe. Fa moaposetoloi Paulo a ne a kwalela Bakeresete ba kwa Kolosa lekwalo ka 61 C.E., o ne a tlhalosa gore dikgang tse di molemo di ne di rerwa “mo popong yotlhe e e kafa tlase ga legodimo.” (Bakol. 1:23) Fa Paulo a ne a bua ka “popo yotlhe,” o ne a bua ka mafatshe a ba neng ba kgona go ya kwa go one. Gompiano, Jehofa o ile a dirisa moya o o boitshepo go thusa batho ba gagwe gore ba rere go ya kwa dikarolong tse di “kgakalagakala [tsa] lefatsho.”—Dit. 13:47. *w20.04 6-7 ¶15-16*

## Labotlhano, September 2

*Ke tla batla dinku tsa me, e bile ke tla di tlhokomela.—Esek. 34:11.*

Jehofa o rata dinku tsa gagwe, tota le tse di tlogetseng go tsamaya le letsomane la gagwe. (Math. 18:12-14) Modimo o ile a bolelela pele gore o tlele go batlana le dinku tsa gagwe tse di latlhegileng a bo a di thusa gore di nne le kamano e e molemo gape le ene. Mme o ne a tlhalosa gore o tla dira seo jang. Se a neng a tla se dira se tshwana fela le se modisa wa Moiseralele a neng a ka se dira fa nku ya gagwe e latlhegile. (Esek. 34:12-16) Sa ntlha, modisa o

ne a tshwanetse go batla nku ya gagwe, mme seo se ne se tla tlhoka gore a tseye matsapa le go dirisa nako e ntsi. Mme fa a sena go e bona o ne a tla e busetsa kwa letsomaneng. Mo godimo ga moo, fa nku eo e gobetse e bile e tshwerwe ke tlana, modisa yoo o ne a tla e hapa, a bo a e fa dijo. Bagolwane, ba e leng badisa ba “letsomane la Modimo,” le bone ba tshwanetse go dira se se tshwanang go thusa nku e e latlhegileng go boela mo phuthegong. (1 Pet. 5:2, 3) Bagolwane ba tshwanetse go batlana le batho bao, ba ba thuse go boela mo phuthegong ba bo ba ba thuse gore ba boe ba nne ditsala tsa ga Jehofa. *w20.06 20 ¶10*

## Matlhatso, September 3

*Masimo a masweu go ka robiwa.*  
—*Joh. 4:35.*

A Jesu o ile a re masimo a siametse go ka rojwa ka gonne a ne a lebeletse gore batho ba le bantsi ba tla nna balatedi ba gagwe? Nnyaa. Dikwalo di ne di setse di boleletse pele gore ke batho ba le mmalwa fela ba ba neng ba tla dumela mo go ene. (Joh. 12:37, 38) Mo godimo ga moo, Jesu o ne a kgona go bona se se mo dipelong tsa batho. (Math. 9:4) Le fa go ntse jalo, Jesu o ne a tlhoma mogopolo mo bathong ba le mmalwa ba ba neng ba tla dumela mo go ene, e bile o ne a rerela batho botlhe. E re ka re sa kgone go itse se se mo dipelong tsa batho, ga re a tshwanela go akanya gore ba ka se fetoge. Go na le moo, re tshwanetse go nna re gopotse gore batho ba re ba rerelang ba ka kgona go nna barutwa ba ga Jesu. O se ka wa lebala gore Jesu o ile a raya barutwa ba gagwe a reng. O ile a re masimo a masweu e bile a siametse go ka rojwa. Batho ba ka kgona go fetoga ba bo ba nna barutwa ba ga Jesu. Jehofa o a itse gore batho ba ba mo tshimong ya lona ba ka kgona go fetoga ba bo ba nna “dilo tse di eletsegang.” (Hag. 2:7) Fa le rona re dumela gore batho ba ka kgona go fetoga, re tla ipha nako ya go itse maemo a bone le dilo tse ba di ratang. Re tla ba tsaya jaaka bakaulengwe le bokgaisadi ba rona ba kamoso. *w20.04 13 ¶18-19*

## Sontaga, September 4

*Ke lo bitsa ditsala, ka gonne ke lo boleetse dilo tsothle tse ke di utlwi-leng kwa go Rre.—Joh. 15:15.*

Baebele ya re re tshwanetse go tswelera re rata Jesu gore re kgone go itumedisa Jehofa. Sengwe se se ka re thusing go nna ditsala tsa ga Jesu ke go mo itse. Re ka dira seno ka go bala buka ya Mathaio, Mareko, Luke le Johane. Dipego tsa Baebele tse di buang ka botshelo jwa ga Jesu di re thusa go itse gore Jesu o ne a tshwara batho jang. Fa re tlhathanya ka dipego tseno, re tla mo rata e bile re tla mo tlotla. Ka sekai, Jesu o ne a sa tshware barutwa ba gagwe jaaka makgoba le fa gone e ne e le Mong wa bone. Go na le moo, o ne a ba bolelela gore o ikutlwa jang le gore o akanyang. Fa ba utlwile bothoko, o ne a lela le bone. (Joh. 11:32-36) Tota le batho ba ba neng ba sa rate Jesu ba ne ba itse gore Jesu ke tsala ya batho ba ba dumelang mo go ene. (Math. 11:19) Fa re etsa tsela e Jesu a neng a tshwara batho ka yone, re tla kgona go dirisana sentle le ba bangwe, re tla itumela e bile re tla rata Jesu le go feta. *w20.04 22 ¶9-10*

## Mantaga, September 5

*Kgosi ya borwa . . . e tla ipaakanyetsa ntwa ka mophato wa masole o mogolo le o o maatla thata.—Dan. 11:25.*

Ka 1870, Boritane e ne e le yone mmusomogolo mo lefatsheng e bile e na le sesole se se nonofileng thata. Boporofeti jwa ga Daniele bo bua ka lonaka lo lonnye lo lo neng lwa fenywa dinaka tse dingwe tse tharo. Lonaka loo lo emela Boritane mme dinaka tse tharo tsona di emela Fora, Spain le Netherlands. (Dan. 7:7, 8) Puso ya Boritane e ne e le yone kgosi ya borwa go fitlha ka Ntwa ya Lefatshe ya Ntlha. Ka nako eo, United States of America e ne e le yone naga e e neng e humile thata mo lefatsheng mme e ne ya simolola go dirisana mmogo le naga ya Borita-

ne. Ka Ntwa ya Lefatshe ya Ntlha, United States le Boritane di ne di thusana mme dinaga tseno di ile tsa nna maatla fela thata. Di ne di dirisana mmogo ka jalo di ile tsa simolola go bidiwa Mmusomogolo wa Maesemane le Maamerika. Mmuso ono o ile wa phutha “mophato wa sesole o mogolo le o o thata” fela jaaka Daniele a ne a boleetse pele. Ka jalo mo meltheng eno ya bofelo, Mmusomogolo wa Maesemane le Maamerika kgotsa Boritane le United States, ke one kgosi ya borwa. *w20.05 4 ¶7-8*

## Labobedi, September 6

*Melatswana e boela kwa e neng e tswa gone gore e tle e elele gape.—Mor. 1:7.*

Go na le metsi mo lefatsheng ka gonne lefatshe le kgakala le letsatsi ka sekgala se se siameng. Fa lefatshe le ka bo le atametse letsatsi go sekae fela, metsi a a mo go lone a ne a tla kgala, e bile go ne go ka se nne le sepe se se ka kgonang go tshela mo go lone. Fa le ka bo le ne le le kgakalanyana le letsatsi, metsi a a mo go lone a ne a tla gatsela mme lefatshe e bo e nna aese. E re ka Jehofa a beile lefatshe mo go tshwanetseng, modikologo wa metsi o kgona go thusa gore go nne le botshelo mo lefatsheng. Modikologo wa metsi o direga fa letsatsi le fisa metsi a a mo mawatleng. Metsi ao a bo a fetoga go nna mouwane a bo a tlhatlogela kwa godimo. Fa mouwane o fitlha kwa lefaufaug o fetoga go nna maru. Ka ngwaga fela, metsi a a gotediwang ke letsatsi a bo a tlhatlogela kwa godimo, a feta metsi a a fitlhelwang mo matamong otlhe fela a a mo lefatsheng. Metsi ano a nna malatsi a le lesome mo lefaufaug pele a boela mo lefatsheng e le pula kana kapoko. Fa pula e na, metsi ao a boela mo matamong le mo mawatleng a a tswang mo go one. Go tswa foo, modikologo wa metsi o simologa gape. Jehofa o dirile modikologo ono gore lefatshe le nne le na le metsi. Ka jalo, seno se re ruta gore Jehofa o botlhale e bile o maatla.—Jobe 36:27, 28. *w20.05 22 ¶6*

## Laboraro, September 7

*Lo tla amogela maatla fa moya o o boitshepo o tla mo go lona.*

—Dit. 1:8.

Jesu o ne a re re nne re rapelele gore Modimo a re fe moya o o boitshepo. (Luke 11:9, 13) Jehofa o dirisa moya o o boitshepo go re naya maatla, “tota le maatla a a fetang a a tlwaelegileng.” (2 Bakor. 4:7) Moya o o boitshepo o kgonna go re thusa go fenywa diteko dipe fela tse re ka lebanang le tsone. Mme gape moya o o boitshepo o ka re thusa gore re diragatse dikabelo tsa rona mo tirong ya ga Jehofa le go tokafatsa bokgoni jwa rona. Re tshwanetse go leboga Modimo go bo a re file moya wa gagwe o o boitshepo o o re thusang go fitlhelela dilo dingwe. Re ka bontshang gore re lebogela moya o o boitshepo ka go kopa Modimo gore a re neye one gore o re thusa go lemoga dilo tse di phoso kana dikakanyo tse di sa siamang tse re ka tswang re na le tsone. (Pes. 139:23, 24) Fa re dira jalo Jehofa o tla re thusa go bona dikakanyo tseo tse re tlhokang go di baakanya. Re tshwanetse go kopa Jehofa gore a re neye moya wa gagwe o o boitshepo gore o re neye maatla a go tlosa dikakanyo tseo. Fa re dira jalo re a bo re bontsha Jehofa gore re batla gore a re thusa a dirisa moya wa gagwe o o boitshepo.—Baef. 4:30. *w20.05* 28-29 ¶10-12

## Labone, September 8

*Ke ba rutila ka ga leina la gago.*

—Joh. 17:26.

Fa re femela leina la Modimo, re a bo re etsa Jesu Keresete. Jesu o ne a sa rute batho fela ka leina la ga Rraagwe, mme gape o ne a ba ruta gore Rraagwe o ntseng jang. Ka sekai, Jesu o ne sa itswarelelang jaaka Bafarasai ba ba neng ba dira gore go lebege e kete Jehofa ke Modimo yo o setlhogo, yo o batlang se re ka se kang ra kgonna go se dira, yo o kgakala le batho e bile a se kutlwelobotlhoko. Jesu o ne a thusa batho go itse gore Jehofa ke Modimo yo o pelotelele, yo o lorato le yo o

itswarelang. Gape tsela e a neng a tshelela ka yone, e ne e thusa batho go lemoga gore Jehofa ke Modimo yo o ntseng jang. (Joh. 14:9) Fela jaaka Jesu re ka kgonna go ruta batho ka Jehofa, re ka ba ruta gore Jehofa ke Modimo yo o lorato le yo o pelonomi. Fa re dira jalo re a bo re ganetsa maaka a a buiwang ka Jehofa. Fa re bolelela batho ka leina la ga Jehofa, seo se dira gore leina la gagwe le itshepsiwe. Fa re tshela ka melao ya ga Jehofa, seo se tla dira gore batho ba lemogwe gore ke Modimo yo o ntseng jang. Re ka kgonna go tlotlomatsa leina la ga Jehofa ka go ruta batho boammaaruri ka lone. *w20.06* 6 ¶17-18

## Labotlhamo, September 9

*A re se ka ra ikgogomosa, ra gaisana, ra nna pelotshetlha.*

—Bagal. 5:26.

Re ka dirisa Internet ka tsela e e siameng. Ka sekai, re ka e dirisetsa go tlotla le ba malapa le ditsala. A o etse tlhoko gore batho ba bangwe ba tsenya ditshwantsho, dibidio kgotsa ba akgela mo Internet gore batho ba ba rate? Go lebege batho bano ba dira seno ka gonne ba batla go bonwa ke batho. Batho bangwe ba kwala dilo tse di tsitsibanyang mmele mo Internet e bile ba akgela ka tsela e e sa siamang fa ba bangwe ba tsentse ditshwantsho tsa bone. Bakeresete ga ba a tshwanela go dirisa Internet ka tsela eo ka gonne Baebele e ba kgothaletsa gore ba nne boikokobetso le gore ba akanyetse ba bangwe. (1 Pet. 3:8) Fa e le gore o dirisa Internet, ipotse jaana: ‘A dikakgelo, ditshwantsho le dibidio tse ke di tsenyanng mo Internet di dira gore batho ba bangwe ba akanye gore ke a ikgantsha? A ke dira gore batho ba bangwe ba fufege?’ Bakeresete ga ba tlhoke go dira gore batho ba bangwe ba ba tseye ba le bothokwa kgotsa ba ba tlotlomatse. Ba ikobela mafoko a temana ya letsatsi ya gompiono. Fa re le boikokobetso, ga re kitla re tshwana le batho ba lefatshe leno ba ba boikgogomoso e bile ba batla gore batho ba ba tseye ba le bothokwa.—1 Joh. 2:16. *w20.07* 6 ¶14-15

## Matlhatso, September 10

*Pele ke ne ke le motlhapatsi, ke bogisa batho ba gagwe e bile ke se na maitseo. Le fa go ntse jalo, Kerese o ne a nkutlwela botlhoko ka gonne ke ne ke dira dilo ke se na kitso.—1 Tim. 1:13.*

Pele moaposetoloi Paulo e nna Moke-resete, e ne e le motho yo o se nang maitseo e bile a sotla balatedi ba ga Kerese-te. (Dit. 7:58) Jesu o ile a thibela Paulo, yo ka nako eo a neng a bidiwa Saulo, go tswelela a sotla batho ba Modimo. Jesu o ne a bua le Paulo a le kwa legodimong, a bo a mo itaya ka bofou. E le gore a kgone go boa a bona gape, o ne a tshwanelwa ke go kopa thuso kwa bathong ba a neng a ba bogisa. O ne a nna boikokobetso a bo a amogela gore Ananiase a mo thuse go bona gape. (Dit. 9:3-9, 17, 18) Moragonyana Paulo o ne a nna Moke-resete yo o itsegeng mo diphuthegong mme ga a ka a lebala thuto e Jesu a ileng a mo ruta yone fa a ne a le mo tseleng a ya Damaseko. O ne a tswelela a le boikokobetso mme o ne a amogela fa bakaulengwe le bokgaisadi ba ne ba mo thusa. O ne a amogela gore Bakeresete bao e ne e le 'thuso e e mo nonotshang.'—Bakol. 4:10, 11. *w20.07 18-19 ¶16-17*

## Sontaga, September 11

*Rraalona o itumeletse go lo naya Bogosi.—Luke 12:32.*

Le fa gone Jehofa a kgona go itirela sengwe le sengwe, o naya ba bangwe maikarabelo a go dira dilo dingwe. Ka sekai, o tlhomile Jesu go nna Kgosi ya Bogosi jwa Gagwe, gape o tla naya batlodiwa ba ba 144 000 ba ba tla busang le Jesu, taolo e e rileng. Gone Jehofa ke ene a katisitseng Jesu gore a kgone go nna Kgosi le Mope-resiti yo Mogolo. (Baheb. 5:8, 9) Gape o katisa ba ba tla busang le Jesu kwa legodimong gore ba kgone go diragatsa maikarabelo a bone. Mme gone, ga a nnele go ba bolelela gore ba dire eng le gore ba se ka ba dira eng. O a ba tshepa e bile

o a itse gore ba tla dira thato ya gagwe. (Tshen. 5:10) Jehofa ga a tlhoke go thusiwa ke ope, mme le fa go ntse jalo o neile ba bangwe maikarabelo a go dira dilo dingwe. Mme e re ka re tlhoka go thusiwa ke batho ba bangwe, re tlhoka go mo etsa. A o tlhogo ya lelapa kgotsa o mogolwane mo phuthegong? Etsa Jehofa ka go naya ba bangwe maikarabelo mme o se ka wa laola sengwe le sengwe se ba se dirang. Fa o etsa Jehofa, o tla dira gore ba bangwe ba se ka ba ipelaela mme ba kgone go dira tiro e o ba neileng yone.—Isa. 41:10. *w20.08 9 ¶5-6*

## Mantaga, September 12

*Morwa motho o tletse go batla le go boloka se se neng se latlhegile.—Luke 19:10.*

Jehofa o batla gore re ikutlwe jang ka dinku tsa gagwe tse di latlhegileng? Jesu o re tlhomela sekao. O ne a itse gore dinku tsotlhe di botlhokwa mo go Jehofa, ka jalo o ne a dira sotlhe se a ka se kgonang go thusa 'dinku tse di latlhegileng tsa ntlo ya Iseraele' go boela kwa go Jehofa. (Math. 15:24) E re ka Jesu e le modisa yo o molemo o ile a dira sotlhe se a ka se kgonang gore go se ka ga nna le nku epe ya ga Jehofa e e latlhegang. (Joh. 6:39) Moaposetoloi Paulo o ile a kgothaletsa bagolwane ba kwa Efe-so gore ba etse sekao sa ga Jesu. O ne a re: "Lo tshwanetse go thusa ba ba bokoa, le gore lo tshwanetse go gopola mafoko a Morena Jesu, fa ene ka boene a ne a re, 'Go na le boitumelo jo bogolo mo go abeng go na le jo bo leng gone mo go amogeleng.'" (Dit. 20:17, 35) Temana eno e bontsha gore bagolwane ba na le maikarabelo a botlhokwa a go tlhokomela batlhanka ba ga Jehofa. Mogolwane mongwe wa kwa Spain yo o bidiwang Salvador, a re: "Fa ke akanya kafa Jehofa a ratang dinku tsa gagwe ka gone, ke tlhohlhetsega go dira sotlhe se nka se kgonang go di thusa, ke a itse gore Jehofa o batla gore ke di tlhokomele." *w20.06 23 ¶15-16*

## Labobedi, September 13

*Dilo tse di neng di tlhola di direga ga di tlhola di le teng.*

—Tshen. 21:4.

Jehofa o tlile go leta dingwaga di le sekete pele ga re nna batho ba ba itekanetseng. Go fitlha ka nako eo, Jehofa o iketleleditse go re itshwarela fa re dira diphos. Ka jalo fela jaaka Jehofa, le rona re tshwanetse go tlhoma mogopolo mo dinonofong tse dintle tse ba bangwe ba nang le tsone, le go nna pelotelele le bone. Jesu le baengele ba ne ba itumetse fa lefatshe le bopiwa. Mme akanya fela gore ba tla bo ba itumetse jang fa ba bona lefatshe le tletse ka batho ba ba itekanetseng, ba ba rantang Jehofa e bile ba mo direla. Gape akanya gore batho ba ba nang le tsholefelo ya go tshela kwa legodimong ba tla bo ba itumetse jang fa ba bona batho ba solegelwa molemo ke tiro ya bone. (Tshen. 4:4, 9-11; 5:9, 10) Akanya o tshele o sa tlhole o tsholola dikeledi tsa kutlobotlhoko ka gonne go se na bolwetse, kutlobotlhoko le loso. Go fitlha nako eo e goroga, ikemisetse go etsa Rraarona yo o lorato, yo o botlhale le yo o pelotelele. Fa o dira jalo, o tla nna o itumetse le fa o lebana le diteko. (Jak. 1:2-4) Ruri re leboga Jehofa go bo a re solofeditse gore “go tlile go nna le tsogo!”—Dit. 24:15. *w20.08* 19 ¶18-19

## Laboraro, September 14

*Dikgang tseno tse di molemo tsa Bogosi di tla rerelwa batho ba ba mo lefatsheng lotlhe.*—Math. 24:14.

Baebele ke mpho e e tswang kwa go Jehofa. O dirile gore go nne le batho ba ba e kwalang ka gonne a re rata. Jehofa o dirisa Baebele go araba dipotso tse re nang le tsone tsa botlhokwa thata mo botshelong tse di jaaka: Re tswa kae? Re tshelela eng? Le gore go tlile go diragala eng mo nakong e e tlang? Jehofa o ba-

tla gore batho botlhe ba itse dikarabo tsa dipotso tseno. Ke ka moo a ileng a dira gore e ranolelwe mo dipuong di le dintsi. Gompiano, Baebele e teng e feletse kgotsa e le dikarolo dingwe tsa yone ka dipuo di feta 3 000. Ga go na buka e nngwe e e ranotsweng kgotsa e e phasaladitsweng jaaka Baebele. Re ka bontsha gore re lebogela Baebele ka go e bala letsatsi le letsatsi, ka go tlhatlhanya ka se re se ithutang mo go yone, le ka go leka ka natla go se dirisa. Gape re ka bontsha Modimo gore re lebogela mpho eno e a re fileng yone ka go thusa batho ba bangwe go e itse.—Pes. 1:1-3; Math. 28:19, 20. *w20.05* 24-25 ¶15-16

## Labone, September 15

*Ke ne ka tlhapadiwa le go sotliwa letsatsi lotlhe ka ntlha ya lefoko la ga Jehofa.*—Jer. 20:8.

Batho ba moporofeti Jeremia a neng a ba rerela ba ne ba sa batle go reetsa molaetsa wa gagwe. Nako nngwe Jeremia o ile a kgobega marapo thata mo a neng a batla go tlogela go rera. Mme ga a ka a dira jalo. Ka ntlha yang? Ka gonne “lefoko la ga Jehofa” le ne le tshwana le molelo o o neng o tswaletse mo go ene mme o ne a sa kgone go o tshola! (Jer. 20:9) Le rona re ka diragalelwa ke se se ileng sa diragalela Jeremia fa re nna re bala Lefoko la Modimo e bile re tlhatlhanya ka lone. Ka ntlha ya seo, re tla itumelela bodiredi e bile batho ba le bantsi ba tla re reetsa. (Jer. 15:16) Ka jalo, fa o kgobegile marapo, kopa Jehofa gore a go thuso. O tla go thusa go itshokela makoa a gago. O tla go thusa fa o lwala. Fa o sa newe dikabelo tse o neng o di batla, o tla go thusa gore o lebe dilo sentle. O tla go thusa gore o tswelele o itumetse le fa batho ba o ba rerelang ba sa batle go reetsa molaetsa. Mo rapele mme o mmolelele gore o iku-tlwa jang. O tla go thusa gore o fenye go kgobega marapo. *w20.12* 27 ¶20-21

## Labotlhano, September 16

*Gakolola . . . basadi ba ba godileng jaaka bommaago, makgarebana jaaka bokgaisadio, mme o itshware sentle fa o dirisana le bone.*

—1 Tim. 5:1, 2.

Bokgaisadi bangwe ba na le tshono ya go kopana le bakaulengwe le bokgaisadi ba bone fela fa ba le kwa dipokanong. Ka jalo, fa re le kwa dipokanong re tshwanetse go ipha nako ya go tlotla le bone le go ba bolelela gore re a ba rata. Le rona re tshwanetse go fetsa nako le bokgaisadi fela jaaka Jesu a ne a dira. (Luke 10:38-42) Gongwe re ka ba laetsa gore ba tle go ja le rona, kgotsa re ka ya go iphokisa phefo le bone. Fa re na le bone, re tshwanetse go tlotla ka dilo tse di ba kgothatsang. (Bar. 1:11, 12) Bagolwane ba tshwanetse go etsa sekao sa ga Jesu. Jesu o ne a itse gore bokgaisadi bangwe ba ne ba tla lebana le dikgwetlho ka gonne ba sa nyalwa. Mme gone o ile a tlhalosa gore, lenyalo kgotsa go nna le bana ga se gone go dirang gore motho a itumele. (Luke 11:27, 28) Go na le moo, selo se se ka dirang gore re itumele ke go dira tiro ya ga Jehofa le go e tsaya e le botlhokwa thata. (Math. 19:12) Bago-lwane ba tshwanetse go dirisana le basadi ba Bakeresete jaaka bokgaisadiabone le bommaabone. Bagolwane ba tshwanetse go ipha nako ya go bua le bokgaisadi pele ga dipokano le morago ga tsone. *w20.09* 21-22 ¶7-9

## Matlhatso, September 17

*Molemirusi o nna a letetse thobo e e tlhathlwakgolo . . . Le lona nnang pelotelele.*—Jak. 5:7, 8.

Baiseraele ba ne ba lema morago ga pula ya nthla e e neng e na ka letlhabula ba bo ba roba morago ga pula ya bofelo e e neng e na ka dikgakologo. (Mar. 4:28) Le rona re tshwanetse go nna pelotelele fela jaaka mojadi. Mme gone, ka dinako tse dingwe ga go motlhofo. Gantsi fa motho a sena go dira sengwe, o batla go bona matswela a sone ka bonako. Mme gone, fa re batla gore dijalo di tlhoge, re tshwanetse go di tlhokomela. Fa re sena go jala peo

mo tshingwaneng, re tshwanetse go nna re nosetsa e bile re tlhagola. Ka tsela e e tshwanang, fa re batla go dira batho barutwa, re tlhoka go dira ka natla. Go tsaya nako go thusa batho ba re ithutang le bone gore ba tlogele go nna le tlhalele le gore ba rate ba bangwe. Fa re le pelotelele, ga re kitla re kgobega marapo fa batho ba sa re reetse. Mme le fa re kopana le batho ba ba batlang go ithuta le rona, re sa ntse re tlhoka go nna pelotelele ka gonne ga re ka ke ra pateletsa motho yo re ithutang le ene gore a nne le tumelo. Tota le barutwa ba ga Jesu le bone ka dinako dingwe ba ne ba tsaya nako go tlhaloganya dilo tse a neng a di ruta. (Joh. 14:9) Re tshwanetse go nna re gopotse gore tiro ya rona ke go rera le go ruta mme Jehofa ke ene a thusang batho gore ba nne le tumelo mo go ene.—1 Bakor. 3:6. *w20.09* 11 ¶10-11

## Sontaga, September 18

*Ke tla baka Jehofa ka pelo ya me yotlhe mo setlhopheng se se phuthengileng sa batho ba ba ikanyegang le mo phuthengong.*—Pes. 111:1.

Rotlhe re batla gore batho ba re ithutang Baebele le bone ba kolobediwe. Tselangwe e re ka ba thusang ka yone, ke go ba kgothaletsa gore ba tle dipokanong. Gantsi fa motho yo o ithutang Baebele a simolola go tla dipokanong, o dira diphetogo ka bonako. Bakaulengwe le bokgaisadi bangwe ba tlhalosetsa batho ba ba ithutang le bone gore go na le dilo di le dintsi tse ba ka di ithutang kwa dipokanong, tse go sa buiweng ka tsone mo buikeng e ba e ithutang. Bala Bahebera 10:24, 25 le motho yo o ithutang le ene, mme o mo tlhalosetse gore go ya dipokanong go tla mo thusa jang. Mo tlotlele sengwe se se kgalhang se o se ithutileng kwa dipokanong. Fa a lemoga gore o rata dipokano, gongwe le ene a ka nna a batla go ya. Se a tla se utliwang le se a tla se bonang, se tla bo se farologane thata le se a tlholang a se bona kwa dikerekeng. (1 Bakor. 14:24, 25) Fa a le kwa dipokanong, o tla kopana le bakaulengwe le bokgaisadi ba ba tla mo thusang go dira diphetogo. *w20.10* 10-11 ¶14-15

## Mantaga, September 19

*Ke motlhatlheledi ofe yo o tshwanang le [Modimo]?—Jobe 36:22.*

Moya o o boitshepo o tla go thusa gore o kgone go dirisa dilo tse o di ithutang mo Baebeleng. Kopa Jehofa gore a go thuse fela jaaka mopesalema mongwe a ile a dira. O ne a re: “Nthute tlhe Jehofa, kaga tsela ya gago. Ke tla tsamaya mo boammaaruring jwa gago. Kitlanya pelo ya me gore e boife leina la gago.” (Pes. 86:11) Tswelela o ithuta Baebele le dikgatiso tsa motlhanka yo o boikanyego le yo o botlhale. Gone boikaelelo jwa gago ga e a tshwanela go nna fela gore o batla go nna le kitso e ntsi. Gape o tshwanetse go tlhatswega pelo gore se o se ithutang ke boammaaruri o bo o se dirisa mo botshelong jwa gago. Moya wa ga Jehofa o tla go thusa. Gape o tshwanetse go kgothatsa bakaulengwe le bokgaisadi ba gago. (Baheb. 10:24, 25) Ka ntlha yang? Ka gonne lotlhe fela lo karolo ya lelapa la ga Jehofa. Kopa Jehofa gore a go thuse go araba ka tsela e e tla kgothatsang ba bangwe kwa dipokanong le gore o tseye matsapa fa o neilwe kabelo. Fa o dira jalo, o tla bo o bontsha Jehofa le Morwa-we gore o rata “dinku” tsa bone. (Joh. 21:15-17) Ka jalo, bontsha gore o rata Jehofa ka go ithuta le go dirisa dilo tso-tlhe tse a re rutang tsona. *w20.10* 24-25 ¶15-17

## Labobedi, September 20

*Barutwa botlhe ba ne ba mo tlogela ba tshaba.—Mar. 14:50.*

Jesu o ile a dirisana jang le baaposetoloi ba gagwe fa ba ne ba kgobegile marapo? Fa Jesu a sena go tsoisiwa o ile a raya bangwe ba balatedi ba gagwe a re: “Se boifeng! Tsamayang, begelang bomorwarre, gore [ke tsositswe].” (Math. 28:10a) Jesu ga a ka a tlhoboga baaposetoloi ba gagwe. Le fa ba ile ba mo tlogela, o ne a sa ntse a ba bi-

tse ‘bomorwarraagwe.’ Jesu o ne a le kutlwelobotlhoko e bile a itshwarela ba bangwe fela jaaka Jehofa. (2 Dikg. 13:23) Le rona re amega ka bakaulengwe le bokgaisadi ba ba tlogetseng go rera dikgang tse di molemo. E sa ntse e le bakaulengwe le bokgaisadi ba rona, e bile re a ba rata. Re sa ntse re gopola tsela ba neng ba dira ka natla ka yone mo tirelong ya ga Jehofa. Bangwe ba bone ba feditse dingwaga di le dintsi ba direla Jehofa. (Baheb. 6:10) Ruri re a ba gopola! (Luke 15:4-7) Re tshwanetse go kgothatsa batho ba ba tsidifetseng gore ba tle dipokanong. Mme fa motho yo o tsidifetseng a tla dipokanong, re tshwanetse go ya kwa go ene re bo re mo amogela. *w20.11* 6 ¶14-17

## Laboraro, September 21

*Lo se ka lwa ya ka kwa ga dilo tse di kwadilweng.—1 Bakor. 4:6.*

Jakobe, Johane le mmaabone ba ne ba kopa Jesu sengwe se a neng a se na tshwanelo ya go ba naya sone. Jesu o ne a ba bolelela gore Rraagwe ke ene yo o nang le tshwanelo ya go tlhopho gore ke mang yo o tla nnang mo letlhakoreng la gagwe la moja le la molema mo Bogosing jwa gagwe. (Math. 20:20-23) Jesu o ne a itse gore go na le mo a felelang teng. O ne a le boikokobetso, e bile ga a ise a dire sepe se Jehofa a neng a sa mo laela gore a se dire. (Joh. 12:49) Re ka etsa Jesu jang? Re ka etsa Jesu ka go dirisa kgakololo ya Baebele e re e nwang mo temanang ya letsatsi ya gompieno. Ka jalo, fa motho a re kopa kgakololo, ga re a tshwanela go bua fela re sa akanya kgotsa go mo pateletsa go dirisa dikgakololo tsa rona. Go na le moo, re tshwanetse ra ba naya kgakololo e e tswang mo Baebeleng kgotsa e e tswang mo dikgatisong. Fa re dira jalo, re a bo re bontsha gore re itse gore re felela kae. Re a bo re bontsha gore re boikokobetso le gore re dumela gore ka metlha, dikgakololo tsa ga Jehofa di botoka go na le tsa rona.—Tshen. 15:3, 4. *w20.08* 11-12 ¶14-15



## Labone, September 22

*O se ka wa siama ka tsela e e feteletseng, kgotsa wa itshupa o le bo-tlhale ka tsela e e feteletseng. Ke ka ntlha yang fa o tshwanetse go itli-setsa tshenyego?—Mor. 7:16.*

Ke dilo dife tse o tshwanetseng go akanya ka tsone fa o akanya gore o tlhoka go naya mongwe kgakololo? Pele o bua le ene ipotse gore, 'A ke feteletsang dilo?' Motho yo o feteletsang dilo kgotsa yo o iponang a siame thata, o athlola ba bangwe go ya ka tsela e ene a lebang dilo ka yone mme e seng ka tsela e Jehofa a di lebang ka yone. E bile motho yo o ntseng jalo, ga a kutlwelobotlhoko. Fa o sena go akanya ka dintlha tseno, mme o lemoga gore o sa ntse o tlhoka go bua le tsala ya gago, mmolelele gore bothata ke eng mme o mmotse dipotso tse di tla mo thusang go lemoga phoso e a e dirileng. Tlhomamisa gore se o batlang go se bolelela motho yoo se tswa mo Baebeleng, mme o gopole gore rotlhe re ikarabelela mo Modimong. (Bar. 14:10) Dirisa Baebele fa o naya motho yo mongwe kgakololo mme o etse sekao sa ga Jesu sa go nna kutlwelobotlhoko. (Dia. 3:5; Math. 12:20) Goreng re tshwanetse go dira jalo? Ka gonne Jehofa o tlile go dirisana le rona ka tsela e re dirisanang le batho ba bangwe ka yone.—Jak. 2:13. *w20.11 21 ¶13*

## Labotlhano, September 23

*Tlogelang go athlola go ya ka se lo se bonang, mme atlholang ka tsela e e siameng.—Joh. 7:24.*

A o ne o ka itumela fa batho ba ne ba ka go athlola ka tsela e o lebegang ka yone kgotsa ka lotso lwa gago? Nnyaa. Ruri go a itumedisa go itse gore Jehofa ga a re athlola go ya ka tsela e re lebegang ka yone. Ka sekai, fa Samuele a ne a bona bomorwa Jese, ga a ka a bona se Jehofa a neng a se bona. Jehofa o ne a boleletse Samuele gore mongwe wa bomorwa Jese o tla nna kgosi ya Iseraele. Mme e ne e le ofe wa bone yo o neng a tla nna kgosi? Fa Samuele a ne a bona mo-

rwa Jese yo mogolo e bong Eliabe o ne a re: "Ruri yono ke motlodiwa wa ga Jehofa." Eliabe o ne a bopegile sentle, ka jalo, Samuele o ne a akanya gore ke e ene a tla nna ng kgosi. "Mme Jehofa a raya Samuele a re: 'O se ka wa leba ponalo ya gagwe le bolelele jwa gagwe, gonne ke mo ganne.'" Seno se re ruta eng? Jehofa o ne a re: "Motho fela o bona se se bonalang mo matlhong; mme Jehofa ene, o bona se pelo e leng sone." (1 Sam. 16:1, 6, 7) Le rona re tshwanetse go etsa Jehofa fa re dirisana le bakaulengwe le bo-kgaitsadi. *w20.04 14 ¶1; 15 ¶3*

## Matlhatso, September 24

*Tsholetsang matlho a lona mme lo bone gore masimo a masweu go ka robiwa.—Joh. 4:35.*

Fa Jesu a ne a ya kwa Galalea, o ne a feta mo masimong. Gongwe masimo ao e ne e le a mabele a a sa tswang go tlhoga. (Joh. 4:3-6) Go ne go setse dikgwedi di ka nna nnê gore mabele ao a siamele go ka rojwa. Mme Jesu o ile a bua sengwe se se gakgamatsang. O ne a re: "Tsholetsang matlho a lona mme lo lebe masimo, gore a masweu go ka rojwa." (Joh. 4:35, 36) O ne a raya jang? Go bonala Jesu a ne a sa bue ka go phuthiwa ga mabele, go na le moo, o ne a bua ka go phuthiwa ga batho. Akanya ka se se neng se sa tswa go direga. Le fa gone Bajuda ba ne ba sa nosane metsi le Basamarea, Jesu o ne a sa tswa go rerela mosadi wa Mosamarea mme o ile a mo reetsa. Mosadi yoo o ile a ya go bolelela batho ba motse wa gagabo dilo tse a neng a di utlwile mo go Jesu. Ka jalo, fa Jesu a ne a bua ka masimo a "masweu go ka rojwa," Basamarea ba mosadi yoo a neng a ba boleletse ka Jesu ba ne ba le mo tseleng ba ya kwa go ene gore ba tle go ithuta mo go oketsegileng. (Joh. 4:9, 39-42) Moithuti mongwe wa Baebela o bua jaana ka pego eno: "E re ka Basamarea ba ile ba itlhaganela jaana go ya kwa go Jesu, seno se bontsha gore ba ne ba tshwana le masimo a a siametseng go ka rojwa." *w20.04 8 ¶1-2*

## Sontaga, September 25

*A re akanyetsaneng gore re tle re tlhotlheletsane go nna le lorato le go dira ditiro tse di molemo.*

—Baheb. 10:24.

Dipokano tsa rona di re thusa go toka-fatsa tsela e re rerang le e re rutang ka yone. Ka sekai, re rutiwa gore re ka dirisa jang Lebokoso la go Ruta. Ka jalo, pele o ya dipokanong, baakanyetsa sentle. Fa o le kwa go tsone, reetsa ka kelotlhoko. Morago ga dipokano, dirisa se o ithutileng sone. Fa o dira jalo, o tla nna “lesole le le molemo la ga Keresete.” (2 Tim. 2:3) Baengele le bone ba a re thusa. Mme baengele bano ba bantsi e bile ba maatla. Akanya fela gore moengele a le mongwe a ka kgonna go dira eng! (Isa. 37:36) Jaanong, akanya fela gore baengele ba le bantsi ba ka kgonna go dira eng. Ga go na motho ope kgotsa ledimona lepe le le ka kgonang go fenyha baengele ba Modimo. Jehofa o na le maatla a magolo. Ka jalo fa a re thusa, re tla kgona go fenyha baba ba rona go sa kga-thalesenge gore ba bantsi go le kana kang. (Baatlh. 6:16) Re ka tlhomamisega gore re ka kgonna go fenyha! Fa batho ba o berekang le bone, ba o tsenang sekolo le bone kgotsa ba masika ba ba sa dumeleng mo go Jehofa ba go bolelela sengwe kgotsa ba go dira sengwe se se go utlwisang botlholko, akanya ka thuso e Jehofa le baengele ba go nayang yone. Gopola gore ga o nosi, Jehofa ke ene a go kaelang. *w21.03* 29 ¶13-14

## Mantaga, September 26

*Fa e le gore baswi ga ba kitla ba tsosiwa, “a re jeng re nweng, ka gonne kamoso re tle go swa.”*

—1 Bakor. 15:32.

Gongwe moaposetoloi Paulo o ne a nopa mafoko a a mo go Isaia 22:13, a a neng a tlhalosa tsela e Baiseraele ba neng ba itshwara ka yone. Go na le gore ba nontshe kamano ya bone le Jehofa, ba ne ba nnela go ijesa monate. Tota Baiseraele ba ne ba tsaya gore ba tshwanetse go itumelela botshelo kafa ba batlang ka gone

ka gonne nako nngwe le nngwe ba ne ba ka nna ba swa. Mme eo ke tsela e batho ba lebang dilo ka yone gompiano. Re a itse gore Jehofa o tlele go tsosa baswi. Ka jalo, kgang eo e tshwanetse go tlhotlheletsa tsela e re tlhophang ditsala ka yone. Bakesetse ba kwa Korintha ba ne ba tshwanetse go tla go itsalanya le batho ba ba neng ba sa dumele mo tsogong ya baswi. Fa re nna ditsala le batho ba ba se nang sepe le gore go tlele go diragala eng mo nakong e e tlang mme ba batla fela go tshela menate, le rona re ka feleletsa re tshwana le bone. Fa Mokeresete a fetsa nako e ntsi le batho ba ba ntseng jalo, a ka feleletsa a se na mekgwa e siameng. Tota e bile, batho bao ba ka mo tlhotlheletsa gore a dire dilo tse Modimo a di tlhoileng. Ke lone lebaka la go bo Paulo a ile a re: “Tlhapogelwang ka tsela e e siameng mme lo se ka lwa dira boleo.”—1 Bakor. 15:33, 34. *w20.12* 9 ¶3, 5-6

## Labobedi, September 27

*Tlhogo ya monna mongwe le mongwe ke Keresete; mosadi ene tlhogo ya gagwe ke monna; mme Keresete ene tlhogo ya gagwe ke Modimo.—1 Bakor. 11:3.*

Temana eno e tlhalosa tsela e Jehofa a rulagantseng lelapa la gagwe la kwa legodimong le la mo lefatsheng ka yone. Go nna tlhogo go akaretsa go nna le taolo le go nna le maikarabelo. Jehofa ke “tlhogo” kgotsa o na le taolo yotlhe. Ka jalo, o neile ba bangwe taolo mme botlhe ba ikarabelela mo go ene mo tseleng e ba dirisang taolo eo ka yone. (Bar. 14:10; Baef. 3:14, 15) Jehofa o tlhomile Jesu go nna tlhogo ya phuthego kgotsa go nna le taolo mo bathong. Mme Jesu o ikarabelela mo go Jehofa ka tsela e a tshwarang phuthego ka yone. (1 Bakor. 15:27) Gape Jehofa o neile banna taolo mo malapeng a bone. Ke eng se se ka thusang monna gore e nne tlhogo ya lelapa e e molemo? Fa monna a batla go nna tlhogo ya lelapa e e molemo, o tshwanetse go tlhaloganya gore ke eng se Jehofa a lebeletseng gore a se dire. Gape o tshwanetse go tlhaloganya gore ke eng fa Jehofa a neile ba bangwe taolo

le gore a ka etsa jang sekao sa ga Jehofa le Jesu. Goreng go le botlhokwa gore banna ba itse dilo tseno? Ka gonne Jehofa o neile ditlhogo tsa malapa taolo e e rileng e bile o lebeletse gore ba e dirise sentle. —Luke 12:48b. *w21.02 2 ¶1-3*

## Laboraro, September 28

*Nna Jehofa, ke Modimo wa gago, Ene yo o go rutang gore o tshela ka tsela e e tla go tswelang mosola.*—Isa. 48:17.

Re ka etsa Jehofa ka go tlhophya go lebala dilo dingwe. Ka sekai, go farologana le rona batho, Jehofa ga a lebale. Mme fa re ikwatlhaya, o tlhophya go re itshwarela a bo a lebala diposo tsa rona. (Pes. 25:7; 130:3, 4) Mme o batla gore re mo etse ka go itshwarela batho ba re utlwisitseng botlhoko e bile ba ikwatlhela se ba se dirileng. (Math. 6:14; Luke 17:3, 4) Re ka dirisa mpho e Modimo a re neileng yone, e leng boboko jwa rona go mo galaletsa. Batho bangwe ga ba dirise mpho eno sentle. Ba e dirisa go ipeela melao ya se se siameng le se se sa siamang. (Bar. 12:1, 2) E re ka Jehofa e le ene a re bopileng, re ka solofela gore melao ya gagwe ya se se siameng le se se sa siamang e botoka thata go gaisa e rona re ka e ipeelang. (Isa. 48:18) Fa re tshela ka melao ya Gagwe re itumelela botshelo, re lemoga gore ke eng se a batlang re se dira, go tswa foo re bo re dira se se mo itumedisang.—Dia. 27:11. *w20.05 23-24 ¶13-14*

## Labone, September 29

*Ratanang thata jaaka bana ba motho ba ratana.*—Bar. 12:10.

Re ka leka jang go bontsha bakaulengwe le bokgaisadi gore re ba rata ka pelo yotlhe? Fa re ipha nako ya go itse bakaulengwe le bokgaisadi botoka, re tla kgona go ba tlhaloganya sentle le go ba rata le go feta. Re ka kgona go tsalana le bone le fa ba godile, ba le bannye kgotsa ba tswa mo ditsong tse di farologaneng. Gopola gore Jonathane o ne a feta Dafide ka dingwaga di ka nna 30

mme ene le Dafide, ba ne ba kgona go nna ditsala. A go na le mongwe mo phuthegong ya lona, yo mogolo mo go wena kgotsa yo monnye, yo o ka kgonang go tsalana le ene? Fa o dira jalo, o tla bo o bontsha gore o 'rata bakaulengwe botlhe.' (1 Pet. 2:17) A go rata ba bangwe go kaya gore o tla tsalana le batho botlhe mo phuthegong? Nnyaa, seo ga se kgonege. Re ka atamalana thata le batho ba bangwe ka gonne re rata dilo tse di tshwanang mme re bo re sa kgone go atamalana le ba bangwe jalo. Jesu o ile a re baaposetoloi botlhe ke "ditsala" tsa gagwe mme gone, o ne a atamalane thata le Johane. (Joh. 13:23; 15:15; 20:2) Le fa go ntse jalo, Jesu ga a ka a dira gore baaposetoloi ba bangwe ba akanye gore o rata Johane go ba gaisa.—Mar. 10:35-40. *w21.01 23 ¶12-13*

## Labotlhano, September 30

*Lo bonala lo boifa medimo thata go farologana le batho ba bangwe.*  
—Dit. 17:22.

Paulo o ne a sa rerele Baditšhaba ba kwa Athena ka tsela e a neng a rerela Bajuda ba kwa sinagogeng ka yone. O ile a ela tlhoko tikologo ya bone le dilo tsa bodumedi tse ba neng ba di dira. (Dit. 17:23) Go tswa foo, o ne a leka go bona gore ke dilo dife tse di mo Dikwalong tse ba di dumelang Paulo o ne a iketleleditse go fetola tsela e a rerang ka yone. O ne a bolelela batho ba kwa Athena gore molaetsa o a o rerang o tswa kwa 'Modimong O o Sa Itsiweng' o ba neng ba leka go o obamela. Le fa gone batho bao ba ne ba sa itse Dikwalo, Paulo ga a ka a ba tlhoboga. Go na le moo, o ne a tsaya gore ba tshwana le masimo a a siametseng go ka rojwa. Ka jalo, o ne a fetola tsela e a rerang dikgang tse di molemo ka yone. Fela jaaka Paulo, nna ketlotlhoko. Fa o etetse motho, leka go bona dilo dingwe tse di ka go bontshang gore o dumela eng. O kgabisitse ntló kgotsa koloi ya gagwe ka eng? A leina la gagwe, tsele a a apereng kgotsa e a buang ka yone di kgona go bontsha gore o tsena kereke efe? *w20.04 9-10 ¶7-8*

## Matlhatso, October 1

*“Ke mang yo o itseng tsela e Jehofa a akanyang ka yone, gore a tle a mo rute?” Mme rona re akanya jaaka Keresete.—1 Bakor. 2:16.*

Fa re ntse re ithuta ka Jesu, re tla kgona go etsa tsela e a akanyang ka yone le e a dirang dilo ka yone. Fa re akanya jaaka Jesu, re tla atamalana thata le ene. Re ka mo etsa jang? Akanya ka seno: Jesu o ne a sa ikakanyetse a le nosi fela. O ne a nna a akanyetsa dilo tse ba bangwe ba di tlhokang. (Math. 20:28; Bar. 15:1-3) Ka jalo, o ne a thusa batho e bile a ba itshwarela. O ne a sa letle dilo tse batho ba di buang ka ene di mo kgopisa. (Joh. 1:46, 47) Mo godimo ga moo, o ne a sa tseye gore fa motho a dirile phoso mo nakong e e fetileng, seo se raya gore motho yoo ga a siamang. (1 Tim. 1:12-14) O ne a re: “Botlhe ba tla itse gore lo barutwa ba me ka seno, fa lo ratana.” (Joh. 13:35) Ipotse jaana: “A ke etsa Jesu ka go dira sotlhe se nka se kgonang gore ke dirisane le ba bangwe ka kagiso?” *w20.04 24 ¶11*

## Sontaga, October 2

*Ba tla baka leina la me.—Isa. 29:23.*

Le fa gompieno batho ba le bantsi ba gogagoga leina la Modimo mo seretseng e bile ba le tlhapatsha, re sa ntse re ka kgona go le galaletsa ka gonne re itse gore Jehofa o boitshepo, o siame, o molemole e bile o a re rata. O ka bontsha gore o batla e nne ene a go busang. Re na le tshono ya go bontsha gore Bogosi Jwa Modimo ke jone fela jo bo ka tlisang kagiso le boitumelo mo bathong botlhe. (Pes. 37:9, 37; 146:5, 6, 10) Fa re ruta batho ba bangwe boammaaruri jwa Baebele, gantsi re ba ruta gore Jehofa Modimo ke ene Molaodimogolo wa lobo-po lotlhe le gore o na le tshwanelo ya go busa batho. Le fa re leka ka natla go tshela ka melaometho ya Modimo, sa

botlhokwa le go feta ke gore re rute batho go rata Jehofa le go ikanyega mo go ene. Fa re ruta batho ka Jehofa, re tshwanetse go ba ruta ka dinonfo tsa gagwe, gore ke Motho yo o ntseng jang le gore leina la gagwe le kaya eng. (Isa. 63:7) Fa re dira jalo, re tla ba thusa gore ba rate Jehofa le gore ba mo obamele ka gonne ba batla go ikanyega mo go ene. *w20.06 6 ¶16; 7 ¶19*

## Mantaga, October 3

*Ke mang yo o diretseng motho mologo . . . ? A ga se nna, Jehofa? —Ekes. 4:11.*

Boboko jwa rona bo dirilwe ka tsela e e gagamatsang. Fa o ne o sa ntse o le mo popelong, boboko jwa gago bo ne jwa bopega ka tsela e Jehofa a neng a ikaletse ka yone. Motsotso le motsotso go ne go nna le disele tse disha di le diketekete tse di neng di bopega mo bobokong jwa gago. Babatlisisi ba fopholetsa gore boboko jwa motho yo o godileng, bo na le disele di ka nna dibilione di le 100 tse di bidiwang *di-neuron*. Boboko jwa rona bo ka nna dikilogerama di le 1,5. Sengwe sa dilo tse di gagamatsang tse boboko jwa rona bo kgonang go di dira ke go re thusa go bua. Fa o bua, boboko bo dira gore mesifa ya gago e ka nna 100, e e molemole, mo kgokgotsong, mo dipounameng, mo ditlhaeng le mo sehubeng e dire mmogo. Gore o kgone go bua mafoko a a utlwalang, mesifa ya gago e tshwanetse go dirisana sentle. Pego nngwe e e gatisitsweng ka 2019, ya re bana ba ba sa tswang go tsholwa ba kgona go gopola mafoko mangwe. Patlisiso eno e bontsha gore kgang e babatlisisi ba le bantsi ba e dumelang ya gore re tsholwa re na le bokgoni jwa go ithuta dipuo tse di farologaneng, e boammaaruri. Ruri bokgoni jwa go bua ke mpho e e tswang kwa go Jehofa. *w20.05 22-23 ¶8-9*

## Labobedi, October 4

*O ne a letetse motse o o nang le metheo ya mmatota, o Modimo a o tlhamileng a bo a o aga.*

—Baheb. 11:10.

Aborahame o ne a tlogela botshelo jwa gagwe jwa manobonobo jo a neng a bo tshela kwa Ure, a sa patelediwe ke ope. Goreng a ile a dira jalo? Ka gonne o ne a letetse “motse o o nang le metheo ya mmatota.” (Baheb. 11:8-10, 16) Motse o Aborahame a neng a o letetse ke Bogosi Jwa Modimo. Kgosi ya Bogosi joo ke Jesu Keresete, mme o tla busa le Bakeresete ba ba tloditsweng ba ba 144 000. Paulo o bitsa motse oo a re ke “motse wa Modimo yo o tshelang, e leng Jerusalema wa selegodimo.” (Baheb. 12:22; Tshen. 5:8-10; 14:1) Jesu o ne a ruta balatedi ba gagwe gore ba rapelele gore Bogosi joo bo tle, gore thato ya Modimo e diragale mo lefatsheng jaaka e direga kwa legodimong. (Math. 6:10) A Aborahame o ne a itse gore Bogosi Jwa Modimo bo ne bo tla rulaganngwa jang? Nnyaa. Go fetile dingwaga di le dintsi tshedimosetso eo e le “sephiri se se boitshupo.” (Baef. 1:8-10; Bakol. 1:26, 27) Mme Aborahame o ne a itse gore bangwe ba ditlogolwana tsa gagwe ba ne ba tile go nna dikgosi ka gonne Jehofa o ne a mo solofeditse gore seo se ne se tla direga.—Gen. 17:1, 2, 6. w20.08 2-3 ¶2-4

## Laboraro, October 5

*Tswelelang lo . . . ikobela [Morena]. . . . Tumelo ya lona . . . e tshwanetse go lo nonotsha le go lo tiisa jaaka setlhare se medi ya sone e nweleletseng kwa teng.*

—Bakol. 2:6, 7.

Re tshwanetse go gana dithuto tsa bathanogi. Go simolola fela ka phuthego ya ntlha ya Bokeresete, Diabolo o ntse a leka go dira gore batho ba Modimo ba belaele se ba se dumelang. Ka jalo, re tshwanetse go ithuta go farologanya se se boammaaruri le se se seng boammaaruri. Baba ba rona ba ka nna ba dirisa Internet go dira gore re se ka ra tshepa Jehofa le bakaule-

ngwe le bokgaisadi. O se ka wa dumela maaka ao, ka gonne a tswa kwa go Satane! (1 Joh. 4:1, 6; Tshen. 12:9) Gore re kgone go gana fa Satane a leka go koafatsa tumelo ya rona, re tshwanetse go nonotsha tumelo ya rona mo go Jesu le go dumela gore Jehofa o dirisa ene go diragatsa thato ya Gagwe. Gape re tshwanetse go tshepa batho ba Jehofa a ba dirisang go kaela phuthego ya gagwe gompiono. (Math. 24:45-47) Re nonotsha tumelo ya rona mo go Jehofa fa re ithuta Lefoko la Gagwe ka metlha. Mme tumelo ya rona e tla nna jaaka setlhare se se namileng medi. Moaposetoloi Paulo o ile a bua sengwe se se tshwanang fa a ne a kwala mafoko a a mo temanang ya letsatsi ya gompiono. w20.07 23-24 ¶11-12

## Labone, October 6

*Motho o bona se se bonwang ke matlho fela, mme Jehofa ene o bona se se mo pelong.—1 Sam. 16:7.*

E re ka re na le boleo, gantsi re athlola batho go ya ka se re se bonang. (Joh. 7:24) Mme gone, go na le dilo tse dintsi tse re ka se kgoneng go di itse ka motho fa re mo lebile fela. Ka sekai, le fa ngaka e ka nna bo tlhale kgotsa ya nna le maitemogelwang, ga e ka ke ya itse gore motho o tshwerwe ke eng ka go mo lebelela fela. Gore a kgone go lemoga gore motho o tshwerwe ke eng, o tshwanetse go mo reetsa ka kelo tlhoko fa a mo tlhalosetsa gore o ikutlwa jang le gore o kile a tshwarwa ke malwetse afe. Gongwe e bile a ka nna a mo tsaya X-ray go bona gore o tshwerwe ke bolwetse bofe gore a kgone go mo naya melemo le dipilisi tse di tla mo thusang. Ka tsela e e tshwanang, ga re ka ke ra kgona go itse gore bakaulengwe le bokgaisadi ba rona ke batho ba ba ntseng jang ka go ba lebelela fela. Re tshwanetse go ipha nako go ba itse gore re kgone go tlhaloganya gore ke batho ba ba ntseng jang. Ga re kgone go bona se se mo pelong ya motho, mme gone, re ka leka go etsa Jehofa. O reetsa bathanka ba gagwe. O akanyetsa maemo a bone le dilo tse di ba diragaletseng mo botshelong. Gape o ba bontsha kutlwelobotlhoko. w20.04 14-15 ¶1-3

## Labotlhamo, October 7

*A mongwe le mongwe a akanye sentle mme a itebe ka tsela e e tshwanetseng.*—Bar. 12:3.

Re tshwanetse go nna le boikokobetso ka gonne batho ba ba boikogomoso ga ba na “mogopolo o o itekanetseng.” Batho ba ba boikogomoso ba manganga e bile ba ikakanyetsa ba le nosi. Gantsi se ba se akanyang le se ba se dirang se utlwiswa ba bangwe botlhoko e bile le bone ba feleletsa ba ikutlwiswa botlhoko. Fa ba sa fetole tsela e ba akanyang ka yone, Satane o tla ba tsietsa. (2 Bakor. 4:4; 11:3) Motho yo o ikokobeditseng o kgona go akanya sentle. Ga a itseye a le botlhokwa thata e bile ga a inyatse. Mme o tsaya ba bangwe ba le botlhokwa go mo gaisa. (Bafil. 2:3) Gape o a itse gore “Modimo o ganetsa ba ba mabela, mme o naya ba ba boikokobetso bopelonomi jo bo sa re tshwanelang.” (1 Pet. 5:5) Batho ba ba nang le mogopolo o o itekanetseng, ga ba batle gore Jehofa a nne kgatlhanong le bone. Gore re tswelere le le boikokobetso, re tshwanetse go dirisa kgakololo ya Baebele ya gore re ‘apole botho jwa bogologolo le ditlwaello tsa jone mme re apare botho jo bosha.’ Re tshwanetse go ithuta mo sekaong sa ga Jesu le go leka go mo etsa.—Bakol. 3:9, 10; 1 Pet. 2:21. *w20.07 7 ¶16-17*

## Matlhatso, October 8

*Mmele o mongwe fela mme o na le dikarolo di le dintsi.*  
—1 Bakor. 12:12.

Ruri ke tshiamelo go nna mo phuthengong ya ga Jehofa! Go na le kagiso le boitumelo mo phuthengong ka gonne re direla Jehofa mmogo. O na le seabe sefe mo phuthengong? Moaposetoloi Paulo o ne a tshwantsha phuthengo le mmele wa motho. Gape o ne a tshwantsha mongwe le mongwe mo phuthengong le dikarolo tsa mmele. (Bar. 12:4-8; 1 Bakor. 12:12-27; Baef. 4:16) Se re ithutang sone mo tshwantshong sa ga Paulo, ke gore mongwe le mongwe wa rona o botlhokwa

mo phuthengong ya ga Jehofa. Paulo o simolola setshwantsho sa gagwe ka gore: “Fela jaaka re na le ditokololo di le dintsi mo mmeleng o le mongwe, mme e se ditokololo tsoatlhe tse di dirang tiro e le nngwe fela, jalo rona, le mororo re le bantsi, re mmele o le mongwe o o seoposengwe le Keresete, mme re ditokololo tse nngwe le nngwe ya tsone e leng ya e nngwe.” (Bar. 12:4, 5) Tota Paulo o ne a raya jang? O ne a raya gore mongwe le mongwe wa rona o na le seabe sa botlhokwa mo phuthengong ya ga Jehofa. *w20.08 20 ¶1-2; 21 ¶4*

## Sontaga, October 9

*Jehofa o ne a mmotsa a re, “O tla dira seo jang?”*—1 Dikg. 22:21.

Batsadi, lo ka etsa jang sekae sa ga Jehofa sa go nna boikokobetso? Fa go kgonega, botsa bana ba gago gore ba akanya gore tiro nngwe e ka dirwa jang. Fa dikakantsho tsa bone di siame, di dirise. Gape Jehofa o bontsha gore o boikokobetso ka go nna pelotelele. Ka sekai, Jehofa o pelotelele le fa batlhanka bangwe ba gagwe ba mmotsa dipotso ka ditshwetso tse a di dirileng. Jehofa o ne a reetsa Aborahame fa a ne a mmolelela kafa a neng a tshwenyegile ka gone ka ntlha ya tshwetso e a neng a e dirile ya go senya Sodoma le Gomora. (Gen. 18:22-33) A o a gopola gore Jehofa o ne a dirisana jang le mosadi wa ga Aborahame e bong Sara? Ga a ka a kgopisega kgotsa a galefa fa Sara a ne a tshega molaetsa o a neng a o tlišitse wa gore o tla tshola ngwana le fa a tsofetse. (Gen. 18:10-14) Mme o ile a bontsha gore o tlotla Sara. Batsadi le bagolwane ba ka ithuta eng mo go Jehofa? O dira eng fa bana ba gago kgotsa bangwe mo phuthengong ba sa dumalane le tshwetso ya gago? A o nna manganga? Kgotsa o leka go tlhaloganya gore goreng ba sa dumalane le tshwetso ya gago? Go nna monate mo lelapeng le mo phuthengong fa ba ba eteletseng pele kgotsa ba ba nang le maikarabelo ba etsa Jehofa. *w20.08 10 ¶7-9*

## Mantaga, October 10

*Maatla a me a bonala le go feta fa o le bokoa.—2 Bakor. 12:9.*

Fa re ne re simolola go ithuta boammaaruri go ne go le motlhofo gore re amogele thuso ya ba bangwe ka gonne re ne re itse gore go na le dilo tse dintsi tse re sa di tlhloganyeng. (1 Bakor. 3:1, 2) Mme gone, a re sa ntse re ntse jalo? Fa e le gore re na le nako e telele re le mo phuthegong ya Modimo, go ka nna ga se ka ga nna motlhofo gore re amogele thuso, se-golobogolo fa re e newa ke motho yo e leng gone a ithutang boammaaruri. Le fa go ntse jalo, Jehofa o dirisa bakaulengwe le bokgaisadi go re thusa. (Bar. 1:11, 12) Ka jalo, re tshwanetse go lemoga gore Jehofa o re naya maatla a dirisa bone. Motho yo o atlegileng ke yo o boikokobetso e bile a ikanya Jehofa, e seng yo o nang le dithoto, yo o rutegileng, yo o tswang mo lotsong lo lo rileng kgotsa yo o nang le maatla. E kete rotlhe re ka tswela (1) re ikaega ka Jehofa, (2) re ithuta mo batlhankeng ba Modimo ba go buiwang ka bone mo Baebeleng, le (3) go amogela thuso ya bakaulengwe le bokgaisadi. Fa re dira jalo, Jehofa o tla re thusa le fa re ka iku-tlwa re le bokoa! *w20.07 14 ¶2; 19 ¶18-19*

## Labobedi, October 11

*[Dirang] ka natla. . . . Ga re batle gore lo nne ditshwakga, mme dirang se se neng sa dirwa ke ba ba neng ba amogela se se solofeditšweng ka gonne ba na le tumelo e bile ba le pelotelele.*  
—*Baheb. 6:11, 12.*

Go ka nna thata gore re nne pelotelele fa re rerela ba masika a rona ba e seng Basupi. Moreri 3:1, 7 e ka re thusa fa re le mo maemong ao. Ya re go na le “nako ya go dimala le nako ya go bua.” Boitshwaro jwa rona jo bo siameng bo ka neela ba masika a rona bosupi, le fa go ntse jalo re tshwanetse go nna re ipaakanyeditse go ba bolelela ka Jehofa. (1 Pet. 3:1, 2) Re tshwanetse go nna matlhatlhatlaga mo ti-

rong ya go rera, mme gone re tshwanetse go nna pelotelele le batho botlhe ba re ba rerelang, go akaretša ba masika a rona. Re ka ithuta go nna pelotelele mo batlhankeng ba ga Jehofa ba go buiwang ka bone mo Baebeleng le ba re tshelang le bone gompieno. Ka sekai, Habakuke o ne a batla gore dilo tse di bosula tse di neng di direga di fele, mme gone, o ne a bontsha gore o pelotelele fa a ne a re: “Ke tla nna ke eme mo lefelong la me la go lebelela.” (Hab. 2:1) Moapostoloi Paulo o ne a eletsa go wetsa bodiredi jwa gagwe le go amogela tuelo ya gagwe ya kwa legodimong, le fa go ntse jalo, o ne a tswela a “[naya] bosupi ka botlalo [ka] dikgang tse di molemo.”—Dit. 20:24. *w20.09 11-12 ¶12-14*

## Laboraro, October 12

*[Jesu] ga a ka a akanya go itseela maemo a a sa mo tshwanelang, e leng maemo a go lekana le Modimo.—Bafil. 2:6.*

Le fa go se na motho yo o fetang Jesu ka maatla, fa e se Jehofa fela, Jesu ga ise a itseye a le botlhokwa go feta ba bangwe. Jesu o ile a re batlhanka ba Modimo ba tla itsiwe ka go ratana. Ka jalo, fa re le boikokobetso, re tla kgona go rata ba bangwe. (Luke 9:48; Joh. 13:35) O tshwanetse go dira eng fa go na le mathata mo phuthegong mme o akanya gore bagolwane ga ba dire sepe ka one? Go na le gore o ngongorege, o ka bontsha gore o na le boikokobetso ka go ema ba ba eteletseng pele nokeng. (Baheb. 13:17) O ka thusiwa ke go ipotsa gore: ‘A mathata a ke a bonang mo phuthegong a magolo go le kalo mo e leng gore a tlhoka go baakangwa? A ke nako e e siameng ya gore a baakangwe? A ke nna ke tshwanetseng go a baakanya? A mme tota ke leka go dira gore go nne le kutlwano mo phuthegong kgotsa ke batla go tlhagelela?’ Jehofa o tsaya batho ba ba boikokobetso ba le botlhokwa go feta ba ba nang le bokgoni. Ka jalo, fa o direla Jehofa, leka ka bojotlhe gore o nne le boikokobetso. Fa o dira jalo, o tla dira gore go nne le kutlwano mo phuthegong.—Baef. 4:2, 3. *w20.07 4-5 ¶9-11*

## Labone, October 13

*Jesu o ne a ba raya a re: "Lo se ka lwa tshoga! Tsamayang lo ye go bolelela bomorwarre."*

—Math. 28:10.

Basadi bangwe ba ba ikanyegang ba ba ne ba dirisa dilo tsa bone go thusa Jesu. Mme Jesu o ne a lebogela thuso ya bone. (Luke 8:1-3) O ne a ba ruta dilo tse di bothokwa ka Modimo. Ka sekai, o ne a ba bolelela gore o tšile go swa a bo a tsosiwa. (Luke 24:5-8) Jesu o ile a thusa basadi bano go ipaakanyetsa diteko tse ba neng ba tla lebana le tsone, fela jaaka a ile a thusa baaposetoloi ba gagwe. (Mar. 9:30-32; 10:32-34) Le fa baaposetoloi bangwe ba ile ba tšhaba fa Jesu a ne a tšharwa, basadi bangwe ba ne ba na le ene fa a ne a le mo koteng ya tlhokofatso. (Math. 26:56; Mar. 15:40, 41) Batho ba ntlha go itse gore Jesu o ne a tsositswe, ke basadi. O ile a roma basadi bao gore ba ye go bolelela baaposetoloi gore o ne a tsositswe. (Math. 28:5, 9, 10) Mme gape, basadi ba ka tswa ba ne ba le teng ka Pentekosete ya 33 C.E. fa barutwa ba ga Jesu ba ne ba tloidiwa ka moya o o boitshepo, le bone ba ile ba newa bokgoni jwa go bua dipuo tse di farologaneng, ba bo ba bolelela ba bangwe "dilo tse dikgolo tsa Modimo."—Dit. 1:14; 2:2-4, 11. *w20.09 23 ¶11-12*

## Labotlhano, October 14

*Ikele tlhoko o bo o tlhokomele tsela e o rutang ka yone.—1 Tim. 4:16.*

Tiro ya go dira barutwa e bothokwa ka gonne e ka boloka matshelo a batho. Re itse jang? Fa Jesu a ne a ntsha taelo e e mo go Mathaio 28:19, 20, o ne a re: "Tsamayang . . . lo dire . . . , barutwa, lo ba kolobetse." Goreng go le bothokwa gore motho a kolobediwe? Re tshwane-tse go kolobediwa fa e le gore re batla go tšhelela ruri. Motho yo o batlang go kolobediwa o tshwanetse go dumela gore a ka kgona go tšhelela ruri fela ka go-

nne Jesu o ile a re swela a bo a tsosiwa. Ke gone ka moo moaposetoloi Peterere a ileng a bolelela Bakeresete a re: "[Kolobetso] jaanong [e] a lo boloka . . . ka tsogo ya ga Jesu Keresete." (1 Pet. 3: 21) Ka jalo, fa motho a kolobediwa, o nna le tshlofelo ya gore a ka tšhelela ruri. Gore re kgone go dira barutwa, re tshwanetse go nna ditswerere mo tirong ya go ruta. (2 Tim. 4:1, 2) Ka ntlha yang? Ka gonne Jesu o ile a re: "Tsamayang, . . . lo dire . . . , barutwa, lo ba kolobetse." Moaposetoloi Paulo o ile a re re nne re dire tiro eno 'gonne ka go dira seno re tla ipoloka re bo re boloka ba ba re reetsang.' *w20.10 14 ¶1-2*

## Matlhatso, October 15

*Go tloga jaanong go ya pele o tla bo o tshwara batho ba tshela.*

—Luke 5:10.

Morutwa wa ga Jesu e bong Peterere, o ne a dira tiro ya go rera dikgang tse di molemo, mme Jehofa o ne a mo thusa gore tiro eo le yone a e rate e bile a nne setswerere mo go yone. (Dit. 2:14, 41) Lebaka la bothokwa la go bo re rera dikgang tse di molemo, ke ka gonne re rata Jehofa. Fa re rata Jehofa re nna le bopelokgale jwa go rerela ba bangwe, le fa ka dinako tse dingwe re ka tswa re inyatsa. Fa Jesu a ne a laletsa Peterere gore e nne molatedi wa gagwe, o ne a mo raya a re: "Tlogela go boifa." (Luke 5:8-11) Peterere o ne a sa tshosiwe ke gore go ka direga eng fa a ka nna molatedi wa ga Jesu. Go na le moo, o ne a gaggamaditswe ke go bona ditlhapi tse dintsi tse Jesu a neng a ba thusitse gore ba di tshware, ka jalo o ne a tsaya gore ga a tshwanele go bereka le Jesu. Gongwe le wena o a tshoga fa o akanya ka dilo tse o tshwanetseng go di dira gore o nne morutwa wa ga Jesu. Fa go le jalo, leka ka ntlha gore o rate Jehofa, Jesu, le batho ba bangwe ka pelo yotlhe. Seno se tla go thusa gore o amogele taletso ya ga Jesu ya gore o nne morutwa wa gagwe.—Math. 22: 37, 39; Joh. 14:15. *w20.09 3 ¶4-5*



## Sontaga, October 16

*Ka jalo, yang . . . mme lo ba dire  
barutwa, . . . lo ba rute.*

—*Math. 28:19, 20.*

Re dirisa nako, maatla le madi a rona gore re kgone go fitlhelela ba ba nang le “tshakameloe e e siameng ya go bona botshelo jo bo sa khutleng.” (Dit. 13:48) Fa re dira jalo re a bo re latela sekao sa ga Jesu. O ne a re: “Dijo tsa me ke gore ke dire thato ya yo o nthomileng le go wetsa tiro ya gagwe.” (Joh. 4:34; 17:4) Ke se le rona re batlang go se dira. Re batla go wetsa tiro e Jesu a re neileng yone. (Joh. 20:21) Gape re batla gore batho botlhe, go akaretsa le batho ba ba tsidifetseng ba dire tiro eno ya go rera le rona. (Math. 24:13) Ga go motlhofo go dira se Jesu a re laetseng gore re se dire. Mme gone, ga re nosi mo tirong eno. Jesu o re solofeditse gore o tla nna le rona. Fa re dira tiro ya go dira barutwa re a bo re le “badirimmo le Modimo” e bile “re patilwe ke Keresete.” (1 Bakor. 3:9; 2 Bakor. 2:17) Ka jalo, re ka kgona go dira tiro eno. Ruri go dira tiro eno le go thusa ba bangwe go e dira ke tshiamelo e e seng kana ka sepe!—Bafil. 4:13. *w20.11 7 ¶19-20*

## Mantaga, October 17

*Jesu o ne a tswelela a nna botlhale  
le go feta, a gola e bile a amogelwa  
ke Modimo le batho.*—*Luke 2:52.*

Gantsi ditshwetso tse batsadi ba di dirang di ama bana ba bone. Fa batsadi ba sa dire ditshwetso tse di siameng, ba ka bakela bana ba bone mathata. Mme fa ba dira ditshwetso tse di siameng, ba ka thusa bana ba bone gore ba itumelele botshelo. Mme gone, bana le bone ba tshwanetse go itirela ditshwetso. Tshwetso e rotlhe re ka e dirang mo botshelong, ke go direla Jehofa. (Pes. 73:28) Josefa le Marea ba ne ba batla gore bana ba bone ba direle Jehofa. Di-

tshwetso tse ba nang ba di dira di ne di bontsha gore ga go na sepe se se botlhokwa thata mo go bone go feta go direla Jehofa. (Luke 2:40, 41, 52) Jesu le ene o ile a dira ditshwetso tse di siameng tse di nang di mo thusa gore a kgone go dira thato ya ga Jehofa. (Math. 4:1-10) Jesu o ile a nna motho yo o bonolo, yo o ikanyegang le yo o pelokgale. Batsadi botlhe ba ba ratang Jehofa ba ka itumelela go nna le ngwana yo o ntseng jalo. *w20.10 26 ¶1-2*

## Labobedi, October 18

*Matlho a gago a tshwanetse go  
leba kwa pele.*—*Diane 4:25.*

Akanya ka dikai tseno tse tharo. Kgaityadi yo o godileng o akanya ka dina-ko tse di monate tse a kileng a di itumelela fa a ne a le moshale. Le fa gone jaanong botshelo jwa gagwe bo le thata, o sa ntse a direla Jehofa sotlhe se ka se kgonang. (1 Bakor. 15:58) Letsatsi le letsatsi, o nna a ipona a le kwa paradaiseng, a na le ditsala le ba lelapa la gagwe. Kgaityadi yo mongwe o gopola gore mongwe mo phuthengong o kile a mo utlwisisa botlhoko thata. Mme gone, kgaityadi yono o ile a dira tshwetso ya gore a se ka a tlhola a akanya thata ka kgang eo. (Bakor. 3:13) Mokaulengwe o gopola diphošo tse a di dirileng mme o dira sotlhe se a se kgonang go tswelela a ikanyega mo go Jehofa. (Pes. 51:10) Mokaulengwe yono le bokgaityadi bano, ba tshwana ka eng? Botlhe ba gopola dilo tse di kileng tsa ba diragalela, mme gone ga ba nne ba akantse ka tsone. Go na le moo, ba nna ba akantse ka masego a Jehofa a tlileng go ba naya one. Goreng go le botlhokwa go dira jalo? Fa motho a tsamaya a lebile kwa morago, ga a kgone go tsamaya sentle. Go ntse fela jalo le fa re direla Jehofa. Ga re ka ke ra kgona go direla Jehofa ka pelo yotlhe fa re nna re akantse ka dilo tse re kileng ra di dira kgotsa tse di kileng tsa re diragalela.—*Luke 9:62. w20.11 24 ¶1-3*

## Laboraro, October 19

*O ne a mo leba ka lenyatso.*

—1 Sam. 17:42.

Goliathe o ne a tsaya Dafide a le bo-koa tota. Kana gone, Goliathe o ne a le moleele, a itse go lwa e bile a na le dibetsa tsa ntwā. Mme Dafide ene, e ne e le mosimanyana fela yo o se nang maitemogelo, a lebega a sa itse ntwā, e bile a se na dibetsa. Mme gone, o ne a ikaegile ka Jehofa. Mme Jehofa o ne a mo naya maatla a go fenyā Goliathe. (1 Sam. 17: 41-45, 50) Dafide o ne a le bana le kgwetlho e e neng e ka dira gore a ikutlwe a le bokoa e bile a se na maatla. O ne a berekela kgosi ya Iseraele e Jehofa a neng a e tlhomile e bong Saulo ka boikanyegi. Kwa tshimologong, Kgosi Saulo o ne a tlotla Dafide. Moragonyana Saulo o ne a simolola go ikgogomosa mme seo se ne sa dira gore a fufegele Dafide. O ne a tlhorontsha Dafide a bo a leka go mmolaya. (1 Sam. 18:6-9, 29; 19:9-11) Le fa Saulo a ne a sa tshware Dafide sentle, Dafide o ile a tswelela a mo tlotla ka gonne a itse gore o tlhomilwe ke Jehofa. (1 Sam. 24:6) O ne a ikanya Jehofa gore a mo thuse go itshokela teko eo e e thata.—Pes. 18:1, mafoko a fa godimo ga Pesalema. w20.07 17 ¶11-13

## Labone, October 20

*Mo motlheng wa bokhutlo kgosi ya borwa e tla kgorometsana le [kgosi ya bokone].—Dan. 11:40.*

Go na le boporofeti bongwe mo Baebeleng jo bo buang ka dikgosi tse pedi tse di wantshanang, e leng kgosi ya bokone le kgosi ya borwa. Dikarolo di le dintsi tsa boporofeti joo di setse di diragaditswe, ka jalo, re ka tlhatswega pelo gore dikarolo tse di setseng le tso- ne di tla diragadiwa. Gore re kgone go tlhaloganya boporofeti jo bo mo Daniele kgaolo 11, re tshwanetse go nna re gopotse dintlha tseno: Boporofeti joo bo bua fela ka babusi kgotsa dipuso tse di neng di busa mafatshe a batho ba Modi-

mo ba le bantsi ba neng ba nna kwa go one kgotsa tse di neng di tlhasela batho ba Modimo. Ka jalo, ke ka ntsha yang fa dipuso tseno di bogisa batho ba ga Jehofa le fa palo ya batho ba ga Jehofa e le nnye thata fa e bapisiwa le palo ya batho ba ba leng teng mo lefatsheng? Ke ka gonne Satane le batho ba gagwe ba ba bopula ba batla go fedisa batho botlhe ba ba direlang Jehofa le Jesu. (Gen. 3:15; Tshen. 11:7; 12:17) Mo godimo ga moo, boporofeti jo bo mo bukeng ya Daniele bo tshwanetse go dumalana le boporofeti jo bongwe jo bo mo Baebeleng. Tota e bile, re ka kgona go tlhaloganya boporofeti jwa ga Daniele sentle fa fela re bo bapisa le dipego tse dingwe tse di mo Baebeleng. w20.05 2 ¶1-2

## Labotlhano, October 21

*Baswi ba tla tsosiwa jang? Ba tla tsosiwa ba na le mmele o o ntseng jang?—1 Bakor. 15:35.*

Batho ba le bantsi ba na le dikgopolo tse di farologaneng ka gore go diragala eng ka motho fa a sena go swa. Mma re bone gore Baebele yone e rutang eng. Fa motho a swa, mmele wa gagwe o a bola. Mme e re ka Jehofa a bopile dilo tsoatlhe, a ka kgona go tsosa motho yoo a bo a mo naya mmele o o siameng. (Gen. 1:1; 2:7) Moaposetoloi Paulo o ile a dira setshwantsho se se bontshang gore Modimo ga a tlhoke go tsosa motho yo o suleng ka mmele wa gagwe wa kgale. Akanya ka “tlhaka” kgotsa “peo” ya semela. Fa peo e sena go jalwa, e a gola e bo e nna semela. Le fa semela se tswa mo peong, se farologane thata le peo. Moaposetoloi o ile a dirisa setshwantsho seo go re bontsha gore Mmopi wa rona a ka re naya mmele o moshā. Gape Paulo o ile a tlhalosa gore “go na le mebele ya selegodimo, le mebele ya selefatshe.” O ne a kaya eng? Dibopiwa tsa mo lefatsheng di na le mebele ya senama mme tsa kwa legodimong di na le mebele ya semoya e e tshwanang le ya baengele.—1 Bakor. 15:36-41. w20.12 9-10 ¶7-9

## Matlhatso, October 22

*Ke tla nna ke tlhobaela ka lobaka lo lo kae, ke hutsafetse mo pelong letsatsi le letsatsi?—Pes. 13:2.*

Rotlhe re batla go itumelela botshelo. Ga go na ope yo o ratang go nna a tshwe-nyegile. Mme gone, ka dinako dingwe mathata a botshelo a ka nna a dira gore re tlhobaele re bo re simolole go ipotsa potso e e mo temaneng ya letsatsi ya gompieno e Kgosi Dafide a ileng a ipotsa yone. Go na le dilo di le dintsi tse di ka dirang gore re tlhobaele. Mme ga re kgone go thibela dingwe tsa dilo tseo go direga. Ka sekai, ga re kgone go thibela tlhwa-tlhwa ya dijo, diaparole ya rente gore e se ka ya tlhatloga ngwaga le ngwaga. E bile ga re ka ke ra laola gore batho ba re berekang le bone kgotsa ba re tsenang sekolo le bone, ba tla re raela makgetlo a le makae gore re dire boitsholo jo bo sa siamang. Gape ga re ka ke ra thibela batho gore ba se ka ba dira bokebekwa mo re dulang gone. Re diragalelwa ke dilo tse- no ka gonne batho ba re tshelang le bone ga ba dire ditshwetso go ya ka melame- theo ya Baebele. Gape modimo wa lefatshe leno e bong Satane o a itse gore batho bangwe ga ba kitla ba direla Jehofa ka gonne 'tsamaiso eno ya dilo e dira gore ba tlhobaele.' (Math. 13:22; 1 Joh. 5:19) Ka jalo, ga re makale fa re bona lefatshe le tletse mathata a a dirang gore batho ba tlhobaele! *w21.01 2 ¶1, 3*

## Sontaga, October 23

*Mongwe le mongwe yo o tlhoileng mokaulengwe wa gagwe ke mmolai, mme lo a itse gore ga go na mmolai ope yo o tla nngang le botshelo jo bo sa khutleng.*

—1 Joh. 3:15.

Moaposetoloi Johane o ile a re kgothaletsa gore re se ka ra tlhoa bakaulengwe le bokgaisadi. Fa re sa ikobele kgakololo eo, Satane a ka re tlhotlheletsa go dira dilo tse di sa siamang. (1 Joh. 2:11) Seo se ile sa diragalela Bakeresete ba bogologolo. Ka nako eo, Satane o ile a dira sotlhe

se a ka se kgonang gore batlhanka ba Modimo ba tlhoane le gore go nne le mako-ko mo phuthengong. Ka nako ya fa Johane a ne a kwala makwalo a gagwe, batho ba ba nang le mokgwa o o tshwanang le wa ga Satane, wa go baka makoko le dikgaogano ba ne ba setse ba le teng mo phuthengong. Ka sekai, Dioterefese o ne a dira gore go nne le makoko mo phuthengong. (3 Joh. 9, 10) O ne a nyatsa bagolwane ba ba neng ba tlhomilwe ke sethlopha se se laolang gore ba etele diphuthengo. Gape o ne a batla go leleka bakaulengwe ba ba neng ba rata go amogela batho ba ene a neng a sa ba rate mo phuthengong. Oo e ne e le mokgwa o o sa siamang! Le gompieno, Satane o sa ntse a leka go dira gore batho ba Modimo ba se ka ba nna seoposengwe. Ka jalo, ga re a tshwanela go tlhoa bakaulengwe le bokgaisadi le go tlogela go ba ema nökeng. *w21.01 11 ¶14*

## Mantaga, October 24

*Fa ba fetsa go porofeta, sebatana . . . se tla lwa le bone, mme se tla ba fenywa se bo se ba bolaya.*

—Tshen. 11:7.

Ka ntwa ya ntsha ya lefatshe, puso ya Jeremane le puso ya Boritane di ne di bogisa batho ba ga Jehofa ba ba neng ba gana go ya ntsweng. Puso ya United States yone e ile ya tshwara bakaulengwe ba ba neng ba eteletse tiro ya go rera pele. Seno se ne se diragatsa boporofeti jo bo mo go Tshenolo 11:7-10. Ka bo1930, kgosi ya bokone e ile ya bogisa batho ba Modimo setlhogo segolobogolo ka nako ya ntwa ya lefatshe ya bobedi. Hitler le balatedi ba gagwe ba ile ba thibela tiro ya batho ba ga Jehofa. Puso ya Jeremane e ile ya bolaya batho ba ga Jehofa ba le bantsi mme ba bangwe e ne ya ba isa kwa dikampeng tsa pogisetso. Kgosi ya bokone e ne ya "itshepolola lefelo le le boitshepo" e bile e ile ya "tlosa sethlabo sa ka metlha" ka gonne e ile ya thibela tiro ya go rera ya batho ba ga Jehofa. (Dan. 11:30b, 31a) Tota e bile, Hitler o ne a ikana gore o tlile go bolaya batho ba ga Jehofa botlhe kwa Jeremane. *w20.05 6 ¶12-13*

## Labobedi, October 25

*Ratanang thata jaaka bana ba motho ba ratana. Nnang ba ntlha go tlotla ba bangwe.—Bar. 12:10.*

Fa re rata ba bangwe, ga re kitla re leka go gaisana le bone. Gopola gore Jonathane ga a ka a fufegela Dafide e bile ga a ka a leka go dira gore go tlhomiwe ene go nna kgosi mo boemong jwa ga Dafide. (1 Sam. 20:42) Rotlhe re ka etsa sekao sa ga Jonathane. O se ka wa fufegela ba bangwe ka gonne ba kgona go dira dilo tse wena o sa kgoneng go di dira, go na le moo, nna le 'mogopolo o o ikokobeditseng mme o tseye ba bangwe ba le kwa godimo ga gago.' (Baf. 2:3) Gopola gore rotlhe re ka kgona go dira sengwe se se ka thusang ba bangwe mo phuthegong. Fa re le boikokobetso re tla kgona go lemoga gore bakaulengwe le bokgaisadi ba na le botho jo bo molemo, re bo re ithuta mo dikaong tsa bone. (1 Bakor. 12:21-25) Fa re ratana ka pelo yotlhe, re tla kgona go kgothatsa bakaulengwe ba rona fa ba le bana le mathata. Re ba thusa gore ba kgone go direla Jehofa ba itumetse. Re bontsha gore re barutwa ba ga Jesu mme seo se dira gore batho ba batle go direla Jehofa. Mme sa botlhokwa le go feta, re galaletsa "Rara wa mautlwelobotlhoko a manana le Modimo wa kgomotso yotlhe," e bong Jehofa.—2 Bakor. 1:3. *w21.01 24 ¶14; 25 ¶16*

## Laboraro, October 26

*E re ka jaanong lo se karolo ya lefatshe, . . . lefatshe le lo tlhoile.—Joh. 15:19.*

Gompiano batho ga ba tlotle Basupi ba ga Jehofa, ba ba tseela kwa tlase ka gonne ba akanya gore ga ba botlhale e bile ba bokoa. Goreng? Ka gonne ga re itshware ka tsela e batho ba le bantsi ba itshwarang ka yone gompiano. Re leka go nna boikokobetso le go nna bonolo. Mme batho ba ba sa obameleng Jehofa bone, ba rata batho ba ba mabela le ba

ba ikgogomosang. Mo godimo ga moo, ga re tseenele dipolotiki e bile ga re di tshegetse, gape ga re tseenele bosole. Ka gonne re sa tshwane le bone, ba re tseela kwa tlase. (Bar. 12:2) Le fa batho ba lefatshe leno ba akanya gore re bokoa, Jehofa o re dirisa go fitlhelela dilo di le dintsi. Gompiano tiro ya go rera e dirwa go feta le e leng pele, mme Jehofa o dirisa rona go dira tiro eo. Batho ba ga Jehofa ba ranola le go phasalatsa dimakasine mo lefatsheng lotlhe e bile ba thusa batho go fetola matshelo a bone ba dirisa Baebele. Jehofa ke ene a dirang gore re kgone go fitlhelela tiro eno. *w20.07 15 ¶15-6*

## Labone, October 27

*Ke dira fela jaaka Rara a ntaetse gore ke dire.—Joh. 14:31.*

Jesu o tlotla taolo ya ga Jehofa, e seng ka gonne a sena bokgoni kgotsa a se botlhale. Tsela e e sa raraanang e a neng a ruta ka yone e bontsha gore o botlhale. (Joh. 7:45, 46) Jehofa o ne a itse gore Jesu o botlhale, ke lone lebaka la go bo a ile a mo letla gore a dire le ene fa a bopa. (Dia. 8:30; Baheb. 1:2-4) Fa Jehofa a sena go tsosa Jesu, o ile a mo naya 'taolo yotlhe kwa legodimong le mo lefatsheng.' (Math. 28:18) Le fa gone Jesu a na le bokgoni, o reetsa kaelo ya ga Jehofa. Goreng? Ka gonne o rata Rraagwe. Banna ba ba nyetseng ba tshwanetse go ela tlhoko gore Jehofa ga a ka a baya molao wa gore basadi ba ikobebe banna ba bone ka gonne a akanya gore basadi ke batho ba maemo a a kwa tlase fa ba bapisiwa le banna. Jehofa o ile a bontsha gore ga a tseye basadi e le batho ba maemo a a kwa tlase, ka go tlhopho banna le basadi gore ba ye go busa le Jesu. (Bagal. 3:26-29) Fa Jehofa a ne a naya Morwawe taolo, o ne a bontsha gore o a mo tshepa. Ka tsela e e tshwanang, monna yo o botlhale o tla naya mosadi wa gagwe taolo e e rileng. *w21.02 11 ¶13-14*

## Labotlhano, October 28

*Ba ba itshokileng ke bone ba ba itumetseng.—Jak. 5:11.*

Lefoko la Modimo le tshwana le seipone. Le re thusa go bona gore ke eng se re tlhokang go se tokafatsa le gore re ka dira seo jang. (Jak. 1:23-25) Ka sekai, fa re sena go ithuta Lefoko la Modimo, re ka nna ra lemoga gore re tlhoka go laola bogale. Jehofa a ka re thusa gore re nne bonolo fa re dirisana le ba bangwe le fa re lebana le mathata a ka dirang gore re galefe. Re tla kgona go akanya sentle le go dira ditshwetso tse di siameng. (Jak. 3:13) Ruri re tlhoka go tlhaloganya Baebele sentle! Ka dinako dingwe re ithuta mo diphosong tsa rona. Mme fa re ithuta mo dilong tse di siameng le mo diphosong tse ba bangwe ba ileng ba di dira, seo se tla re thusa gore re nne le bothhale. Ke ka moo Jakobe a re kgothaletsang gore re ithute mo dikaong tsa batho ba go buiwang ka bone mo Babeleng ba ba jaaka Aborahame, Rahabe, Jobe le Elija. (Jak. 2:21-26; 5:10, 11, 17, 18) Batlhanka bao ba ba ikanyegang ba ga Jehofa ba ile ba kgona go itshokela diteko tse di neng di ka dira gore ba se ka ba tlhola ba itumela. Se se ba diragaletseng se re thusa go bona gore le rona Jehofa a ka re thusa gore re itshoke le go tswelera re itumetse. *w21.02 29-30 ¶12-13*

## Matlhatso, October 29

*Fa go na le puisano, dithulaganyo di tla atlega, ka jalo, dirisa kgakololo e e bothhale e e tswang mo bathong ba bangwe.—Diane 20:18.*

Motho yo o tshwarang thuto ke ene yo o nang le maikarabelo a go thusa moithuti go tlhaloganya Lefoko la Modimo. Fa mongwe a go kopile gore o tsamaye le ene kwa thutong ya gagwe, o na le boikarabelo jwa go mo thusa. (Mor. 4:9, 10) Mme gono, o ka dira eng go mo thusa fa a tshwere thuto? Baakanyetsa. Sa ntlha, kopa motho yo o tshwarang thuto gore a go tlotlele go se kae ka motho yo a ithutang le ene. O ka nna wa mmo-

tsa gore: “Moithuti wa gago ke motho yo o ntseng jang? Lo bala kgaolo efe? Ke eng se o batlang gore moithuti wa gago a ithute sone mo kgaolong eno? A go na le sengwe se ke sa tshwanelang go se bua kgotsa go se dira fa re tshwere thuto? Nka dira eng go thusa moithuti wa gago gore a gatele pele?” Gone mmoledi ga a kitla a go bolelela sengwe le sengwe ka moithuti wa gagwe, mme se a tla go bolelelang sone se tla go thusa. Morongwa mongwe yo o bidiwang Joy a re: “Motlotlo oo o thusa motho yo ke tsamayang le ene gore a batle go thusa motho yo ke ithutang le ene le gore a itse gore a ka bua eng fa thuto e ntse e tswelitse.” *w21.03 9 ¶5-6*

## Sontaga, October 30

*Fa lefatshe le lo tlhoile, lo gopole gore le ne la ntlhoa pele ga le tlhoa lona.—Joh. 15:18.*

Ka dinako tse dingwe batho ba a re tlhoa ka gonne re ikobela melao ya Modimo. Melao ya ga Jehofa ya se se siameng le se se sa siamang e farologane thata le ya batho ba lefatshe leno. Ka sekai, batho ba le bantsi ba tsaya gore go itshiametse fela go dira boitsholo jo bo sa siamang jwa tlhakanelodikobo jo bo tshwanang le jo bo neng jwa dira gore Jehofa a senye Sodoma le Gomora! (Jude 7) E re ka re ikobela melao ya Baebele ya gore re tshwanetse go itshwara jang, batho ba a re sotla e bile ba re re tlhola batho. (1 Pet. 4:3, 4) Ke eng se se ka re thusang go itshoka fa batho ba re tlhoile e bile ba re tlhapatsa? Re tshwanetse go dumela gore Jehofa o tla re thusa. Fela jaaka thebe, tumelo ya rona e ka kgona go “tima dibetsa tsotlhe tse di konopiwang tse di fisang tsa yo o boikepo.” (Baef. 6:16) Mme ga re tlhoke go nna le tumelo fela. Gape re tlhoka go nna le lorato. Goreng? Ka gonne lorato “ga lo gakatsege.” Lo emela e bile lo itshokela dilo tsotlhe tse di bothhoko. (1 Bakor. 13:4-7, 13) Go rata Jehofa, go rata bakaulengwe le bokgaityadi tota le go rata batho ba ba re tlhoileng, go ka re thusa go itshoka fa re tlhoilwe. *w21.03 20-21 ¶3-4*

## Mantaga, October 31

*O se ka wa kgopisega ka bonako, ka gonne go kgopisega go nna mo sehubeng sa dieleele.—Mor. 7:9.*

Re ka bontsha gore re rata bakaulengwe le bokgaisadi ka go sa kgopisege motlhofo. Akanya ka se se ileng sa diragala fa Jesu a tloga a bolawa. O ile a bolelela barutwa ba gagwe gore fa ba batla go bona botshelo jo bo sa khutleng, ba tshwanetse go ja nama ya gagwe le go nwa madi a gagwe. (Joh. 6:53-57) Bontsi jwa barutwa ba gagwe ba ne ba sa rate se a neng a se bua, ka jalo ba ne ba tlogela go mo sala morago. Mme ditsala tsa mmatota tsa ga Jesu, ga di a ka tsa tlogela go mo sala morago. Le bone ba ne ba sa tlhaloganye se Jesu a neng a se bua e bile gongwe ba ne ba gagametse. Mme gone, ga ba a ka ba swetsa ka gore se Jesu a neng a se bua se ne se le phoso ba bo ba kgopisega. Go na le moo, ba ne ba mo tshepa ka gonne ba itse gore o bua boammaaruri ka metlha. (Joh. 6:60, 66-69) Le rona ga re a tshwanela go kgopisiwa motlhofo ke dilo dingwe tse batho ba di buang. Go na le go dira jalo, re tshwanetse go ba naya tshono ya go tlhalosa gore ba kaya eng. —Dia. 18:13. *w21.01 11 ¶13*

## Labobedi, November 1

*Fa ope fela a fetola kgang pele ga a utlwa dintlha tsa yone, seo ke boelele le matlhabisaditlhong.*

—Diane 18:13.

Go ka nna motlhofo gore re akanye gore Jona o ne a sa ikanyege ka gonne ga re itse dintlha tsotlhe ka maemo a gagwe. Jehofa o ile a laela Jona gore a ye go rerela Baninife molaetsa wa katlhoho. Jona ga a ka a ikobela Jehofa, go na le moo, o ne a palama sekepe se se yang kwa Tareshishe gore “a tswe fa pele ga ga Jehofa.” (Jona 1:1-3) A wena o ne o ka naya Jona tshono e nngwe gape ya gore a dire kabelo eo? Gongwe

o ne o ka se dire jalo. Mme Jehofa ene o ne a mo naya tshono e nngwe. (Jona 3: 1, 2) Thapelo ya ga Jona e re thusa go bona gore e ne e le motho yo o ntseng jang. (Jona 2:1, 2, 9) Ga go pelaelo gore Jona o ile a rapela makgetlo a le mantisi. Mme thapelo e a ileng a e rapela fa a ne a le mo teng ga tlhapi e re thusa go itse gore e ne e le motho yo o ntseng jang. Se a ileng a se bua se re thusa go lemoga gore o ne a le boikokobetso, a lebogetla dilo tse Jehofa a mo diretseng tsone le gore o ne a ikemiseditse go mo ikobela. Ka jalo, ga go gagamatse go bo Jehofa a ile a mo itshwarela. Gape o ile a araba thapelo ya gagwe a bo mo letlha gore a tsewelele e le moporofeti. Go botlhokwa gore mogolwane a reetse dintlha tsotlhe pele a naya mongwe kgaokololo. *w20.04 15 ¶14-6*

## Laboraro, November 2

*[Paulo] o ne a ba ruta ka go ba thusa go tlhaloganya Dikwalo, a tlhalosa e bile a dirisa Dikwalo tseno go ntsha bosupi.—Dit. 17:2, 3.*

Barutwa ba ga Jesu ba ne ba amogela dithuto tsa Bokeresete le go ikaega ka moya o o boitshepo gore o ba thusa go tlhaloganya Lefoko la Modimo. Ba ne ba dira dipatlisiso gore ba tlhomamisege gore dithuto tseno di tswa mo Dikwalong. (Dit. 17:11, 12; Baheb. 5:14) Ba ne ba sa rate Jehofa fela ka gonne go le monate mo phuthegong kgotsa ba rata tsela e bakaulengwe le bokgaisadi ba dirisanang ka yone. Go na le moo, ba ne ba na le tumelo kgotsa ba dumela mo go Jehofa ka gonne ba na le “kitso e e boammaaruri ka Modimo.” (Bakol. 1:9, 10) Boammaaruri jwa Baebele ga bo fetoge. (Pes. 119:160) Ka sekai, fa mokaulengwe mongwe kgotsa kgaisadi a re kgopisa kgotsa a dira boleo jo bo masisi, boammaaruri joo ga bo fetoge. E bile ga bo fetoge fa re kopana le mathata. Ka jalo, re tshwanetse go itlwaetsa go ithuta Baebele le go tlhomamisa gore se re se ithutang mo go yone ke boammaaruri. Fa re na le tumelo e e

nonofileng mo boammaaruring jwa Baebele, tumelo ya rona e tla tshwana le tshe-tledi e e thusang sekepe gore se se ka sa tsewa ke phefo fa go na le setsuatsue mo lewatlang. *w20.07 9 ¶6-7*

### Labone, November 3

*O ne a re laela gore re rerele ba-tho le go ba tlhalosetsa ka bottlalo.*  
—*Dit. 10:42.*

Jesu a re dilo tse re di direlang bomorwarraagwe re di direla ene. (Math. 25: 34-40) Tsela ya botlhokwa e re ka tshegetsang bomorwarraagwe Keresete ka yone ke ka go dira sotlhe se re ka se kgonang mo tirong ya go ruta e Jesu a ileng a re e dirwe. (Math. 28:19, 20) Bomorwarraagwe Keresete ba ka kgo-na go dira tiro eno fa fela ba thusiwa ke ba “dinku tse dingwe.” (Joh. 10:16) Fa e le gore o mongwe wa dinku tse dingwe, nako le nako fa o dira tiro eno o a bo o bontsha gore o tshegetsatsa Jesu le bomorwarraagwe. Gape re ka nna ditsala tsa ga Jehofa le Jesu fa re ntsha meneelo go tshegetsatsa dilo tse di direlwang Bogosi. (Luke 16:9) Ka sekai, re ka ntsha moneelo go tshegetsatsa tiro e e dirwang mo lefatsheng lotlhe. Meneelo eno e dirisediwa go thusa bakaulengwe le bokgaisadi ba ba wetsweng ke mase-tlapelo a tlhologo. Gape re ka ntsha meneelo go thusa go duelela ditshenyegelo tsa phuthego. Mo godimo ga moo, re ka thusa bakaulengwe le bokgaisadi ba ba tlhokang.—Dia. 19:17. *w20.04 24 ¶12-13*

### Labotlhamo, November 4

*Ga e kitla e tlotla Modimo wa bo-rraayone. . . . Go na le moo, e tla galaletsa modimo wa dikago tsa phemelo.*—*Dan. 11:37, 38.*

Kgosi ya bokone e ile ya diragatsa bo-porofeti jono ka gonne e ile ya bontsha gore ga e na sepe le ‘Modimo wa bo-rraayone.’ Jang? Soviet Union e ne ya leka go fedisa bodumedi. E ne ya leka go

dira seo jang? Ka 1918, puso eo e ne ya dira gore kwa dikolong bana ba rutiwe gore ga go na Modimo. Kgosi eno e ile ya “galaletsa modimo wa dikago tsa phemelo” jang? E ile ya dirisa madi a le man-tsi tota go nonotsha sesole sa yone le go dira dibomo tsa nuklea. Kgosi ya bo-kone le kgosi ya borwa di ne tsa felele-tsa di na le dibetsa di le dintsi tse di ka kgonang go ganyaola batho ba le dimil-ionemilione. Kgosi ya bokone le kgosi ya borwa di ile tsa dirisana mmogo go “baya selo se se ferosang sebete se se bakang kgakgabalo” e leng Lekgotla la Ditšhaba Tse di Kopaneng.—Dan. 11:31. *w20.05 6-7 ¶16-17*

### Matlhatso, November 5

*Morwarrago . . . o ne a latlhegile mme o bonwe.*—*Luke 15:32.*

Ke bomang ba ba tshwanetseng go batla batho ba ba tsidifetseng? Babole-di botlhe mo phuthegong ba ka thusa go batla ba ba tsidifetseng, go akaretsa, bagolwane, babulatsela le ba ba nang le masika a a tsidifetseng. A o na le tsa-la kgotsa wa losika yo o tsidifetseng? A o kile wa kopana le motho yo o tsidi-fetseng o le mo bodireding? Tlhalose-tsa motho yoo gore fa e le gore a ka rata go etelwa o ka naya bagolwane di-nomoro tsa gagwe le atereze ya kwa a dulang gone. Mogolwane mongwe yo o bidiwang Thomas a re: “Sa ntlha, ke bot-sa bakaulengwe le bokgaisadi gore a ba itse gore gone jaanong motho mongwe yo o tsidifetseng o nna kae. Kgo-tsa ke botsa baboledi gore a ba itse mongwe yo o sa tlholeng a tla dipokanong. Mme fa ke etetse bakaulengwe le bo-kgaisadi ba ba tsidifetseng ke ba botsa ka bana ba bone le ba masika. Bangwe ba bakaulengwe le bokgaisadi bano, ba ne ba tlhola ba ya dipokanong le bana ba bone mme ka nako eo bana bao e ne e le baboledi. Le bone ba ka thusiwa go boela kwa go Jehofa.” *w20.06 24 ¶1; 25 ¶6-7*

## Sontaga, November 6

*Ke tla gakologelwa ditiro tsa ga Jah; ke tla gakologelwa ditiro tsa gago tse di gakgamatsang tsa bogologolo.—Pes. 77:11.*

Go farologana le diphologolo, batho ke bone fela ba ba kgonang go ithuta tsela e ba tshwanetseng go itshwara ka yone go tswa mo dilong tse di ba diragale-tseng. Seo se re thusa gore re nne le mekgwa e e siameng le gore re kgone go fetola tsela e re akanyang le e re tshelang ka yone. (1 Bakor. 6:9-11; Bakol. 3:9, 10) Tota e bile re kgona go katisa segakolodi sa rona gore se kgone go itse se se siameng le se se sa siamang. (Baheb. 5:14) Gape re kgona go ithuta go rata ba bangwe le go ba utlwela botlhoko. Re kgona go ithuta tsela e Jehofa a bontshang tshiamiso ka yone re bo re mo etsa. Re ka bontsha Jehofa gore re lebogela mpho e a re fileng yone ya go gakologelwa dilo ka go ikgopotsa tsela e a kileng a re thusa ka yone, le e a kileng a re gomotsa ka yone mo nakong e e fetileng. Seno se tla dira gore re se ka ra belaela gore o tla re thusa mo nakong e e tlang. (Pes. 77:12; 78:4, 7) Sengwe gape se re ka se dirang, go bontsha gore re lebogela mpho eno, ke go ikgopotsa dilo dingwe tse dintle tse batho ba kileng ba re direla tsona re bo re ba leboga. Babatlisisi ba lemogile gore gantsi batho ba ba lebogang ba nna ba itumetse. *w20.05 23 ¶12-13*

## Mantaga, November 7

*Boifa leina leno le le galalelang le le boitshengang la ga Jehofa, Modimo wa gago.—Dute. 28:58.*

Akanya fela gore Moshe o ne a ikutlwa jang fa Jehofa a ne a mo tsentse mo phatlheng ya lefika a bo a mmontsha kgalalelo ya gagwe. E tshwanetse ya bo e ne e le selo se se itumedisang thata mo go Moshe fa a ne a bona kgalalelo ya ga Jehofa. Moshe o ne a utlwa mafoko ano a a ka tswang a ne a buiwa ke moengele: “Jehofa, Jehofa, Modimo yo o kutlwebotlhoko le yo o pelontle, yo o bonya go galefa le yo o nang le bopelonomi jo bogolo jwa lorato le boa-

mmaaruri, yo o bolokelang dikete bopelonomi jwa lorato, yo o itshwarelang phoso le tlolo le boleo.” (Ekes. 33:17-23; 34:5-7) Go ka direga gore Moshe o ne a gopola tiragalo eo fa a ne a bolelela Baiseraele mafoko a temana ya letsatsi ya gompiono. Fa re akanya ka leina Jehofa, re tshwanetse ra akanya ka botho jwa mong wa lone. Gape re tshwanetse go akanya ka dinononofo tsa gagwe tse di jaaka maatla, botlhale, tshiamiso le lorato. Go akanya ka dinononofo tseno go tla dira gore re mo tlotle le go feta.—Pes. 77:11-15. *w20.06 8-9 ¶13-4*

## Labobedi, November 8

*Tswelela o dirisa dilo tse o di ithutileng wa bo wa thusiwa go di dumela.—2 Tim. 3:14.*

Jesu o rile batho ba tla bona gore re batutwa ba gagwe fa re ratana. (Joh. 13:34, 35) Mme gone, gore motho a nne le tumelo e e nonofileng o tlhoka go dira dilo dingwe. Ga re a tshwanela go nna le tumelo fela mo go Jehofa ka gonne re bona go na le lorato mo phuthegong. Goreng? Ka gonne fa o na le tumelo fela mo go Jehofa ka ntlha ya lorato lo o lo bonang mo phuthegong, fa nako e ntse e ya, tumelo ya gago e ka nna ya fela. Ka sekai, re ka tlogela go direla Jehofa fa modumedimmo go le rona yo gongwe e leng mogolwane kgotsa mmulatsela a dira bolelo jo bo masisi. Gape re ka tlogela go direla Jehofa fa mokaulengwe kgotsa kgaitisadi mongwe a re kgopisa kgotsa e nna motlhanogi, a bo a re se re se dumelang ga se boammaaruri. Ka jalo, fa re batla go nna le tumelo e e nonofileng mo go Jehofa re tshwanetse ra bo re mo rata ka pelo yotlhe. Tota re ka re: Fa e le gore o na le tumelo mo go Jehofa fela ka ntlha ya se batho ba bangwe ba se dirang mme e se ka gonne o na le kamano le Ene kgotsa o mo rata go tswa pelong, tumelo ya gago ga kitla e nonofa. Tsela e o ikutlwang ka yone ka Jehofa le batlhanka ba gagwe e ka go thusa gore o nne le tumelo. Mme gone o tshwanetse go ithuta Baebele, o tlhaloganye se o se ithutang le go dira dipatlisiso gore o tlhatswepe pelo gore se o ithutang sone ka Jehofa ke boammaaruri.—Bar. 12:2. *w20.07 8 ¶2-3*



## Laboraro, November 9

*Thusa ba ba bokoa.—Dit. 20:35.*

Go na le dikai tse dintsi tse di re bontshang gore baengele ba fa re thusa go batla batho ba ba tsidifetseng, ba ba batlang go boela kwa go Jehofa. (Tshen. 14:6) Ka sekai mokaulengwe wa kwa Ecuador yo o bidiwang Silvio, a re o ne a kopa Jehofa gore a mo ro-melele mongwe yo o ka mo thusang go boela mo phuthegong. Fa a ntse a rape-la, bagolwane ba babedi ba ne ba kokota mo kgorong ya gagwe. Ka yone nako eo, ba ne ba simolola go mo thusa. Re tla itumela fa re thusa batho ba ba tsidifetseng go boela kwa go Jehofa. Ela tlhoko se mokaulengwe mongwe yo o bidiwang Salvador yo e leng mmulatsela e bile a rata go thusa batho ba ba tsidifetseng a se buang. A re: "Fa ke akanya ka batho ba ba neng ba tsidifetse ba ba boetseng kwa go Jehofa, matlho a me a gelela di-keledi. Ke itumelela gore ke ile ka dira le Jehofa go thusa nku ya gagwe e e neng e latlhegile go tswa mo lefatsheng la ga Satane go go boela mo phuthegong." Fa e le gore o tsidifetse, itse gore Jehofa o sa ntse a go rata. Jehofa o emetse gore o boele kwa go ene mme o tla go amogela ka lorato. *w20.06 29 ¶16-18*

## Labone, November 10

*Lo tla bona Motlhatlheledi wa lona yo Mogolo.—Isa. 30:20.*

E re ka Jehofa e le 'Motlhatlheledi wa rona yo Mogolo' o re kwaletse dikai tse re ka di etsang mo Baebeleng. (Isa. 30:21) Fa re bala Baebele mme re akanya ka se re se badileng, re ithuta ka batho ba ba neng ba na le dinonofotse Modimo a di ratang. Gape re ithuta gore go ne ga diragala eng ka ba ba neng ba palelwa ke go bontsha dinonofotse. (Pes. 37:37; 1 Bakor. 10:11) Akanya ka se se diragaletseng Kgosi Saulo. Fa a simolola go busa, o ne a le boikokobetso. O ne a itse gore a ka se kgone go dira sengwe le sengwe, ke ka moo a neng a tshaba go amogela maikarabelo a a oke-

tsegileng. (1 Sam. 9:21; 10:20-22) Mme fa nako e ntse e ya, Saulo o ne a simolola go nna mabela, a bo a dira dilo tse a neng a sa tshwanela go di dira. O ne a simolola go itshwara jaana fela fa a se na go nna kgosi. Nako nngwe fa a ne a emetse moporofeti Samuele o ne a palelwa ke go nna pelotelele. O ne a ntsha setlhabelo le fa a ne a sa tshwanela go dira jalo. Seo se ne sa dira gore Jehofa a se ka a tlhola a mo amogela a bo a dira gore a se ka a tlhola a nna kgosi. (1 Sam. 13:8-14) Sekai seno se re ruta gore ga re a tshwanela go dira dilo tse re sa newang maikarabelo a go di dira. *w20.08 10 ¶10-11*

## Labotlhano, November 11

*Lo tlotle ba ba . . . lo okametseng mo tironng ya Morena.*

*—1 Bathes. 5:12.*

Gone ke boammaaruri gore Jehofa o dirisitse Keresete go naya phuthego "dimpho tse e leng banna." (Baef. 4:8) Banna bano ba akaretsa maloko a Setlhopha se se Laolang, bathusi ba Setlhopha se se Laolang, baemedi ba lekala, balebedi ba potologo, ba ba rutang kwa dikolong tsa Baebele, bagolwane mo diphuthegong le batlhanka ba bodiredi. Bakaulengwe bano botlhe ba tlhomilwe ke Jehofa ka moya wa gagwe o o boitshepo gore ba tlhokomele dinku tsa gagwe le go nonotsha phuthego. (1 Pet. 5:2, 3) Bakaulengwe botlhe ba tlhomiwa ka moya o o boitshepo gore ba kgone go dira dikabelo tsa bone. Fela jaaka maoto le matsogo a le botlhokwa mo mmeleng, bakaulengwe bano ba ba tlhomilweng ka moya o o boitshepo, ba dira ka natla, mme seo se solegela phuthego molemo. Ga ba leke go dira gore batho ba bangwe ba ba tseele kwa godimo. Go na le moo, ba leka go nonotsha bakaulengwe le bokgaityadi. (1 Bathes. 2:6-8) Re leboga Jehofa go bo a re neile bakaulengwe bano ba ba ikentshang setlhabelo ka go baya dilo tse ba bangwe ba di tlhokang kwa pele ga tsa bone! *w20.08 21 ¶5-6*

## Matlhatso, November 12

*Yang . . . mme lo ba dire barutwa.*

—*Math. 28:19.*

Lebaka le lengwe la go bo re rerela batho ke ka gonne ba “sotlegile e bile ba gasame jaaka dinku tse di se nang modisa,” ka jalo ba tlhoka go itse ka Bogosi Jwa Modimo. (Math. 9:36) Jehofa o batla gore batho botlhe ba itse boammaaruri le gore ba bolokwe. (1 Tim. 2:4) Fa re nna re gopotse gore tiro ya rona ya go rera e ka dira gore batho ba bolokwe, seno se ka re tlhotlheletsa gore re ba rele. (Bar. 10:13-15; 1 Tim. 4:16) Gape re tshwanetse go nna le dithulusu tse di siameng gore re kgone go dira tiro ya go rera. Mme gape re tshwanetse go itse go di dirisa. Jesu o ne a naya balatedi ba gagwe ditaello tsa gore ke eng se ba tshwanetseng go se dira fa ba rera dikgang tse di molemo. O ne a ba bolelela gore ba tseye eng, ba rere kae le gore ba bue ba reng. (Math. 10:5-7; Luke 10:1-11) Gompieno, phuthego ya ga Jehofa e re diretse Lebokoso la go Ruta, e bile e re ruta gore re le dirise jang. Lebokoso leno, le re thusa thata mo tirong ya go rera. Thapiso e re e newang, e re thusa gore re se ka ra inyatsa le gore re nne ditswerere mo tirong ya go rera.—2 Tim. 2:15. *w20.09 4 ¶6-7, 10*

## Sontaga, November 13

*Ga go na sepe se se intumedisang go feta seno: go utlwa gore bana ba me ba sa ntse ba tsamaya mo boammaaruring.*—3 Joh. 4.

Akanya kafa moaposetoloi Johane a ileng a itumela ka gone fa a utlwa gore batho ba a neng a ba ruta boammaaruri ba sa ntse ba direla Jehofa ka boikanyegi. Bakeresete bao ba ne ba kopana le mathata mme Johane o ne a ba thusa go nonotsha tumelo ya bone ka gonne a ne a ba tsaya jaaka bana ba gagwe. Le rona re a itumela fa re bona bana ba rona

kgotsa batho ba re ithutang Baebele le bone ba ineela mo go Jehofa e bile ba tswelela ba mo direla. (3 Joh. 3) Ka ngwaga wa 98 C.E., moya o o boitshepo o ile wa tlhotlheletsa Johane go kwala makwalo a mararo. Makwalo ao a ne a kwaletswe go nonotsha tumelo ya Bakeresete le go ba thusa gore ba tswelela ba tsamaya mo boammaaruring. Johane o ne a utlwa botlhoko thata fa a bona barutisi ba maaka ba baka tshenyo mo phuthegong. (1 Joh. 2:18, 19, 26) Batlhanogi bao ba ne ba re ba itse Jehofa mme ba ne ba sa ikobele ditaello tsa gagwe. *w20.07 20 ¶1-3*

## Mantaga, November 14

*Dumelang mo Modimong; dumelang le mo go nna.*—Joh. 14:1.

Re a itse gore molaetsa o re o rerang o boammaaruri, ka jalo re o bolelela batho ba le bantsi kafa re ka kgonang ka gone. Gape re a itse gore Jehofa o tlile go dira dilo tse a re solofetsang tsone mo Baebeleng. (Pes. 119:42; Isa. 40:8) Re setse re bone boporofeti bo le bontsi bo diragadiwa e bile re bone batho ba le bantsi ba fetola matshelo a bone fa ba sena go dirisa se ba se ithutileng mo Baebeleng. Dilo tseno di dira gore re tlhatswege pelo gore ruri batho ba tlhoka go utlwa molaetsa wa Bogosi. Gape re na le tumelo mo go Jehofa le mo go Jesu, yo a mo tlhomileng gore e nne Kgosi ya Bogosi jwa Gagwe. Le fa re ka diragalelwa ke eng, Jehofa o tla re sireletsa le go re naya maatla. (Pes. 46:1-3) Mo godimo ga moo, re tlhatswegile pelo gore Jesu o dirisa maatla a Jehofa a mo neileng one go kaela tiro ya go rera. (Math. 28:18-20) Tumelo e re thusa gore re tlhommamisege gore Jehofa o tla segofatsa maiteko a re a dirang. *w20.09 12 ¶15-17*

## Labobedi, November 15

*O ntiretse tiro e e molemo. . . . O dirile se a neng a se kgona.*

—Mar. 14:6, 8.

Ka dinako dingwe fa bokgaisadi ba lebane le dikgwetho, ba tlhoka mongwe yo a ka ba buelelang. (Isa. 1:17) Ka sekai, kgaisadi yo o tlhokafaletseng ke monna kgotsa yo o tlhadilweng, a ka nna a tlhoka mongwe yo a ka mo thusang go dira dilo dingwe tse di neng di dirwa ke monna wa gagwe. Kgaisadi yo o tsofetse a ka nna a tlhoka mongwe yo o ka mmuelelang le dingaka. Kgotsa kgaisadi wa mmulatsela yo o nnang le seabe mo diporojekeng dingwe tse di dirwang mo phuthegong, a ka nna a tlhoka mongwe yo o ka mmuelelang fa ba bangwe ba mo tshwayatshwaya diphoso ka gore ga a nne teng mo tshimong ka metlha. A re boneng gore re ka ithuta eng mo go Jesu. Jesu o ne a tlhola a buelela basadi ba ba ikanyegang fa ba sa tshwarwe sentle. Ka sekai, o ile a buelela Marea fa Maratha a ne a ngongorega ka ene. (Luke 10:38-42) O ne a buelela Marea mo lekgetlhong le lengwe gape fa batho ba ne ba mo omanyetsa sengwe se a neng a se dira. (Mar. 14:3-9) Jesu o ne a itse gore se Marea a neng a se dira, o ne a se dira ka boikaelelo jo bo siameng. Gape o ile a bolelela pele gore se Marea a ileng a se dira go ne go tla buiwa ka sone "gongwe le gongwe fela kwa dikgang tse di molemo di rerwang gone." w20.09 24 ¶15-16

## Laboraro, November 16

*Disang letsomane la Modimo le lo le tlhokometseng, lo direle lo le balebedi, e seng ka go patelediwa mme e nne ka go rata, go dumalana le thato ya Modimo.—1 Pet. 5:2.*

Modisa yo o molemo o a itse gore dinku di kgona go latlhega. Fa modisa a sena go bona nku ya gagwe e e latlhegileng, ga a e tshware makgwakgwa. Akanya ka sekao se Jehofa a re tlhometseng sone sa go thusa bangwe ba batlhanka ba gagwe ba ba neng ba palelwa ke go dira se a

neng a batla gore ba se dire ka gonne ba boifa kgotsa ba kgobegile marapo. Moprofeti Jona ga a ka a ikobela Jehofa fa a ne a mo roma kwa Ninife. Mme gone Jehofa ga a ka a mo tlhoboga. Fela jaa-ka modisa yo o molemo, Jehofa o ile a falotsa Jona a bo a mo naya bopelokgale jwa gore a kgone go diragatsa kabelo ya gagwe. (Jona 2:7; 3:1, 2) Moragonyana Jehofa o ile a dirisa semela sa segwana go thusa Jona go tlhaloganya gore batho botlhe ba botlhokwa mo go ene. (Jona 4:10, 11) Re ithuta eng? Gore bagolwane ga ba a tshwanela go tlhoboga batho ba ba tsidifetseng. Go na le moo, ba tshwanetse go leka go tlhaloganya gore ke eng se se dirileng gore mmoledi a tlogele go ya bodireding le go ya dipokanong. Mme fa mmoledi yoo a boela kwa go Jehofa, bagolwane ba tshwanetse go tselela pele ba mo rata le go mo tlhokomela. w20.06 20-21 ¶10-12

## Labone, November 17

*Ba tla thusiwa go le gonnye fela.*

—Dan. 11:34.

Ka 1991 fa Soviet Union e sena go phutlhama, batho ba Modimo ba ile ba golesega ka nakwana. Daniele o bitsa kgololesego eo a re ke "thuso e nnye." Mme go ise go ye kae, batho ba le bantsi ba ba neng ba nna mo dinageng tse di neng di busiwa ke Soviet Union ba ne ba nna baboledi. Fa nako e ntse e ya, Russia le dinaga tse di e tshegetsang di ile tsa nna kgosi ya bokone. Gore puso e nne kgosi ya bokone kgotsa kgosi ya borwa e tshwanetse ya bo e dira dilo tseno tse tharo: (1) e busa kwa batlhanka ba Modimo ba leng gone, (2) e bontsha gore e tilhoile Jehofa le batho ba gagwe, e bile (3) e gaisana le puso e nngwe. Russia le dinaga tse di e tshegetsang di ne tsa tlhasela batho ba Modimo ka go ba bogisa le go thibela tiro ya bone ya go rera. Se ba ileng ba se dira se bontsha gore ba tilhoile Jehofa le batho ba gagwe. Ba ntse ba gaisana le kgosi ya borwa e leng Mmusomogolo wa Maesemane le Maamerika. w20.05 12-13 ¶3-4

## Labotlhano, November 18

[*Tlhokomela*] *tsela e o rutang ka yone.*—1 Tim. 4:16.

Gore batho e nne barutwa, re tshwanetse go ba ruta. Ka jalo, re tshwanetse go nna ditserwerere mo go ruteng. Re ithuta Baebele le batho ba le bantsi mo lefatsheng lotlhe. Re rata dilo tse re ithutileng tsone mo Lefokong la Modimo. Ka jalo, re ka nna ra raelesega go bua thata ka tsone. Mme gone, le fa o ka tswa o tshwere Thuto ya *Tora ya Tebelo*, Thuto ya Baebele ya Phuthego kgotsa o ithuta Baebele le motho, ga o a tshwanela go bua thata. Rotlhe re batla go dirisa Baebele sentle fa re ruta, mme gone ga re a tshwanela go leka go tihalosa sengwe le sengwe se re se itseng ka temana kgotsa ka sethlogong sengwe se se rileng. (Joh. 16:12) Akanya ka dilo tse o neng o di itse fa o ne o kolobediwa o bo o di bapisa le tse o di itseng gone jaanong. Fa o ne o kolobediwa, gongwe o ne o itse fela dithuto tsa konokono tse Mokeresete a tlhokang go di itse. (Baheb. 6:1) Go go tsere dingwaga di le dintsi gore o nne le kitso e o nang le yone gone jaanong. Ka jalo, o se ka wa leka go ruta motho sengwe le sengwe se o se itseng ka letsatsi le le lengwe fela. w20.10 14-15 ¶2-4

## Matlhatso, November 19

*Motho yono . . . [ke] mmetli, morwa Marea.*—Mar. 6:3.

Jehofa o ile a tlhophela Jesu batsadi ba ba molemo tota. (Math. 1:18-23; Luke 1:26-38) Se Marea a ileng a se bua se bontsha gore o ne a rata Jehofa le Lefoko la gagwe. (Luke 1:46-55) Josefa le ene o ne a ikobela ditaello tsa ga Jehofa ka metlha. Seno se bontsha gore o ne a rata Modimo e bile a batla go mo itumedisa. (Math. 1:24) Jehofa ga a ka a tlhophela Jesu batsadi ba ba humileng. Setlhabelo se Josefa le Marea ba ileng ba se ntsha fa Jesu a sena go tsholwa, se bontsha

gore ba ne ba humanegile. (Luke 2:24) Ba ka tswa ba ne ba se na madi a manntsi ka gonne lelapa la bone le ne la gola. Ba ile ba feleletsa ba na le bana ba le supa. (Math. 13:55, 56) Jehofa o ile a sireletsatsa Jesu mo dilong dingwe tse di rileng, mme gone o ne a sa mo sireletse mo go sengwe le sengwe. (Math. 2:13-15) Ka sekai, bangwe ba losika lwa ga Jesu ba ne ba sa dumele mo go ene. Jesu o tshwanetse a bo a ile a utlwa botlhoko tota fa kwa tshimologong bangwe mo lelapeng ba ne ba sa dumele gore ke ene Mesia. (Mar. 3:21; Joh. 7:5) Gape Josefa o tshwanetse a bo a ile a swa Jesu a sa ntse a le moshana, mme ga go pelaelo gore seo se ile sa utlwisa Jesu botlhoko tota. w20.10 26-27 ¶4-6

## Sontaga, November 20

*Ga nkitle ke go tlogela, e bile ga nkitle ke go latlha.*—Baheb. 13:5.

A o kile wa lebana le mathata o bo o ikutlwa e kete o nosi le gore ga go na ope yo o go thusang? Batho ba le bantsi go akaretsa le batlhanka ba ba ikanyegang ba ga Jehofa, ba kile ba ikutlwa jalo. (1 Dikg. 19:14) Fa e le gore seo se kile sa go diragalela, gopola mafoko a ga Jehofa a a reng: “Ruri ga ke na ke go tlogela ka gope le fa e le go go latlha ka gope.” Ka jalo, re ka bua re tlhatswegile pelo re re: “Jehofa ke mothusi wa me; ga ke na ke boifa. Motho o ka ntirang?” (Baheb. 13:5, 6) Mo e ka nna ka 61 C.E. moapose-toloi Paulo o ile a kwalela Bakeresete ba kwa Judea mafoko ao. Se a ileng a se kwala se re gopotsa mafoko a a mo go Pesalema 118:5-7. Paulo o ne a itse gore Jehofa ke mothusi wa gagwe ka gonne a ile a mo thusa ka makgetlo a le manntsi mo nakong e e fetileng. Ka sekai, dingwaga di le pedi pele a kwalela Bakeresete ba Bahebera lekwalo, o ile a tsaya loeto ka sekepe mme go ne ga tsoga setsuatsue mo lewatlang. (Dit. 27:4, 15, 20) Pele ga Paulo a tsaya loeto loo le morago ga lone, Jehofa o ile a mo thusa ka ditsetla tse di farologaneng. w20.11 12 ¶1-2

## Mantaga, November 21

*O se ka wa bua o re, "Ke ka ntlha yang fa malatsi a pele a ne a le botoka go na le a gone jaanong?"*

—Mor. 7:10.

Goreng re sa tshwanela go nnela go akanya gore botshelo jwa rona bo ne bo le botoka mo nakong e e fetileng? Ka gonne seo se ka dira gore re nne re akantse fela ka dilo tse di monate tse di diragetseng mme re bo re lebala gore go ne go tle go nne thata. Akanya ka se Baiseraele ba ileng ba se dira. Fa ba sena go tswa kwa Egepeto, ba ne ba lebala gore botshelo jwa bone jwa koo bo ne bo le thata. Go na le moo, ba ne ba nna ba akantse fela ka dijo tse di monate tse ba neng ba di ja. Ba ne ba re: "A bo re gakologelwa jang ne tlhapi e re neng re tle re e je mahala kwa Egepeto, makgomane le magapu le diliki le dieie le gareleke!" (Dipa. 11:5) A mme gone ba ne ba ja dijo tseo "mahala"? Nnyaa. Fa ba le kwa Egepeto e ne e le makgoba e bile ba bogisiwa. (Ekes. 1:13, 14; 3:6-9) Mme gone, ba ile ba lebala dilo tseo ba bo simolola go eletsa e kete ba ka busetsa nako kwa morago. Ba ne ba nnela go akanya fela ka dinako tse di monate tse ba nnileng le tsone pele go na le go akanya ka dilo tse di molemo tse Jehofa a ba diretseng tsone. Seo se ile sa utlwise Jehofa botlhoko.—Dipa. 11:10 w20.11 25 ¶5-6

## Labobedi, November 22

*Jehofa o gaufi le ba ba pelo e phatlogileng; o boloka ba ba kgobegileng marapo.—Pes. 34:18.*

Ka dinako dingwe, re ka kgobiwa marapo ke go akanya ka gore botshelo bo bokhutshwane le gore bo "tletse matshwenyego." (Jobe 14:1) Ka jalo, go a utlwa go bo ka dinako dingwe re kgobega marapo. Batlhanka ba le bantsi ba ga Jehofa ba mo nakong e e fetileng ba kile ba ikutlwa ka tsela eo. E bile bangwe ba bone ba ne ba eletsa e kete ba ka swa. (1 Dikg. 19:2-4; Jobe 3:1-3, 11; 7:15, 16) Mme ka metlha Jehofa o ne a ba

kgothatsa. Dilo tse di ba diragaletseng di ne tsa kwalwa mo Baebeleng gore di re kgothatse le gore re ithute mo go tsone. (Bar. 15:4) Akanya ka morwa wa ga Jakobe e bong Josefa. Botshelo jwa gagwe bo ne jwa fetoga ka bonako fela. O ne a sa tlhola a nna le rraagwe yo a neng a mo rata. O ne a iphitlhela a dira tiro ya maemo a a kwa tlase e bile a berekela mongwe yo o sa itseng Jehofa. (Gen. 37: 3, 4, 21-28; 39:1) Mosadi wa ga Potifaro o ile a latofatsa Josefa ka gore o ne a leka go mmeteela. Potifaro ga a ka a batlisisa kang eo. Go na le moo, o ile a tsenya Josefa mo kgolegolong mme fa a le koo, o ile a bofiwa ka diketane. (Gen. 39:14-20; Pes. 105:17, 18) Ka jalo, Josefa o ne a na le mabaka a a utlwalang a go kgobega marapo! w20.12 16-17 ¶1-4

## Laboraro, November 23

*A leina la gago le itshepisiwe.*

—Math. 6:9.

Jesu o ile a re go botlhokwa gore re rapelele gore leina la Modimo le itshepisiwe. Mme gone, Jesu o ne a kaya eng? Go itshepisa sengwe go kaya go se dira boitshepo, go se dira phepa kana go se itshekisa. Bangwe ba ka nna ba ipotsa gore, 'A leina la Modimo ga le boitshepo, ga le phepa kana ga le a itsheka?' Gore re bone karabo ya potsa eno, re tlhoka go akanya ka gore leina le le molemo le akaretsa eng. Leina ga se lefoko fela le le ka bidwang kgotsa le le ka kwalwang mo pampiring. Baebele ya re: "Go tshwanetse ga tlhophiwa leina go na le dikhumo tse dintsi." (Dia. 22:1; Mor. 7:1) Ke eng fa leina le le botlhokwa jaana? Ka gonne le akaretsa tsela e motho itsegeng ka yone le se batho ba se akanyang ka ene. Ka jalo, tsela e leina le kwalwang ka yone kgotsa e le bidwang ka yone ga e botlhokwa go le kalo, mme sa botlhokwa ke se batho ba se akanyang fa ba le bona kgotsa ba le utlwa. Fa batho ba bua maaka ka Jehofa, ba a bo ba senya tsela e a itsegeng ka yone. Fa ba senya tsela e a itsegeng ka yone, ba a bo ba gogagoga leina la gagwe mo seretseng. w20.06 3 ¶5-7

## Labone, November 24

*Ke fuduegile thata, mme ke a go botsa, tlhe Jehofa, go tla tsaya lobaka lo lo kae?—Pes. 6:3.*

Re ka tlhobaela ka mathata a rona thata jaana mo re feleletsang re palelwa ke go akanya ka dilo tsa botlhokwa. Ka sekai, re ka tlhobaela ka gore ga re kitla re nna le madi a a lekaneng gore re reke dilo tse re di tlhokang. Gape re ka tlhobaediwa ke go akanya gore re ka lwalwa, re bo re sa kgone go ya tirong kgotsa re bo re latlhegelwa ke tiro. Mme gape re ka tlhobaediwa ke go akanya gore re tlile go palelwa ke go ikanyega fa re raelwa gore re tlole melao ya Modimo. Go ise go ye kae, Satane o tla tlhotlheletsa batho ba gagwe gore ba tlhasele batho ba Modimo. Ka jalo, re ka nna ra tshwenyega, re ipotsa gore re tlile go dira eng fa seo se direga. Gongwe re ka ipotsa gore a go siame gore re tlhobaele ka dilo tseno. Jesu o ile a raya balatedi gagwe a re: “Tlogelang go tlhobaela.” (Math. 6:25) A Jesu o ne a raya gore ga re a tshwanela go tlhobaela ka sepe? Nnyaa, o ne a sa reye jalo. Gopola gore batlhanka bangwe ba ga Jehofa ba mo nakong e e fetileng le bone ba ne ba tlhobaela. Mme Jehofa o ne a sa ntse a ba amogela. (1 Dikg. 19:4) Tota fa Jesu a ne a re re tlogele go tlhobaela, o ne a re gomotsa. O ne a sa batle re tlhobaela ka dilo tse re di tlhokang mo re ka feleletsang re sa tihole re tlhoma mogopolo mo go direleng Jehofa. *w21.01 3 ¶4-5*

## Labotlhano, November 25

*Mosadi . . . tlhogo ya gagwe ke monna.—1 Bakor. 11:3.*

Banna ba ikarabelela mo go Jehofa le Jesu ka tsela e ba tshwarang ba malapa a bone ka yone. (1 Pet. 3:7) E re ka Jehofa e le Tlhogo ya baengele le batho, o na le tshwanelo ya go dira melao, le go tlhomamisa gore mongwe le mongwe o ikobela melao eo. (Isa. 33:22) Jesu le ene ke tlhogo ya phuthego ya Bokeresete,

ka jalo o na le tshwanelo ya go tlhoma melao le go tlhomamisa gore mongwe le mongwe o a e latela. (Bagal. 6:2; Bakol. 1:18-20) Fela jaaka Jehofa le Jesu, tlhogo ya lelapa le ene o na le tshwanelo ya go dira ditshwetso mo lelapeng la gagwe. (Bar. 7:2; Baef. 6:4) Mme gone, go na le fa taolo ya gagwe e felelang gone. Ka sekai, o tshwanetse go tlhoma melao a ikaegile ka melaometheo e e tswang mo Lefokong la Modimo. (Dia. 3:5, 6) E bile monna yo e leng tlhogo ya lelapa ga a na tshwanelo ya go beela batho ba e seng ba lelapa la gagwe melao. (Bar. 14:4) Gape fa bana ba gagwe ba gola ba bo ba tswa mo gae, ba tla tswelela ba mo tlotla, mme gone ga a sa tihole e le tlhogo ya bone.—Math. 19:5. *w21.02 2-3 ¶3-5*

## Matlhatso, November 26

*Tlhokomela . . . maloko a lelapa la [gago].—1 Tim. 5:8.*

Tlhogo ya lelapa a ka bontsha gore o rata ba lelapa la gagwe ka go ba tlamelala ka dilo tse ba di tlhokang. Mme gone, o tshwanetse go gopola gore selo sa botlhokwa ke go ba thusa gore ba nne ditlala tsa ga Jehofa. (Math. 5:3) Fa Jesu a ne a tloga a swa mo koteng ya tlhokofatso o ne a batla go tlhomamisa gore go ne go tla nna le mongwe yo o neng a tla sala a tlhokomela Marea. Le fa Jesu a ne a le mo ditlhabing, o ne a kopa moaposetoloi Johane gore a tlhokomele Marea. (Joh. 19:26, 27) Fa mokaulengwe e le tlhogo ya lelapa, a ka nna le maikarabelo a le mantsi. O tshwanetse go bereka ka natla fa a le kwa tirong gore batho ba tle ba galaletse Jehofa. (Baef. 6:5, 6; Tito 2:9, 10) Gape a ka tswa a na le maikarabelo a le mantsi mo phuthegong, a a jaaka go kgothatsa le go tlhokomela bakaulengwe le bokgaisadi le go tlhoma sekao ka go nna gone mo tirelong ya tshimo. Gape o tlhoka go bala Baebele le ba lelapa la gagwe ka metha. Ba lelapa la gagwe ba tla mo rata le go feta ka gonne a ba thusa gore ba nne ba itumetse le gore ba tswelela ba direla Jehofa.—Baef. 5:28, 29; 6:4. *w21.01 12 ¶15, 17*

## Sontaga, November 27

[*Mosadi yo o botlhale*] o ela tlhoko se se diregang mo ntlong ya gagwe.—*Diane 31:27.*

Baebele e tlhalosa dilo dingwe tse mosadi yo o botlhale a kgonang go di dira. Ka sekai, o okamela tiro e e dirwang mo lelapeng, a ka reka kgotsa a rekisa setsha e bile a ka dira kgwebo. (Dia. 31:15, 16, 18) Ga se lekgoba e bile o na le tshwanelo ya go bua se a se aka-nyang. Monna wa gagwe o a mo tshepa e bile o reetsa dikakantsho tsa gagwe. (Dia. 31:11, 26) Fa monna a dirisana jalo le mosadi wa gagwe, mosadi wa gagwe o tla itumelela go mo ikobela. Le fa gone Jesu a ile a kgona go fitlhelela dilo di le dintsi, ga a ka a akanya gore go ikobela taolo ya ga Jehofa go dira gore a nyatsege. (1 Bakor. 15:28; Bafil. 2:5, 6) Ka tsela e e tshwanang, mosadi yo o botlhale e bile a ikobela taolo ya ga Jesu, ga a kitla a ikutlwa a nyatsega ka gonne a ikobela monna wa gagwe. O tlile go ema monna wa gagwe nokeng e seng fela ka gonne a mo rata mme ka gonne a rata Jehofa e bile a mo tlotla. Le fa gone mosadi a tshwanetse go ikobela monna wa gagwe, ga a a tshwanela go mo ikobela fa monna yoo a batla gore a dire dilo tse di sa dumalaneng le melaometheo ya Baebele. *w21.02* 11 ¶14-15; 12 ¶19

## Mantaga, November 28

*Pitlagano e re thusa go itshoka.*  
—*Bar. 5:3.*

Batlhanka ba Modimo ga ba bolo go itshokela go bogisiwa ka gonne ba rata Jehofa. Ka sekai, fa kgotlatshekelokgolo ya Bajuda e laela baaposetoloi gore ba tlogele go rera, ba ile ba tlhopho go “utlwa Modimo e le mmusi bogolo go batho,” ka gonne ba ne ba rata Jehofa. (Dit. 5:29; 1 Joh. 5:3) Bakaulengwe le bokgaityadi ba ba bogisiwang ke dipuso tse di nang le taolo e kgolo e bile di le setlhogo, le bone ba kgona go tswelala

ba ikanyega mo go Jehofa ka gonne ba mo rata. Fa batho ba lefatshe leno ba re tlhoile ga re kgobege marapo, go na le moo, re a itumela. (Dit. 5:41; Bar. 5:4, 5) Go ka nna thata gore re itshoke fa re gane-diwa ke ba malapa a rona. Fa ba lemoga gore re batla go ithuta ka Jehofa, ba ka simolola go akanya gore re tsie-ditswe. Ba bangwe ba ka akanya gore re latlhegetswe ke tlhaloganyo. (Bapisa Mareko 3:21.) Ba ka simolola go re lwa-ntsha. Mme seno ga se a tshwanela go re gakgamatsa. Jesu o ile a re: “Baba ba motho e tla nna batho ba ntlo ya gaga-bo.”—Math. 10:36. *w21.03* 21 ¶6-7

## Labobedi, November 29

*Mongwe le mongwe o tshwanetse go nna bonako go utlwa, bonya go bua.*—*Jak. 1:19.*

Fa o tsamaile le mongwe kwa thutong ya gagwe, o tshwanetse go reetsa ka kelotlhoko fa thuto e ntse e tswel-tse. Fa o dira jalo, o tla kgona go bua ka nako e e tshwanetseng. Mme gone, o tshwanetse go akanya pele o bua. Ka sekai, ga o a tshwanela go bua thata, go tsena motho yo o rutang ganong a ntse a tlhalosa sengwe kgotsa go bua ka sengwe se se farologaneng le se go ithuti-wang ka sone. Mme o ka thusa moithuti go tlhaloganyo dintlha tsa botlhokwa ka go akgela ka bokhutshwane, go dirisa ditshwantsho kgotsa go mmotsa potsotso. Ka dinako dingwe o ka nna wa lemoga gore ga o tlhoke go bua sepe. Mme fa o akgola moithuti, o mmontsha gore o mo tsaya a le botlhokwa, seo se ka mo thusa gore a gatele pele. Fa go tlhokega, tlotlala moithuti ka bokhutshwane gore go tlile jang gore o ithute boammaaruri, ke dikgwetlho dife tse o kopaneng le tsone le gore Jehofa o go thusitse jang mo botshelong. (Pes. 78:4, 7) Gongwe maitemogelo a gago a ka mo thusa. A ka nonotsha tumelo ya gagwe kgotsa a mo thusa go dira diphetogo gore a kolobe-diwe. *w21.03* 10 ¶9-10

## Laboraro, November 30

*[Batho] ba ditšhaba tsoitlhe . . . lo  
ba dire barutwa.—Math. 28:19.*

Ke mang tota yo o re thusang go atlega mo bodireding? Paulo o ile a kwalela phuthego ya kwa Korintha a re: "Ke ne ka jala, Apolose a nosetsa, mme Modimo o ne a nna a godisa; mo e leng gore yo o jalang ga se sepe le fa e le yo o nose-tsang, fa e se Modimo yo o godisang." (1 Bakor. 3:6, 7) Fela jaaka Paulo re tshwanetse go leboga Jehofa fa re atlega mo bodireding. Re ka bontsha jang gore re lebogela tshiamelo e re nang le yone ya go "dira mmogo" le Modimo, Jesu le baengele? (2 Bakor. 6:1) Ka go batla di-tshono tsa go rerela ba bangwe dikgang tse di molemo. Ga re a tshwanela go jala dipeo tsa boammaaruri fela, gape re tshwanetse go di nosetsa. Fa re kopane le motho yo o kगतlhegelang go ithuta Baebele, re tshwanetse go dira maiteko a go boela kwa go ene kgotsa re kope motho yo mongwe gore a ithute Baebele le ene. Fa re ntse re ithuta le motho re bo re bona kafa Jehofa a mo thusang ka teng gore a dire diphetogo, seo se dira gore re itumele. *w20.05 30 ¶14, 16-18*

## Labone, December 1

*Yo o belaelang o tshwana le lekhu-  
bu la lewatle le le kgweediwang  
ke phefo, le phaillelwa kwa le kwa.  
—Jak. 1:6.*

Fa re ntse re bala Baebele, re ka nna ra kopana le dilo di le dintsi tse re sa di tlhologanyeng. Kgotsa gongwe Jehofa a ka nna a se ka a araba dithapelo tsa rona ka tsela e re neng re lebeletse ka yone. Dilo tseno di ka dira gore re nne le dipela-elo. Fa re ithokomolosa dipelaelo tseo, di tla koafatsa tumelo ya rona re bo re tlogela go nna ditsala tsa ga Jehofa. (Jak. 1: 7, 8) Mme seo, se ka dira gore re se ka ra tsena kwa lefatsheng le lesa. Moapo-setoloi Paulo o tshwantsha tsholofelo ya rona le tshetledi. (Baheb. 6:19) Fa go na le setsuatsue, tshetledi e thusa sekepe gore se eme mo lefelong le le lengwe le gore

se se ka sa phailakwa ke diphefo se bo se thula matlapa. Mme gone, tshetledi e ka thusa sekepe mo maemong ano fa fela keetane e e gokeletsweng mo tshetleding le mo sekepeng e sa kgaoge. Fela jaaka rusi e kgona go ja keetane, le rona fa re na le dipelaelo re bo re sa leke go di baaka-nya, seo se ka koafatsa tumelo ya rona. Mme fa re na le dipelaelo re bo re lebana le diteko, re ka nna ra feleletsa re belaela gore Jehofa o tleile go diragatsa ditsholofetso tsa gagwe. Fa re sa tlhohle re na le tumelo mo go Jehofa ga re kitla re tsena kwa lefatsheng le lesa. Motho yo o nang le dipelaelo ga a kitla a itumela! *w21.02 30 ¶14-15*

## Labotlhano, December 2

*Aborahame o ne a dumela mo go  
Jehofa.—Jak. 2:23.*

Aborahame a ka tswa a ne a na le dingwaga di feta 70 fa ene le ba lelapa la gagwe ba tswa kwa Ure. (Gen. 11:31-12:4) Mme o feditse dingwaga di le leggolo a nna mo ditenteng e bile a kgarakgatshega mo lefatsheng la Kanana. Aborahame o ne a swa a na le dingwaga di le 175. (Gen. 25:7) Mme ga a ka a bona Jehofa a diragatsa tsholofetso ya gagwe ya go naya ditlogolwana tsa gagwe lefatsheng le a neng a mo solofeditse lone. E bile ga a ka a tshela lobaka lo lolele go fitlha a bona motse o e leng Bogosi Jwa Modimo o tlhomiwa. Le fa go ntse jalo, Baebele ya re Aborahame o ne a swa "a godile e bile a kgotsafetse." (Gen. 25:8) Le fa Aborahame a ile a lebana le dikgwetlho tse dintsi, o ne a tswelela a na le tumelo e e nonofileng e bile a ikemiseditse go leta Jehofa. Ke eng se se mo thusitseng go itshoka? Ka metlha Jehofa o ne a mo sireletsa e bile e le tsala ya gagwe. (Gen. 15:1; Isa. 41:8; Jak. 2:22) Fela jaaka Aborahame, le rona re letetse motse o o nang le metheo ya mmatota. (Baheb. 11:10) Mme gone, ga re a letela gore motse oo o agiwe. Bogosi Jwa Modimo bo ne jwa tlhomiwa ka 1914 mme gone jaanong bo busa kwa legodimong. (Tshen. 12: 7-10) Mme re emetse gore Bogosi joo bo tle go busa mo lefatsheng lotlhe. *w20.08 4-5 ¶11-12*



## Matlhatso, December 3

*Dikanyo tse di mo pelong ya motho di tshwana le metsi a a boteng, mme motho yo o nang le temogo o kgona go di gelela.—Diane 20:5.*

Fa re le boikokobetso e bile re le pelotelele re tla kgona go reetsa ba bangwe ka kelotlhoko. Re tshwanetse go dira jalo ka ntlha ya mabaka a le mararo. La ntlha, fa re reetsa motho ka kelotlhoko, ga re kita re akanya dilo tse di sa siamang ka ene. La bobedi, re tla kgona go itse gore o ikutlwa jang le gore ke eng fa a dira dilo dingwe tse di rileng mme seo se tla re thusa gore re mo utwele bothoko. La boraro, fa re mo reetsa ka kelotlhoko, re ka nna ra kgona go mo thusa go lemoga gore o ikutlwa jang. Ka dinako dingwe motho ga a tlhaloganye gore o ikutlwa jang go fitlha leka go tlhalosetsa motho yo mongwe tsela e a ikutlwang ka yone. Ga go motlhofo gore bakaulengwe le bokgaisadi bangwe ba tlhalose tsela e ba ikutlwang ka yone ka ntlha ya dilo tse di ba diragaletseng mo botshelong kgotsa ka ntlha ya botho jwa bone. Go ka tsaya nako gore bakaulengwe le bokgaisadi ba re tshepe le go re bolelela gore ba ikutlwa jang. Mme fa re le pelotelele jaaka Jehofa, ba ka re bolelela gore ba ikutlwa jang. Fa ba dira jalo, re tshwanetse go ba reetsa ka kelotlhoko. *w20.04 15-16 ¶6-7*

## Sontaga, December 4

*O tla bo o tshwara batho ba tshela.—Luke 5:10.*

Gantsi ditlhapi ga di rate metsi a a tsididi thata kgotsa a a mogote thata e bile di rata go nna kwa go nang le dijo teng. Motshwaraditlhapi o tshwanetse go itse gore ke nako efe e e siameng ya go tshwara ditlhapi. Morongwa mongwe yo o nnang kwa setlhaketlhakeng sa Pacific o ne a ithuta gore go na le nako e e siameng ya go tshwara ditlhapi. Mokaulengwe mongwe wa kwa lefelong leo, o ne a mo kopa gore ba ye go tshwara ditlhapi mmogo. Morongwa yoo o ne a mo raya a re: "Re tla kopana ka ura ya borobongwe mo mosong." Mokaulengwe yoo o ne a mo

raya a re: "Nnyaa rra! Re tshwanetse go ya ka nako e ditlhapi di tla bong di le teng ka yone, e seng ka nako e rona re e batlang." Ka tsela e e tshwanang, barutwa ba ga Jesu ba ne ba rera kwa batho ba leng gone e bile ba ne ba ya go ba rerele ka nako e ba neng ba itse gore ba tla ba fitlhela ka yone. Ka sekai, ba ne ba rera kwa tempeleng, ka ntlo le ntlo, kwa dinagongeng le kwa marekisetso. (Dit. 5: 42; 17:17; 18:4) Le rona re tshwanetse go itse gore batho ba mo tshimong ya rona, ba rata go ya kwa mafelong afe le gore re ka ba fitlhela leng kwa magaeng a bone. Re tshwanetse go ya kwa mafelong a re itseng gore ba kwa go one le ka nako e re itseng gore re tla ba fitlhela ka yone. —1 Bakor. 9:19-23. *w20.09 4 ¶8-9*

## Mantaga, December 5

*E re ka re bua boammaaruri ka gone re tlhotlhelediwa ke lorato, a re goleng mo dilong tsotlhe re etse tlhogo, e bong Keresete.*

—Baef. 4:15.

Gore re nne ditsala tsa ga Jesu, re tshwanetse go tshegetsa dithulaganyo tse di dirwang mo phuthegong ya Modimo. Jesu ke tlhogo ya phuthego, ka jalo re nonotsha botsala jwa rona le ene fa re reetsa ba ba tlhomilweng go tlhokomela phuthego. (Baef. 4:16) Ka sekai, gone jaanong re leka go dirisa Diholo Tsa Bogosi ka botlalo. Ka jalo, diphuthego dingwe di kopantswe le tse dingwe e bile tshimo e di e dirang le yone e okeditse. Seno se re thusa gore re kgone go boloka madi a le mantsi. Le fa go ntse jalo, seno se ile sa dira gore maemo a baboleledi bangwe a fetoge. Bakaulengwe le bokgaisadi bangwe ba ka tswa ba feditse dingwaga di le dintsi ba kopanela le phuthego e e rileng, e bile ba rata bakaulengwe le bokgaisadi ba phuthego eo fela thata. Mme gone jaanong, ba tshwanetse go kopanela le phuthego e nngwe. Jesu o tshwanetse a bo a itumela tota fa a bona bakaulengwe le bokgaisadi ba le bantsi ba ikobela thulaganyo eno. *w20.04 24 ¶14*

## Labobedi, December 6

*Kgosi ya borwa e tla thulana le yone ka dinaka.—Dan. 11:40; nthl.*

Kgosi ya bokone le kgosi ya borwa di a lwantshana ka gonne di lwela go nna le maemo a nthlha. Ka sekai, morago ga Ntwa ya Lefatshe ya Bobedi Soviet Union e ile ya simolola go busa karolo e kgolo ya Yuropa, ka jalo kgosi ya borwa e ile ya dumalana le dinaga tse dingwe gore di kopanye sesole sa tsone mme di lwantshe kgosi ya bokone. Fa di kopane di bidiwa NATO, [North Atlantic Treaty Organization]. Gape kgosi ya bokone le kgosi ya borwa di dirisitse madi a mantsi di leka go nonotsha sesole sa tsone. Dikgosi tseno di bontsha gore di a lwantshana ka gonne fa di ne di fitlhela dinaga di lwa, di ne di tshegetsa matlhakore a a sa tshwaneng. Di ne tsa dira jalo kwa Afrika, Asia, le kwa Latin America. Mo dingwageng tse di fetileng, Russia le dinaga tse di e tshegetsang di nnile maatla go gaisa dinaga tse dingwe. Gape kgosi ya bokone e ile ya lwa le kgosi ya borwa e dirisa dikhomputara kgotsa mafaratlhatlha. Dikgosi tseno di pegana molato wa gore e nngwe e leka go dirisa di-*software* tsa dikhomputara go senya maemo a ikonomi le a sepolotiki a e nngwe. Fela jaaka Danniele a ile a bolelela pele, kgosi ya bokone e tswelela e thasela batho ba Modimo.—Dan. 11:41. *w20.05* 13 ¶15-6

## Laboraro, December 7

*Ke tla batla dinku tsa me, e bile ke tla di tlhokomela.—Esek. 34:11.*

“A mosadi a ka lebala losea lwa gagwe lo lo anyang?” Jehofa o kile a botsa potso eo ka nako ya ga moporofeti Isaia. Modimo o ile a bolelela batho ba gagwe gore: “[Le fa] basadi bano ba ka lebala, . . . nna ga nkitle ke go lebala.” (Isa. 49:15) Ga se gantsi Jehofa a itshwantsha le mmê. Mme mo lekgetlong leo o ile a dira jalo. O ile a bapisa tsela e a iku-tlwang ka yone ka bathanka ba gagwe,

le tsela e mmê a ratang ngwana wa gagwe ka yone ka gonne o ne a batla gore bathanka ba gagwe ba tlhaloganye gore o ba rata fela thata. Bommê ba le bantsi ba ikutlwa fela jaaka kgaisadi mongwe yo o bidiwang Jasmin. A re: “Fa o anyisa ngwana, o simolola go mo rata thata, mme lorato loo lo nnela ruri.” Jehofa o a lemoga fa mongwe wa bathanka ba gagwe a emisa go ya bodireding le go ya dipokanong. Bontsi jwa bakaulengwe le bokgaisadi bano ba boa gape ba kopanela le phuthego mme re a itumela fa re ba bona! Jehofa o batla gore ba boele mo phuthegong mme le rona ke se re se batlang.—1 Pet. 2:25. *w20.06* 18 ¶1-3

## Labone, December 8

*[Tlthoma] matlho a [gago] mo dilong tse di sa bonweng, e seng mo dilong tse di bonwang. Gonne dilo tse di bonwang ke tsa nakwana, mme dilo tse di sa bonweng di nnela ruri.—2 Bakor. 4:18.*

Ga se matlotlo otlhe a re ka kgonang go a bona. Tota e bile, go na le dilo tse di tlhwatlhwakgolo tse Jehofa a re direlang tsone tse re sa kgoneng go di bona. Mo Therong ya Kwa Thabeng, Jesu o ile a bua ka matlotlo a a kwa legodimong a a botlhokwa thata go gaisa dikhumo le madi. Go tswa foo, o ile a re: “Kwa letlotlo la gago le leng gone, le pelo ya gago e tla nna gone koo.” (Math. 6:19-21) Fa re tsaya selo se le tlhwatlhwakgolo, re leka ka thata gore re nne le sone. Re ‘ipolokela matlotlo kwa legodimong’ ka go nna le boitsholo jo bo siameng le ka go nna mo letlhakoreng la ga Jehofa. Jesu o ile a tlhalosa gore matlotlo ao ga a kitla a sennngwa kgotsa a utswiwa ke ope. Moaposetoloi Paulo o ile a re kgothaletsa gore re “[tlhame] matlho a rona . . . mo dilong tse di sa bonweng.” (2 Bakor. 4:17, 18) Matlotlo ano a re sa kgoneng go a bona, a akaretsa dilo tse re tlileng go di itumelela kwa lefatsheng le lesa. A re bontsha gore re leboga Jehofa go bo a re file dimpho tseno? *w20.05* 26 ¶1-2

## Labotlhamo, December 9

*Thuto ya me e tla na jaaka pula.*

—Dute. 32:2.

Dilo tse Moshe a neng di ruta Baise-raele di ile tsa ba kgothatsa le go nonotsha tumelo ya bone fela jaaka pula e thusa dijalo go gola. Re ka etsa Moshe jang fa re ruta? Fa re le mo bodireding, re ka dirisa Baebele go bontsha batho gore leina la Modimo ke Jehofa. Re ka ba fa dikgatiso, ra ba bontsha dibidio kgotsa ra ba romelela sengwe mo *websites* ya rona se se buang ka Jehofa. Fa re le kwa mmerekong, kwa sekolong kgo-tsa gongwe re tsaya loeto, re ka kgona go nna le tshono ya go bua le batho ba bangwe ka Jehofa. Fa re ba bolelela ka dilo tse dintle tse Jehofa a tllileng go re direla tsone mo lefatsheng, ba ka simolola go lemoga gore Jehofa o a re rata. Fa re ruta ba bangwe boammaaruri ka Modimo, re a bo re dira gore leina la gawe le itshepisiwe. Re ba thusa go lemoga gore dilo di le dintsi tse ba ntseng ba di rutiwang ka Modimo ke maaka. Fa re ruta batho boammaaruri jo bo tswang mo Baebeleng ba tla lapologelwa.—Isa. 65:13, 14. *w20.06* 10 ¶8-9

## Matlhatso, December 10

*Boelang mo go nna, mme le nna ke tla boela mo go lona.*—Mal. 3:7.

Re tlhoka go nna le dinonofo dife gore re kgone go thusa ba ba tsidifetseng gore ba kgone go boela kwa go Jehofa? A re tlotleng ka se re ka ithutang sone mo setshwantshong sa ga Jesu sa morwa yo o neng a latlhegile. (Luke 15:17-24) Jesu o tlhalosa ka fa morwa yoo a ileng a itharabologe-lwa ka gone a bo a boela gae. Rraagwe o ne a mo tabogela a bo a mo tlampara-rela, mme seo se ne sa mo netefaletsa gore rraagwe o a mo rata. Morwa yoo o ne a ikutlwa molato e bile o ne a sa lebelela gore rraagwe a mo amogele. Fa a sena go bolelela rraagwe gore o iku-

tlwa jang, rraagwe o ne a mo utlwela botlhoko. Rraagwe o ile a dira sengwe go bontsha morwawe gore o mo amogela mo lelapeng. O ne a mo direla moletlo a bo a mo apesa diparolo tsa maemo a a kwa godimo. Jehofa o tshwana le rre yo o mo setshwantshong seno. O rata bakaulengwe le bokgaisadi ba ba tsidifetseng e bile o batla gore ba boele kwa go ene. Fa re etsa Jehofa, re ka kgona go ba thusa gore ba boele kwa go ene. Seo se raya gore re tshwanetse go nna pelo-telele, go ba utlwela botlhoko le go ba rata. *w20.06* 25-26 ¶8-9

## Sontaga, December 11

*Fa lo ikobela mafoko a me ka metlha, ruri lo barutwa ba me, e bile lo tla itse boammaaruri, mme boammaaruri bo tla lo golola.*

—Joh. 8:31, 32.

Jesu o ne a re bangwe ba ne ba tla amogela boammaaruri “ka boipelo” mme tumelo ya bone e ne e tla koafala fa ba lebana le mathata. (Math. 13:3-6, 20, 21) Gongwe ba ne ba sa tlhaloganye gore fa o nna molatedi wa ga Jesu o tli-le go sotliwa le go lebana le mathata. (Math. 16:24) Gongwe ba ne ba akanya gore fa o nna Mokeresete ga o kitla o nna le mathata le gore Modimo o tla fedisa mathata otlhe a gago. Mme mo lefatsheng leno le le laolwang ke Satane go nna go na le mathata. Maemo a ka fetoga mo botshelong mme seo se ka dira gore re se ka ra tlhola re itumela. (Pes. 6:6; Mor. 9:11) Bontsi jwa bakaulengwe le bokgaisadi ba bontsha gore ba tlhatswegile pelo gore ba mo boammaaruring. Ba bontsha seo jang? Tumelo ya bone ga e koafale fa mokaulengwe kgo-tsa kgaisadi mongwe a ba utlwisa botlhoko kgotsa a dira bolelo jo bo masisi. (Pes. 119:165) Fa ba lebana le diteko, tumelo ya bone e a nonofa mme ga e reketle. (Jak. 1:2-4) Re tshwanetse go nna le tumelo e e tshwanang le ya bone. *w20.07* 8 ¶1; 9 ¶4-5

## Mantaga, December 12

*Fa mongwe wa lona a tlhoka bothlale, a a nne a bo kope mo Modimong.—Jak. 1:5.*

Pele o bala Baebele, kopa Jehofa gore a go thuse go bona gore o ka solegelwa molemo jang ke se o se balang. Ka sekai, fa e le gore o na le bothata mme o batla go itse gore o ka bo rarabolola jang, mo kope gore a go thuse go bona melaometho mo Baebeleng e e ka go thusang go dira ditshwetso tse di siameng. (Bafil. 4: 6, 7) Jehofa o re neile bokgoni jo bo kgatlhang jwa go bona dilo ka leitlho la mogopolo. Gore o kgone go dira gore pego e o e balang e go ame pelo, leka go bona se o se balang ka leitlho la mogopolo. Leka go bona dilo tse motho yoo a ileng a di bona le go ikutlwa ka tsela e a neng a ikutlwa ka yone. Go tswa foo, akanyetsa kwa teng ka se o se balang. Go akanyetsa kwa teng go kaya go akanya ka kelotlhoko ka dilo tse o di balang le go bona gore o ka di dirisa jang. Go go thusa gore o kgone go tlhaloganya se o se balang. Fa o bala Baebele mme gone o sa akanyetse kwa teng ka se o se balang, go tshwana le fa o sega matsela gore o kgone go itirela seaparo se sentle mme o bo o a baya fela o sa a kopanye. Mme fa o akanyetsa kwa teng ka se o se balang, go tshwana le fa o rokaganya matsela ao gore o itirele seaparo se sentle. *w21.03 15 ¶3-5*

## Labobedi, December 13

*Ke leboga Modimo, . . . le ka motlha ke sa lebele go go umaka mo dithapelong tsa me tse ke di dirang ka tlhoafalo bosigo le motshegare.—2 Tim. 1:3.*

Moaposetoloi Paulo a ka bo a ile a akanya ka gore gongwe fa a ne a sa tlhagafala mo tirong ya Modimo a ka bo a sa tsennngwa mo kgolegolong. A ka bo a ile a galefela Bakeresete bangwe ba kwa Asia ba ba ileng ba mo tlhanogela. Gape

a ka bo a ile a tlogela go tshepa ditsala tsa gagwe. Mme gone, ga a ka a dira jalo. Le fa gone Paulo a ne a itse gore o tlile go bolawa, ga a ka a lebala gore selo sa bothlokwa ke go dira gore Jehofa a galalediwe. Gape o ile a nna a akanya ka gore a ka kgothatsa jang ba bangwe. O ile a bontsha gore o ikaega ka Jehofa, ka go rapela ka metlha. Paulo ga a ka a nna a akantse ka Bakeresete ba ba ileng ba mo tlhanogela. Go na le moo, o ile a tlhalosa gore o lebogela go bo ditsala tsa gagwe di ile tsa mo ema nökeng. Gape o ile a tswelela a ithuta Lefoko la Modimo. (2 Tim. 3:16, 17; 4:13) Sa bothlokwa le go feta, o ne a tlhomamisegile gore Jehofa le Jesu ba a mo rata. *w21.03 18 ¶17-18*

## Laboraro, December 14

*Fela jaaka mefero e kokoannngwa e bo e jewa ka molelo, go tla nna jalo mo malatsing a bofelo.  
—Math. 13:40.*

Nako nngwe ka lekgolo la bobedi la dingwaga, go ne go tletse Bakeresete ba maaka mo phuthegong ya Bokeresete. Ba ne ba ruta maaka e bile ba fitlhela batho boammaaruri jo bo mo Lefokong la Modimo. Go tloga ka nako eo, go fitlha ka lekgolo la bo19 la dingwaga, go ne go se na phuthego ya Modimo mo lefatsheng. Bakeresete bao ba maaka ba ile ba tlhoga fela jaaka mofero mo tshimong mme ka ntlha ya seo, go ne go le thata go bona gore tota Bakeresete ba boammaaruri ke bomang. (Math. 13:36-43) Ke eng fa go le bothlokwa gore re itse seno? Tshedimosetso e e mo go Daniele kgaolo 11 e re thusa go lemoga gore dikgosi tse di neng di busa ka nako eo e ne e se kgosi ya bokone kgotsa kgosi ya borwa ka gone go ne go se na phuthego ya ga Jehofa mo lefatsheng mo dingwageng tseo. Le fa go ntse jalo, go ela kwa bofelong jwa lekgolo la bo19 la dingwaga, kgosi ya bokone le kgosi ya borwa di ne tsa boa tsa nna teng gape. *w20.05 3 ¶5*

## Labone, December 15

*Setšhaba . . . se tllie mo lefa-tsheng la me.—Joele 1:6.*

Joele o bolelela pele gore lesogodi la tsie le tla tlhasela lefatšhe la Iseraele le gore le tla ja dimela tsoitlhe tse di mo Iseraele. (Joele 1:4) Go fetile dingwaga di le dintsi re akanya gore boporofeti jono bo bolelela pele ka tiro ya go rera e batho ba ga Jehofa ba neng ba tla e dira. Re ne re tsaya gore fela jaaka tsie e ja dimela tsoitlhe fela tse e kopanang le tsone, tiro ya go rera e ne e tla senola dithuto tsoitlhe tsa bodumedi jwa maaka. Mme fa re se-kaseka boporofeti joo jotlhe, go a bonala gore re tshwanetse go fetola tsela e re bo thaloganyang ka yone. Jehofa o ile a bua jaana ka tsie: 'Motho wa bokone [tsie] ke tla mmaya kgakala ke mo ntsha mo go lona.' (Joele 2:20) Fa e le gore tsie e emela batho ba ga Jehofa ba ba ikobelang taelo ya ga Jesu ya gore ba rere e bile ba dire batho barutwa, ke eng fa Jehofa a re o tla ba baya kgakala kgotsa o tla ba leleka? (Esek. 33:7-9; Math. 28:19, 20) Jehofa ga a kitla a leleka batho ba gagwe ba ba ikanyegang, go na le moo, o tla leleka sengwe kgotsa mongwe yo o sa tshwareng batho ba gagwe sentle. w20.04 3 ¶3-5

## Labotlhano, December 16

*Fa mongwe wa lona a tlhoka botlhale, a a nne a bo kope mo Modimong.—Jak. 1:5.*

Re tshwanetse go dira eng fa re akanya gore Jehofa ga a arabe dithapelo tsa rona ka yone nako eo? Jakobe a re re tshwanetse 'go nna re kopa' Modimo. Jehofa ga a lape fa re nna re mo kopa gore a re neye botlhale. Ga a kitla a re galefela. Fa re mo kopa gore a re neye botlhale gore re kgone go itshokela diteko tse re lebanang le tsone, o re naya jone a go-lolesegile. (Pes. 25:12, 13) O lemoga diteko tse re lebanang le tsone, o re utlwele botlhoko e bile o batla go re thusa. Seno

se dira gore re itumele! Mme gone, Jehofa o re naya botlhale jang? Jehofa o re naya botlhale a dirisa Lefoko la gagwe. (Dia. 2:6) Gore re kgone go nna le botlhale joo, re tshwanetse go ithuta Baebele le dikgatiso tsa rona. Mme ga re a tshwanela go ithuta fela. Re tshwanetse go dira se Jehofa a batlang re se dira. Jakobe o ile a re: "Nyang badiri ba lefoko, mme e seng bautlwi fela." (Jak. 1:22) Fa re dirisa kgakololo ya ga Jehofa, re nna batho ba ba ratang kagiso, ba ba tekatekano le ba ba utlwelelang ba bangwe botlhoko. (Jak. 3:17) Dilo tseno di tla re thusa go itshokela diteko re itumetse. w21.02 29 ¶10-11

## Matlhatso, December 17

*Karolo nngwe le nngwe . . . e thusa mmele gore o gole.—Baef. 4:16.*

Batho ba bangwe mo phuthegong ba ka thusa moithuti wa Baebele gore a kgone go gatela pele a bo a kolobediwe. Mmoleledi mongwe le mongwe a ka kgona go thusa moithuti wa Baebele gore a nne Mosupi wa ga Jehofa. Mmulatsela mongwe a re: "Go na le seane sengwe se se reng, ngwana sejo o a tlhakanelwa. Ke akanya gore go ntse jalo le ka tiro ya go dira barutwa. Gantsi gore motho yo o ithutang Baebele a feleletse a kolobediwa, o a bo a thusitswe ke phuthego." Batsadi, ba losika, ditsala le barutabana ba ka thusa ngwana gore e nne motho yo o nang le maikarabelo. Ba ka mo thusa ka go mo kgothatsa le go mo ruta dithuto tsa botlhokwa mo botshelong. Ka tsela e e tshwanang, bakaulengwe le bo-kgaitsadi ba ka gakolola, ba kgothatsa le go tlhoma sekao se se molemo go thusa moithuti wa Baebele gore a dire diphetogo a bo a kolobediwe. (Dia. 15:22) Goreng mmoleledi a ka itumela fa bakaulengwe mo phuthegong ba thusa motho yo a ithutang Baebele le ene? Ka gone batho ba le bantsi ba ka thusa gore motho yo a ithutang le ene a gatele pele. w21.03 8 ¶1-3

## Sontaga, December 18

*Fa re bua polelo e e reng: "Ga re na boleo," re a itsietsa.—1 Joh. 1:8.*

Bakeresete ga ba a tshwanela go itira e kete ba direla Jehofa mme ka fa le tlhakoreng le lengwe ba bo ba dira dilo tse di sa mo itumediseng. Moaposetoloi Johane o ne a re ga re ka ke ra tsamaya mo boammaaruring mme re dira dilo tse di sa itumediseng Jehofa. (1 Joh. 1:6) Fa re batla gore Jehofa a re amogele, re tshwanetse go dira dilo jaaka e kete re bonwa ke batho botlhe. Le fa batho ba sa bone se re se dirang mo sephiring, Jehofa ene o bona sengwe le sengwe. (Baheb. 4:13) Ga re a tshwanela go leba boleo ka tsela e batho ba ba sa direleng Jehofa ba bo lebang ka yone. Mo motlheng wa ga Johane, batlhanogi ba ne ba re motho a ka dira boleo ka boomo a bo a tsewela e le tsala ya ga Jehofa. Le gompieno re tshele le batho ba ba akanyang jalo. Batho ba le bantsi ba re ba dumela mo Modimong, mme ga ba dumalane le tsela e Jehofa a lebang boleo ka yone, segolobogolo fa go buiwa ka tlhakanelodikobo. Dilo tse Jehofa a di tsayang di sa siama, jaaka go tlhakanela dikobo le motho yo o sa nyanalang le ene, bone ba re ke tshwetso e motho a itirelang yone. *w20.07 22 ¶7-8*

## Mantaga, December 19

*Lorato lwa lona lo tshwanetse go bonala ka se lo se dirang e bile lo tshwanetse go nna lwa boammaaruri.—1 Joh. 3:18.*

A le wena o bulela bokgaisadi fa go tlhokega? A re re go na le kgaisadi mongwe yo monna wa gagwe e seng Mosupi, o nna a tsena dipokano di setse di simologile e bile o tsamaya ka bonako fela fa dipokano di tswa. Batho bangwe kwa dipokanong ba lemoga seno e bile ba lemoga gore ga se gantsi a tla le bana ba gagwe. Ka jalo, ba mo tshwayatshwaya diphoso ba re ga a tse-

ye matsapa a go tla le bana ba gagwe. Mme gone, ga ba lemoge gore kgaisadi yono o dira sotlhe se a ka se kgonang. A ka se ka a kgona go ya dipokanong le bana monna wa gagwe a sa batle. Fa o akgola kgaisadi yoo o bo o bua ka dilo tse dintle tse a di dirang, o ka thusa ba bangwe gore ba tlogele go bua dilo tseo tse di sa siamang ka ene. Bagolwane ba a itse gore Jehofa o batla gore bokgaisadi ba tshwarwe sentle. (Jak. 1:27) Ba etsa Jesu ka go akanyetsa ba bangwe le go ba tshwara sentle. Ga ba gatelele gore dilo di dirwe ka tsela e e rileng fela. (Math. 15:22-28) Fa bagolwane ba thusa bokgaisadi ka dilo tse ba di tlhokang, bokgaisadi bano ba kgona go lemoga gore ba a ratiwa e bile ba botlhokwa mo phuthegong ya ga Jehofa. *w20.09 24-25 ¶17-19*

## Labobedi, December 20

*[Modimo] o itsisitse Kgosi Nebukadenesare se se tla diragalang.—Dan. 2:28.*

Moporofeti Daniele e ne e le motlhanaka yo o boikokobetso wa ga Jehofa mme ka metlha o ne a kopa thuso kwa go Ene. Ka sekai, fa Jehofa a ne a mo dirisa go tlhalosa toro ya ga Nebukadenesare, Daniele ga a ka a itlotlomatsa mme o ne a tlotlomatsa Jehofa. (Dan. 2:26-28) Re ithuta eng? Fa re neela dipuo tse di monate kwa dipokanong kgotsa re atlega mo bodireding, ga re a tshwanela go itlotlomatsa mme re tshwanetse go tlotlomatsa Jehofa. Re ne re ka se kgone go dira jalo fa Jehofa a sa re thusa. (Bafil. 4:13) Fa re dira jalo, re a bo re etsa sekao se se molemo sa ga Jesu. O ne a ikaega ka Jehofa. (Joh. 5:19, 30.) Ga ise a ko a leke go tsaya taolo ya ga Rraagwe. Bafilipi 2:6 ya re Jesu ga a ka a itsaya a "lekana le Modimo." Jesu e ne e le Morwa yo o ikokobeditse, a tlhaloganya gore o felela kae e bile a tlotla bolaodi jwa ga Rraagwe. *w20.08 11 ¶12-13*

## Laboraro, December 21

*Tabogang gore lo se gape.*

—1 Bakor. 9:24.

Batlhanka bangwe ba ga Jehofa ba lebane le mathata a batho ba bangwe ba sa kgoneng go a bona. Fa e le gore o a lwala mme o ikutlwa e kete batho ba bangwe ga ba go tseye sentle, o ka kgothadiwa ke sekao sa ga Mefiboshethe. (2 Sam. 4:4) O ne a golafetse, mme nako nngwe Kgosi Dafide ga a ka mo tshwara sentle. Le fa go ntse jalo, Mefiboshethe ga a ka a mo galefela, go na le moo, o ne a tswelela a lebogela dilo tsotlhe tse Dafide a neng a mo diretse tsone mo nakong e e fetileng. (2 Sam. 9:6-10) O ne a leka go bona gore tota ke eng se se neng se dira gore Dafide a se ka a mo tshwara sentle. Ga a ka a boloka sekgopi e bile ga a ka a pega Jehofa molato ka ntlha ya se se neng se mo diragalela. Go na le moo, o ne a tswelela a dira sotlhe se a ka se kgonang go tshegetsatsa Dafide ka gonne e le kgosi e e tlhomilweng ke Jehofa. (2 Sam. 16:1-4; 19:24-30) Jehofa o ile a dira gore pego ya ga Mefiboshethe e kwalwe mo Baebeleng gore e kgone go re tswela mosola.—Bar. 15:4. *w20.04* 26 ¶3; 30 ¶18-19

## Labone, December 22

*Re dira mmogo le Modimo.*

—1 Bakor. 3:9.

Gongwe mo phuthegong ya lona go na le barongwa, babulatsela ba ka metlha kgotsa babulatsela ba ba kgethegileng. Ba le bantsi ba tsenetse tirelo ya nako e e tletseng e bile ke sengwe se ba batlang go se dira botshelo jotlhe jwa bone. Le fa bakaulengwe le bokgaityadi bano ba se na madi a manntsi kgotsa dilo tse dintsi, Jehofa ga a ise a ko a ba latlhe. (Mar. 10:29, 30) Re rata bakaulengwe le bokgaityadi bano thata e bile re itumelela go bo re na le bone mo phuthegong! A bakaulengwe

ba ba tlhomilweng le ba mo tirelong ya nako e e tletseng, ke bone fela ba ba leng botlhokwa mo phuthegong ya ga Jehofa? Nnyaa! Mmoledi mongwe le mongwe o botlhokwa mo go Jehofa le mo phuthegong. (Bar. 10:15; 1 Bakor. 3:6-8) Tota e bile, tiro ya botlhokwa e rotlhe re tshwanetseng go e dira mo phuthegong ya ga Jehofa, ke go dira batho barutwa ba ga Jesu. (Math. 28:19, 20; 1 Tim. 2:4) Baboleledi botlhe mo phuthegong, ba ka tswa ba kolobeditswe kgotsa ba sa kolobediwa, ba tshwanetse go dira gore tiro eno e nne yone e e tlang pele mo botshelong jwa bone.—Math. 24:14. *w20.08* 21 ¶7-8

## Labotlhano, December 23

*Ke na le lona malatsi otlhe go fitlha kwa bokhutlong jwa lefatshe leno.—Math. 28:20.*

Mafoko a temana ya letsatsi ya gompiano a re bontsha gore Jesu o tla re thusa fa re na le mathata. Mafoko ao a ga Jesu a ka re kgothatsa. Goreng re rialo? Ka gonne ka dinako dingwe go ka nna thata gore re itshokele mathata a re lebanang le one. Ka sekai, fa mongwe yo re mo ratang a tlhokofala, go ka tsaya lobaka gore re gomotsege e bile gongwe go ka feta dingwaga re ntse re utlwile botlhoko. Ba bangwe ba ka tswa ba lwala thata ka ntlha ya botsofe. Ba bangwe bone ga ba kgone go itumelela botshelo ka gonne ba gateletse mo maikutlong. Le fa gone re lebane le mathata, re gomodiwa ke go itse gore Jesu o ile a re o tla nna le rona “malatsi otlhe,” tota le fa re lebane le maemo a a thata. (Math. 11:28-30) Baebile ya re Jehofa o dirisa baengele go re thusa. (Bah. 1:7, 14) Ka sekai, baengele ba a re thusa fa re ntse re rera “dikgang tse di molemo tsa bogosi” mo bathong ba ‘setšhaba sengwe le sengwe le lotso le teme.’—Math. 24:13, 14; Tshen. 14:6. *w20.11* 13-14 ¶6-7

## Matlhatso, December 24

*Dikakanyo tse di mo pelong ya motho di tshwana le metsi a a boteng, mme motho yo o nang le temogo o kgona go di gelela.—Diane 20:5.*

Re batla gore motho yo re ithutang le ene a itse gore dilo tse a ithutang tsone di tswa mo Baebeleng. (1 Bathes. 2:13) Re ka dira seo jang? Mo kgothaletse gore a tlhalose se a se ithutang. Ka sekai, fa lo sena go bala temana, go na le gore o e tlhalose, mo kope gore e nne ene a tlhalosang gore o ithuta eng mo temaneng eo. Mo thuse go bona gore se Baebele e se buang se mo ama jang. Mmotse dipotso tse di tla mo thusang gore a tlhalose gore o ikutlwa jang ka se Baebele e se buang. (Luke 10: 25-28) Ka sekai, mmotse go re: “Temana eno e go ruta eng ka Jehofa? Dilo tse o ithutileng tsone mo Baebeleng di ka go thusa jang? O ikutlwa jang ka se o se ithutang?” Selo sa botlhokwa ga se gore motho yo o ithutang le ene a itse dilo tse dintsi, go na le moo, sa botlhokwa ke gore a dirise se a se ithutileng. Dirisa Baebela fa o ruta mme fa o batla go tokafatsa tsela e o rutang ka yone, o tshwanetse go nna boikokobetso. *w20.10 15 ¶5-6*

## Sontaga, December 25

*Jala peo ya gago mo mosong mme o se ka wa letla seatla sa gago se ikhutsa go fitlha maitseboa.*

—Mor. 11:6.

Re a itse gore tiro ya go rera e tla fela ka nako e Jehofa a e tlhomileng. Akanya ka se se ileng sa direga ka motlha wa ga Noa. Jehofa o ne a bontsha gore ka metlha o dira dilo ka nako e a e tlhomileng. Dingwaga di le 120 pele ga Morwalela, Jehofa o ne a setse a tlhomile nako ya gore Morwalela oo o ne o tla tla leng. Dingwaga di le dintsi morago ga moo, o ne a laela Noa gore a age araka. Gongwe go ne ga feta dingwaga di le 40 kgotsa di le 50 Noa a aga araka e bile a tlhagisa batho. Le fa gone batho ba ne ba sa mo reetse, o ne a tswelela a rera go fitlha nako e Jehofa a neng a mo raya a re a tsene mo ara-

keng. Ka nako e e siameng, “Jehofa [o ne] a tswala kgoro.” (Gen. 6:3; 7:1, 2, 16) Go ise go ye kae, Jehofa o tla emisa tiro ya go rera. Go tswa foo, o tla senya lefatshe la ga Satane a bo a tliša lefatshe le lesa. Mme fa re ntse re letetse nako eo, a re tsweleng re etsa Noa le batlhanka ba bangwe ba ga Jehofa ba ba ileng ba se ka ba letla seatla sa bone se ikhutsa. A re tsweleng re tlhomile mogopolo mo tirong ya go rera re le pelotelele e bile re na le tumelo mo go Jehofa le mo ditsholofetsong tsa gagwe. *w20.09 13 ¶18-19*

## Mantaga, December 26

*A dilo tsoitlhe di dirwe sentle le ka thulaganyo.—1 Bakor. 14:40.*

Fa go ne go sa itsiwe gore ke mang yo o nang le taolo, batho ba ga Jehofa ba ne ba tšile go tlhakatlhakana e bile ba ne ba se kitla ba itumela. Ka sekai, go ne go se kitla go itsiwe gore ke mang yo o tshwanetseng go dira ditshwetso le gore ke mang yo o tshwanetseng go tlhomamisa gore ditshwetso tseo di a dirwa. Fa e le gore banna ke bone ba ba tshwanetseng go nna le taolo mo malapeng, goreng basadi bangwe ba ikutlwa e kete ba a gatelelwa? Ke ka gone banna ba bangwe ga ba ikobele melao ya ga Jehofa. Go na le moo, ba dira dilo go ya ka tsela e di dirwang ka yone mo lefelong le ba nnang mo go lone kgotsa go ya ka setso sa bone. Bangwe ba sotla basadi ba bone fela ka gone ba batla go ikutlwa e le banna tota. Ka sekai, monna a ka gatelela mosadi wa gagwe ka gone a batla go bontsha batho ba bangwe gore ene ga se monna yo o bokoa. A ka nna a akanya gore a ka se pateletse mosadi wa gagwe gore a mo rate mme gone a ka kgona go dira gore a mo tshabe. Mme fa mosadi wa gagwe a mo tshaba, seo se ka dira gore a kgone go mo laola. Banna ba ba akanyang jalo le ba ba dirang dilo jalo ba phoso. Ga ba tlotle basadi ka tsela e ba tshwanetseng go ba tlotla ka yone. E bile ba dira se se farologaneng le se Jehofa a batlang ba se dira.—Baef. 5:25, 28. *w21.02 3 ¶6-7*



## Labobedi, December 27

*Latlhelang dithobaelo tsotlhe tsa lona mo go ene, ka gonne o a lo kgathalela.—1 Pet. 5:7.*

Fa o tshwenyegile ka sengwe, kopa Jehofa gore a go thuse. Jehofa a ka araba dithapelo tsa gago ka go go naya “kagiso ya Modimo e e gaisang kakanyo yotlhe” ya batho. (Bafil. 4:6, 7) Jehofa o tla re naya kagiso a dirisa moya wa gagwe o o boitshepo. (Bagal. 5:22) Fa o rapela Jehofa, mmolelele sengwe le sengwe se se go tshwenyang. O se ka wa potapota. Mmolelele gore bothata jwa gago ke eng, o bo o mo tlhalosetsa gore o ikutlwa jang. Fa bothata jwa gago bo na le tharabololo, mo kope gore a go neye bothale jwa gore o ka dira eng le maatla a go bo dirisa. Mme fa bo se na tharabololo, mo kope gore a go thuse gore o se ka wa tlhobaela thata. Fa o sa potapote fa o rapela mme o bolelela Jehofa ka thamalalo gore bothata jwa gago ke eng, o tla kgona go lemo-ga fa Jehofa a araba dithapelo tsa gago. Fa Jehofa a sa arabe dithapelo tsa gago ka yone nako eo, o se ka tlogela go rape-la. Jehofa o batla gore o se ka wa potapota fa o mmolelela mathata a gago, gape o batla gore o se ka wa kgaotsa go mo rape-la.—Luke 11:8-10. *w21.01* 3 ¶6-7

## Laboraro, December 28

*[Jesu] o ne a ba raya a re: “Ga se batho botlhe ba ba kgonang go tshela ka tsela eno, mme ke fela ba ba nang le mpho eo.”—Math. 19:11.*

Mo phuthegong go na le malapa, e ka tswa e le a a nang le bana kgotsa a a se nang bana. Gape go na le bakaulengwe ba ba sa nyalang le bokgaisadi ba ba sa nyalwang. Re tshwanetse go tsaya jang batho ba ba sa nyalang? Jesu ene o ne a ba tsaya jang? Jesu o ne a sa nyala. O ne a dirisa nako yotlhe ya gagwe mo kabe-long e a neng a e neilwe. Ga a ise a ko a re Bakeresete ba tshwanetse go nyala kgotsa go sa nyale. Mme gone, o ne a re

Bakeresete bangwe ba ka nna ba tlhoph-a go sa nyale. (Math. 19:12) Jesu o ne a tlotla batho ba ba neng ba sa nyala. O ne a sa tseele batho ba ba nyetseng kwa godimo a bo a tseela ba ba sa nyalang kwa tlase kgotsa a akanya gore ba tlhae-la sengwe ka gonne ba sa nyala. Moapo-setoloi Paulo le ene o ne a sa nyala fa a ne a dira tiro ya gagwe ya go rera. Ga a ise a ko a re Bakeresete ga ba tshwane-la go nyala. O ne a tlhaloganya gore mongwe le mongwe o tshwanetse go itirela tshwetso mo kgannyeng eno. *w20.08* 28 ¶7-8

## Labone, December 29

*Modimo ke lorato.—1 Joh. 4:16.*

Moapostoloi Johane o ile a tshela dingwaga di le dintsi e bile o ile a diragalelwa ke dilo di le dintsi tse di kga-tlang. O ile a lebana le dikgwetlho tse di neng di ka koafatsa tumelo ya gagwe. Mme gone, o ile a dira sotlhe se a ka se kgonang gore a ikobebe ditaello tsa ga Jesu, go akaretsa taelo ya go rata bakaulengwe le bokgaisadi. Ka ntilha ya seo, Johane o ne a tlhomamisegile gore Jehofa le Jesu ba a mo rata le gore ba tla mo naya maatla a go itshokela ditoko tsotlhe. (Joh. 14:15-17; 15:10) Satane le batho ba lefatshe la gagwe ba ne ba ka se kgone go dira gore Johane a palelwe ke go bontsha bakaulengwe le bokgaisadi ba gagwe gore o a ba rata. Fela jaaka Johane, le rona re tshela mo lefats-heng le le busiwang ke Satane e bile o tlhoile batho botlhe. (1 Joh. 3:1, 10) O batla go dira gore re tlogele go rata bakaulengwe le bokgaisadi. Mme fa re sa mo letle, ga a kitla a kgona go dira jalo. Re ikemiseditse go dira sotlhe se re ka se kgonang go rata bakaulengwe le go ba bontsha gore re a ba rata ka dilo tse re di buang le tse re di dirang. Fa re rata bakaulengwe le bokgaisadi re tla itumelela go nna karolo ya lelapa la ga Jehofa e bile re tla itumelela botshelo. —1 Joh. 4:7. *w21.01* 13 ¶18-19

## Labotlhano, December 30

*Modimo . . . o [naya] batho  
boitshoko.—Bar. 15:5.*

Go ka nna thata go itumelela botshelo mo lefatsheng leno le le laolwang ke Sataane mme ka dinako dingwe mathata a botshelo a ka dira gore go nne thata le go feta. (2 Tim. 3:1) Mme gone, ga re a tshwanela go tshoga kgotsa go tlhobaela. Jehofa o itse mathata a re kopanang le one. O re solofetsa gore fa re tlhoka thuso o tla re ngangatelela ka seatla sa gagwe sa moja. (Isa. 41:10, 13) Re a itse gore Jehofa o tlile go re thusa. Gape re a itse gore Baebele e ka re thusa go nna le maatla a re a tlhokang gore re kgone go itshokela mathata ape fela. Ditolhogo tsa “Etsa Tumelo ya Bone” mmogo le dibidio le diterama tsa Baebele, di ka dira gore dipego tsa batho ba go buiwang ka bone mo Baebeleng di go ame pelo. Pele o lebelela, o reetsa kgotsa o bala dipego tseno, kopa Jehofa gore a go thuse go bona dintlha tsa botlhokwa tse o ka di dirisang. Leka go ipona ka leitlho la mogopolo o le motho yo o balang ka ene. Aka nyetsa kwa teng ka se batlhanka bano ba ga Jehofa ba ileng ba se dira le gore o ile a ba thusa jang go fenya mathata a bone. Go tswa foo, dirisa se o ithutileng sone. Lebogela thuso e Jehofa a go naya yone gone jaanong. Mme bontsha gore o lebogela se a go direlang sone ka go batla ditshono tsa go kgothatsa le go thusa ba bangwe. *w21.03 19 ¶22-23*

## Matlhatso, December 31

*Bana ke boswa jo bo tswang  
kwa go Jehofa.  
—Pes. 127:3.*

Fa e le gore o mo lenyalong mme wena le molekane wa gago lo batla go nna le bana, ipotseng go re: ‘A re batho ba ba boikokobetso, ba ba ratang Jehofa le Lefoko la gagwe? A Jehofa a ka re tlhophapha gore re tlhokomele ngwana yo a sa kgoneng go itirela sepe?’ (Pes. 127:4) Fa e le gore o setse o na le bana, ipotse go re: ‘A ke ruta bongwanake gore go dira ka natla go botlhokwa?’ (Mor. 3:12, 13) ‘A ke dira sotlhe se nka se kgonang go ba sireletsa mo dilong tse di bosula?’ (Dia. 22:3) Gone ke boammaaruri gore o ka se kgone go sireletsa bana ba gago mo go sengwe le sengwe. Mme gone, o ka ba thusa go ipaakanyetsa mathata a botshelo ka go ba ruta gore ba ka dirisa jang kgakololo e e mo Baebeleng. (Dia. 2:1-6) Ka sekai, fa mongwe wa losika a tlogela go direla Jehofa, dirisa Baebele go thusa bana ba gago go tlhaloganya gore ke eng fa re tshwanetse go ikanyega mo go Jehofa. (Pes. 31:23) Kgotsa fa mongwe yo lo mo ratang a tlhokafala, balela bana ba gago ditemana tse di tla ba gomotsang le tse di tla ba kgothatsang.—2 Bakor. 1: 3, 4; 2 Tim. 3:16. *w20.10 27 ¶17*